



Sup. Tab. 1. 55.

220112





PRÆFATIO



A D

LECTOREM.



UI tibi, AMICE
L E C T O R,
paucis ab hinc an-
nis tradidit selec-
tas ex universa
philosophia Quæstiones; ecce
etiam alias ex nonnullis Sa-
cræ Theologiæ partibus Se-
lectas Quæstiones offert, plu-
res ex reliquis partibus obla-
tus, nisi mors parantem

P R Æ F A T I O.

extinxisset. Queruntur plerique Nostratum, nec immeritò, Theologorum Scholasticorum aut infinitam in quæstionibus explicandis prolixitatem, aut inextricabilem in contrahendis obscuritatem: eadem ne tu querereris, fecit Author, dum minùs utiles refecuit Quæstiones, ut brevis esset; & utilibus nihil subtraxit, ne esset obscurus: brevitatis tamen & claritatis sic amicus, ut cum utraque conciliet soliditatem, tantam quantam vix reperias in aliorum aut prolixitate luxuriantem, aut brevitate latitantem. In definiendis Quæstionibus nihil erit novi: Quis enim sapiens novitatem secte-

P R Æ F A T I O.

tur in Theologicis , in quibus vix securum est quidquid novitatem sapit ? sed pleraque passim aut novis rationibus stabilita & propugnata , aut nova luce conspersa. Vix usquam alibi Deus , quantus quantus est , se se oculis humanis obijcit tam blandè conspiciendum ; & quidquid est in entibus supernaturale vix alibi sese tam facile accommodat naturali rationi ; enim verò , etsi secretorum naturæ ad supernaturalia nulla sit ratio , qui tamen in Philosophicis potuit naturæ secreta rimari , is utprimùm fide se manu duci patitur , in abdita supernaturalium non adeo difficilem nanciscitur aditum aliisque pandit. Utinam rese-

P R Æ F A T I O.

ret tibi , A M I C E L E C-
T O R , ut qui dum vixit , non
tam sibi quàm aliis laboravit , la-
borum fructum colligat post
mortem in profectu tuo. Vale.



FACULTAS

R. P.

PROVINCIALIS.


EGO infra-scriptus Præpositus Provincialis in Provinciæ Campaniæ, Societatis JESU, potestate ad hoc mihi facta ab admodum Reverendo Patre nostro Generali PAULO JOANNE OLIVA, & juxta Privilegium eidem Societati concessum à Regibus Christianissimis Henrico III. 10. Maii 1583. Henrico IV. 20. Decembris 1606. Ludovico XIII. 14. Februarii 1611. & Ludovico XIV. nunc regnante 23. Decembris 1650. quo omnibus Regni sui Typographis prohibent, ne libros ab ejusdem Societatis hominibus conscriptos absque Superiorum ejus permissu imprimant; Permitto ut Liber cui titulus est, SELECTÆ QUÆSTIONES THEOLOGICÆ, à P. JOANNE GUILLEMINOT, Societatis JESU Sacerdote, & Doctore Theologo compositus, & à tribus designatis ex eadem Societate viris

lectus & probatus , typis excudatur ,
& quidem à Joanne Ressayre. In quo-
rum fidem has Litteras manu nostra
subscriptas , & sigillo nostro munitas
dedimus. Divione 24. Augusti 1681.

CAROL. FR. DE HARAUCOURT.



INDEX



INDEX

QUÆSTIONUM ET SECTIONUM.

TOMI PRIMI.

QUÆSTIO PRIMA.

*De Existentia Dei, & resolutione fidei, etiam
circa illam existentiam.*

Seçtio I. **E**Xistentia Dei demonstratur ex im-
plicantia quæ est in impossibili-
tate entis summè perfecti. pag. 3

Seç. II. Demonstratur existentia Dei ex depen-
dentia rerum quæ non potuerunt existere abs-
que eo quòd à principio extrinseco produce-
rentur. 10

Seç. III. Demonstratur existentia Dei ex impos-
sibilitate succedentium sibi generationum,
quarum origo non sit à causa illis omnibus
extrinseca. 21

Seç. IV. Demonstratur Existentia Dei ex ordine
universi. 37

Seç. V. Existentia Dei ex evidenter credibili ipsius
Dei revelatione certissimè constat, debetque
ex hoc motivo firmiùs, quàm ex omni scien-
tifico judicari. 40

QUÆSTIO SECUNDA.

De Essentia Dei.

Seç. I. **I**N quo consistat Essentia Dei. 54

Seç. II. **S**olvuntur contrariarum sententiarum
rationes. 63

QUÆSTIO TERTIA.

De Attributis Dei.

- Señ. I.* **Q**uid sit divinum Attributum, & quotuplex. 73
- Señ. II.* An detur inter attributa, & quævis prædicata divina, distinctio ex natura rei 76
- Señ. III.* An detur inter Dei prædicata distinctio virtualis. 88
- Señ. IV.* Solvuntur argumenta quibus astringitur distinctio formalis ex natura rei, inter Dei prædicata. 95
- Señ. V.* Solvitur alia difficultas. 111
- Señ. VI.* Refertur ac refellitur multorum recentiorum doctrina circa virtualem in Deo distinctionem. 118
- Señ. VII.* Qualiter detur in nostro intellectu præcisio unius prædicati divini ab alio, 126
- Señ. VIII.* An Attributa Dei includantur in essentia ejus. 132
- Señ. IX.* An Attributa includant essentiam. 138
- Señ. X.* An Attributa Dei alia in aliis includantur. 143

QUÆSTIO QUARTA.

De Visione Dei.

- Señ. I.* **A**N Deus sit naturaliter invisibilis omni intellectui creabili. 149
- Señ. II.* Solvuntur objectiones. 154
- Señ. III.* An Deus supernaturaliter videri possit ab intellectu creato. 174
- Señ. IV.* An possibilitas visionis Dei sola ratione probari possit. 179
- Señ. V.* An intellectus creatus possit videre Deum sine lumine gloriæ. 194
- Señ. VI.* An ad visionem Dei sit necessaria species impressa, & an de facto detur in beatis. 197
- Señ. VII.* Solvuntur objectiones. 200
- Señ. VIII.* An possit dari species impressa qua videatur Deus, ut in se est. 206

Señ. I X. Solvuntur objectiones.

210

QUÆSTIO QUINTA.

De Scientia Dei.

Señ. I. **A**N sit in Deo scientia. 224

Señ. II. **Q**uodnam sit objectum formale
Scientiæ Divinæ. 227

Señ. III. Solvuntur objectiones. 233

Señ. IV. An Deus cognoscat futura contingen-
tia. 242

Señ. V. An Deus cognoscat contingentia condi-
tionata. 246

Señ. VI. Solvuntur objectiones. 265

Señ. VII. An Deus futura contingentia cognos-
cat ratione præsentis ad æternitatem. 288

Señ. VIII. Solvuntur objectiones. 301

QUÆSTIO SEXTA.

De Voluntate Dei.

Señ. I. **Q**uid Deus necessario amet. 306

Señ. II. **A**n sit in Deo libertas. 315

Señ. III. **Q**uid actus Dei liber superaddat enti-
tati actus necessariis. 318

Señ. IV. An id quod actus Dei liber superaddit
entitati actus necessariis habeat rationem per-
fectionis realis Deo intrinsecæ. 223

Señ. V. Refelluntur oppositæ sententiæ. 329

Señ. VI. Solvuntur objectiones contra termina-
tionem ad extrinsecum in actu Dei libero in-
clusam, ejusque differentialiter, & ultimò
constitutivam. 338

Señ. VII. Solvuntur aliæ objectiones contra in-
clusam in decreto Dei libero formaliter sump-
to, aliquam perfectionis realis intrinsecæ
rationem. 347

Señ. VIII. An sit in Deo amor amicitis erga
homines. 358

Señ. IX. An dentur in Deo decreta conditiona-
lia. 366

Señ. X. An dentur in Deo decreta disjunctiva, &

I. Partis.

an tale sit illud, ex quo cum causa libera concurrat ad actus ejus. 370

Señ. XI. Examinantur sententiæ prædictis contrariæ. 391

QUÆSTIO SEPTIMA.

De Prædestinatione.

Señ. I. **A**N prædestinatio sit prior prævisione meritorum, an posterior. 409

Señ. II. Solvuntur objectiones. 432

QUÆSTIO OCTAVA.

De Existentiâ Trinitatis.

Señ. I. **Q**UOMODO constet Existentiâ Trinitatis. 450

Señ. II. An ratione naturali possit ostendi existentia Trinitatis. 452

Señ. III. Solvuntur objectiones. 462

QUÆSTIO NONA.

De Processionibus Divinis

Señ. I. **A**N dentur Processiones in deo. 474

Señ. II. An processioness divinæ fiant per intellectum & voluntatem. 478

Señ. III. Quomodo intellectus & voluntas conferunt ad processioness divinas. 486

Señ. IV. An & quomodo in processionibus divinis personalitas produciens habeat rationem principii. 492

Señ. V. Solvuntur objectiones. 501

Señ. VI. Ex quorum cognitione Verbum procedat. 511

Señ. VII. Cur processio Filii sit generatio, non autem Spiritus sancti. 521

Señ. VIII. Solvuntur objectiones. 527

Señ. IX. Expenduntur duæ sententiæ contrariæ. 531



SELECTÆ



SELECTÆ
 QUÆSTIONES
 THEOLOGICÆ.
 PRIMA PARS.
 DE ENTE INCREATO.

QUÆSTIO PRIMA.

*De Existentia Dei & resolutione fidei,
 etiam circa illam existentiam.*



UM Metaphysica, quæ est
 Theologia naturalis, &
 Theologia Christiana in
 eo conveniant, quod Dei
 existentiam demonstrent,
 plurimum tamen quo-ad
 scopum, & modum suarum demonstratio-
 num differunt. Nam Metaphysica Deum
 ut primum, & necessarium ens considerat,
 & ejus existentiam ostendit dignam eo

A



assensu quem dant scientiæ suis conclusio-
nibus , per media certa , & evidentia de-
monstratis. Theologia verò Christiana
Deum spectat etiam ut supernaturalium
rerum-auctorem , idque consequenter ad
propositionem fidei , & ad ea omnia qui-
bus Deus suam revelationem evidenter
credibilem reddidit : Unde melius ipse ,
quàm ex omnibus naturalibus effectibus
cognoscibilis est. Utroque modo hic sta-
bilienda est Dei existentia. Primò, quidem
per demonstrationes naturales , quas sibi
ad suum finem Theologia subordinat , si-
quidem ipsa Deum per omnia quæ in hoc
præsenti statu , ad ejus notitiam juvant ,
attingere nititur. Secundò , per eviden-
ter credibilem revelationem Dei , loquen-
tis scilicet per effectus qui vires naturæ
superant, nec nisi ab ipso esse possunt : &
suam item revelationem infalsificabilibus,
& ipsi soli possibilibus signis attestantis.
Atque hinc maximè Theologia ad cog-
noscenda divina , ipsamque Dei existen-
tiam pervenit, idque cum certitudine mul-
tò majori , quàm sit ea quæ est scientia-
rum propria : siquidem stante & incon-
cussa divini testimonii evidenti credibili-
tate , quidquid in oppositum occurrit , etsi
in speciem scientificum ; fallax tamen , &
à veritate devium esse necesse est. Atque
ex hoc potissimo modo astruendi existen-

tiam Dei dignoscetur in quid debeat resolvi fides nostra, etiam circa illam existentiam, in ipsam scilicet revelationem, in qua, & ex qua per se cognoscibili, & evidenter credibili, Deus ipse sit, etiam primò, ab eo qui ipsum antea ignorasset, cognoscibilis.

SECTIO PRIMA.

*Existentia Dei demonstratur ex implicantiâ
quæ est in impossibilitate entis summè
perfecti.*

1. **H**Æc demonstratio est veluti à priori, in quantum ex ratione summi boni, & perfectionis infinitæ, quæ in notione Dei includitur, infertur tale, tamque perfectum bonum necessario existere. Quod ut pateat, duo sunt ponenda principia. Primum est, id quod verè meretur nomen boni, & perfectionis, non posse esse impossibile. Ratio est quia nomen boni, & perfectionis, dicit aliquam rationem entis: De essentia autem entis est possibilitas ipsius, per quam à chymæris distinguitur. Itaque quidquid meretur nomen boni, & perfectionis, non potest esse impossibile. Quod si aliqua vera perfectio impossibilis esset, ipsa esset perfectio, & non esset, esset quidem, quia talis supponitur: non

esset autem, quia quod neque habet, neque habere potest existentiam, est merum nihil. Secundum principium est, id quod opponitur defectui formaliter sumpto, & secundum quod defectus est, includere aliquam perfectionem. Sic, quia gradus entium viventium opponitur generi substantiæ imperfectiori, nempe ei quod substantias inanimatas continet, vita est necessario perfectio substantiæ. Idemque est de gradu entis intellectualis, & aliis differentiis, aut attributis, quæ tollunt aliquam carentiam perfectionis. Hoc ipso quod tales differentiæ, aut attributa tollunt se ipsis id quod in oppositis facit ut ipsa minus excellentia sint; habent majorem excellentiæ gradum; & illa ipsa excellentia, siue formaliter, siue radicaliter sumpta, est talis gradus constitutiva, & distinctiva. His positis.

[2. Dico, in tota multitudine entium, esse necessario aliquod ens summè perfectum, omnipotens, quod omnia perfectissimè uno actu noverit, quod sine peccabilitate sit liberum, & summè sanctum, & in omnibus attributis infinitum, immensum, æternum immutabile, ac completè beatum. Ratio est, quia alioqui multæ veræ perfectiones essent absolutè impossibiles; quod est contra primum ex positis principiis. Sequela probatur, quia primò

QUÆST. I. *De Existentia Dei.* 5

negari non potest quin potentia quæ se extendat ad omnia quæ non implicant contradictionem; scientia quæ adæquet omnia intelligibilia; libertas circa bona non necessaria cum impeccabilitate conjuncta, immensitas, æternitas, immutabilitas, completa ex omni parte beatitudo, sint verissimæ perfectiones, quod cum per se pateat, confirmatur ex secundo principio, quia quod opponitur istis attributis, ac prædicatis, necessario est imperfectum, & dicit saltem defectus negativos, ut impotentiam, ignorantiam, peccabilitatem, & quo-ad prædicata omnia limitationem. Si ergo quod per se excludit aliquem defectum, & formaliter est illi contrarium, necessario est vera perfectio, manifestum est omnia illa prædicta esse verissimè & formalissimè perfectiones: Aliunde verò est etiam manifestum, omnes illas perfectiones absolute fore impossibiles, si non actu existerent. Nam quod nec habet existentiam, nec causam sui productivam, est omnino impossibile: Si autem non existerent illæ perfectiones, carerent quoque causa sui productiva, quia nihil esset in cujus virtute containerentur, si quidem sola essent entia in omni perfectionis genere limitata, quæ proinde nihil possent producere nisi finitum. Itaque in tali hypothefi, omnes

illæ perfectiones essent impossibiles. Cùm ergo vera perfectio non possit esse impossibilis, oportet illas necessariò existere actu, & cum summa, & simplicissima unitate, quia alioquin unitas illa, cujus defectus est imperfectio infinita, esset perfectio impossibilis. Sic evidens est dari ens in quo omnes illæ perfectiones sint unum quid: Et tale ens Dei nomine significamus. Certè nihil tam esset impossibile, quàm Deus, si actu non existeret, itaque optimum maximè implicaret. Maximè autem è contra implicat, id quod est formalissimè optimum; contradictionem in se involvere, & maximè esse impossibile; quia si impossibilitatem tollit ratio entis, maximè eam debet excludere ratio optimi, & perfectissimi entis.

3. Dices primò, In hoc discursu supponitur id quod est probandum, nempe dari ens infinitè perfectum.

Respondeo nullo modo supponi existentiam talis entis, sed ex notione ejus objectiva inferri existentiam ejus. In quo est legitima ratiocinatio. Nam ex notione alicujus potest inferri aliquid circa existentiam ejus. Ex notione chymæræ potest inferri non existentia, & impossibilitas ejus. Ex notione entis finiti potest inferri contingentia ejus, seu indifferentia ad esse aut non esse. Consimiliter ergo, quo-ad-

QUÆST. I. *De Existentia Dei.* 7

ipsum inferendi modum, ex notione entis infiniti, & summè perfecti, quod si non existeret, esset impossibile, potest inferri necessitas absoluta existentiae ejus. Unum semper illorum trium inferibile est ex notione, seu conceptu objectivo cujusvis rei, nempe vel necessitas existendi, quæ prima est, in ente infinito, & summè perfecto: vel contingentia, quæ illis convenit quorum possibilitas in illius primæ potestate fundatur, & existentia ab ejus libertate dependet: vel impossibilitas, quæ est eorum ad quæ propter implicantiam quam includunt, non datur potestas, quæ omnino esset ad non-ens, unde non esset potestas.

4. Dices secundò, Ex prædicto discursu sequitur dari posse compositum ex humana natura & Angelica. Consequens est falsum: Ergo discursus ille, cum nimis probet, nihil probat. Major probatur, quia tale compositum majorem perfectionem dicit, quàm homo & Angelus simul sumpti, at divisi, nec componentes unum, in quo utriusque sit juncta substantialiter essentia. Cum ergo nulla perfectio debeat esse impossibilis, sequetur tale compositum esse possibile. Respondeo sequi tantum quodd possibile sit compositum vel formale, quod naturas illas cum sua distinctione, & limitatione contineat, solam

illis addendo unionem : vel eminentiale , in quo illius utriusque naturæ perfectio æquivalenter , & sine defectu distinctionis , & limitationis , imò cum infinito excessu in illa ipsa perfectione , ab omni defectu abstracta , ac proinde sine compositione formali , reperiatur : & tale compositum est Deus , cum summa perfectionis eminentia continens omnia quæ sunt in finitis entibus , ita ut omnia in eo sint simul unum , & optimum. Quod autem nihil ultra ex prædicto discursu sequatur ; probatur , quia argumentum tantum infert possibilitatem perfectionis quæ est in prædicta unione , & illa in composito eminentiali perfectissimè , & necessariò reperitur. Ad valorem autem argumenti , requireretur ut perfectio quæ concipitur resultans ex tali unione , non esset possibilis nisi in composito formali constante ex utraque illa natura : quod est falsum , propter entis infinitè perfecti , & simul summè simplicis , non modò possibilitatem , sed necessitatem ex natura rei absolutam. Ratio porrò cur non possit dari talis ex utraque illa natura compositio , neque ex aliis similiter unionis incapacibus , est quia proprium est rerum in se limitatarum , habere disconvenientias , & contrarietates , & impossibilitates cum aliis : quod totum facit perfectionum diversitas

QUÆST. I. *De Existentia Dei.* 9

cum limitatione, & sic una excludit aliam, cum è contra respectu infiniti, omnia etiam finita, non quidem prout finita, sed prout aliquam perfectionem dicunt, convenientiam habeant. Unde in illo quidem reperitur illorum perfectio, sed sine imperfectione, & repugnantia, aut impossibilitate, quia infinitas perfectionis, cum omnem defectum excludat, consequenter, & maximè excludit impossibilitatem bonitatum, & perfectionum; quæ impossibilitas esset maximus defectus, tollens rationem infinitæ bonitatis. Et sic cum in Deo sint omnia quæ in creatis sunt contraria, nulla in eo contraria sunt, quia in simplicitate infinitæ perfectionis, ita nulla deest perfectio, ut nulla sit perfectionum oppositio, quia nec distinctio.

5. Aliter potest formari ex eodem medio, seu ex ratione optimi entis, argumentum, idem concludens, hoc modo. Datur ens infinitè in omni genere perfectum. Hoc est quod Deum dicimus. Ergo datur Deus. Major probatur, quia id cujus existentia non implicat, implicaret autem, si illud actu non existeret, necessariò est. Sed ens infinitè in omni genere perfectum, ejusmodi est, ut ejus existentia nullam contineat implicantiam. Illud autem idem implicaret existere, si de facto non exi-



steret. Ergo tale ens necessariò est. Major est clara ex terminis. Minor quo-ad primam partem probatur, quia infinitas perfectionis omnem defectum excludit. Implicare autem est maximus defectus; siquidem est impossibilitas habendi verum esse. Ergo infinitas in omni perfectionis genere maximè excludit implicantiam sui. Quoad secundam partem probatur, quia si tale ens non existeret, non existerent nisi entia finita; Itaque nihil esset quod posset ipsum producere. Quoad autem neque est, neque habet causam sui, à qua produci possit, impossibile est. Sic existentia summi, & infiniti entis, non quidem ex ipsa præsupposita, sed ex notione talis entis (quod plane aliud est) probatur, & per principia certa ex natura rei petita infertur.

SECTIO SECUNDA.

Demonstratur existentia Dei ex dependentia rerum quæ non potuerunt existere absque eo quòd à principio extrinseco producerentur.

1. **H**Æc demonstratio sic procedit. Evidens est, si datur ens quod cum ipsum sit à se, & subsistat necessitate naturæ suæ, sitque causa efficiens omnium

QUÆST. I. *De Existentia Dei.* 11

quæ sunt extra ipsum, nempe & cæli, & terræ, & aliorum elementorum, & omnium quæ hoc mundo continentur, eaque ex nihilo extraxerit, illud mereri, & cultum quem Deo deferimus, & nomen Dei in eo sensu quem intelligimus: idque non negant Athei, posito illo antecedente, quod non admittunt. Tale autem ens, seu principium omnium quæ videmus, ipsiusque materiæ primæ, dari probatur, positis duobus. Primum est, mundum non potuisse se ipsum producere. Secundum, non potuisse existere absque eo quod produceretur. Quoad primam veritatem, clarum est nihil posse esse causam sui, quia necessarium esset, illud quod se produceret, esse antequam esset: quia ut aliquid agat, debet existere; ut autem primò producat, debet ante productionem non esse.

2. Quod spectat ad secundam veritatem, ea sic probatur. Si ratio formalis propter quam res quæ quotidie incipiunt esse, non potuerunt pervenire ad illud esse, nisi per actionem suæ causæ, cadit quoque in illas omnes primarias mundi hujus corporei partes, sequitur illas quoque non potuisse existere absque eo quod producerentur. Ratio enim formalis, si vera est, habet necessariam connexionem cum suo effectu, & necessariò, atque universaliter ipsum infert.

3. Dico autem illam rationem ipsis quoque primariis mundi partibus, & materiæ primæ convenire. Nam ratio illa ob quam res quæ de novo incipiunt esse, non potuerunt habere illud esse, nisi per dependentiam à sua causa, est quia existentia non est illis essentialis, neque convenit illis ex propria conditione suæ naturæ. Nihil autem potest nisi aliunde habere quod non habet ex se. Et nihil habet ex se id quod neque est illi essentialis, neque ex ipsius essentia sequitur. Unde ad hoc ut illud habeat, necessariò debet à principio extrinseco illud accipere. Hæc est vera causa illius necessitatis: & impossibile est aliam talis indigentia causam assignare. Nam si quæram, quare homo, verbi gratiâ, qui, ut esset, generari debuit, non potuit esse nisi dependenter à causa producente, certum est rationem formalem proximam non esse quia est homo; quia, si ita esset, soli homines, ut essent, produci deberent: sicut quia ratio formalis cur homo sit risibilis, est quia est rationalis, quod ipsi soli convenit; ideo soli homines sunt risibiles. Falsum autem est solos homines, ut sint, debere produci; Ergo falsum est rationem formalem proximam, cur produci debeant, ut existant, esse quia sunt homines. Sed neque causa illius necessitatis, & indigen-

tia est quia ille homo qui nascitur, est sensitivus, aut vivens, quia sola sensitiva, aut viventia ad existendum indigerent productione sui; quod est falsum, cum multa inanimata, ut metalla, per sui productionem acquirant esse. Neque etiam causa illa est ratio substantiæ, sive corporeæ, sive mixtæ ex corpore & spiritu, cum etiam accidentia indigeant causa efficiente, ut sint. Ac denique non potest illa necessitas peti ex ratione entis præcisè, quia præterquam quod secundum istam responsionem fatendum esset cœlum & terram, & materiam primam, cum habeant etiam rationem entis, fuisse creata; quod nos intendimus, & Athei nolunt: dicendum præterea esset, ens adæquatè sumptum, seu id totum quod est, extra nihilum, fuisse productum; quod implicat; quia ad hoc necesse esset aliquod ens præcessisse ante omne quod habet rationem entis, & fuisse antequam haberet esse, ut esset causa talis esse; in quo est contradictio. Quare indigentia causæ efficientis ad habendam existentiam, non est attributum entis per se spectati, nec potest assignari aliud cuius illa sit proprietas, nisi id quod dixi, nempe ens quod non continet in sua essentia necessitatem existentia suæ. Hæc autem ratio planè est sufficiens, & formalis, quia quod alicui enti

non convenit ex essentia, & necessitate naturæ, non potest ei convenire nisi per aliquam actionem, qua hoc ei, aut acquiratur, aut communicetur; Et aliunde nihil potest esse principium actionis per quam ipsius existentia producat; quia sic deberet agere antequam existeret; quod est impossibile; Itaque planè necesse est ut quod non habet esse actuale ex propria conditione suæ essentiæ, aut intra statum nihili remaneat, aut illud esse à principio extrinseco accipiat.

4. Jam verò rebus illis omnibus ex quibus constat mundus, non convenit esse ex propria conditione essentiæ. Quod probatur primò ex communi sensu Philosophorum qui docent essentias rerum naturalium nihil dicere nisi esse possibile, quod spectant scientiæ, abstrahentes ab existentia talium rerum, eo quod cum objectum scientiarum debeat esse aliquid necessarium, existentia illa sit contingens, & solum illud esse possibile sit secundum suam possibilitatem necessarium.

5. Probatur secundò rationibus, quarum prima est, quia nobilissimus essendi modus, opposita sibi differentia absque proportionem melior, non potest rebus imperfectissimis ex natura rei convenire. Atqui esse non ab alio, est modus essendi

QUÆST. I. *De existentia Dei.* 15

omnium cogitabilium optimus, & absque
proportionem melior opposita sibi differen-
tia, seu modo existendi per differentiam
constitutivam entis potentialis, quod sit
capax non existentiae, & de se indigum
causae, ac proinde & seipso privabile, &
nihil habens cujus principium non sit in
alio, unde emanare debet. Ergo modus
ille existendi non ab alio, seu aseïtas, non
potest rebus imperfectissimis, cujusmodi
sunt cælum, sidera, elementa, & materia
prima, convenire. Quod si rebus illis
corporeis, inanimatis, ac de se infimis,
comparatè etiam ad ens finitum, quod est
homo, conveniret aseïtas, ipsa esset il-
larum essentialis differentia, & non esset.
Esset quidem, quia ex omnibus identifica-
tis quæ per se rei insunt, id quo nihil
est melius in illa re, quodque secundum
nostros conceptus, omnium secum con-
vertitulum prædicatorum principium est,
est differentia constitutiva rei, quo modo
rationale est differentia hominis, quia
cum sit melius merâ ratione corporis,
mixti, vegetativi & sensitivi, est princi-
pium discursivi, admirativi, risivi, &
aliorum propriorum hominis prædicato-
rum. Atqui prædicatorum omnium quæ
rebus illis insunt, omnium sine com-
paratione præstantissimum esset aseïtas,
quæ secundum nostros conceptus est prin-

cipium ex quo rectè inferuntur omnes
compossibiles cum illo essendi modo per-
fectiones. Ergo hæc esset differentia il-
larum rerum essentialiter constitutiva, &
primò ab omnibus distinctiva. Sed ne-
que ipsa esset talis differentia; (quæ est
altera pars contradictionis) quia conve-
niret multis essentialiter differentibus,
nempe cælo, soli, terræ, materiæ primæ.
Itaque ipsa esset gradus genericus, summè
excellens, quo nihil præstantius esse potest,
cui tamen gradui supervenirent differen-
tiæ rerum infimarum, & finitarum con-
stitutivæ: quod est contra naturalem or-
dinem graduum metaphysicorum, seu
generum, ac specierum, in quibusea quæ
imperfectiora sunt, saltem præcisivè à
differentiis perfectioribus, ad quas illa
contingit determinari, sunt generica, &
differentiæ contrahentes semper aliquid
perfectivum adjiciunt. Unde genera ha-
bent rationem potentiæ, & partis mate-
rialis, seu perfectibilis in compositione
specierum. Illic autem daretur planè con-
trarium, quia rationi existendi à se, su-
perveniret differentia terræ: quod asse-
rere est à ratione alienius, quàm si di-
catur rationem metalli, putà plumbi,
posse supervenire rationi constitutivæ
Angeli. Hinc oportet aseitatem esse rei
cui inest, ultimò constitutivam, cui
nihil

nihil possit supervenire perfectius, cum ex ipsa omnes perfectiones eminenter in ea contentæ, & formaliter tantum distinctæ, secundum nostrum concipiendi modum proveniant. Quare impossibile est talem excellentiæ gradum entibus imperfectissimis convenire. Et morale iudicium in re scientifica attendendo, tam repugnat veræ sapientiæ iudicio, aseitatem entibus illis omnibus, ipsique materiæ primæ tribuere, quàm olim idolatria, & cultus vilissimarum rerum, veræ religioni repugnabat. Utrobique enim datur entibus infimis id quo nihil in summo ente excellentius cogitari potest.

6. Secunda ratio per quam excluditur ab illis entibus modus habendi existentiam ex propria conditione naturæ suæ, est quia per se repugnat id quod non est summè perfectum, & optimum, esse necessarium; siquidem quod non est summè bonum, est tantum eligibile: unde connotat aliquam causam liberam, à qua, saltem remotè pendeat, & per cuius determinationem in oppositum, potuerit non esse. Et solius finis proprium est non esse eligibile, sed præsupponi eligibilibus, ita ut si eligatur id quod est finis de se, sit per accidens, propter imperfectionem eligentis, non cognoscentis ipsum ut in se est. Finis autem debet esse

optimum. Unde solum optimum est de se necessarium. Jam autem entia imperfecta, quibus constat mundus, essent de se necessaria, si ex propria conditione suæ essentiæ haberent existentiam, & quod in illis defectuosum est, frustra esset omissibile, quia quod est necessarium, frustra est aversionis objectum. Ergo entibus illis non potest convenire modus existendi independentèr ab extrinseco, & ex sola conditione naturæ suæ.

7. Tertia ratio est, quia quod habet esse per essentiam, non potest habere causam. Habere causam finalem proprium est ejus quod habet quoque efficientem; quandoquidem officium finis est determinare ac movere agens ad productionem effectus: & quia hæc sunt relativa, fieri non potest ut unum sit sine alio. Atqui res omnes ex quibus mundus est compositus, habent finem, quia cum non habeant summam bonitatem, nec consequenter sint supremus finis; qui ad nullum alium refertur, si non haberent finem, non mererentur nomen boni, quia nequidem bonitatem haberent rerum utilium, & sibi subalternorum propriam, quæ referuntur, & inserviunt ad aliquid se ipsæ altius. Cum ergo dici non possit: *ex nihilo res nullam præter*

QUÆST. I. *De Existentia Dei.* 19

habere rationem boni , necessarium est fateri , eas omnes aliquem habere finem , qui omninò est hominum species , respectu rerum corporearum , siquidem hæc species de facto rebus ita constitutis subsistit ope ipsarum ; posito verò vel aliquarum defectu , vel alio ipsarum ordine , vel etiam quantitate , aut figura , aut dispositione situs , putâ positâ vicinitate majore solis , aut perfectâ rotunditate terræ , non subsisteret. Ipse verò homo , cùm sit Dei capax , habet illum pro fine , cùm unumquodque habeat pro fine optimum cujus est capax. Ergo nihil est in mundo quod fine careat , ac proinde nihil est quod non remotè , aut proximè sit ab agente tótius illius ordinationis , ac productionum auctore.

8. Quarta ratio est , quia quod est per suam essentiam , debet esse immutabile & inalterabile in suo illo esse , quia & essentiæ , & proprietates quæ ex illis fluunt , debent esse absolutè invariabiles , & semper eadem. Unde Aristoteles dixit essentias esse sicut numeros , quibus si quid addatur , destruitur semper talis numeri , cui aliquid additur , ratio & differentia. Quare res quæ non aliunde quàm ex tua essentia existet , semper eadem & immutata existet , & eam in suo esse alterari implicabit , sicut implicat hominem non semper esse animal

rationale. Atqui res illæ omnes ex quibus constat mundus, non sunt inalterabiles in suo esse actuali, & modo existendi, quia hoc ipso quòd sunt corporeæ, sunt divisibiles ratione continuitatis. Quod est divisibile, potest pati effectum qui potentiae illi passivæ, seu divisibilitati, correspondet. Quod est divisum, non est idem quod erat prius, quia perdidit integritatem, actualitatem quam prior subsistentia includebat. Divisio ex uno supposito tot constituit, quot sunt partes separatæ, quarum unaquæque est novum totum, minus eo ex quo est sumpta. Quis non videt hæc omnia esse aliena ab ente quod habet esse per essentiam? quandoquidem tale ens, cum ex necessitate naturæ sit id quod re ipsa est, non potest non esse semper idem. Sic ergo omnia quæ in hoc mundo spectabilia sunt, hoc ipso quòd sunt corporea, infinitè distant à conditione entis per essentiam. Et materia prima, quæ patitur actu omnes divisiones quæ fiunt in quibusvis rebus corporeis, in quibus semper continetur, magis ex hoc capite distat ab illa immutabilitate, quæ propria est entis de cujus essentia est ut existat. Quare manifestum est omnibus entibus ex quibus constat mundus, præsupponi aliquod ipsis ante-

QUÆST. I. *De Existentia Dei.* 11

rius principium, à quo, vi suæ essentiaë, & non aliunde existente, hæc omnia talem non habentia essentiam, extiterint. Hinc Sanctus Thomas. 1. p. q. 3. a. 2. *Bonum, inquit, per essentiam prius est bono per participationem, & Aug. lib. 8. de Trinit. cap. 3. Nulla essent mutabilia bona, nisi esset incommutabile bonum.*

SECTIO TERTIA.

Demonstratur existentia Dei ex impossibilitate succedentium sibi generationum, quarum origo non sit à causa illis omnibus extrinseca.

1. **S**I quæ in mundo permanentia sunt, necesse est fuisse producta à causa ipsi mundo extrinseca, ut existentiam haberent; id speciali modo evidens est de sola multitudine entium, in quibus sola perennis est indeficientium generationum successio, cum singula individua pereant. Horum enim primum principium non aliud esse potest nisi Deus; quod sic ostenditur.

2. Multitudo constans tota ex solis entibus dependentibus, & singulis per se insufficientibus ad habendum esse à se exigat, ac supponit causam ipsi multitudini

extrinsecam, quæ dederit esse vel singulis, vel alicui primo individuo, aut primo pari, unde alia processerint. Atqui multitudo tota hominum est ejusmodi, ut concedunt ipsi adversarii, & patet ex inductione, & ex natura, & conditione hominis. Ergo illa exigit, & supponit causam omni hominum multitudini extrinsecam, quæ saltem uni, aut alteri individuo dederit esse: quæ causa non potest esse nisi Deus. Major probatur, quia alioqui daretur effectus sine anteriore causa, ac proinde sine causa, nempe totalis existentia multitudinis, seu existentia illius adæquatè sumpta, ante quam nihil præfuisset quod esset causa illius, quia nihil quidem extrinsecum fuisset ejusmodi causa, ut supponitur. Et præterea ante existentiam illius multitudinis adæquatè sumptam, nihil præfuisset illius multitudinis; quia implicat partem totius esse antequam sit quidquam illius. Unde nihil planè præfuisset quod esset causa illius multitudinis.

3. Respondent Athei primò, hoc verum esse in multitudine finita, non autem in infinita, in qua non potest deveniri ad aliquid quod careat causa.

Sed contra est, quia ratio allata valet ex natura rei, & per se formaliter ratione sui; unde ad quodcunque applicetur, valebit semper, siue illud sit finitum, siue infini-

QUÆST. I. *De Existentia Dei.* 23
tūm, sicut valebit siue sit corporeum, siue
spirituale, siue substantia, siue accidens;
quæ omnia se habent materialiter ad illam ra-
tionem; ratio illa est necessitas alicujus præ-
existentis ad id quod est effectum, seu ne-
cessitas prioritatis in eo quod est causa alte-
rius. Quæ necessitas, & per se patet, &
probat, quia nihil dat quod non habet.
Unde nihil dat existentiam, nisi illam ha-
beat, præterea id clarè apparet in exemplo
alicujus infiniti, quod per mentem fingi po-
test. Nam si extra mundum essent infinitæ
faces non accensæ; & omnes insufficientes
ad concipiendam ex se flammam, impossi-
bile esset, non obstante infinitate, ut omnes ac-
cenderentur, hac inflammante istam, & ista
illam, & sic in infinitum. Et ratio impossi-
tatis est, quia multitudo constans ex solis in-
sufficientibus ad habendum aliquid, exigit,
& supponit aliquod principium prius ipsa,
ac proinde extra ipsam, quod sit in actu, &
contineat, siue formaliter, siue eminenter,
illud quo ipsa caret, ut illud ipsi commu-
nicet. Unde quia multitudo facum non
accensarum, est multitudo entium insuf-
ficientium ad habendam flammam, ipsa
exigit, ad habendam illam, principium ipsa
anterius, ac proinde ipsi extrinsecum. Simi-
liter ergo quia multitudo hominum sumptuo-
rum antecederet ad existentiam qua quis-
que carere potest, & aliquando caruit,

tota constat ex entibus insufficientibus ad habendam illam à se, talis multitudo exigit, ac supponit ante se, ac proinde extra se, causam, quæ cum non sit homo, possit producere hominem, tanquam causa particularis æquivoca; unde hominis perfectionem debeat continere eminenter. Et sicut, si jam faces infinitæ arderent, & si numquam vidissemus illas accendi, neque audivissemus fuisse accensas; bene inferremus aliquam saltem ex illis fuisse accensam aliunde, sive à principio ad omnem earum flammam anteriore, ex eo præcisè quòd unaquæque possit non ardere, & non ardens non possit se accendere; unde ipsa de se est ens potentiale respectu flammæ; ita, etsi poneremus homines fuisse successivè infinitos, tamen ex eo quòd nullus sit ex illis qui sumptus antecederet ad existentiam qua potest carere, possit illam de se habere, unde unusquisque est ens potentiale ad ipsam, & indigens causa sibi extrinseca ad eam habendam; bene etiam in illa hypothese inferremus, extra totam collectionem hominum ita insufficientium ad existendum, dari principium existentiae illorum, quod quomodocunque, alicui saltem pari hominum, illam dedisset.

4. Dices, si esset hominum successio infinita, non esset in ea par primum, quia alioqui daretur infinitum utrinque terminum.

natum. Si non esset par primum, non penderet series hominum à causa illi successioni extrinseca. Ergo falsum est, etiam posita infinitate successionis, esse necessariò admittendam causam illi infinitati extrinsecam.

5. Respondent aliqui negando minorem, & dicunt etiam posita infinitate successionis, fore à Deo par aliquod indeterminatum, per quod alia individua sint ab ipso, sed nullum fore quod sit primum, ob rationem quæ afferitur, quia nimirum infinitum esset duobus extremis terminatum.

6. Sed contra est, quia quæ sunt, aut fuerunt, determinata sunt, & effectus determinati causæ omnes, etiam intermedix, sunt omnino determinatæ, nihilque determinatum est à principio indeterminato, sed solis entibus in potentia convenit indeterminatio. Quia igitur fuerit à Deo par aliquod, per quod ab ipso fuerit tota collectio hominum, & à quo renorè sint homines jam existentes, necessariò illud par debet esse determinatum, & nisi illud sit primum, tota collectio non erit à Deo. Quare ut tota collectio sit à Deo, si non est ab ipso quoad singula, debet esse saltem quoad aliquod par primum.

7. Respondeo ergo aliter, positis duobus. Primum est quòd posito impossibili,

sequi possit quidlibet, etiamque utraque pars contradictionis, ita ut una sequela non impediatur aliam, & utrumque ex oppositis, in bona forma inferatur. Secundum est, quòd in illa verificatione contradictoriorum, si una pars procedat ex principiis per se certis, & evidentibus, & in ejus probatione nihil supponatur nisi certum, & evidens, hoc ipso alia pars debet judicari falsa, & in iis ex quibus rectè inferatur, aliquid sumetur, aut supponetur falsum, quia alioquin impossibile esset utramque contradictionis partem in bona forma sequi. His positis, ad argumentum sic respondeo. Si esset hominum successio infinita, non esset in ea pars primum, id est defectus seu negatio primi paris ex illa successionis infinitate sequeretur sine contradictione, & absque repugnantia cum principiis certis, & evidentibus, ex quibus, sine ulla suppositione, alicujus non evidentis inferatur necessitas primi paris ad dependentiam totius collectionis à Deo, nego: sequeretur contra ejusmodi principia, & rectam illationem, primi paris ex illis, concedo. Principia illa sunt. Id quod est merè effectum quo ad omnia quæ includit, seu quod nihil continet, nisi dependens, non potest esse sine causa sibi prævia. Item, effectus determinatus non potest esse ab ulla causa indeterminata, etiam interme-

dia, sed à solis agentibus determinatis physice esse potest. Jam ex illis principiis sine ulla alia præsuppositione, sequitur non posse esse à Deo totam collectionem hominum sine dependentia, & origine immediata primi saltem paris ab ipso. Quia igitur negatio primi paris ex infinitate successionis sequitur contra ejusmodi principia, & contra necessitatem ejusdem paris, rectè ab illis consequentem, sequitur ipsam esse falsam, & impossibilem; quia id ex quo sequitur ea pars contradictionis, quæ repugnat principiis certis, & evidentibus, non potest esse nisi falsum, & impossibile; & ex eo propriè contradictio sequitur, quia illa sequitur ex eo, ex quo infertur id quod est oppositum vero.

8. Dices multi graves Auctores hypothese illam infinitæ successionis in generationibus hominum, non improbabilem asserunt. Respondeo ab illis illam hypothese admitti tantum, posito quòd cum necessitate dependentiæ à Deo, ut causa prima, illi collectioni extrinseca, stare, & conciliari possit: non autem aliter. Et dico auctoritatem illorum qui aliquid non asserunt probabile, aut verum, nisi subordinatè ad aliud, & ex hypothese quòd stet cum illo, quod ipsi necessarium, atque indubitatum volunt, non valere ad reddendam probabilem illam necessarij falsita-

tem, ex eo scilicet quòd istud, quod subordinatè asseruerunt, non stet cum illo necessario, neque cum illo concilietur, ut ipsi opinati sunt. Ad hoc enim ut valeret, necessarium esset illos istud asseruisse independentè ab illo necessario, & sive stet eum illo, sive non stet: à qua assertionè illi maximè abfuerunt. Tantùm igitur verum est illos quoad hoc minùs consequenter esse philosophatos, non autem invalidasse demonstrationem petitam ex insufficientia collectionis adæquatè dependentis ad existendum sine principio sibi extrinseco, & sibi prævio, quia principia per se nota & evidentia, non per hoc suam certitudinem amittunt, quòd aliqua disputabilis sententia illis repugnet; sed potius omnis sententia quæ cum illis non congruit, hoc ipso quòd cognoscitur non bene cohærere cum illis, probabilitatem suam amittit.

9. Alia Atheorum responsio est, nos in argumento prædicto supponere quòd in hominum qui sint ab æterno geniti, numero, sit totalitas, & adæquata aliqua collectio, de qua dicimus, necesse esse ut illa tota collectio sit ab aliquo ipsi extrinseco. Atqui, inquiunt, in infinito non est totalitas, neque eorum ex quibus constat, ulla adæquata collectio: sed sunt semper plura, & plura absque termino: quod probant ex Aristotele, qui 3. Phys. text. 63. ita loqui-

QUÆST. I. De Existētia Dei. 29

tur, Totum dicitur cuius nihil est extra, vel, cui nihil deest. Perfectum autem nihil est, quod finem non habet. Finis autem terminus: Quare totum, & perfectum terminus est. Hæc ille, ex quibus patet, cum in infinito numero entium successivè se habentium, non sit terminus à parte ante, ex qua se tenet infinitas, ideo ex illa parte non esse totalitatem, neque collectionem, ac proinde argumentum quod illam supponit, nullum esse.

10. Respondeo, ex hypothēsi quòd data fuerit infinita multitudo, & series generationum, non modò fore in hominibus totum universale per nullius exclusionem in nostro intellectu, sed etiam totum positivè collectivum, seu collectionem determinatam omnium individuatorum, quia quæ sunt, aut fuerunt, necessariò determinata sunt: & si non potuissent determinari, non potuissent poni, siquidem ipsa positio, aut productio rerum determinat id quod attingit, nempe existentiam earum. Confirmatur, quia ideo dies æternitatis à parte post, non possunt poni omnes, quia non possunt omnes determinatè sumi, eo quod non sit in illis totalitas. Itaque si omnes homines per totam æternitatem à parte ante possibiles, essent positi, fuissent per illam positionem determinatè sumpti, & esset in illis totalitas.

11. Ad probationem in oppositum, distinguo minorem, in infinito syncategorematico, de quo tantum, loco citato, loquitur Aristoteles, non est totalitas positivè collectiva, seu totalitas multitudinis, concedo: in infinito categorematico, si datur, aut datum fuerit, ut volunt adversarii, nego. Hoc enim est discrimen inter infinitum categorematicum; & syncategorematicum, quod illud sit totum actu, seu re ipsa positum; illud autem in potentia nullum habente terminum circa possibilia, ac proinde nunquam totum, nec perfectum. Ratio hujus discriminis est, quia ea quæ sunt actu, quatenus sunt actu, determinata sunt secundum id omne quod est in illis actuale, ut jam dictum est supra. Non implicat autem in possibilibus nunquam esse determinationem ultimam. Sic si intellectus intelligit, aut intellexit, habet, aut habuit cogitationes certas, & taliter perfectas, & non plures, neque pauciores. Si autem spectetur ut intellectivus, cogitationes ab eo possibiles sunt plures, & plures, itemque perfectiores semper, ac perfectiores, saltem cum supernaturali Dei auxilio, absque termino. Item si quantitas dividitur actu, divisiones sunt in certo numero, & non ultra: si autem spectetur ut divisibilis, potentialitas quoad hoc est sine ultima divisione possibili. Item si unus or-

bis inferior movetur actu mediante aliquo superiori, ille qui primariò movet, est certus, ac determinatus. Sed si spectemus quotus ille esse debeat qui moveri potest primariò, & movere cæteros: nunquam in hoc dabitur terminus, quia decimus movere potest, itemque undecimus, & duodecimus, & sic in infinitum. Quia igitur generationes quæ præteritæ fuerint, reipsa extiterint, erunt illæ secundùm esse quod habuerint, determinatæ; ac proinde erit in iis infinitum catégorematicum, seu reipsa positum. Quare rectè in tali infinito totalitatem, & collectionem sumimus, etsi in possibilibus, quæ potentialitatem interminabilem dicunt, non sit terminus.

12. Aliter adhuc respondent Athei ad illud idem argumentum, sumptum prout communiter à multis proponitur. Cum enim multi sic forment discursum ex illo medio dependentiæ quæ est in singulis genitis, Quivis ex illis genitis habet ante se causam sui: ergo omnes collectivè sumpti: quia valet consequentia à sensu distributivo ad collectivum: respondent negando huiusmodi consequentiæ validitatem, præsertim ubi est multitudo infinita. Invaliditatem autem illam probant plurimis exemplis. Non enim valet, quivis homo est unus homo. Ergo omnes collectivè sunt unus.

homo. Item quivis dies æternitatis à parte post, habebit posteriorem. Ergo omnes. Post quamvis cogitationem angelicam erit alia : ergo post omnes. In continuo unaquæque pars habet minorem : ergo & omnes. Similiter ergo, inquit, non valebit, posita mundi æternitate, quivis homo habet ante se causam sui : ergo & omnes, seu ipsa tota collectio hominum ; sicut non valeret. Quilibet est in tempore : ergo & omnes.

13. Respondeo argumentum, ut à me supra aliter propositum fuit, non habere vim suam ex hoc quòd valeat consequentia à singulis ad totum, quæ propositio, neque expressè, neque implicite fuit, aut major, aut minor in illo discursu ; sed fundari in hoc principio, quòd multitudo constans ex solis dependentibus, & insufficientibus ad existendum à se, exigat causam sibi extrinsecam, à quo saltem mediante aliquo individuo, aut pari primo, accipiat esse. Et illa major probata est per hoc quòd alioquin daretur effectus sine causa, nempe totius multitudinis existentia, cui nihil præfuisset. Ut sit enim causa effectus, debet esse aliquid præcedens ipsum effectum. Quia igitur nihil multitudinis potest ipsam totam præcedere, nulla fuisset multitudinis adæquatè sumptæ causa. Jam majori illi sic probatæ subjecta est ista minor.

Atqui multitudo hominum constat solis dependentibus & de se insufficientibus ad existendum: quam propositionem concedunt ipsi Athei, cum res sit perse notissima. Itaque non est ibi facta argumentatio cujus vis fundaretur in necessitate, atque universalitate, aut quavis infallibilitate boni progressus à sensu distributio ad collectivum, sed vis fuit in impossibilitate multitudinis adæquatè quo ad suas omnes partes productæ, absque causa illis omnibus partibus extrinseca, & saltem natura priorè: quod ultimò reducitur ad istud universalius principium, non potest esse effectus sine causa priorè se.

14. Respondent aliter alii qui utuntur prædicto progressu, & dicunt valere hoc loco consequentiam à singulis ad totum, etsi illa non valeat in allatis exemplis: quia, inquit, sunt quædam prædicata quæ tribuuntur ratione quantitatis, aut sui, aut subjecti: vel ut conveniant, supponunt in se, vel subjecto quantitatem determinatam; alia verò quæ conveniunt rebus absolute secundum se, & præscindendo à quantitate, & in prædicatis quidem prioris generis non valet consequentia à sensu distributivo ad collectivum, quia per collectionem variatur quantitas: si quidem collectio omnium addit supra unumquodque in distributione contentum, majorem quanti-

tatem, aut discretam, sicut collectio hominum: aut continuam, sicut collectio palmorum: aut successivam, ut collectio circulationum diurnarum. At verò in prædicatis secundi generis tenet consequentia, quia collectio ut sic, nihil addit singularibus, quod impediat ne prædicata toti multitudini conveniant. Tantùm enim addit conceptum multitudinis, quæ nihil variare potest in prædicato quod convenit independenter à quantitate. Atqui in allatis omnibus exemplis prædicata includunt in se, aut supponunt in subiecto quantitatem, quia quantitatis nomine hic intelligitur etiam conjunctio cum ea, majoritas, minoritas, finitudo, infinitudo, pars, totum, unitas, pluralitas, duratio, locus, situs, &c. Illud autem prædicatum de quo agitur, est planè independens à quantitate, quia illud sic intelligitur, esse de se insufficiens ad existendum à se, & non posse existere sine principio sibi extrinseco. Quod tam est absolutum quàm esse substantiam, viventem, sensitivam, &c. Ergo sicut in istis valet consequentia à sensu distributivo ad collectivum, ita in illo valebit.

15. Respondet Esparza hic. q. 2. a. 21.
22. valere prædictum progressum à sensu distributivo ad collectivum, quando fit transitus, & progressus sub prædicato negativo non excludente à singulis solam con-

junctionem cum aliis, quibus idem prædicatum sit commune, sed excludente insuper aliquid aliud cui idem prædicatum non sit commune. Unde si ponantur infiniti indigentes, & infiniti famelici, per additionem eorum non tolletur à multitudine paupertas, & fames. Imò prædicatum ejusmodi negativum tantumdem multiplicatur, & augetur, quot sunt entitates superadditæ per conjunctionem cum pluribus similiter insufficientibus, ideoque per nullam talem additionem fieri poterit ut exterminetur, penitusque auferatur à multitudine, seu collectione prædicatum negativum. Quare idem erit de collectione infinitorum insufficientium per se ad existendum; unde aliunde debebunt habere ut sint.

16. Hæ quoque solutiones, adhibitis talibus conditionibus valent, sed expeditius, & fortius est argumentum fundatum, non in consecutione, & vi illativa talis progressus à sensu distributivo ad collectivum, sed in principiis de se notissimis. Etenim, per se loquendo, & ipsum formaliter transitum spectando, sine talibus conditionibus, quæ tali progressui accidentariæ sunt, non valet argumentatio à sensu distributivo ad totum categorematicum: Ut si dicatur, hic homo est essentialiter rationalis, & ille similiter, & sic

de cæteris: ergo omnes homines sunt essentialiter rationales. In qua conclusione nota universalis acceptionis, Omnes, syncategorematicè sumitur: Quodd si inferretur. Ergo collectio hominum est essentialiter rationalis, conclusio esset falsa. Nam id quod est formaliter constitutivum multitudinis ut sic, non est rationalitas, sed aliquid de genere quantitatis discretæ, nempe ratio numeri alicujus, sive finiti, sive infiniti, si daretur numerus hominum infinitus. Porro, omnes collectivè, idem est ac collectio omnium: quia sic tò omnes, non est nota universalis suppositionis distributivæ, sed terminus consignificativus, importans hominum totalitatem, & ex hoc termino consignificativo petitur significatum formale subjecti prædictæ conclusionis. Nam universaliter loquendo, quando additur substantivo nomen adjectivum, aut adverbium verbo, formale significatum, termini ex substantivo & adjectivo, aut ex verbo & adverbio conflati, petitur ex ipso adjectivo, aut adverbio modificationem importante. Sic cum dicitur homo eloquens, vel qui eloquenter concionatur, & movet animos auditorum, formale significatum subjecti est eloquentia: homo verò, vel concionator, materiale. Item cum dicitur omnes milites collectivè sunt exercitus, formale significatum subjecti est collectio

militum, in quam cadit ratio exercitûs. Hinc patet progressum à sensu distributivo ad collectivum, etiam adhibitis quibuscvis conditionibus, non valere ad inferendum in sensu formalissimo de ipsa collectione prædicatum illud quod est de propria ratione formali singularium, sed tantum ad inferendum illud in sensu identico. Nam si valeret ad inferendum in sensu formali, quoties prædicatum conveniret singulis in sensu formali, collectioni eodem modo conveniret. Quod cum ex jam dictis sit falsum: siquidem collectio hominum est tantum identicè rationalis, per se non valet ille progressus ad talem illationem: Potest autem valere per ipsas condiciones ipsi accidentarias, per eas maximè quas Esparza apponit. Sed hoc non est ipsum de se vim habere.

SECTIO QUARTA.

Demonstratur Existentia Dei ex ordine universi.

1. **P**Ræter allatas supra aliasque similes existentiaæ divinæ scientificas demonstrationes, alia captu facilior, nec minùs efficax, & necessaria, ducitur ex ordine universi, qui non potest esse nisi à principio summè intelligente, & omnipotente. Nam,

ut ait Lactantius, lib. 3. cap. 10. Nihil est perfectum, quod possit sine moderatore consistere. Quod maximè est necessarium, si res quæ substant ordini, sint plurimæ numero, & planè inter se oppositæ, ac dissimillimæ, & ipse ordo perfectissimus, & constantissimus, itaut per eum res illæ omnes ita dissimiles, & contrariæ conspirent in unum finem, quem certissimè, & infallibiliter, & semper assequantur. Atqui talis est ordo in mundo, dissimillarum, & oppositarum inter se rerum, ut sunt cælestia corpora, & elementa, quorum unum summè calidum & siccum est, aliud summè frigidum & humidum; item unum calidum & summè humidum, aliud summè frigidum & siccum; & inter hæc talis est ordo, ut hæc omnia conspirent in bonum hominis, sive ad sustentandam, & conservandam speciem ipsam hominum: ad quod omnia ita conferunt, ut si quid demas, aut mutes in iis quæ sunt notabilia in orbe, vita hominum futura sit impossibiliis: putà si non essent cæli & sydera, quæ sunt causæ universales omnium effectuum sublunarium: si sol esset minor, quo posito, non esset vis ejus sufficiens: si vicinior, quo posito, omnia combureret in terris: si stellæ deessent, quæ eo absente reflectant lumen ab eo acceptum: si astra essent immobilia, quo pacto non esset.

successio dierum ac noctium, & nullibi ulla fecunditas, quia ex una parte omnia æstu conficerentur: ex alia omnia languerent, ac deficerent. Item si deesset unum elementum, si aliter disposita essent elementa, si terra esset perfectè globosa, quo posito, tota aquis inundaretur: si deessent pluvix, si venti quibus aër purgetur, atque ab infectione eximatur; manifestum est interituram hominum speciem. Quocirca malum quod negationem, aut mutationem præsentis statûs sequeretur, aperitissimè ostendit ac demonstrat, hæc omnia esse optimè constituta; siquidem excludere malum, proprium boni est, nihilque est perturbationi ac confusione contrarium, nisi ordinis rectitudo, in tanta præsertim dissimillarum rerum multitudine. Quare cum earum diversitas perfectum ordinem constituat, & talis ordo non possit esse nisi, ab agente per intellectum, cujus etiam virtus illimitata sit, & ad omnia se extendat, itaut nihil ei non subsit; manifestum est ex tali ordine, dari tale agens, ipso ordine, & rebus ita ordinatis prius, cujus sapientiam, ac potentiam effectus isti manifestant.

SECTIO QUINTA.

Existentia Dei ex evidenter credibili ipsius Dei revelatione certissimè constat, debetque ex hoc motivo firmitus, quàm ex omni scientifico judicari.

1. **Q**Uæ hætenus allatæ sunt demonstrationes, ex principiis naturalibus sunt petitæ, & his quidem utitur Theologia Christiana, quia ipsa non excludit quod Theologiæ naturali convenit, spectatque, ut in præfatione dictum est, omnia ex quibus Deus in præsentī statu cognoscibilis est. Sed multò potiori jure eandem Dei existentiam, ut in objecto formali fidei inclusam, & ex eo cum summa firmitate, credendam, Theologia ostendit. Quod ut pateat.

2. Adverte primò, loquentem non per se visum, neque aliunde cognitum, posse ex ipsa sua locutione, sub aliqua saltem ratione innotescere. Quod probatur, quia effectus de se perceptibilis, causam, à qua sola esse potest, etsi non aliunde notam, manifestat. Itemque signum de se sensibile cognitionem rei significatæ parit. Atqui locutio est effectus de se perceptibilis ab eo cui fit locutio, & talis effectus non potest esse nisi à causa intelligente : Et est

QUÆST. I. *De Existentia Dei.* 41

est signum quo loquens, non modò rem enunciatam, sed etiam illius assertorem denotat. Itaque loquens aliunde non notus, etsi cæco loquatur, ex sua locutione potest illi innotescere, saltem sub ratione entis intellectivi, rem aliquam testificantis. Potest etiam aliquis tam sublimia loqui, ut inde ingeniolus & doctus judicetur. Potest item tam cohærentia dicere, ut rationabiliter putetur non mentiri. Ponamus præterea illum esse virum sanctum, qui audienti revelet arcana cordis, quæ non nisi divinitus scire potuit, meritò illi, etiam cæcus, quoad omnia fidem habebit. Unde si ille, quis sit, & qualis sit, quoad singularia declaret, cæcus in ejus cognitionem, etiam individualem, seu distinctivam illius ab omnibus aliis, ex ipsius sermone, & testificatione deveniet.

3. Adverte secundò, id quod in locutione unamquamque singularem personam naturaliter, ea certitudine quæ in humanis haberi potest, determinatè designat, esse certam differentiam vocis, quæ est cuique propria, & non convenit aliis. Ut enim in vultibus hominum, ita & in voce est aliquid quod unumquemque ab omni alio distinguit: & est imperfectio locutionis in homine, si per alium ab ipso, ita quoad auris judicium, confingi possit vox ejus, & loquela, ut falsò ipse loqui putetur.

4. Adverte tertio, talem differentiam distinctivam, in Dei locutione, multo perfectius reperiri, quam in locutione humana, aut quavis creata: quia Deus loquitur modo superante omnes naturæ creabilis vires, & qui sit soli enti infinito, atque omnipotenti possibilis. Loquitur enim, ut inquit Divus Augustinus, mirabilibus factis, id est per miracula quæ non possunt esse nisi ab ipso. Unde locutio Dei determinatissimè, & planè infallibiliter ipsum designat, etiam seclusis omnibus aliis indiciis; itemque seclusa omni alia cognitione, qualem nos habemus de eo quem ex audita voce agnoscimus. Et ratio illius infallibilitatis est ipsa exuperantia talis modi, & excellentia supra id totum quod aliis entibus possibile est. Sic locutioni divinæ summè convenit inimitabilitas à quovis alio, & vis manifestativa talis loquentis, ejusque perse præcisè designativa.

5. Adverte quarto, ex illa exuperantia, & inimitabilitate oriri aliud discrimen inter locutionem divinam, & humanam, nempe quòd Dei locutio, non modò denotet ipsum asserere rem enuntiatam, sed etiam indubitabile reddat ipsum esse veracem, dum nimirum significat ipsum qui loquitur tam mirabili modo, esse ens infinitum, ac natura su-

perius. Nam in tale ens non cadit suspicio ignorantiae, aut fictionis, aut mendacii. Et constat ei qui sic loquatur, summè esse credendum, & omnis dubitandi ratio à mente talem locutionem percipientis excluditur.

6. Adverte quintò, Deum loquentem posse tum quævis vera, tum singulariter suam Existentiam asserere, ac dicere, sive jam cognoscenti, sive ignoranti ipsum, se existere. Potest enim enunciare omne verum suæ locutioni præsuppositum in ratione objecti. Atqui existentia ejus sic præsupponitur. Ergo eam cuivis enunciare potest.

7. Adverte sextò, ad perfectionem divini testimonii, atque auctoritatis in loquendo, pertinere, ut quod ipse dixit, id iis qui non audierunt, publicetur, atque manifestetur modo planè divino, & infallibili. Solent quidem homines, dum aliquid ex sua assertionem certum fieri, & constare volunt, assertionem illam syngrapha sua, & sui proprietate sigilli confirmare. Et principes vetant sub gravibus pœnis, sui confictionem sigilli. Sed multò excellentius est, quod Deo soli convenit, habere sigillum omnino inimitabile, cujusmodi sunt effectus soli Deo possibiles. Et ita factum esse declarat D. Paulus ad Hebræos cap. 1. dum

loquens de lege Christi, confirmata per miracula, ab iis qui Christum audierant, & ex auditu prædicaverant, confirmationem illam dicit esse factam, attestante Deo signis, & portentis, & variis virtutibus, & spiritus sancti distributionibus. Ibi Apostolus non intelligit, Deum per illa signa, & virtutes propriè esse locutum videntibus talia, ita ut annunciatam doctrinam ipse illis omnibus, & singulis revelaret; siquidem vult Apostolos & prædicatores, quæ auditu didicerant, notificasse. Quare sensus illius loci, & mens D. Pauli est, signa illa, & portenta, & virtutes esse Dei approbantis attestationem, quæ verbo sic approbato auctoritatem divinam conciliaret. Idemque constat ex eo quòd Marci 16. dicitur, *Apostolos ubique prædicasse Domino cooperante, & sermonem confirmante sequentibus signis.* Quorum verborum sensus non est, Deum per miracula, quæ fiebant ab Apostolis, juncta cum illorum prædicatione, ita locutum esse, sicut per miracula Christi juncta verbis ejus loquebatur, & divinitatem ejus revelabat. Unde Christus Joan. 5. v. 36. dicebat, *Ego testimonium habeo majus Joanne. Opera enim quæ dedit mihi Pater, ut perficiam ea, ipsa testimonium præbent de me, quia Pater misit me;*

Et, *Qui misit me Pater, ipse testimonium perhibet de me.* Et supra v. 31. *Sic ego (ut homo) testimonium perhibeo de me ipso, testimonium meum non est verum.* Alius est qui testimonium perhiberet de me, & scio quia verum est testimonium quod perhibet de me. Et c. 8. v. 18. *Testimonium perhibet de me qui misit me Pater.* Non sic, inquam, Deus per miracula ab Apostolis facta loquebatur; sed ipsa erant signa, quibus Deus constare volebat, id quod illi prædicabant, non esse humanam doctrinam, sed veritates quas revelasset. Ex his.

Dico primò, Deus ex sua revelatione certò cognoscibilis est, etiam ab eo qui ejus existentiam ex effectibus naturalibus non cognovisset. Probatur, quia locutio superans omnes vires naturæ creabilis, & omni enti infinito inimitabilis, denotat per se ens supremum, infinitum, in creatum, etsi aliundè non notum, cum ipsa sit de se perceptibilis, & sui principii, à quo solo esse possit, determinatissimè significativa. Atqui revelatio Dei est ejusmodi, cum fiat per mirabilia opera, soli tali enti possibilia, & per se visibilia: Et si non fit per talia extrinseca & sensibus perceptibilia, fit interius per illapsum ipsius Dei in mentem Prophetæ, id est per cognitiones ab ipso immediatè efficiente

infusas : qui modus agendi in spiritus , soli enti supremo convenit. Et potest Deus ejus , cui sic loquitur , mentem ita illustrare , ut certissimè sciat , & experiatur hanc esse Dei ad se locutionem , & de hoc dubitare non possit. Igitur Deus etiam ab eo cui antea non esset notus , potest ex sua revelatione primò cognosci.

9. Confirmatur quia , si , ut dictum est homo cæco planè incognitus , potest illum sermone suo in notitiam sui , etiam individualement perducere , multò magis Deus seipsum per suam revelationem , omni alteri ab ipso impossibilem , etiam si antea ignoraretur , designatissimè manifestare.

10. Dices , ut judicem aliquem loqui , oportet ut prius judicem ipsum esse. Respondeo negando propositionem , quia oportet quidem ipsum prius esse quàm loquatur , sed in ordine ad cognitionem nostram , id quod per se primò cognoscitur , erit actio locutionis , quæ quia talis erit , ut non possit esse nisi ab ente omnipotente , ipsa talem causam manifestabit. Quòd si valeret objectio , simili modo probaretur neminem posse ex sua quavis actione primò cognosci , quia sicut prius est esse , quàm loqui ; ita universaliter prius est esse quàm agere. Cognos-

cetur ergo Deus per suam locutionem ut agens divino modo, & determinatiùs, ut loquens, etiam divino modo. Loqui enim est quoddam agere, in quo, etiam differentialiter sumpto, & miracula aut illapsum in mentem auctoris canonici includente, modus significandi soli supremo enti possibilis apparebit.

II. Dico secundò, si quod dicet Deus prædicto modo, nempe per mirabiles effectus loquens, sit istud, *Ego sum Dominus Deus tuus*, vel, *Ego sum qui sum*, duplici modo ipse per illam revelationem cognoscetur, primò in ratione entis intellectivi, omnipotentis, natura superioris; secundò in ratione objecti per talem locutionem enunciati. Probatur, quia cùm ex locutione duo cognoscantur, unum immediatè, in ipsa talis actionis perceptione, nempe ipse loquens, qui plùs aut minùs manifestatur, prout locutio magis aut minùs, quæ sunt illius propria, refert: alterum mediatè, nempe res dicta, quæ ex significatione, & veracitate loquentis infertur; si loquens, de cujus veritate non dubitetur, & res dicta sunt idem, ut hic contingit, necesse est illum duplici modo ex tali locutione cognosci, & de loquente, præter notitiam quæ habetur in perceptione locutionis, haberi quoque parem ei quæ

haberetur de alia re per locutionem enuntiata.

12. Nec valet, aut verum est, si dicas sic fore progressum ab eodem ad idem, nempe ab existentia loquentis in ipsius locutione inclusa, ad illam ipsam existentiam, Respondeo enim non ab ipsa formaliter existentia progressum fieri ad existentiam, sed à dictione existentis, ad ipsius existentiam, ut infallibili testimonio assertam. Circa quod observandum est, dum à signo fit progressus ad rem significatam, perinde esse quoad illam illationem, sive illa sit aliquid à quo effectivè aut directivè signum procedat, sive non, quia ut per signum objectum ejus possit inferri; satis est quod per ipsum significari possit, sicut respectu nostræ visionis, ut ab ea valeat consequentia ad rem visam, non est necesse ut illa non sit causa visionis, sive corporeæ, sive spiritualis: neque ut cognoscens visionem, jam in ipsa ejus cognitione talem causam non attingat, ut connotatum illius; sed satis est quòd visio possit repræsentare causam suam, & videns possit videre se ipsum, quo posito, valebit in tali materia æquè ac in cæteris, ob paritatem repræsentationis activæ, & passivæ, eadem consequentia, à signo vero ac certo ad rem significatam. Quocirca id quoque
locum

locum habebit in revelatione divina, neque ad hoc ut progrediamur ab ea ad rem revelatam, necesse erit ut res illa non sit causa revelationis, neque ut cognoscendo revelationem, non cognoscamus eam ut ipsius revelationis connotatum, quia scilicet non est locutio abstractè ab omni loquente, sed locutio Dei determinatè. Satis autem est quod res illa quæ est causa revelationis, per revelationem repræsentetur, & asseratur, & loquens, qui est Deus, seipsum enunciet, quo posito, eadem lege inferetur qua universim objectum signi ex signo ipso inferitur.

13. Instabis primò, semper verum erit existentiam ex seipsa inferri, hoc ipso quòd inferitur ex aliquo ipsam supponente, & in ea fundato, nempe ex locutione.

14. Respondeo ex prædictis locutionem in esse quidem reali supponere existentiam Dei, at verò in esse intentionali, sive in ordine ad prædictam cognitionem, existentiam notificari per dictionem, ut prius cognitam, & se ipsa cognoscibilem, ac de se superantem vires omnis alterius entis à summo atque omnipotente principio.

15. Instabis secundò, impossibile est ut quod evidens est alicui, judicetur ab eo verum ob testimonium alicujus, putà

ut dum videt de meridie solem lucere, judicet esse diem, quia aliquis id dicit: & licet posset esse talis illatio, inutile esset illud mediatum judicium. Atqui evidens est homini docto existentia Dei, & qui ex admirabilitate signorum certò cognoscit Deum loqui, hoc ipso certò judicat Deum existere. Ergo ille non potest amplius id inferre ut rem à Deo, quem, ut loquentem, novit, enunciatam. Et si id judicet, frustra erit istud secundarium judicium.

16. Respondeo quoad impossibilitatem, contrarium planè esse dicendum. Nam necessarius erit ille assensus mediatum, & secundarius, si loquens verax habeatur. Et isto quoque modo judicabitur de meridie diem esse, quia universaliter, & absolutè, positis præmissis, & concessis, non potest non sequi assensus conclusionis, & ille nequit esse liber, nisi in concessione præmissarum.

17. Non erit autem inutilis assensus ille secundarius, existentiae divinæ, tum quia verum non potest nimis multis bonis modis cognosci, cum quævis ejus cognitio sit perfectio intellectus; tum quia talis significatio confirmabit cognitionem quæ ex admirabilitate miraculosæ locutionis habebatur; confirmabit, inquam, eo modo quo effectus posteriores, & me-

diati, eandem causam à qua procedunt, semper magis manifestant. Hinc qui in tenebris suam præsentiam manifestare posset sola sua de quavis alia re locutione, agnoscenti scilicet vocem ejus, dicit tamen expressè se adesse, ut talis testificatio sit nova ratio eandem præsentiam judicandi. Quoad Deum autem asserentem se existere, addendum est illum ita posse id præstare, ut altiore de sua existentia conceptum ingeneret, quàm qui ex sola supernaturalitate miraculosæ locutionis oriri posset. Dum enim dicit, *Ego sum, qui sum*, hoc plus infinitè involuit, quàm ista verba, *ego sum*, prout præcisè existentiam significant, nempe innuunt essentialem ex natura rei subsistendi necessitatem, & plenitudinem essendi, & æternitatem, in qua nihil sit præteritum, nihilque futurum. Quare non frustra erit ille à locutione Dei ad ejus existentiam progressus.

18. Dico tertio, Deus per revelationem suam, non modò ab iis quibus ipsa est facta, sed etiam ab illis quibus est infalsificabili modo proposita, primò cognoscibilis est. Probatur, quia loquentis auctoritas, non modò in signis immediatis, sed etiam in aliis, eorum significativis, ab eadem procedentibus, & ordinatis, considerabilis est. Ac proinde eandem vim

habet revelatio talibus signis confirmata, quæ inest immediatè ipsi revelationi. Quia igitur revelatio immediatè per seipsam potest esse primi circa Deum assensus motivum, idque duplici modo, ita ut per eam Deus cognoscatur, tum ut agens, & loquens modo naturæ vires superante, tum ut per talem locutionem enunciatur: pari modo per eandem revelationem, ut propositam per signa infalsificabilia, & effectus soli Deo possibiles, poterit primò cognosci Deus, tum ut talia operans, & inimitabiliter testificans, tum ut per talem testificationem assertus.

19. Confirmatur, quia sic verum Deum primò cognoverunt innumeri Gentiles, qui circa Divinitatem erraverant, colentes multos Deos, quibus neque infinitatem, neque omnipotentiam, neque immensitatem, neque aliquid dignum Deo tribuebant. Visis enim miraculis, summum & unicum numen, à se antea ignoratum, agnoscebant, auctoritate ejus in talibus signis prælucente.

20. Dico quartò, existentia Dei taliter proposita, debet inde firmitus quàm ex quovis motivo scientifico judicari. Probatur quia ille assensus est de se omni scientifico firmior, contra quem si occurrant rationes in speciem scientificæ,

judicare debemus illas esse chymæricas, & apparentes, & nostrum erroris capacem intellectum, malè rem objectam concipere. Atqui talis est assensus qui revelationi aut per se ipsam, inimitabilem omni enti creato, aut per infalsificabilia divinæ auctoritatis signa propositæ debetur. Quandiu enim per illa evidenter credibile est, Deum esse locutum, etsi occurrant rationes quæ alioqui viderentur modo scientifico evincere contrarium, debemus non moveri illis, & inde intelligentiæ nostræ defectum arguere. Sic, cum contra Trinitatem ex revelatione evidenter credibili constantem, sese offerant imaginariæ contradictiones, quæ videantur nulli scientifico discursui impares, hoc ipso vim suam amittunt, quòd contra illas stat evidenter credibilis revelatio Dei, non potentis decipere. Et non modò fieret divinæ auctoritati injuria, sed esset error intellectuali sapientiæ virtuti maximè oppositus, & stultitiæ vitium, si quis stante circa Trinitatem evidenti credibilitate testimonii divini, admitteret aliquod oppositum judicium propter quancumque rationis apparentiam. Quod si ad judicandam in Deo personarum Trinitatem revelatio omni apparenti in contrarium scientifico discursui prævalet, eadem, dum cum ea scienti-

fieri motiva concurrunt, ut hic circa Dei existentiam contingit, ipsis ad idem judicandum præpollet, fortiùsque ac securiùs nostrum intellectum determinat.

21. Objectiones quæ contra hoc fieri possunt, solventur postea, ubi agetur de objecto ultimato fidei, quam adæquatè in revelationem & attestationem Dei resolvi ostendam.



QUÆSTIO SECUNDA.

De Essentia Dei.

SECTIO PRIMA.

In quo consistat Essentia Dei.

1. **A**Dverte conceptum objectivum differentialem rei debere esse inter convertibiles cum re definita primum, ex quo cæteræ illius rei perfectiones oriantur, ac bene à priori inferantur, eo modo quo in homine, ex rationali, id est intellectivo per conversionem ad phantasmata, inferuntur discursivum, admirativum, visivum, liberum, capax virtutis, ac divinorum, &c. Hinc essentia dicitur, primum in re, & causa cæte-

rorum. Dixi autem illum conceptum ob-
jectivum debere esse, non quomodocun-
que primum, sed primum inter conver-
tibilis cum re definita, id est inter æquè,
nec latius patentes, & de se mutuò in
tota sua amplitudine prædicabiles, ut
sunt homo & rationale, rationale & vi-
sibile. Nam omnis homo est rationalis: &
omne rationale est homo, &c. Non debet
autem esse primus absolutè conceptus ob-
jectivus, quia quòd sint alii priores, in-
quantum universaliores, id non impe-
diet ne minus universalis posterior sit
rei differentialiter constitutivus, sed po-
tius hoc ipsum necessarium est, quia sic
rem determinabit ad suam speciem infi-
mam, quæ totam ejus essentiam continet,
aut si non est alicujus speciei, eo quod
non habeat par in essentia, ut Deus, ad
gradum sibi essentialiter proprium con-
trahet & distinguet ab iis cum quibus
aliunde in gradibus superioribus conve-
niet. Sic quòd ante rationalitatem detur,
aliquid prius in homine, nempe vivens,
& animal, id non impedit ne rationale
sit differentia hominis, sed hoc ipsum re-
quiritur, ut per rationalitatem homo à
cæteris animalibus, & à plantis distingua-
tur. Quia verò rationale & visibile, sic se
habent, ut, cum sint termini convertibiles,
rationale sit prius visibili, hoc facit, ut

risibile non sit differentia constitutiva hominis, sed rationale.

2. Jam ex eo quod differentia rei debeat esse primus ex conceptibus objectivis cum ipsa convertibilibus, sequitur alia differentia ultimò constitutivæ conditio, nempe quòd debeat esse inter illos conceptus omnium perfectissimus, saltem negativè, ita ut nullus sit ipso perfectior. Ratio est, quia nihil potest esse causa alicujus se ipso nobilioris. Cum igitur differentia rei sit secundum nostrum concipiendi modum origo, & principium cæterorum quæ necessariò rei insunt, oportet ex prædicatis ei necessariò inexistentibus, ejusque propriis, nullum esse ipsa excellentius. Non est autem necesse ut differentia rei sit perfectissimus positivè conceptus: quia non implicat aliquid esse principium alicujus sibi paris, & causæ adæquari causarum. Et de facto nihil necessariò inest homini excellentius capacitate quam habet ad divina. Et in Deo nihil est infinitate præstantius, qua si posset cogitari aliquid perfectius, ipsa non haberet rationem infinitatis. Item nihil est in Deo excellentius ratione Trinitatis, quæ ex aseitæte quidem remotè, proximius autem secundum nos oritur ex infinitate, exigente summam communicationem ad intra. Satis est igitur ad per-

fectionem differentiae essentialis, si sit summa negativè. Et hoc posito, quod potest ei esse commune cum aliis propriis rei prædicatis, id quod ei rationem formalem differentiae dabit, erit ratio primi conceptus objectivi inter eos qui sunt cum re convertibiles.

3. Dico ratio formaliter constitutiva Dei consistit in hoc quòd sit Ens à se, ita ut differentia ejus essentialis sit aseitās, seu modus existendi à se, cum impossibilitate non existendi actu à se ipso, independenter ab omni alio. Probatur primò ex Scriptura, Exod. 3. 14. ubi Deus de se ipso dicit, *Ego sum, qui sum.* Quæ verba non meliùs quàm per jam dictum existendi modum, possunt explicari.

4. Probatur secundò ex Patribus, qui ita dicunt Deum esse suum esse, ut per hoc illum distinguant ab entibus creatis, quæ habent esse ab illo contingenter. Athanasius in primis hanc rationem constitutivam Dei formalissimè assignat, Oratione contra idola, post medium, ubi sic habet, *Deus enim, qui est ipsa essentia, nullis partibus coalescit. Quà propter ipsius ratio, ipsum esse est.*

5. Probatur tertio ratione, quia illa ratio in Deo est differentialiter constitutiva ipsius, quæ est prima ex iis quæ sunt illius propriæ, seu non communes cum

creaturis , & est principium ex quo aliæ ipsius propriæ inferuntur. Atqui aſcitas, ſeu neceſſitas exiſtendi à ſe ipſo , eſt talis, & nulla alia prior aſſignari poteſt , & ex ipſa aliæ bene inferuntur , ut quid ex ipſa conſequens. * Ergo. Major conſtat ex præmiſſo notabili. Minor probatur , quia infinitas , quam Argentinas vult eſſe differentiam Dei , ſequitur ex eſſe à ſe , ſiquidem ens quod eſt à ſe , nihil habet unde limitetur , & eſt cauſa omnis perfectionis extra ſe poſſibilis : unde ſi aliquam perfectionem non præhaberet aut formaliter , aut eminenter , ipſa eſſet impoſſibilis , ac ne quidem haberet rationem perfectionis , ſed non entis , etiam nominaliter ſumpti. Intellectio actualis , quam Alexander , Aureolus , Bannez , Suarez , Faſolus , & alii volunt eſſe rationem ultimò conſtitutivam Deitatis , ſequitur etiam ex prædicta aſcitate , præſuppoſito gradu ſpiritûs , quem illa contrahit. Nam qui eſt ſpiritus à ſe , cum ſit ſummæ perfectionis in ratione ſpiritus : & ad illam perfectionem per ipſam aſcitatem determinetur , non eſt in potentia phyſica ad intellectionem : ſi quidem hoc diceret maximum defectum. Itaque neceſſariò intelligit. Similiter omnes alias ab aſcitate perfectiones , quæ pro differentia Dei aſſignari poſſent ; ab ea oriri , ac rectè ſequi , facile erit oſtendere.

6. Sed nec dici potest quod volunt aliqui, omne perfectionis simpliciter simplicis genus, esse Deo essentialē, & essentiam ejus nihil differre ab omnibus attributis explicitè cognitis, nisi quod illorum omnium implicitum conceptum includat, ipsaque sit plenitudo essendi, cui nihil desit ex iis quæ imperfectionem non involvunt. Hoc, inquam, dici non potest, quia quotiescumque in aliqua re multi conceptus objectivi illius unius proprii, ita se habent, ut sese invicem non includant, & aliundè in illis datur unus qui à nullo alio, secundum nostrum concipiendi modum procedit, & simul est radix, ac principium cæterorum, ille solus est essentialis, ac differentialis. Atqui in illa tota multitudine perfectionum quæ Deo soli conveniunt, datur una quæ à nulla alia oritur, & à qua aliæ procedunt relativè ad nostros conceptus distinguentes, & unum ex alio inferentes, nempe ascēitas, seu ratio existendi necessariò à se. Ergo ex tota illa multitudine hæc sola est Deo essentialis, ac differentialis.

7. Dices quod est accidens etiam metaphysicum alicujus, non potest esse de essentia ullius substantiæ; sed existentia est accidens metaphysicum entium creatorum. Ergo ipsa non poterit esse de essentia Dei.

8. Respondeo hoc tantum esse verum, Illud quod est accidens entis completi, non posse per se præcisè sumptum, esse differentiam adæquatam constitutivam alicujus substantiæ; non esse autem verum quod non possit in differentia alicujus substantiæ contineri. Nam ratio imaginis mentalis, quæ est accidens, etiam physicum, hominîs, & Angeli, ingreditur differentiam constitutivam Verbi divini: quod est terminus naturæ divinæ per viam intellectûs, seu per dictionem communicatæ. Et idem est de amore, qui est in nobis accidens physicum, & includitur in constitutione Spiritus sancti: Spiritus enim sanctus est terminus naturæ divinæ per amorem communicatæ. Cæterum neque ratio verbi, seu imaginis, per se præcisè sumpta, est differentia Verbi constitutiva. Neque ratio amoris pari modo sumpta, est differentia constitutiva Spiritus sancti, quia differentiæ constitutivæ, & Verbi divini, & Spiritus sancti, sunt aliquid substantiale: ratio autem verbi mentalis, & amoris, abstrahunt de se à substantialitate. Item differentiæ illæ sunt termini naturæ divinæ, & personalitates; hoc autem non est de ratione verbi ut sic, aut amoris ut sic, quia in creaturis ratio verbi, & amoris id non habent. Quare potest aliquid ingredi differentiam alicu-

jus , & non esse ipsa per se adæquatè sumpta differentia ejus. Et sic existentia Dei non est ipsa per se sumpta differentia ipsius Dei , sed in illa differentia , quæ est aseititas includitur. Aseititas autem est modus existendi necessariò à se independenter ab omni alio , seu necessitas existendi actu à se , quæ differentia est omnium conceptibilium optima.

9. Dices differentiam debere esse simplicem conceptum objectivum , non autem includere aliquid quod non sit ipsa differentia adæquatè sumpta.

10. Respondeo hoc sensu debere esse simplicem differentiam , quòd nihil includat genericarum rationum ac differentiarum superiorum , quas supponit , ulterius contrahendo suum genus , in quo includuntur , non autem sensum esse quòd nihil possit in se includere commune entibus sub alio opposito genere contentis. Nam in homine rationale includit vim intellectivam , quæ est illi cum Angelo communis ; & non est tota differentia hominis , siquidem rationale est intellectivum per conversionem ad phantasmata , & per hanc conversionem homo differt ab Angelo. Satis est autem ad simplicitatem differentię constituentis hominem , quòd nihil includat eorum quæ continentur in gradibus animalis , viventis , mixti , substantię

Unde pari modo satis est ad simplicitatem differentia Deum constituentis, quod ipsa superveniens gradibus substantia, & spiritus, non includat aliquid in illis gradibus contentum. Non continetur autem in illis existentia, sed ipsi ab illa abstrahunt. Unde inclusio existentia in a seitate non adimit ei simplicitatem in Dei differentia requisitam.

II. Sic stabilita differentia essentiali Dei, potest ipse nostro modo definiri, super addita gradibus superioribus, qui sunt illi communes cum creaturis, hac ipsa differentia, hoc pacto. Deus est ens per se subsistens immateriale à se. Vel quia brevitas causa in definitionibus solet poni tantum genus proximum, in quo gradus superiores contenti intelliguntur, & differentia: rectè dicetur Spiritus à se. Vel denique, quod magis receptum est, sed in eodem sensu intelligendum, Ens à se, ita ut, tò ens, ut præsuppositum a seitati, importet omnia superiora, nempe rationem spiritus, & substantia, sine quibus a seitas esse non potest. Probatur, quia sic totum, & id solum quod est de essentia Dei, in ejus definitione ponitur.

SECTIO SECUNDA.

*Solvuntur contrariarum sententiarum.
rationes.*

1. **A**liqui dicunt in definitione Dei nihil debere poni nisi rationem entis & aſcitantem, non incluſa implicite, aut ſub intellecta ratione ſubſtantia, aut ſpiritu. Et hanc ſententiam probant, tum quia debet eſſe ſimpliciſſima Dei eſſentia, tum quia Deus non eſt ſubſtantia eo modo quo dicitur ſubſtantia de entibus creatis, ſed ſuper ſubſtantia, ut loquuntur ſancti Patres; tum quia illa ipſa ratio ſuperſubſtantia, & ſpiritus ex aſcitantem inferuntur, unde ſunt extra eſſentiam Dei. Denique quia gradus ſuperiores ab aſcitantem præſcidentes eſſent nihil, cum exiſtentia aſcitantem non præcedat, & in ea ſola contineatur.

2. Sed contra eſt, quia malè negatur ſubſtantiam, & ſpiritum, in Dei eſſentia incluſi, ut gradus ſuperiores, qui ab aſcitantem contrahantur. Nam eſſe non in ſubjecto inhæſionis, quod dicit ratio ſubſtantia, & eſſe expertem materia, quod dicit ratio ſpiritus, ſunt perfectiones ſimpliciter ſimplices, quæ ſi in creatis imperfectionem involvunt, illam ex differentiis ſupervenientibus contrahunt, non autem in ſuo

abstractissimo conceptu includunt. Unde secundum illum abstractissimum conceptum in Deo reperiri debent. Deinde sunt perfectiones prædicabiles in quid incompletè de eo cui insunt, & aptæ constituere inadæquatè naturam, supposito aliquo, seu personalitate terminabilem. Unde habent rationem generis intra prædicamentum substantiæ, ipsa quidem substantia supremi in illo prædicamento: spiritus autem, subalterni. Denique quando dicitur, Deus est substantia, Deus est spiritus, non qualificatur Deus, sicuti cum dicitur Deus est misericors, aut justus, sed quidditas ejus, inadæquatè licet, exprimitur. Ergo rationes illæ sunt genericæ intra essentiam Dei.

3. Ad primam rationem in oppositum, respondeo non obesse simplicitati compositionem metaphysicam, quæ est tantum secundum nostrum concipiendi modum, oriturque ex perfectione objecti comparati ad intellectum non comprehensivum ejus per unum actum, sed per plures attingentem id quod uno non potest. Quod si pluralitas rationum ac perfectionum per nostras præcisiones distinguibilium repugnaret simplicitati objecti, non deberent esse in Deo plura attributa, neque essentia, & attributa, sed unicus conceptus objectivus, etiam in ordine ad nostram mentem. Sunt
autem

autem necessario plures : unde talis multiplicitas non repugnat simplicitati.

4. Ad secundam probationem respondeo cum sancti Patres dicunt Deum non esse substantiam, sed super substantiam, illos accipere substantiam secundum rationem non essentiali ipsi, nempe secundum vim substandi accidentibus physicis, quæ soli substantiæ creatæ convenit : non autem secundum hoc quod ipsa sit non in subiecto inhæsionis, à quò dependeat, ut à substante. Et hæc sola ratio est substantiæ essentialis, nec potest de Deo negari, sicut nec ratio spiritus, quam Christus de Deo prædicat. Joan. 4. 24. *Spiritus est Deus.*

5. Ad tertiam probationem, dico cum substantia & ratio Spiritûs inferuntur ex aseitante, inferri secundum regulam, quæ docet valere à speciè ad genus consequentiam affirmantem, sicuti cum dicitur. Est homo, Ergo est animal, vivens, substantia : non autem inferuntur ut proprietates ex differentia essentiali quæ sit principium talium rationum, cum potius præsupponantur aseitanti secundum ordinem nostrorum conceptuum. Neque enim aseitas potest convenire accidenti, aut corpori quæ non sunt subiecta ejus capacia : sed requiritur ut id cui inest, sit substantia immaterialis, Et hinc redditur ratio cur bene definiatur Deus, dum dicitur, Ens à se, & non bene

definiatur homo si dicatur, ens rationale. Nam si quod ens est à se, necessariò ei insunt omnia genera quæ inter ens & aseïtatem mediant. Si autem ens est rationale, non propterea est substantia, corporea, neque, vivens animatum, seu vivens sensitivum, quæ sunt homini essentialia. Ens enim rationale potest esse Angelus, imò & de Deo dici potest aliquo modo, quod sit ens summè rationale sine defectibus nostræ rationalitatis. Quia igitur aseïtas ea determinatè supponit quæ inter ens & ipsam intercedunt, dum ipsa additur enti, illa omnia in ente sic illi substante, & præsupposito, implicite comprehenduntur. Unde valet ista definitio, Dens est ens à se: non quidem ita ut ratio substantiæ & spiritus, à Dei essentia excludantur, sed ita ut illa, ut præsupposita aseïtati, & necessariò intercedentia, inter ipsam & ens, implicite involvantur.

6. Ad quartam probationem nego gradus præscindentes ab aseïtate fore nihil, quia tò nihil dicit exclusionem existentia, & vel statum meræ possibilitatis, vel etiam impossibilitatem existendi; ut compositio unius entis ex duabus naturis completis. Præcisio autem ab existentia stat cum ea, & ita convenit omnibus rationibus entis nominaliter sumpti, formaliter ab eâ distinctis, ut tunc propriis-

simè dicantur ab ea præscindi, cum ei de facto realiter identificantur. Præscindere enim est concipere unum non concepto alio cui identificatur. Et latius accipietur præcisio, si rationes ab existentia formaliter distinctæ, considerentur abstrahendo à statu meræ possibilitatis, aut actualitatis, ut objecta scientiarum, quæ tamen non sunt nihil entis nominaliter sumpti, seu quoad essentiam spectati. In Deo autem quæ præscindunt ab existentia ejus, sunt necessariò ei identificata; unde præcisio est tantum non inclusio existentia in conceptu illorum, sine carentia identitatis cum actuali existentia: & isto tantum modo substantia & spiritus ab aseitante præscindunt.

7. At inquires gradus superiores præscindentes ab inferioribus habent rationem potentia subjectivæ respectu illorum, & sic exercent aliquam causalitatem in illos, non potentes existere nisi ipsis præsuppositis; in quo est quædam dependentia. Implicat autem aseitatem sic pendere ab aliquo.

8. Respondeo causalitatem illam non esse nisi in ordine ad nostros conceptus, & consistere in præsuppositione intellectuali gradus superioris ad minus communem, aut nullo modo communem: ad quod non requiritur prioritas existentia,

cum ibi nulla sit causalitas physica, sed tantum prioritas universalitatis, quæ verè est in rationibus substantiæ, & spiritus, comparatis cum aseitate, quæ soli Deo inest. Et similiter cum differentia dicitur esse causa, aut principium proprietatum, non est ibi ulla productio, aut emanatio physica, neque ulla dependentia ex parte objecti per se absolutè sumpti, sed tantum est prior conceptibilitas unius rationis formalis, & inferibilitas alterius ex illa per se prius intelligibili. Ad hoc autem non requiritur præhabito existentia per se loquendo. Quod si differentia in Deo existentiam involvit, hoc est per accidens ad illud per se sumptum causalitatis genus, cum sola causalitas physica per se existentiam prærequirat.

9. Hinc non valet ratio qua multi probant existentiam includi in differentia Dei, quia si non est de essentia Dei, debet ab ea resultare: implicat autem existentiam resultare ab essentia quæ antecederet ad existentiam nihil habebit præ non entibus: & si esset principium existentia, daret quod non haberet, & faceret quod non posset. Hæc, inquam, ratio non valet, quia argumentatio procedit quasi supponendo causalitatem quæ esset inter differentiam essentialem Dei, & existentiam ejus, fore

QUÆST. II. *De Essentia Dei.* 69

physicam, ad quam requireretur existentia ante causandam existentiam. Illa autem esset tantum metaphysica, qualis modò explicata est, in ordine ad nostros conceptus: & consisteret in hoc quòd ex illa perfectione, tanquam ex anteriore conceptu objectivo, rectè sequeretur, & inferretur existentia, cujus emanatio non esset alia quàm ipsa inferibilitas ejus ex illa per se priùs intelligibili perfectione. Et in hoc nulla esset implicantia, si verè daretur in Deo perfectio ipsi soli conveniens, quæ secundum se priùs intelligibilis esset quàm existentia ejus. Sed re ipsa nulla datur prior aëritate, quæ existentiam includit. Et potius ex aëritate, seu necessitate existendi actu à se, cætera Dei prædicata oriuntur, suntque ideo attributalia; ut infinitas, æternitas, immutabilitas, sapientia, omnipotentia, &c.

10. Neque sequitur illam perfectionem, quæ metaphysicè prior esset quàm Dei existentia, nihil habituram præ non entibus, quia identificaretur existentia Dei; nullum autem non ens identificatur actu ulli realiter existenti.

11. Neque sequitur daturam quod non haberet, quia non agitur de communicatione, & influxu reali, sed de prioritate intelligibilitatis, & inferibilitate

unius rationis objectivæ ex alia.

12. Pro sententia eorum qui in essentia Dei intellectiōem includunt, ita ut Deus definiendus sit, Intellectio à se, sic obijcitur, Essentia Dei debet consistere in perfectione maxima, & maximè actuali, ut sic tollatur omnis velut privatio aptitudinalis. Talis autem est intellectio, quæ constituit nobilissimum vitæ genus, ab omni materiæ concretionē sejunctum, & aliunde est actualior ipsa sola intellectualitate, seu gradu spiritûs.

13. Respondeo quoad primam partem majoris, essentiam Dei debere consistere in perfectione maxima negativè, seu quia nulla sit major, & talem esse aseitatem. Quoad secundam partem, negatur illa major, quia essentia Dei debet consistere in perfectione prima, Dei propria, & incommunicabili, à qua aliæ ipsius propriæ inferuntur, ut ipsa necessitas actualis intellectiōis. Potest etiam responderi essentiam divinam debere consistere in perfectione quæ sit maximè actualis actualitate principii, seu radicis, non actualitate operationis, quia essentia est intra genus principii, & radicis hoc ipso quod est aliquid primum. Itaque actualitatem de se non requirit nisi quæ propria est ejus generis: & hæc consistit in prioritate conceptibilitatis.

14. Objicitur adhuc pro eadem sententia, creatus spiritus propter imperfectiōnem naturæ suæ constituitur in tali gradu per intellectivum radicale, & non per ipsam intellectiōnem. Deo igitur, in quo nulla est imperfectio, repugnabit talis in illo gradu constitutio. Quod circa Deus essentialiter erit spiritus actu intelligens.

15. Respondeo, creatum spiritum in tali gradu constitui per intellectivum radicaliter sumptum, prout abstrahit à differentia per quam ab ipso creato spiritu contrahitur, nempe à potentialitate quæ de facto illi convenit, & essentiam ejus ulterius determinat. Quod circa Deus similiter debet in illo eodem gradu constitui per intellectivum eodem modo sumptum, nempe prout abstrahit ab impotentialitate & necessitate intelligendi actu, quæ illi contradistinctè convenit. Ratio est quia generica debent in eodem sensu præcisivè esse communia, & diversitas in propriis differentiis consistere, aut ex iis oriri. Porro differentia quæ contrahit in Deo essentialiter gradum spiritus, non est intellectio actualis, quia id quod gradum inferiorem constituit, non est operatio quæ superiori correspondet: putà id quod in homine contrahit rationem animalis, non est sensatio, sed est novum principium novarum proprietatum, cui nova agendi

ratio, in superiori gradu non contenta, correspondet. Nec potest aliquid in Deo melius assignari pro tali superveniente principio, quàm prædicta aseititas, qua posita, omnia generica, quæ secundum rationem abstractissimam erant univocè communia Deo & creaturis, determinabuntur in Deo ad perfectionem infinitam, planè incommunicabilem, putà intellectio, quæ sub ratione immaterialis cognitionis convenit Deo, Angelis, & homini, determinabitur in Deo ad hoc ut sit comprehensio intuitiva infiniti, & omnium aliorum supercomprehensio: vis activa erit omnipotentia: & sic de cæteris Dei proprietatibus, quibus ex aseitate adveniet summus perfectionis gradus Dei proprius.

16. Reliquæ objectiones solvuntur ex prioritate aseitatis ante alias omnes rationes pro differentia Dei assignabiles.





QUÆSTIO TERTIA.

De Attributis Dei.

SECTIO PRIMA.

Quid sit divinum Attributum; & quotuplex.

1. **A**tributi divini nomen diversimodè ab auctoribus sumitur. Ac primò quidem generalissimè sumptum significat quidquid de Deo verè prædicari potest: quo modo Ocham. Quodlib. 3. quæst. 2. & Gabriel in 1. dist. 2. q. 2. dicunt attributa vocari nomina divina, de quibus sanctus Dionysius celebrem tractatum edidit: Et sic prædicata etiam essentialia, ut esse substantiam, spiritum, viventem, attributi nomine continentur, ut docent etiam Ægidius in 1. dist. 1. quæst. 1. Et Petrus. De Alliaco q. 6. a. 2. & alii. Quare secundum hanc acceptionem, ex iis quæ sunt in Deo, nihil excipitur à ratione attributi, nisi supposita divina, & Deus ipse, prout implicite illa complectitur, estque substantia prima, singularis, in-

dividua. Nam suppositorum est subesse omnibus aut formis, aut quasi formis, & sic habet rationem subiecti, prout subiectum opponitur attributo ita genericè sumpto.

2. Secundò attributum sumitur in acceptione Paulò strictiori, pro eo prædicato non notionali, quod Deo absolute sumpto, seu prout unus est, abstrahitque à multiplicata personarum, convenit præter essentiam ipsius, ita ut eam supponat, sitque aliquid ipsi, secundum nostrum concipiendi modum, superadditum. Et sic esse creatorem, conservatorem, legislatorem sunt attributa. Et hæc communis est acceptio, ut notant Molina, Vasquez, & alii.

3. Tertiò strictiùs adhuc, & magis propriè sumitur attributum pro perfectione simpliciter simplici, quæ divinæ essentiae, extra conceptum ejus supervenit, & necessariò illam afficit: quo modo attributum non complectitur operationes quæ Deo conveniunt in tempore, ut creare, conservare, gubernare & similia, nec decreta de illis operationibus liberis, nec visionem, aut præscientiam rerum consequenter ad illa productarum: nec etiam quæ velut passivè, & extrinsecus Deo conveniunt, ut esse glorificatum ab hominibus, & Angelis.

4. *Attributum secundo, & tertio modo sumptum, dividitur primò in affirmativum, cujusmodi est esse bonum, justum, sapientem: & negativum, quod positivæ perfectioni addit exclusionem alicujus defectus, ut esse infinitum, æternum, immensum, quæ plenitudini perfectionis, durationis, extensionis, seu præsentiae ad omnem locum, etiam possibilem, addunt negationem terminorum in illis ipsis rationibus.*

5. *Secundò attributum dividitur in absolutum, quale est esse simplicem; & relativum, saltem secundum nos, quale est esse misericordem, aut justum.*

6. *Tertiò dividitur in commune, & proprium. Commune est quod creaturis etiam convenit, estque vel transcendens, ut unum, verum, bonum: vel non transcendens, ut esse intelligentem, volentem, &c. Proprium, quod incommunicabiliter Deo convenit, ut esse immensum, omnipotentem, &c.*

7. *Quartò aliqua sunt attributa, quæ dicunt præcisè aliquem essendi modum, seu aliquam perfectionem, quæ neque habet rationem potentiae, neque operationis, ut esse simplicem, illimitatum, &c. aliqua quæ constituunt in actu primo ad aliquid, ut esse intellectivum, volitivum, operativum: alia quæ dicunt ipsam ope-*

rationem, ut intelligere, velle, operari.

8. Alias divisiones, ut in necessarium & contingens: in id quod propriè, & in id quod metaphoricè convenit, ut pœnitentia, dolor, &c. Vide apud Suarem, Vasquem, & alios.

SECTIO SECUNDA.

An detur inter attributa, & quævis prædicata divina, distinctio ex natura rei.

1. **C**ertum est dari in prædicatis, & rationibus quæ Deo insunt, aliquam ex parte nostri intellectus distinctionem, quia varios de Deo conceptus formamus, ut cum eum substantiam, spiritum, justum, misericordem dicimus: quæ conceptus non sunt identici: unde est aliqua, secundum nostrum concipiendi modum, diversitas; quod jam supposui in disputatione præcedenti.

2. Certum item est, non dari in Deo extra personas, distinctionem realem, qualem olim affirmavit Gualterus, relatus à Nympho, in dilucidario, lib. 12. metaph. disp. 13. cap. 3. Nam contrarium definitum est in Concilio Lateranensi, sub Innocentio III. cap. 1. de summa Trinitate, ubi statuitur, *Deum esse sub-*

QUÆST. III. De *Attributis Dei*. 77
stantiam, & naturam omnino simplicem, & in eo nullam esse nisi quoad personas, distinctionem realem. Et in Concilio Remensi sub Eugenio III. contra Gilbertum Porretanum, definitum est, non esse dividendum inter Deum & Deitatem, inter personam & naturam: ac simplicem naturam divinitatis esse Deum, nec nisi sapientiam, quæ ipse Deus, sapientem esse; nec nisi magnitudine, quæ est ipse Deus, magnum esse. Idem ratione probatur, quia Deus esset ens imperfectum, si daretur in eo formarum distinctio. Hac igitur rejecta distinctione, quæritur an detur alia minor, & tamen intentionali major, quæ dicitur ex natura rei, præcedens, non tantum nostros conceptus, sed etiam ordinem ad ipsos.

Scotus in *jum. dist. 8. quæst. 4.* talem expressè admittit, mediam inter realem & rationis, quam vult esse actu, nemine cogitante, & sine ordine ad intellectum: unde eam appellat formalem ex natura rei. Verba ejus sunt. *Est ergo ibi distinctio præcedens intellectum omni modo; & est ista, quod sapientia est in re, ex rei natura, & bonitas est in re, ex rei natura: Sapientia autem in re formaliter non est bonitas in re.*

3. Refellitur hæc opinio, primò quia repugnat citatis contra distinctionem rea-

lem Conciliis, quæ satis manifestè excludunt à prædicatis Dei omnem, quæ ex parte ipsorum se teneat, distinctionem.

4. Refellitur secundò rationibus ferè iisdem quæ afferri solent, & iis quas attuli, quæst. 9. Metaph. Sect. 1. contra distinctionem graduum metaphysicorum in eodem individuo: quæ rationes hic valent à fortiori, cum in Deo specialissimè repugnet alia quàm inter personas distinctio intellectum antecedens.

5. Prima ex illis rationibus est, quia si conceptus illi objectivi, quos de Deo non identicè prædicamus, ante operationem intellectûs formaliter distinguantur, distinctio illa erit ex natura rei, non formalis tantùm, sed realis: quod non vult Scotus, & non potest admitti, ut per se patet. Sequela probatur, quia si quid impedit ne distinctio illa ex natura rei, sit realis, maximè quia rationes illæ, non obstante illa sua distinctione, uni rei Physicè identificantur, nempe ipsi Deo entitativè, & realiter sumpto. Hæc autem ratio non valebit, quia, ut identitas quam habent illæ rationes cum entitate Dei physicè sumpta, impediat earum realem à se invicem distinctionem, oportet id, quod entitas Dei physica ipsis superaddit, minùs distingui ab illis, quàm ipsæ

à se invicem distinguantur : sicut ut identitas quam in ipso Deo habent personæ divinæ cum essentia , excludat ab illis distinctionem omnimodam rei à re , & carentiam identitatis , cujusmodi est inter ea quæ separari , ac seorsim poni possunt , oportet ut id quod essentia superaddit personalitatibus , magis identificetur ipsis , quàm illæ inter se : Et universim quod tollit aliquam distinctionem ab aliquibus , hoc ipso quod est medium indistinctionis inter illa , debet esse minùs distinctum ab illis , quàm illa inter se. Quare si formalitates illæ secundùm se , ut supponitur , ex natura rei ante operationem intellectûs distinctæ , ideo non distinguantur realiter , quia sunt identificate entitati physice Dei , in qua continentur ; oportet illas minùs distingui ab illa entitate physica quàm à se invicem. Idque ita intelligendum est , ut sit in illa entitate aliquid præter ipsas quod sit minùs distinctum ab illis , quàm illæ à se invicem. Nam si entitas illa physica idcirco tantùm minùs distinguatur , quia illas omnes continebit , eo modo quo homo minùs distinguitur ab anima , quàm anima à corpore , quia homo animam simul & corpus includit , id non tollet ab illis distinctionem omnimodam à se invicem , seu negationem identitatis inter se , sicut identitas cujusvis

totius cum omnibus suis partibus simul sumptis, & unitis, non tollit distinctionem physicam, seu negationem identitatis inter proprias ipsarum entitates. Quare ad hoc ut identitas cum entitate Dei physica, tollat ab illis formalitatibus distinctionem realem, & negationem identitatis inter ipsas, necesse est entitatem illam continere præter ipsas, aliquid magis illis identificatum, quàm sint ipsæ inter se, seu in quo non sit distinctio ab illis quæ est in ipsis per se sumptis: sicut in ejusdem Dei essentia, quæ à tribus personis excludit, non quidem distinctionem ut sic, sed distinctionem omnimodam rei à re, & carentiam identitatis, non reperitur distinctio ab ipsis personis, quam illæ habent inter se. Jam autem posita illarum formalitatum, de quibus agimus, distinctione ante operationem intellectûs, & ex natura rei, & ex parte objecti per se sumpti, nihil erit in physica Dei entitate quod sit minùs distinctum ab illis, quàm illæ à se invicem, quia entitas illa Dei physicè sumpta, nihil dicet nisi omnes simul, quæ Deo insunt, formalitates, nempe rationem entis, perfectitatem, rationem Spiritûs, aseitatem, & rationes omnes ab istis provenientes, unitatem, veritatem, bonitatem, sapientiam, omnipotentiam, misericordiam, &c.

QUÆST. III *De Attributis Dei.* 81

& qui illas omnes rationes cognosceret, cognosceret perfectè, & distinctè entitatem Dei, sicut si quis cognosceret in Petro rationem entis, perfectitatem, corporeitatem, rationem viventis, animalitatem, rationalitatem, petreitatem, & istorum omnium proprietates omnes, & respectus, putà unitatem, veritatem, bonitatem; vim substanti accidentibus, risibilitatem, &c. perfectè cognosceret, & adæquaret cognitione sua entitatem physicam Petri, nihilque in ea cognoscendum restaret. Itaque entitas physica non dicet præter omnes formalitates inter se ex parte ipsius distinctas, aliquid minùs distinctum ab illis quàm illæ sint inter se. Unde ipsa non poterit esse medium indistinctionis inter illas: ac proinde malè dicetur, ideo illas non distingui aliquo distinctionis genere, putà realiter, quia cum ex natura rei à se invicem distinguantur, identificantur in entitate physica. Et hinc ulterius sequitur, illas omni identitate carere; quod plus est quàm distingui realiter, cum personæ divinæ realiter distinguantur, & non careant identitate, etiam reali, & maxima, ob sui summam identitatem in uno tertio, à quo nullo modo ex parte sui, sed tantùm extrinsecùs per ordinem ad nostrum intellectum distinguuntur: illud inquam se-

quitur ob defectum alicujus in quo illæ rationes magis quàm inter se ipsas identificentur. Et sic illæ non erunt ita unum in Deo, sicut personæ, quia quæ secundum se sunt distincta, si non identificentur in tertio, à quo minùs quàm à se invicem, distinguantur, carent identitate, quia sic distinguuntur, ut tantùm distinguantur. Et hinc personæ divinæ non carent identitate, quòd sint idem in tertio, nempe in essentia. Quòd si non sic identificarentur in uno tertio, carerent identitate, & haberent distinctionem omnimodam, sicut ea quæ in creatis sunt distincta, eoquod non detur in illis aliquid quod sit idem cum realiter distinctis. Quia igitur inter formalitates illas inter se, ut supponitur, ex natura rei, & secundum se distinctas, non dabitur aliquid tertium in quo identificentur, seu inter quod & illas non sit distinctio quæ est inter ipsas, quia nihil erit in re præter ipsas, à se omnes invicem distinctas, ideo omnino carebunt identitate, quia ita distinguuntur, ut tantùm distinguantur.

6. Et si autem in illis esset aliquid carens ea distinctione quam habent inter se, id quidem impediret jam dictam distinctionem omnimodam, & negationem identitatis, sicut essentia divina impedit

QUÆST. III. *De Attributis Dei.* 83

ne fit omnimoda distinctio, & carentia identitatis inter personas, sed non impediret distinctionem præcisè loquendo realem, quia formalissimè loquendo, distinctorum identitas in uno tertio, non tollit distinctionem realem eorum à se invicem, sed solum distinctionem ab illo, tantumque facit ut sint unum eo modo quo identificantur, nempe in illo; quo modo paternitas divina, & filiatio sunt unum, non inter se, sed in natura, cui identificantur. Certè si quid esse posset quod a distinctis ante operationem intellectûs, tolleretur distinctionem realem, maximè identitas eorum simplicissima in uno tertio, à quo nullo modo ex parte objecti distinguantur, qualis est identitas divinarum personarum in natura. Atqui hæc identitas non tollit distinctionem realem à distinctis per se ante operationem intellectûs, sed tantum tollit carentiam identitatis, & distinctionem omnimodam, qualis est inter res utrinque separabiles, seu separatæ existentie capaces. Ergo nihil tollet à distinctis ante operationem intellectûs distinctionem præcisè realem.

7. Secunda ratio fit, quia si datur inter prædicata Dei quæ non identica sunt, distinctio se tenens ex parte ipsorum, & antecedens operationem nostri intelle-

ctus, dabitur compositio in Deo ex parte ipsius Dei; quod admitti non potest, cum repugnet simplicitati Dei, & repugnare ipsi fateantur adversarii. Sequela probatur, quia ibi est compositio, ubi est in uno distinctio plurium non identificatorum alicui à quo nullo modo ex parte objecti distinguantur. Et qualis est ista distinctio plurium non identificatorum, talis est compositio. Quia igitur inter prædicata Dei communia tribus personis, & personas, interque illa ipsa prædicata secum invicem comparata, erit distinctio formalis ex natura rei, antecedens intellectum, nec aliunde erit opposita tali distinctioni identitas, qualem nos contra adversarios asserimus, contententes illa omnia ex parte objecti, & ante nostros conceptus formalissimè, & simplicissimè sine ulla distinctione identificari, dabitur ex parte objecti in Deo compositio formalis ex natura rei, omnem operationem intellectûs antecedens.

8. Confirmatur argumentando consimiliter ad ea quæ dicta sunt in prima probatione, quia nimirum; formalissimè loquendo, ut aliqua inter se distincta proportionatam suæ distinctioni compositionem non faciant, propter sui identitatem in alio, oportet ut cum isto alio non ha-

beant eandem distinctionem quam habent inter se. Hinc secundum ipsos adversarios, ut personæ divinæ, quæ sunt realiter distinctæ à se invicem, non faciant realem compositionem inter se, propter identitatem quam habent in natura, oportet ut illa identitas quam habent cum natura, tollat distinctionem realem ipsarum in natura: & si non tolleretur, consisteretque tantum in indissolubilitate ipsarum, aut aliqua qualicunque indivisione, non impediret compositionem realem. Quia igitur nulla erit identitas tollens distinctionem formalem ex natura rei, antecedentem omnem operationem intellectus inter prædicata Dei absoluta, & personalitates, interque illa secum invicem comparata, dabitur inter ista compositio formalis ex natura rei, omnem intellectus operationem antecedens.

9. Confirmatur ulterius, quia ideo datur in Deo compositio rationis per nostrum intellectum, se tenens tantum ex parte nostri intellectus, quia datur in Deo distinctio per nostrum intellectum, nihilque est in quo illa quæ distinguntur, in ipsa habeant identitatem quæ excludat talem ex parte nostri intellectus se tenentem distinctionem. Ergo à fortiori, quia dabitur distinctio formalis ex natura rei, & prior omni nostri intellectus operatio-

ne, dabitur quoque formalis ex natura rei, & prior nostris conceptibus compositio, quia nimirum plurium uni inexistantium distinctio, si non obstat contraria eorundem in aliquo tertio, quod eidem rei insit, identitas, talem compositionem facit, qualis est illa distinctio.

10. Respondent Mayron, Smylingus, Bassolis, & alii Scotistæ, non esse compositionem, quia diversæ illæ rationes formales in Deo non se habent ut actus & potentia: compositio autem, inquiunt, dicit unionem actûs cum potentia.

11. Refellitur hæc responsio primò, quia, posita tali distinctione, etsi attributa quidem inter se comparata non sint actus & potentia, si tamen eadem cum essentia divina, vel cum personis comparentur, natura, & personæ se habebunt ut potentia, illa verò se habebunt ut actus, quia natura & personæ in sensu formali qualificantur, & denominantur ab illis, sicut natura humana, & Petrus à risibilitate, quæ est forma & naturæ & petreitati eo modo adveniens, quo ab illis distinguitur, & per se illa respiciens, ut subjectum proprium, immediatum, & mediatum; cui utrique per se, cum sola immediationis, & mediationis differentia, convenit.

12. Refellitur secundò, quia tantum

abest ut non sit compositio, ubi est quidem distinctio plurium in uno, sed non ratio actûs, & pôtentiæ, ut potius, si non adsit ea quam dixi, identitas in aliquo tertio, planè contraria tali distinctioni respectu hujus tertii, inveniatur illa compositio quæ unitati ac simplicitati maximè opponitur, nempe aggregatio plurium per accidens: quo modo frigus, & humiditas aquæ, vel calor, & siccitas ignis, faciunt aliquid magis oppositum unitati, quàm frigus & aqua, quæ faciunt frigidum: vel humiditas, & eadem aqua, quæ faciunt humidum, & sic de cæteris. Quare si attributa Dei à se invicem, ex parte objecti, distinguantur, cum aliunde non sint respectu sui invicem actus & potentia, ejusmodi aggregationem unitati, ac simplicitati maximè contrariam, constituent.

13. Confirmatur, quia sanctitas, & potentia, prout nostris conceptibus præcisivis subjacent, minùs faciunt unum, quàm natura & sanctitas, quæ unum effectum formalem, etsi accidentalem, constituunt, videlicet sanctum. Et ratio illius majoris oppositionis cum unitate, inter sanctitatem & potentiam, est quia ita distinguuntur formaliter, ut non sint actus & potentia: Quia igitur attributa inter se distinguuntur ex parte sui, con-

stituent aliquid magis oppositum unitati quæ Deo ex parte sui convenire debet, quàm si essent actus & potentia, nempe facient aggregatum per accidens, non verò unum compositum, seu totum accidentale.

14. Argumenta quæ afferuntur ab adversariis pro astruenda ista distinctione, solvuntur per distinctionem virtuales, aut fundamentalem latius sumptam, de qua agendum est, antequam illa proponantur, ac diluantur.

SECTIO TERTIA.

An detur inter Dei prædicata distinctio virtualis.

1. **N**Otandum virtualitatis vocem additam alicui termino, alienare proprium illius termini significatum, & importare perfectionem, quæ contineat totam virtutem exclusi significati, sine imperfectione ejus. Sic discursus virtualis importat cognitionem, quâ attingatur totum quod attingeretur per discursum formalem, ita tamen ut nec sit multiplicitas conceptuum, nec dependentia unius judicii ab alio interiore: Unde in tali cognitione est tota perfectio discursus, sine formali ratione, & imperfectione

atione discursus. Pari igitur modo distinctio virtualis, seu eminentialis, dicit omnem perfectionem quæ est in pluribus distinctis, sine ipsa distinctione illorum, & sine imperfectionibus quæ illam comitantur. Et verè est in distinctione finitorum à finitis aliqua perfectio, & multiplex imperfectio. Perfectio sita est in eo quod finitum additum finito faciat aliquid majus, & plus sit virtutis in multis non infinitis, quàm in uno. Dixi, non infinitis, quia si distinctum est infinitum, ut personalitas divina, non est aliquid majus, neque perfectius in multis distinctis, quàm in uno. Imperfectio sita est in carentia unitatis, in separabilitate, in defectibilitate unius, manente alio, imò in defectibilitate utriusque, cum nihil imperfectum necessàriò sit. Virtualitas igitur distinctionis ita includit perfectionem omnem distinctorum, etiam cum virtutis excessu, ut omnimodam distinctionis imperfectionem excludat. Hinc.

2. Dico, Datur inter Dei prædicata distinctio virtualis, seu potius eminentialis. Ita Theologi communiter. Probat, quia illud in Deo admittendum est, quod omnimodam perfectionem importat, cum exclusionem cujusvis imperfectionis. At talis est distinctio virtualis,

seu eminentialis ex jam data illius notione. Ergo ipsa in Deo admittenda est, inter aliqua ejus prædicata, in quibus scilicet est æquivalentia ad perfectionem, ac virtutem multorum. Et ex ista æquivalentia sic fit argumentum. Id quod habet aliquid æquivalens alteri in ordine ad aliquem effectum, dicitur esse, vel habere illud virtualiter: unde quia Angelus, & Deus habent præsentiam ad locum, quæ æquivalet diversis partibus extensionis, per quam res quanta occupat spatium, dicuntur habere virtuales partes extensionis, & virtuales extensionem, cum re ipsa habeant, Angelus quidem præsentiam definitivam, qua est totus in toto certo loco, & totus in qualibet parte ejus; Deus autem immensitatem, quâ est præsens omni loco, ubicunque est locus. Item quia Deus per suam æternitatem correspondet diversis partibus temporis, & durationum creaturarum, dicimus in ejus æternitate esse partes virtuales durationis. Pari igitur modo in eo quod habebit aliquid æquivalens rebus distinctis, & virtuti quæ est in illarum multitudine, admittenda erit distinctio, & multiplicitas virtualis. Atqui datur in prædicatis, etsi summè indistinctis, æquivalentia ad res plures, earumque virtutem distinctam. Ergo da-

QUÆST. III. *De Attributis Dei* 91

tur inter illa virtualis distinctio. Minor probatur, quia ibi est æquivalentia unius rei ad plura, ubi vel una res per se habet aliquid quo realiter ab aliis distinguitur, & per se adhuc aliquid præstat, quod præstant aliæ res à se realiter distinctæ; vel etiam ubi una res præstat quod fit per plures entitates divisim, ita ut cum una res præstet unum tantum, & alia aliud tantum; ipsa utrumque faciat. Atqui hi duo modi constituendi & præstandi plures effectus formales dantur in Deo, & ratione illorum Deus subest diversis quæ illi tribuimus prædicatis. Ergo.

3. Quod spectat ad primum modum, ille est communis Deo cum omnibus rebus. Nam nulla res est, quæ determinatè sumpta, non habeat aliquid quo ab omni alio distinguitur, & præterea aliquid in quo cum aliis multis convenit, ita ut præstet idem quod faciunt illa alia formaliter per suum esse. Sic Petrus habet hoc quod sit Petrus, quod illi soli convenit: & præterea tam habet principium discurrendi, quàm Paulus, & ad hoc illi æquivalet: idemque est de singulis assignabilibus rebus, quæ determinatè sumptæ, continent in se unde & convenient cum aliis, & ab illis omnibus distinguantur. Unde est in illis aliqua æquivalentia ad plura: Pari ergo ratione

est in Deo aliquid quo ab omnibus aliis entibus secernitur; & hoc est aſeïtas : & aliquid in quo cum creatis etiam entibus convenit : & est ratio ſpiritûs , & ſubſtantiæ , quodque de gradibus illi eſſentialibus eſt verum , idem quoque invenitur in proprietatibus , quæ præter eſſentiam , illi conveniunt. Nam per potentiam ut ſic , per ſcientiam , per amorem boni , ſi hæc abſtractè ſumantur , convenit etiam cum creatis entibus : per rationem autem omnipotentia , etiam creativæ , per rationem omniſcientia , nihil non videntis , per rationem amoris ſummè ſancti , & ad oppoſita bona , ex ſe , ſeipſo determinabilis differt ab omni entium creatorum virtute , ſcientiâ , amore, &c. Ergo eſt in Deo unde & conveniat cum aliis entibus , & diſconveniat ab illis ; qui eſt primus modus æquivalentia ad diſtincta.

4. Quod ſpectat ad ſecundum modum, ille habetur in Deo cum determinatione tum ad duos ſubalternos , & ſpeciales modos , qui in ipſo ſolo locum habent ; tum ad unum tertium qui illi cum creaturis eſt communis.

5. Primus conſiſtit in identitate reali unius rei cum pluribus inter ſe realiter diſtinctis. Nam eſſentia per ſuam cum perſonis identitatem realem, continet, &

facit quod personæ ; quæ tamen sunt inter se distinctæ : ita ut prædicata quæ cuique personæ conveniunt , eadem , non in sensu quidem formali , at secundum rem , verè de ea dicantur , cum sic non possint dici de aliis personis. Hinc quia paternitas generat , essentia quoque realiter generat : filiatio autem , & spiratio passiva , non eodem modo generant. Et quia filiatio in Incarnatione unitur humanæ naturæ , divinitas quoque secundum rem eidem unitur , & incarnatur ; non autem paternitas , aut spiratio passiva , quia illæ non identificantur per se filiationi , ut natura.

6. Secundus in Deo specialis modus, quo una res præstat effectus formales, qui aliunde inveniuntur constituti per res diversas, est determinabilitas unius per seipsum ad diversa disjunctivè , quæ extra ipsum non possunt haberi nisi per distinctas, & diversas entitates : sic actus divinæ voluntatis ita est volitio unius ex duobus contradictoriis, ut potuerit esse volitio alterius: & actus divini intellectus ita est visio Petri, ut potuerit esse scientia de non existentia, & de non futuritione ejus , cum in creatis volitio contradictoriorum, & judicia opposita de eodem, non possint haberi nisi per actus omnino distinctos, & absolute incumpossibiles. Quare in Deo modus ille præstandi id quod alibi invenitur consti-

tutum per diversas entitates, est planè specialis.

7. Tertius modus præstandi per simplicem entitatem effectus formales qui etiam per diversas entitates constituti reperiuntur, est unius rei cum duabus, aut pluribus aliis comparatæ, æqualis quoad vim extensivam perfectio. Et hic, ut dixi, Deo communis est cum creatis. Nam si-
cut in nobis unus actus sufficit ad ea repræsentanda quæ contingit repræsentari per duos, putà cum concipimus uno actu Petrum & Paulum, quos seorsim possumus cognoscere, ita Dei cognitio sufficit ad universa quæ ab hominibus & Angelis seorsim cognoscuntur, distinctè attingenda. Eademque est ratio de actu divinæ voluntatis, comparato cum quibuscumque distinctis actibus, quibus creatæ voluntates volunt divisim aliqua quæ Deus ipse vult. Nam eadem est extensio illius actus divini, & infinitè major. Quare præcisâ cognitionis, & volitionis divinæ excellentiâ, & spectatâ solâ illorum actuum extensione, est in illis æquivalentia unius rei simplicis, ad multa quæ alibi sunt de facto distincta: ac proinde est virtualis distinctio, quam Deus ipse cognoscit etiam antecederet ad nostros conceptus, & sublato omni ordine ad ipsos, quia talis æquivalentia est in talium rerum virtute, etiam si

à nobis non cognoscatur, nec cognoscibilis esset: Quod si quis per distinctionem virtualem intelligat distinguibilitatem illarum rationum formalium, & æquivalentiarum per nostrum intellectum, eam Deus novit supposita possibilitate intellectus limitati, & habentis conceptus rerum inadæquatos: & tales etiam rationes, ut substantes, vel substare aptas illis conceptibus, distinctè novit: non tamen propriè loquendo ipse per se distinguit cum hoc dicat imperfectionem. Et de hac re philosophandum est sicuti de universalibus, quæ ipse per se non facit, sed factibilia à nobis per nostras præcisiones, cognoscit.

SECTIO QUARTA.

*Solvuntur argumenta quibus astruitur
distinctio formalis ex natura rei,
inter Dei prædicata.*

1. **P**rima ratio ex Scoto in 1. dist. 8. q. 4. num. 17. est hæc. Distinctio objectorum formalium nunquam est in cognitione intuitiva, nisi sit in objecto intuitivè cognito. Cujus rei ratio est, quia cognitio intuitiva attingit rem ut in se est. Atqui Deus intuitivè se cognoscens, videt se generare intellectu, non autem voluntate. Ergo intellectus, & voluntas in:

Deo ex parte ipsius Dei, & non tantum per nostros conceptus inadæquatos distinguuntur.

2. Respondeo distinguendo majorem, nisi sit in objecto sive formaliter, & absolute, sive virtualiter, & per æquivalentiam ad aliud, eo modo quo per visionem repræsentantur, concedo: nisi sit in objecto formaliter & per ejus esse absolutum, cum non videatur sic inesse, nego. Et dico Deum non videre se non generare per voluntatem sumptam secundum suum esse absolutum, & sine ulla relatione ad aliud Deo extrinsecum; sed videre tantum se non generare per voluntatem, prout objicibilem nostris conceptibus, & sumptam prout æquivalet nostræ voluntati, dicenti ordinem ad actus entitativè distinctos ab actibus nostri intellectus, & diversæ rationis ab illis. Deus enim generat per viam repræsentationis, & assimilationis, quæ ratio inest actibus nostri intellectus, non autem actibus nostræ voluntatis. Ad talem autem Dei visionem sufficit in intellectu, & voluntate Dei, itemque inter intellectionem, & volitionem ejus distinctio per talem æquivalentiam, talesque connotationes constituta: quia visio intuitiva, eademque comprehensiva, fertur etiam in ea quæ sunt in re virtualiter, ac fundamentaliter, & in omnes
status

status rei, etiam extrinsecus ei advenientes per nostros conceptus: & illam ut substantem nostris omnibus acceptionibus inuenitur, & de illa sic considerata iudicat, videtque ei, uno modo sumptæ, non convenire prædicata, quæ alio modo sumptæ, & secundum rem conveniunt. Et nisi in hæc omnia ferretur, aliquid lateret videntem.

3. Objicit secundò Scotus. Intellectus noster formans hanc propositionem, Intellectus divinus formaliter non est voluntas: sapientia non est bonitas, & similes, non causat actu suo collativo veritatem illarum propositionum, sed illam invenit in objecto: siquidem ex eo quòd res est, vel non est, propositio est vera, aut falsa, non verò ex hoc quòd hoc, vel illo modo concipitur.

4. Respondeo, Intellectum nostrum non causare veritatem illius propositionis, causando rem enuntiatam, sed determinando acceptionem terminorum, ita ut in subiecto propositionis res accipiat pro seipsa cognita secundum unam virtualitatem præcisè, non autem pro seipsa ut habente aliam, in prædicato autem accipiat pro seipsa præcisè ut habente illam aliam. Hinc in sola tali acceptione, denotata per ; Tò formaliter, propositio prædicta est vera: & erit illa falsa, si termini secundum se

absolutè, sine relatione, tum ad ea quibus æquivalent, tum ad nostros conceptus inadæquatos accipiantur. Ad axioma, dico illud ita esse intelligendum, ut ex eo quòd res est, vel non est absolutè, enunciatio de illa absolutè sumpta, sit vera, aut falsa: ex eo autem quòd res est, vel non est secundum aliquam virtualitatem, quæ in ea spectatur præcisivè ab aliis, propositio quæ de illa sic considerata formatur, veritatem habeat, aut falsitatem. Et sicut respectu nostri intellectus termini sic accepti propositionem veram efficiunt, non autem aliter sumpti, ita idem evenit respectu illius cognitionis qua Deus rem, ut nostris conceptibus, secundum talem virtualitatem, aut æquivalentiam objicibilem, videt.

5. Objicit tertio Scotus, Distinctio quæ est inter intellectum, & voluntatem Dei, est fundamentum distinctionis realis, quæ est in emanationibus ad intra. Nulla autem distinctio realis præexigit necessariò distinctionem, quæ est tantum rationis: sicut nec aliquid quod est purè reale, præexigit aliud quod est merè ens rationis. Ergo distinctio attributorum non est tantum rationis, sed aliquo modo ex natura rei. Assumptum probatur, quia ens reale, quod contradistinguitur ab ente rationis, est illud quod ex se habet esse, circum-

scripto omni opere intellectûs. Quidquid autem dependet ab ente rationis, vel necessariò præexigit illud, non potest habere suum esse circumscripto omni opere intellectûs, ut intellectus est. Ergo nihil quod præexigit ens rationis, est verè ens reale.

6. Respondeo primò, fundamentum distinctionis quæ est in emanationibus divinis, esse infinitatem, seu infinitam perfectionem Dei, quæ exigit necessariò communicationem infinitam, ac proinde communicationem ad intra : cum nihil ad extra necessarium sit. Communicatio autem realis non potest esse nisi inter distincta. Unde infinita Dei perfectio exigit necessariò distinctionem, quæ non potest esse nisi in suppositis, naturam, & naturæ communicationem terminantibus.

7. Respondeo secundò, admittendo quod etiam intellectus, & voluntas sint principia immediatiora illarum emanationum, non distinctionem illorum, quæ est quid accidentarium, & posterius perfectione illorum, sed ipsam illorum perfectionem habere rationem principii, & ad hoc nullam præexigi distinctionem, quia non est verum universaliter, ad rationem principii respectu distinctorum, præquiri distinctionem ex parte ipsius principii : Et in nobis intellectus, & voluntas, ex probabiliori sententia non distinguuntur rea-



liter, sed tantum per ordinem ad suos actus elicitos realiter distinctos: & sunt tamen principia diversitatis quæ est in illis actibus: & posterior est distinctio petita ex illis, quàm ratio principii, quæ ipsos actus antecedit. Multo autem minùs intellectus, & voluntas Dei, ut sint principia emanationum distinctarum, debebunt aliter distinguì quam per ordinem ad earum terminos; vel per æquivalentiam ad potentias intelligendi, ac volendi, quæ habent actus elicitos inhærentes, realiter distinctos. Quod si distinctio actualis, & independens ab intellectu, esset fundamentum emanationum divinarum, esset aliquid simile mysterio Trinitatis, ante ipsam Trinitatem, imò aliquid ultra, quia esset distinctio absolutorum, cum Trinitas dicat tantum distinctionem relativorum: & distinctio illa, juxta dicta sectione secunda, non modò realis esset, sed cum carentia identitatis: quod non cadit in distinctionem divinarum personarum.

8. Objicit quartò Scotus; Non possunt verificari contradictoria de eodem. Atqui de intellectu, & voluntate Dei verificantur contradictoria, nempe generare, & non generare, quorum primum convenit intellectui, secundum voluntati. Ergo est distinctio aliqua inter intellectum, & voluntatem Dei.

QUÆST. III. *De Attributis Dei.* 101

9.. Respondeo distinguendo maiorem, de eodem habente distinctionem virtuales, aut fundamentalem per comparisonem ad alia extrinseca, aut quomodocumque distincta, subdistinguo, de illo eodem secundum unam virtualitatem, aut æquivalentiam, aut connotationem accepto, iterum concedo: de eodem sic diversimodè sumpto, nego: & dico illa quæ secundum se contradictoria sunt, non esse contradictoria respectu talium subjectorum, virtualiter, aut æquivalenter plurium, & secundum illam multipliciter diversimodè consideratorum, quia ex Aristotele 1. Elench. c. 4. contradictio est affirmatio, & negatio ejusdem de eodem secundum idem. In qua definitione, Tò, secundum idem, intelligi debet ut de eo quod affirmatur aut negatur, ita & de eo de quo fit affirmatio, aut negatio, ita ut si in eo diversa sit acceptio, non sit contradictio. Est autem in præsentī materia diversa acceptio illius rei quæ subicitur, dum spectatur nunc sub ratione intellectûs, nunc sub ratione voluntatis. Sumitur enim primo modo secundum æquivalentiam ad nostrum intellectum, secundo autem secundum æquivalentiam ad nostram voluntatem: quæ duæ potentiæ in nobis, vel sunt realiter distinctæ, ut volunt multi, vel per ordinem ad suos actus, tum ab ipsis poten-

tiis, tum à se invicem, sine identitate distinctos, per nostrum intellectum quasi distinctæ concipiuntur. Item sumitur intellectus divinus secundum habitudinem quam dicit ad Filium, in cujus productione est principium formale quo: & voluntas secundum habitudinem quam dicit ad Spiritum sanctum, in cujus productione est item principium formale quo. Et talis diversitas ordinis præbet intellectui nostro fundamentum præscindendi, ac proinde distinguendi unam potentiam ab alia: Itaque in prædicatorum, quæ contradictoria esse possent, verificatione de intellectu & voluntate Dei sic sumptis, non est contradictio: idque ad eam deest quod ad eam maximè requiritur, nempe omnimoda identitas quoad acceptionem subjecti.

10. Instabis, veræ sunt istæ propositiones, essentia divina secundum rem; seu à parte rei communicatur: paternitas secundum rem, seu à parte rei non communicatur. Sic autem nulla erit in modo acceptionis diversitas: ac proinde si nulla est ex parte objecti distinctio, verificabuntur de eodem eodem modo sumpto contradictoria. Quod veræ sint illæ propositiones, probatur, quia primò quidem de essentia, id de fide est, cum illa sit in tribus personis una, & Filius per ejus com-

municationem à Patre, itemque Spiritus sanctus per ejus item communicationem à Patre & Filio, sit Deus. Certum est item paternitatem realiter non communicari, quia si communicaretur Filio, Filius esset Pater, sicut quia illi communicatur Deitas, ipse est Deus. Quia igitur sic verificantur illa contradictoria de essentia, & paternitate eodem modo, sive à parte rei sumptis, oportet in illis esse distinctionem ex natura rei formalem, actua-lem, à nostro intellectu independentem.

II. Respondeo negando esse eundem acceptionis modum in utraque propositione: quia dum dicitur, paternitas secundum rem non communicatur, sumitur paternitas præcisivè ab essentia cui identificatur: & voces illæ secundum rem, & à parte rei tantum significant objectum propositionis esse verum, ac reale, non autem excludunt omnem præcisionem: quia si omnem præcisionem excluderent, & significarent rem, quæ est paternitas; falsa esset illa negativa propositio, paternitas non communicatur. Nam verè res illa quæ est paternitas communicatur, cum illa sit essentia. Confirmatur, quia proprium est termini abstracti sumi in sensu formali, & præcisivè à multis ipsi identificatis. Et licet voces illæ secundum

rem, aut à parte rei, additæ termino abstracto, destruere soleant sensum formalem, & importare identicum, hîc tamen prævalet, ex communi acceptione ratio abstracti, ut paternitas ab essentia præscindatur: quia voces eo modo sumi debent, quo veram propositionem efficiunt, non autem eo quo falsam. Quia igitur erit falsa propositio, nisi sumatur præcisivè ab essentia, siquidem sensus erit, rem, quæ est paternitas non communicari; quod est falsum; de facto sumitur cum tali præcisione: ac proinde res ipsa quæ est Deus, non eodem modo accipitur, cum dicitur, essentia secundum rem communicatur, & paternitas secundum rem non communicatur. Et idem evenit quoties de personarum divinarum proprietatibus loquimur. Accipimus enim distincta, ut distincta, secundum id per quod opponuntur, præscindendo ab eo in quo habent identitatem, quia alioqui negationes essent falsæ, siquidem ad illarum veritatem requireretur carentia identitatis. Sicut in creatis quæ omnimodè & merè distinguuntur.

12. Objicit quintò Scotus; Sapientia in communi distinguitur à bonitate in communi. Ergo infinita sapientia distinguitur à bonitate infinita, quia quidquid convenit rationi communi, convenit

QUÆST. III. *De Attributis Dei.* 105
omnibus inferioribus sub ea contentis.
Antecedens probatur, quia sapientia in
communi, & bonitas in communi diver-
sas habent definitiones.

13. Respondeo sapientiam & bonita-
tem sub abstractissimo & maximè com-
muni conceptu suo, præscindere ab iden-
titate, aut distinctione, quæ illis advenit
per differentias contrahentes ad creatam,
& increatam sapientiam, & bonitatem.
Ad probationem consequentiæ distinguo:
quidquid determinatè & positivè conve-
nit, aut etiam negativè per exclusionem
alicujus formæ, aut prædicati ab ipso ge-
nere, concedo. Sic omni animali conve-
nit esse appetitivum, & non esse lapidem,
& similia, ad quæ ratio animalis deter-
minatè se habet. Quidquid convenit præ-
cisivè, & tantum in potentia de se indif-
ferente ad opposita, à quibus secundum
se abstrahit, quo modo animali convenit
esse risibile, rugitivum, & cætera, nego.
Alioqui sic liceret retorquere argumen-
tum. Sapientia in communi, & bonitas
in communi non excludunt distinctionem
rei à re, & possunt ad illam determinari:
unde in creaturis distinguuntur realiter.
Ergo sapientia infinita, & bonitas infi-
nita distinctionem realem non excludunt,
& ad eam determinari possunt, quod im-
plicat. Ad probationem, dico ad diversi-

tatem definitionum sufficere distinctionem virtuales, in qua fundatur formalis, quæ fit per nostros conceptus præcisi-
vos.

14. Instabis, quando sapientia, & bonitas diversis definitionibus explicantur, itemque cùm dicitur, intellectus divinus generat, voluntas non generat, sermo est de sapientia, bonitate, intellectu, & voluntate primò intentionaliter sumptis, & sine ulla relatione ad sapientiam ac bonitatem creatam, aut ad nostrum intellectum ac voluntatem.

15. Respondeo ita quidem esse sermonem de illis primo-intentionaliter sumptis, ut neque ulla secunda intentio, neque relatio ad extrinsecum, sit id quod definitur, & de quo generatio affirmatur, & negatur: non autem ita ut secunda intentio aptitudinalis, seu conceptibilitas per nostros conceptus præcisiuos, fundata in æquivalentia ad sapientiam, ac bonitatem creatam, aut ad nostrum intellectum, ac voluntatem, non sit ratio sub qua ita solitariè ac seorsim definiuntur, & tale prædicatum suscipiunt, aut non suscipiunt. Nam verè talis conceptibilitas, & distinguibilitas, itemque fundamentum ejus ad formandas tales definitiones, ac propositiones, præsupponitur, hocque sublato, essent impossibiles. Cæ-

terum nec illa conceptibilitas, nec fundamentum ejus in ratione fundamenti, per tales conceptus præcisivos attingitur, quia ratio sub qua aliquid fit, aut taliter se habet, aut patitur, ipsa non fit, aut taliter se habet, aut patitur. Sic intelligibilitas hominis ipsa non intelligitur per conceptum hominis: universalitas, quæ est ratio sub qua natura prædicatur de inferioribus, ipsa non prædicatur de illis. In artibus dirigibilitas actionis non dirigitur, &c. Unde idem est de illa distinguibilitate, ac proinde de æquivalentia ad multa, aut de quavis connotatione ad extrinseca, quæ est fundamentum ejus.

16. Objicit sextò Scotus; sapientia in Deo magis identificatur sibi ipsi, quàm justitiæ, aut bonitati. Ergo respectu justitiæ, ac bonitatis, deest illi aliquis identitatis modus quem habet ratione sui: quia comparatio secundum magis & minus importat aliquem defectum ex una parte. Hic autem defectus non potest esse identitatis realis, cum in Deo præter personas, omnia sint necessariò unum realiter. Ergo est defectus identitatis formalis, oppositæ distinctioni formali ex natura rei.

17. Respondeo distinguendo antecedens, in Deo per se absolutè sumpto,

nego : considerato per comparisonem, & æquivalentiam ad extrinseca, & prout à nobis intelligibili, concedo. Et dico hinc sequi tantum quod sapientia in Deo sic spectato, careat ea distinctione quam habent sapientia, & justitia, quia sapientia, est una tantum virtualitas, cui proinde convenit identitas distinctioni virtuali opposita. Quanquam dici potest sapientiam in Deo dividi virtualiter, & æquivalenter in innumeras cognitiones, sicut scientia, quæ respectu sapientiæ potest dici magis particularium cognitio, & actus liber pari modo dividuntur. Sed semper verum est, sapientiam totaliter sumptam, etsi in seipsa sit illo modo divisa, non tamen dividi à seipsa, sicut dividitur & distinguitur ab aliis rationibus formalibus non contentis in ipsa.

18. Instat Scotus, saltem major est distinctio inter sapientiam, & justitiam, quàm inter sapiens, & sapientiam. Sed hæc in Deo ratione distinguuntur. Ergo illa formaliter ex natura rei, ante operationem intellectûs.

19. Respondeo uno sensu magis distinguui, aut potius magis expressè distinguui sapientiam, & justitiam, in quantum termini isti dicunt explicitè duas rationes virtualiter distinctas, quæ à se invicem

expressè præscinduntur : sapiens autem supra sapientiam dicit tantum implicitè , & confusè id quod habet sapientiam non exprimendo quid illud sit: Est autem essentia , & personalitates indistinctè sumptæ , vel etiam seorsim sumptæ. Et potest dici, omne quod est in Deo præter ipsam rationem sapientiæ , esse id quod habet sapientiam , cum ipsa sola non possit esse subjectum à se denominatum. Nego autem illam majoritatem distinctionis , aut potius expressiorem distinctionem , esse extra distinctionem rationis , fundatam in distinctione , & multiplicitate virtuali , quia scilicet id quod habet sapientiam , nempe essentia , & personalitates , tam distinguitur ab ipsa sapientia , quàm sapientia à iustitia : & tantum verum est quod illud non ita expressè significatur per Tò sapiens.

20. Objicit septimò Scotus ; Qui negat in Deo distinctionem ex natura rei , frustra ostendit unum attributum sequi ex alio , quia tam perfectè cognosceretur Deus sub uno attributo , quàm sub omnibus , siquidem sub ratione unius adæquatè cognoscitur.

21. Respondeo negando sequelam , quia ad illationem unius ex alio sufficit distinctio virtualis , petita ex comparatione , & proportionem unius cum multis

extrinsecis, quorum unum est principium, & aliud effectus à principio distinctus, vel quorum unum est unus effectus prior, & aliud posterior, ut cum cognoscitur rationalitas per ordinem ad cognitionem immaterialem, ac discursum: risibilitas autem per ordinem ad risum, qui est posterior effectus. Item cum distinguitur intellectus per ordinem ad intellectiones, quæ sunt priores volitionibus, & voluntas per ordinem ad illas priores volitiones: in qua distinctione voluntas spectatur ut sequens ex intellectu, & per illum bene demonstratur ut aliquid virtualiter ab eo sequens. Neque id, dum circa Deum fit, ullam in eo imperfectionem importat.

22. Confirmatur à fortiori. Nam si valet argumentatio, qua probatur de definito passio; per definitionem ejus, quæ accipitur pro medio termino, etsi solo explicitè concipiendi modo differat à definito, non autem virtualiter: multò magis sufficiens erit quoad diversitatem terminorum, illa argumentatio, in qua tria erunt virtualiter distincta, ut si de essentia divina, per vim intelligendi, demonstretur voluntas, & per modum intelligendi, libertati prælucentem, nempe per discretionem unius boni, & alterius boni cum illo impossibilis, liber-

QUÆST. III. *De Attributis Dei* III
tas circa finita bona. Valere autem argu-
mentationem in qua definitio accipitur
pro medio termino, docet Aristoteles
lib. 2. Poster. & approbat Scotus ipse in 1.
dist. 2. num. 2. Cujus ratio est, quia ter-
mini non sunt synonymi, cum unus re-
præsentat objectum confuse, & alter
distinctè & explicitè, ut docet ibidem
Scotus.

SECTIO QUINTA.

Solvitur alia difficultas.

PRæter supradicta, objici potest hæc
difficultas. Non implicat distinctio ex
natura rei, in eo subjecto, quod de se est
indifferens ad unum ex duobus prædica-
tis, ex natura rei impossibilibus. At
Deus est ejusmodi subjectum. Ergo. Major
probat, quia illa per se, & ex parte ob-
jecti distinguuntur, quæ secundum suum
esse formale, ex parte objecti, impossi-
bile est esse simul. Omnis enim impossi-
bilitas in rebus positivis est plurium in-
compossibilitas, cum nullus conceptus
entis positivi simplex sit impossibilis.
Quare si incompossibilitas est ex parte
objecti, præciso omni ordine ad nostrum
intellectum, erit quoque par distinctio
inter prædicata quæ impossibile erit esse

simul : ac proinde quod est capax illorum, cum tali indifferentia & implicantia simultatis, distinguetur similiter ab illis, & ei per se non repugnabit distinctio inter varias rationes formales, quæ ipsi insint. Minor probatur, quia Deus est subiectum de se indifferens ad volitionem, vel nolitionem mundi. Ad hoc enim est de se liber. Velle autem ut sit mundus, & nolle ut sit mundus sunt prædicata incompossibilia. Ergo.

2. Ad solvendum hoc argumentum, quod jam proposui in selectis quæstionibus philosophicis, quæst. 9. Metaph. sect. 3. & hujus loci omnino proprium est, suppono quod postea disputatione 5. de voluntate Dei, ostendam, actum liberum divinæ voluntatis esse actus necessarii ordinem, ac relationem ad objectum extrinsecum. Nam cum in Deo non sit potentialitas, ut in nobis, ad ipsam substantiam actûs, quo velit, aut nolit aliquid, quo modo Deus mutaretur : necessarium est esse in voluntate ejus actum ab ipsa indistinctum, quo immutato velit, aut nolit quæ vult, aut non vult. Itemque necessarium est ad Dei libertatem, ut actus ille sit determinabilis ad hoc vel illud volendum, aut nolendum, circa res à Deo eligibiles. Denique necesse quoque est, ut actus ille ad unum potius quam

QUÆST. III. *De Attributis Dei.* 113
ad aliud ita determinari possit, ut id quo
formaliter constitueretur illa determinatio,
non sit de se mutationis in suo proprio
subiecto constitutivum, licet sit ejus in
alio effectivum. Hoc autem non potest
esse aliud quàm habitudo aliqua, & res-
pectus ad objectum extrinsecum: idque
postea, ex dicendis de actu libero Dei,
magis patebit, ac stabilietur contra ea
quæ objici possunt. Hoc igitur nunc po-
sito, nego volitionem, & nolitionem
alicujus objecti, ad quas Deus est de se
indifferens, esse duo ex natura rei distin-
cta, quia implicat relationes à suo sub-
jecto proximo, ac fundamento, aliter
quàm per nostrum intellectum distingui,
siquidem quod aliquo modo se habet ad
aliud, si per aliquid à se ante operationem
nostri intellectus distinctum, taliter se
haberet, non jam ipsum, sed istud alte-
rum sic se haberet: & sic per distinctio-
nem relationis, tolleretur ejus effectus
formalis. Quod cum verum sit de omni-
bus relationibus, quæ sunt accidentia
metaphysica, licet suis subiectis contin-
genter insint, verum quoque erit de iisque
tales sunt in Deo, & inter quas ad invi-
cem comparatas, non intervenit id quod
in personalitatibus divinis distinctionem
facit, nempe realis emanatio, & proces-
sus unius ab alia. Nihil enim in illis erit

constitutivum distinctionis ex parte ipsius objecti per se sumpti, nihilque unde ipsa astruatur.

3. Ad rationem in oppositum, nego impossibilia debere illo modo distinguui ex parte objecti, nisi virtualiter per æquivalentiam ad multa, & ratione ratiocinata, quia satis est si differentiam, etiam realem, habeant, prout differentia distinctioni opponitur. Ad quod adverte aliud esse quod aliqua differant, etiam realiter; aliud quod ullo modo absolutè ex parte sui distinguantur: siquidem Petrus & Paulus non differunt in ratione hominis, & tamen in ea distinguuntur realiter. Contra autem in eodem individuo, putà in Petro à parte rei, differunt ratio dextri, & sinistri: itemque vicinitas & distantia respectu eorum quæ vel circa ipsum immotum moventur, vel ab eo recedunt. Similiter statio, & sessio, si sumantur præcisè sub ratione stationis, & sessionis, id est non considerato actu interno vitali qui intervenit ad transitum à statione ad sessionem, sed solis rationibus constitutivis stationis, & sessionis; nec tamen ista omnia aliter quàm ratione ratiocinata distinguuntur, quia tantum dicunt essendi modos se se quidem formaliter excludentes, sed sola subjecti sui realitate reales, & aliunde

non habentes inter se invicem ullam realem, sive activam, sive passivam emanationem. Et sicut illorum modorum diversitas absque ulla distinctione sufficit ad differentiam realem, ita etiam sufficit ad impossibilitatem. Imò per hoc est inter illos differentia realis, prout differentia opponitur distinctioni, quòd se se necessario ab eodem subjecto excludant, cum alioqui quæ se se non excludant, sint tantum disparata, ut ratio sedentis, & ratio dextri. Et idem etiam in Deo est dicendum. Nam Verbum non esse unitum humanitati, & esse illi unitum, si non esse & esse unitum sumantur prout se tenent ex parte Verbi, sunt modi essendi realiter differentes, ut pote impossibiles: & tamen ab ipso Verbo omni modo indistincti ex parte ipsius Verbi, ut pote nullam in eo compositionem constituentes. Hoc igitur posito, ad propositum exemplum de volitione, & nolitione Dei circa idem objectum dico inter illas duas habitudines quæ voluntatis divinæ actui de se inesse possunt disjunctivè, hoc ipso quòd sunt impossibiles, esse quidem differentiam realem, quæ etiam ex earum summa contrarietate constat, quia à parte rei multò aliter, & planè contrariè se habet voluntas Dei ad mundum, cum ipsum vult, quàm se habuisset, si ipsum no-

luisset. Itemque aliter se habet voluntas Dei ad sanctum Petrum, cujus post peccatum voluit misereri, quam si se habuisset sicut ad Judam, cujus voluit permittere impœnitentiam. At nego esse ullam distinctionem ex parte Dei inter illa omnia, tum quia sufficit ad eorum impossibilitatem prædicta differentia realis, consistens in diversis ejusdem rei modis inter se quidem formaliter oppositis, at indistinctis, & sola illius rei realitate realibus: tum quia distinctio actualis formalis absoluta, quæ virtuali opponitur, summæ Dei simplicitati obesset, & supponeret in eo potentialitatem, quæ imperfectionem dicit, nempe capacitatem ad distincta intrinseca: quod nullo modo in Deo admitti potest.

4. Dices non minùs mirum videri quòd in Deo detur capacitas ad prædicata ita realiter differentia, quàm quòd detur distinctio formalis ex natura rei, quæ non sit realis.

5. Respondeo negando propositionem. Disparitas petitur ex jam dictis, quia differentia illa est tantùm relativa, & necesse est Deum ad extrinseca posse diversimodè se habere realiter, quod solum nomine differentia realis hic intelligitur. Distinctio autem illa est absoluta, & Deum faceret in se compositum, quod

ejus simplicitati repugnat. Deinde constat ex mysterio Incarnationis, non repugnare Deo modum se habendi relativè ad extrinsecum, realiter differentem à priore, cujusmodi est status unionis hypostaticæ, qui non semper illi convenit, & differt realiter à negatione sui, prout se tenet ex parte ipsius Verbi, eique identificatur, & denominat ipsum intrinsecè unitum. Quod quia sine ulla imperfectione, aut passione, & sine augmento perfectionis, antecederet ad hoc infinitæ, ei advenit, ipsum non mutat, etsi per hoc aliter se habeat Physicè, & realiter. Item sancti Patres talem in Deo differentiam agnoscunt, dum dicunt nos debere confugere à Deo irato, ad Deum placatum, ita ut Deus, ut iratus sit terminus à quo, Deus autem ut placatus sit terminus ad quem, idque se teneat etiam ex parte ipsius Dei, & secundum rem maneat, posita nostra conversione ad ipsum. Contra autem distinctio omnis se tenens ex parte objecti per se absolutè sumpti, frustra ponitur, & sanctorum Patrum authoritati, & rationibus supra sect. 2. allatis repugnat.

SECTIONES SEPTIMA.

*Refertur ac refellitur multorum recentiorum
Doctrina circa virtualem in Deo
distinctionem.*

Multi recentiores distinctionem in Deo extra propriam personarum ponunt, quam ita virtualem esse volunt ut sit dispar ab ea virtuali quæ in creatis admittitur inter gradus Metaphysicos, aliaque prædicata à se invicem præscindenda. Docent enim illam sufficere ad suscipienda verè ex parte objecti prædicata contradictoria. Et talem ponunt tantum inter essentiam divinam, & personalitates, itemque inter eandem essentiam & actus Dei liberos, qui sunt scientia contingentium, & decreta circa illa; Ratio hujus sententiæ est quia, inquiunt, de essentia & personalitatibus, itemque de essentia & actibus illis verificantur prædicata à parte rei contradictoriè opposita; non verificantur autem talia ex parte objecti de aliis rationibus quæ Deo insunt. Prædicata illa sunt, communicari realiter, quod convenit essentiæ: & non communicari realiter, quod convenit paternitati: generari, quod convenit filio, & non generari, quod convenit essentiæ; simi-

liter essentia & prædictis actibus liberis conveniunt ista opposita, esse necessario, & esse contingenter: posse coëxistere negationi eorum quæ producta sunt, & non posse coëxistere illi negationi: posse comparari cum oppositis actibus, & esse aliquid impossibile cum ipsis. Nam potest Dei essentia non coëxistere mundo; visio autem quam Deus habet de mundo, & decreta de rebus existentibus, non possunt coëxistere illi negationi. Item essentia de se potest compati cum scientia, & cum decretis de non existentia mundi: scientia autem visionis, & decreta de iis quæ sunt, non possunt compati cum illis. Non sic autem se habent natura & intellectus Dei, intellectus & voluntas, intellectus & scientia Dei necessaria. Nam nulla talis oppositio esse potest inter illos conceptus objectivos, nec talia contradictoria de ipsis aut de ullis rei creatæ prædicatis ipsi realiter identificatis verificantur. Igitur ibi admittenda est distinctio virtualis major: quæ in Deo solo locum habeat.

Hæc doctrina refellitur, quia vel volunt illa contradictoria verificari de essentia Dei & personalitatibus, itemque de essentia Dei, & actibus liberis, sine ulla nostri intellectus præcisione sumptis, vel de illis aliqua præcisione restrictis: si hoc

secundum, quod revera fit, respondent: contra est, possunt quoque de aliis etiam intrinsicis Dei & creatorum entium prædicatis verificari contradictoria mediantibus nostris conceptibus præcisivis, puta de intellectu, & voluntate Dei. Nam in Deo intellectus generat, voluntas non generat. Et in creatis rationale est risibile, admirativum, liberum, capax divinorum: sensitivum autem & vegetativum etsi in eodem individuo rationali identificata, non sunt talia. Quare ex verificatione contradictoriorum, etiam intrinsecorum, facta mediante aliqua præcisione mentali inter essentiam Dei & personalitates, itemque inter essentiam, & actus liberos, nihil habetur unde arguatur in illis distinctio virtualis major quàm quæ reperitur inter alia Dei, & entium creatorum prædicata realiter identificata.

Nec dici potest magis esse contradictoria illa quæ de essentia Dei, & personalitatibus, itemque de essentia & actibus liberis verificantur. Nam omnis oppositio contradictoria est maxima, nec datur in contradictionibus formaliter sumptis majoritas oppositionis, licet detur majoritas in causis ejus, & in qualitate extremorum quæ ad ipsam contradictionem materialiter se habent in omni enim contradictione unus terminus quicumque ille sit,

QUÆST. III *De Attributis Dei.* 121
fit, per alium totaliter tollitur, ac destruitur. Quare nulla est ex inæqualitate contradictionum disparitas.

4. Quod si dicas, de essentia & personalitatibus, itemque de essentia & actibus liberis verificari sine illo ordine ad nostrum intellectum contradictoria quo modo non possunt verificari de aliis sive Dei, sive entium creatorum conceptibus objectivis realiter identificatis, contra est, quia in talibus contradictionibus pars negativa semper erit falsa, si affirmativa est vera seclusâ omni præcisione mentali, Ratio est quia negatio est malignantis naturæ, & removet terminum negatum à subiecto adæquatè sumpto, nisi subiectum illud per aliquam præcisionem ad certam inadæquatam acceptionem determinetur, ac restringatur. Cum autem res sumitur secundum se, prout nullum dicens ordinem ad intellectum, sumitur adæquatè secundum omnes rationes quæ ipsi insunt. Itaque de ea sic sumpta non potest ulla ex talibus rationibus, sine falsitate negari. Quare cum dicitur, paternitas secundum se & secluso omni ordine ad nostrum intellectum non communicatur, propositio spectatâ vi verborum est falsa, quia paternitas sic sumpta est res quæ est paternitas, in qua includitur essentia: Res autem in qua includitur essentia, communicatur. Ut autem aliquo

modo sit vera, necesse est, juxta dicta præcedenti sectione, ad objectionem quartam, verba illa, secundum se, & secluso omni ordine ad nostrum intellectum, ita explicari ex communi modo loquendi in hac materia, ut hic tantum sensus sit; objectum verè ita se habere, ut ratio quæ subest conceptui præcisivo paternitatis non communicetur: non autem is debet esse sensus ut excludatur præcisio paternitatis ab essentia quo modo importaretur res quæ est paternitas, unde falsa esset propositio. Quare malè ex propositione taliter explicanda & sic tantum vera argumentantur qui eam sumunt quasi esset sine ulla mentali præcisione, verissima. Et idem est de aliis consimilibus propositionibus, cujusmodi est ista, essentia secluso omni ordine ad nostrum intellectum non generat, quia essentia sumpta in eo sensu quem verba ista de se important, cum identificetur filiationi, secundum hoc generatur. Imò secluso omni ordine ad nostrum intellectum, nullum est abstractum, cujusmodi est essentia, sed est Deus trinus in quo includitur Filius generatus. Hinc qui præcisionem excludunt, in ipso eam excludendi modo illam usurpant.

5. Refellitur præterea illa verificatio contradictoriorum in Deo sine ordine ad nostrum intellectum quia qui hoc astruunt,

falsò supponunt sufficientiam ad suscipiendam secundum se à parte rei contradictoria, esse perfectionem quæ idcirco quòd sit perfectio maxima, enti infinito tribui debeat propter infinitatem ejus. In qua eam fundari volunt. Contra enim est, quia verificare secundum se & ex parte sui contradictoria est proprium chymærarum, idque quia posito impossibili, sequitur quodlibet, etiam impossibile, simulque esse & non esse. Omni autem vero enti propter ipsam veritatem quæ est propria entis, repugnat ex parte sui talis verificatio, cum ex eo non sequatur aliud quam esse quod est. Quod si omne verum ens talem verificationem excludit ut veritati sui esse oppositam, multò magis summum & optimum ens illam ita excludet, ut ipsa ei infinitè repugnet.

6. Confirmatur hoc ipsum & magis declaratur, quia illud per se implicat quod fundatur in unione impossibilium. Atqui salvatio contradictoriorum à parte rei in eodem ente fundatur in unione impossibilium, quâ videlicet junguntur simul esse & non esse ejusdem rei, aut formæ, aut rationis formalis in illo eodem ente per se sumpto. Ergo talis salvatio per se implicat. Unde non cadit nisi in chymærica entia, & summè in Deo impossibilis est.

7. Refellitur ulterius illa doctrina, quia

si reipsa daretur in Deo sufficientia ad verificanda de essentia & paternitate secluso ordine ad nostrum intellectum, contradictoria, esset inter illos duos conceptus objectivos distinctio, non tantum virtualis, ut volunt adversarii, sed formalis ex natura rei, quod nolunt, & impugnant. Ratio est, quia qualis est acceptio terminorum, de quibus contradictoria prædicata verificantur, talis est inter illos distinctio; si accipiantur in sensu reali, distinctio est realis: si cum præcisione à se invicem, distinctio est mentalis. Si ergo accipiantur secundum se, sine ulla præcisione facta per intellectum, distinctio erit ex natura rei, quia ipsa debet esse verificationi, cui supponitur, proportionata. Et in hoc fundantur syllogismi secundæ figuræ, quod ea de quibus contradictoria verificantur, quo modo verificantur, eo non sint idem. Quare si quis, concessis in sensu reali præmissis, extrema conclusionis vellet esse tantum virtualiter distincta, contra vim syllogismi faceret. Concedunt autem adversarii in hoc syllogismo, Essentia communicatur, paternitas non communicatur, ergo paternitas non est essentia, præmissas esse veras, secluso omni ordine ad nostrum intellectum, ac proinde debent admittere distinctionem quæ sit vera distinctio,

secluso omni ordine ad nostrum intellectum. Distinctio autem virtualis non est verè distinctio, quia quod est tantum virtualiter aliquid, non est illud simpliciter, & absolutè, & virtualitas est terminus alienans significationem termini cui adjungitur, ad significandam virtutem ejus in alio perfectiori eminenter contentam, ut dictum est sectione tertia. Ergo debent admittere aliam quàm virtualem distinctionem inter paternitatem & essentiam, ac proinde saltem formalem ex natura rei. Potest hoc ipsum expeditiùs isto modo concludi per argumentum ad hominem, essentia secluso omni ordine ad nostrum intellectum communicatur (quæ propositio est vera) paternitas secluso omni ordine ad nostrum intellectum non communicatur, quam dicunt ipsi esse veram, ergo paternitas secluso omni ordine ad nostrum intellectum non est essentia. Vel etiam, Ergo essentia, secluso omni ordine ad nostrum intellectum, non est paternitas. Quod dici non potest, quia importat distinctionem formalem antecedentem, omnes nostros conceptus inter essentiam & paternitatem.

SECTIO SEPTIMA.

*Qualiter detur in nostro intellectu præcisio
unius prædicati divini ab alio.*

1. **Q**Uæritur an quando concipitur una ex rationibus objectivis, quæ in Deo virtualiter distinguuntur, juxta prædicta, conceptus sic terminetur ad unam, ut alias in se, & secundum propriam rationem non attingat: an verò, dum una concipitur expressè, aliæ secundum propriam rationem terminent eundem conceptum implicite & confusè.

2. Respondeo ex communi sententia: quam sequuntur omnes Thomistæ, & alii quos refert & sequitur Vasquez. 1. p. disp. 127. c. 2. dari præcisionem ejusmodi mentalem, & dum una ex illis rationibus concipitur, alias tantum realiter & identicè, non autem formaliter attingi, seu attingi rem quæ illis identificatur, non ipsas secundum suam rationem virtualiter, aut per aliquod connotatum distinctam.

3. Probatur primò auctoritate scripturæ & conciliorum loquentium de attributis Dei, nec non de natura, & quavis personalitate, quasi de conceptibus objectivis ratione saltem distinctis. Speciatim au-

tem sexta Synodus generalis, actione 11. in epistola Sophronii, quæ approbatur act. 13. sic loquitur; *Et juxta quod Deus est, id ipsum existit unumquodque, dum seorsim consideratur, ipsâ intelligentiâ, quod non separabile, separante, ut Pater, & Filius, & Spiritus sanctus, aliud & aliud non dicantur.* Ibi manifestè distinguitur, & distingui posse per mentem asseritur id quod est commune personis, nempe divinitas ab ipsis personalitatibus: unde fit ut personæ, etiam singulæ, per se habentes naturam communem cum suis differentiis, non sint aliud & aliud.

4. Probatur secundò rationibus quarum prima est; quia si non datur talis præcisio poterit naturaliter cognosci mysterium Trinitatis, & cognoscetur ab omni cognoscente Deum, & credetur ab omni credente, consequens est omnino falsum. Ergo & antecedens. Sequela probatur, quia impossibile erit cognitionem. Et assensum terminari ad divinitatem, quin terminetur implicite quidem at formaliter ad omnia divinæ naturæ identificata, cujusmodi sunt personæ. Itaque non ignorabitur illud mysterium ab eo cui non fuerit revelatum; & cognoscetur eo modo quo cognoscitur definitum, cujus non habetur definitio: quod non impedit ne res verè, etsi imperfectè obijciatur

intellectui. Item qui credit Deum, non poterit discredere Trinitatem, quia non poterit negare id cui implicitè quidem, at formaliter assentitur.

5. Secunda ratio est, quia ex prædicationis divinis in abstracto sumptis, unum potest negari de alio in sensu formali, putà justitia de misericordia, voluntas de intellectu: & secundùm omnes veræ sunt istæ propositiones misericordia formaliter non est justitia: voluntas formaliter non est intellectus. Hoc autem non esset verum; si utraque ratio in utroque conceptu includeretur secundùm se, etiam implicitè: quia quod aliquid concipiatur duobus modis, uno implicitè, alio explicitè, hoc non mutat rem ipsam conceptam. Itaque ne sic quidem aliquid potest negari de se ipso: quod hic contingeret. Sic non potest negari definitum de definitione sumpta objectivè, putà homo de animali rationali. Tam autem idem negabitur de seipso in hac propositione, misericordia non est justitia, si in conceptu justitiæ continetur implicitè misericordiæ ratio formalis, quàm si diceretur, animal rationale non est homo.

6. Tertia ratio est, quia distinctio virtualis sufficit ad aliquid majus, quàm ad dictam præcisionem omnimodam. Sufficit enim ut personalitas Verbi terminet natu-

QUÆST. III. *De Attributis Dei.* 129
ram humanam, non autem divinitas.
Ergo multò magis sufficiet, ad illam præ-
cisionem.

Contrarium tenent Nominales, Gre-
gorius Arim. in 1. dist. 8. q. 2. a. 1. & 2.
Major ibid. q. 1. Gabriel dist. 2. q. 1.
Ocham. ibid. q. 2. Idemque in Philoso-
phia de rationibus abstractis sentiunt
Hurtadus, Arriaga, Oviedus & alii.
Dicunt ergo illi conceptibus præcisivis
idem semper sub eadem ratione intrinseca
significari, cum sola connotatione diver-
forum terminorum sive effectuum. Et sic
in præsentī materia Deus in ordine ad ef-
fectum parcendi, est misericordia: in or-
dine ad effectum puniendi est justitia:
prout habet negationem imperfectionis,
defectibilitatis, mutabilitatis, & limita-
tionis, infinitus, immortalis, immensus,
absque eo quod quidquam formaliter di-
versum in Deo ipso apprehendatur: quasi
ipse ordo non sit in illis omnibus forma-
liter diversus, & aliquid Deo intrinsecum,
licet ipsum referens ad extrinsecum. Ne-
que enim esse ad aliud, tollit esse in eo
quod refertur: alioquin ipsum non re-
ferret.

7. Probant autem illi suam sententiam,
primò quia ubi non est unum & aliud,
non potest unum cognosci sine alio.
At in Ente simplicissimo non est unum &

aliud. Ergo in eo non potest unum cognosci non cognito alio : quod tamen dicit præcisio omnimoda unius rationis ab alia, unde si ea detur circa ens simplicissimum, idem cognoscetur, & non cognoscetur. Respondeo esse idem & aliud virtualiter & æquivalenter, quod sufficit intellectui non adæquanti objecta, ut virtualitatem unam attingat, non attingendo aliam. Neque continget unum cognosci, & non cognosci simpliciter & eodem modo : sed unum cognosci secundum unam virtualitatem, aut æquivalentiam, & non cognosci secundum aliam nisi identicè. Quod si virtualis illa distinctio contradictionem non tolleretur, in eam quoque inciderent adversarii : quia tam contradictoria sunt cognosci explicitè, & non cognosci explicitè ; quod illi concedunt fieri circa prædictas rationes formales : quàm cognosci & non cognosci : nec datur aliud quod istam contradictionem tollat, quàm distinctio virtualis, & æquivalentia, & diversitas habitudinum intrinsecarum Deo, & referentium ipsum ad extrinseca.

8. Probant secundò quia tam impossibile est unum cognosci secundum unam rationem, & non cognosci secundum aliam, saltem implicitè, quàm unum produci secundum unam rationem, & non produci secundum aliam. Hoc au-

QUÆST. III. *De Attributis Dei.* 131
tem impossibile est. Ergo & illud.

9. Respondeo primò, negando majorem, quia dici potest productionem terminari ad rem physicè sumptam, seu ad entitatem physicam: quæ omnes suas formalitates absolutas continet: cognitionem autem ferri in rem ut repræsentabilem à nostro intellectu imperfecto, & habente conceptus inadæquatos objectorum.

10. Respondeo secundò, negando minorem, quia de facto in divinis Filius producit secundum filiationem, & Spiritus sanctus secundum spirationem passivam, & neque Filius, neque Spiritus sanctus producuntur secundum naturam. In creatis autem producit albedo, non autem similitudo, quæ ipsi identificatur: si quidem ad relationes intrinsecus advenientes non datur motus, item entitas actus mali producit à Deo, non autem malitia, etsi illa sit aliquid positivum, ut pote relativum. Est enim relatio difformitatis cum regulâ morum, seu cum lege divina; & licet malitia consisteret formaliter in privatione, illam tamen comitaretur ista relatio non producta à Deo, ipsam entitatem actûs producente.

SECTIO OCTAVA.

*An Attributa Dei includantur in essentia
ejus.*

1. **A**ffirmant Ferrariensis, Bannez, Torrez, Molina, Suarez, Valentia, Ruiz, & multi alii. Negant, sanctus Thomas in 1. dist. 2. q. unica art. 3. ad. 7. Ubi dicit attributa divina radicari in essentia. Scotus, & Scotistæ omnes, Guillelmus, Altissiodorensis, Henricus, Capreolus, Cajetanus, Vasquez, Gillius Fasolus, & alii.

2. Horum sententia probatur primò Patrum autoritate, licet eâ se prævalere putent prioris sententiæ auctores. S. Justinus in reprehensione responsionis à gentilibus datæ ad tertiam interrogationem, seu quæstionem Christianorum, dicit aliud esse Dei essentiam, aliud voluntatem: Et voluntatem in esse in essentia, & ex essentia prodire: essentiam verò non inesse nec prodire ex voluntate. Item Deum omnia quæ facit, non essentiâ facere, sed voluntate: ac denique nulla ratione fieri posse ut idem sint velle, voluntas, & qui vult. Nazianzenus orat. 38. dicit Deum cognosci à nobis non ex his quæ in ipso sunt, sed quæ circa ipsum:

ideſt non ex eſſentialibus, ſed ex proprietatibus eſſentiæ. Et idem repetit orat. 42. Ubi Nicetas ait, *ſam verò bonum, juſtum, & ſanctum naturam quidem comitantur, caterùm ipſam naturam haud quaquam aperiunt.* Niſſenus libro de ſancta Trinitate, circa finem, ait bonum, juſtum, & ſimilia nomina intelligi circa naturam Dei, & qui illorum, & naturæ rationem reddit, ac definitionem, non eandem reddere utrorumque rationem. Quorum autem ratio definitioque diverſa, eorum natura quoque differens eſt, &c. Baſilius libr. 1. contra Eunomium. Quonam pacto non deridendus, ſi creandi virtutem ſubſtantiam eſſe dicat, ſi providentiam rurfus ſubſtantiam, eodem modo præſcientiam, & omnem itidem operationem ſubſtantiam putet. Cyrillus Alexandrinus lib. 2. Theſauri, dicit attributa voce, modoque dicendi accidentia eſſe, quoniam modo accidentium ea intelligimus. Item aſſerit, illa non ſignificare ſubſtantiam. Quare ſi includerentur in eſſentia, eſſentia eſſet ens per accidens. Damascenus lib. 1. fidei cap. 4. Ita habet: ſi bonum, ſi juſtum, ſi ſapiens, ſi quidvis aliud dixeris, non naturam dicis Dei, ſed ea quæ circa naturam. Quod ſi alii patres, & ſanctus Thomas Deum dicunt eſſe eſſentialiter ſapientem, juſtum, &c. Tantùm

volunt ista ex essentia Dei necessariò sequi : itemque Deo convenire absque ulla entitate distincta , cum in creaturis , virtutes tum intellectûs , tum voluntatis , sint aliquid distinctum ab ipsis. Et multi etiam , ut sanctus Thomas , ipsum intellectum , & voluntatem à nostra anima realiter distinguunt , imò & proprietates à natura , ut risibile à rationali.

3. Probatur secundò ratione , quia essentia est primum in re , ex quo alia secundùm nostrum concipiendi , & inferendi modum oriuntur. Et differentia essentialis est id ex quo proprietates cum natura convertibiles , & maximæ rei perfectiones consequuntur. Hoc autem posito , non omnia Dei attributa sunt ei essentialia , siquidem consequuntur , & inferuntur ex eo quod ejus essentiam constituere ostensum est disputatione præcedenti , nempe ex aseitate.

4. Confirmatur , quia alioqui non poterit constare quænam Deo essentialia sint. Si enim dicas de essentia ejus esse omnia omnino ejus attributa , tam contingentia , quàm necessaria : contra est , quia rationi & notioni essentiæ repugnat ; quod in ea includatur aliquid quod sit contingens ei cujus est essentia. Si sola & omnia necessaria: contra est quia aliquod attributum necessarium non est sine determinatione

ad aliquid contingens, quia illud disjunctivè multas rationes importat, quarum unaquæque poterat non esse, modò eâ deficiente adesset alia ipsi opposita. Et talis est omniscientia Dei, quæ necessariò involvit, vel visionem petri, vel scientiam de non existentia ejus, & sic de aliis. Itaque semper essentiam Dei secundum suum esse determinatum, sumptam, ingreditur aliquid contingens, quia ipsa omniscientia, quæ determinatè sumpta non potest esse sine rationibus particulibus contingentibus non tot quin pluribus, ipsam essentiam ingreditur. Quod si à constitutione essentiæ excludas omnia attributa quæ etiam secundum suæ determinationis modum includunt aliquid contingens, extra essentiam erit aliqua perfectio simpliciter simplex, nempe omniscientia; & hoc posito, corrumpit principium quo probatur alias perfectiones esse de essentia Dei, nempe quòd ipsa prima essentia ut sit perfectissima, debeat includere omnem perfectionem simpliciter simplicem.

5. Dices scientiam Dei dividi in essentialem, & accidentalem & illam quidem esse perfectionem simpliciter simplicem, hanc verò non item, cum dicat aliquid cujus oppositum fuisset æquè bonum.

6. Respondeo non per hoc solvi argu-

mentum quia non sola scientia essentialis, sed omniscientia & comprehensio omnium est perfectio simpliciter simplex melior ipsa quam non ipsa : & hujus compositionem disjunctivè ingreditur vel visio de petro, vel scientia de non existentia ejus, ac proinde aliquid Deo contingenter conveniens : quod si non continetur in essentia Dei, ut de facto non continetur, aliqua perfectio simpliciter simplex, nec multæ aliæ tales continebuntur.

7. Hic nota quod magis constabit ex dicendis de libero Dei decreto, nihil esse in Deo quod si non sit perfectio simpliciter simplex in tali perfectione non includatur, & ad eam sit saltem disjunctivè requisitum.

8. Objiciunt primò, essentia Dei quàm perfectissima fieri potest, concipienda est perfectiùs autem concipietur, si intelligatur includere omnes perfectiones simpliciter simplices, & reliquas eminenter.

9. Respondeo ex dictis disputatione præcedenti, essentiam Dei debere concipi perfectissimam in ratione principii radicalis, ex quo aliæ perfectiones oriuntur; & si quid tali principio addatur, non solam conceptum iri essentiam.

10. Objiciunt secundo, non implicat essentiam esse formaliter infinitam quo posito,

QUÆST. III. *De Attributis Dei.* 137

posito, id dicendum est de essentia Dei. Non potest autem illa esse formaliter infinita, nisi omnes perfectiones simpliciter simplices formaliter contineat, & reliquas eminenter.

11. Respondeo negando majorem, quia implicat id quod est de se accidens metaphysicum, rem quantificans aut qualificans, esse de essentia ipsius substantiæ talis autem est infinitas, quæ ita se habet ad suum subjectum, sicut in rebus creatis quantitas, aut qualitates earum, est que ratio formalis ab earum finitudine contradiuncta, ac proinde in ordine ad nostros conceptus præcisivos, accidentalis. Huc spectat quod essentia Dei deberet includere subsistentiam ipsius totalem, ex tribus personis constantem, quia illa est perfectio simpliciter simplex, melior ipsa quam non ipsa.

12. Obijciunt tertio, attributa secundum nos perficient essentiam, quia addent ei aliquam perfectionem.

13. Respondeo distinguendo, perficient in ratione principii radicalis, dando ei ut sit principium nobilius, nego, quia hoc est proprium differentiarum, quæ ulterius naturam determinant, & rationes genericas contrahunt: perficient in ratione subjecti, seu potius qualificabunt, sicut in creatis quoque entibus proprietatem

res qualificant naturam, à qua ut principio radicaliter illas continente, secundum nostrum concipiendi modum oriuntur, concedo, & dico in hoc non esse imperfectionem, cum sit de ratione essentiae ut sit radix proprietatum de ipsa demonstrabilem à priori, & prima essentia ab aliis sufficienter differat per hoc quod sit radix perfectionum infinitarum, quas in se praecise sumpta non continet formaliter, sed eminenter.

SECTIO NONA.

An Attributa includant essentiam.

1. **A**ffirmant Torrez, Suarez, & alii tum includentes attributa in essentia, tum non includentes, & praecisionem non mutuam ponentes.

2. Negant Capreolus, Aureolus, & qui distinctionem ponunt ex natura rei, nec non plurimi ex iis qui solam distinctionem virtualem, & rationis ratiocinatæ. Inter prædicata Dei non notionalia agnoscunt. Cum his.

3. Dico Attributa divina essentiam Dei non includunt formaliter. Probatur primò, quia id quod ex alio oritur, & per illud demonstratur, non includit suum illud principium, & demonstrationis me-

dium. Atqui attributa Dei ex essentia ejus oriuntur, & per eam demonstrantur. Ergo. Probatur secundò, quia præscindendo ab essentia, rectè assignatur cujusque attributi differentia adæquata à perfectionibus creaturarum, in quibus est aliquid commune genericum cum illis attributis. Nempe differentia illa est modus ad quem tales perfectiones contrahuntur, ac determinantur in Deo: putà differentia scientiæ consistit in hoc quòd sit comprehensio Dei, & omnium aliorum supercomprehensio, omnium visibilium intuitio, & omnis veri summe clara notitia. Differentia potentiæ consistit in ratione omnipotentiae, omnium naturalium, & supernaturalium creativæ. Et par ratio est de modo perfectionis, ad quam in Deo contrahitur ratio generica cujusque attributi: qui modus non est aseitas, sed ex aseitate promanat, eique est proportionatus.

4. Objiciunt adversarii primò, illud est de essentia attributi divini, per quod differt à simili perfectione creata. Hoc autem est ipsum esse divinum, quod idem est ac esse à se. Sic sapientia divina per hoc ipsum quòd est divina, differt à creata. Ergo per hoc quod est à se.

5. Respondeo negando minorem, quia esse divinum in attributo denotat tantum

subjectum attributi, non differentiam ejus, quæ sita est in prædicto modo perfectionis, ad quem intra idem genus determinatur ratio quæ est communis perfectioni creatæ & divinæ. Sic differentia sapientiæ divinæ est quòd sit omnium altissimarum rerum, ac principiorum intuitio, in ratione ipsa intuitionis summè perfectæ. Quòd autem sit divina, id perinde se habet ad illam sicut ad cognitionem humanam, hoc quod sit humana: quod omnino non est differentia ejus. Nam si quæ-ratur per quid differat à cognitione Dei & Angeli, multò melius respondebitur differre per hoc quod sit affinis cognitioni sensuum, quo-ad modum repræsentandi objecta: unde est repræsentativa spiritualium per modum entium corporeorum: quæ omnia ipsam per se cognitionem afficiunt: atque intra suum genus determinant. Idem ergo de divina cognitione dicendum est, quæ per ipsum sibi proprium objectorum repræsentandorum modum differentialiter constituitur: & dum divina dicitur, accipitur prout inexistens subjecto cui identificatur.

6. Obijciunt secundò, ex Aristotele. 1. Post. text. 1. 9. & 13. propositionis per se in secundo modo dicendi subjectum est de essentia prædicati, nempe natura de essentia proprii quarto modo, & sic ri-

sibile est homo aptus ridendum. Itaque in Deo quoque ipsa natura erit de essentia proprietatum quæ ab illa fluunt.

7. Respondeo non strictè loquendo subjectum dici esse de essentia illius prædicati, sed hoc sensu quòd tale prædicatum ex essentia sua hoc habeat quòd non possit convenire alteri subjecto: quòd non convenit aliis prædicatis quæ non dicuntur in illo secundo modo dicendi per se, putà progressivo, respectu hominis. Hoc autem non facit ut propriè natura habeat rationem differentię, sed ut habens naturam non sit subjectum per accidens, neque etiam inadæquatum, ut homo progressivi, sed per se solum determinatum, & convertibile: quæ omnia stant cum hoc quòd tale subjectum sit extra essentiam proprietatis in abstracto sumptæ: & in compositione concreti se habeat ut materiale cui proprietas inest.

8. Objicit tertio Suarez ad hoc ut sapientia sit essentialiter actus increatus, non est necesse ut concipiendo sapientiam, attendatur expressè ratio actus increati: sed satis est si implicite concipiatur, ita ut reflectens se supra objectum sui actus, videat id illi inesse: alioqui possemus ita quantitatem abstrahere, ut in illa non includatur ens, neque accidens, neque aptitudo ad inhærendum: quod est impos-

sibile quare sicut ad inclusionem entis, & accidentis in quantitate, satis est si hæc ita includantur in conceptu d'mensionum, ut si is qui quantitatem concepit, sese reflectat supra objectum talis conceptus, videat in eo rationem entis, & accidentis : ita ad inclusionem entis à se in sapientia divina, satis est si ratio illa ita concipiatur, ut reflectens se intellectus noster supra sapientiam à se intellectam, videat illam non esse ab alio, sed à se.

9. Respondeo primò non satis esse si se reflectens supra objectum sui actus, videat objecto tali id bene congruere, sed requiri ut videat id in tali objecto, saltem implicitè fuisse repræsentatum, alioqui quisquis concepit essentiam hominis, conciperet omnia de homine demonstrabilia, putà esse admirativum, risivum, liberum, capacem divinorum, & ista omnia includerentur in essentia hominis.

10. Respondeo secundò, eum qui conceptâ præcisè Dei sapientiâ, se reflecteret supra objectum sui actus, animadvertendum rationem illam esse planè formaliter aliam à ratione actus increati, quia est summa perfectio cognitionis, omnes altissimas causas & principia intuitivè & clarissimè comprehendentis. Ad exempla

de ente, & accidente, concedo in conceptu dimensionum involvi rationem talis entis, quia ens est analogum, à quo nihil abstrahit, quia posita omni abstractione, quidquid restat, cum non sit nihil, est ens. Nihil autem impedit ne inter essentiam Dei, & attributa ejus, sit perfecta præcisio, cum sint rationes objectivæ virtualiter differentes, unde una in abstracto potest negari de alia. Quod autem spectat ad rationem accidentis, dico illam non involvi in conceptu differentiali dimensionum, quia cum accidens rectè ponatur univocum ad sua inferiora, perfectè abstrahit à differentiis eorum. Quod si concipiendo dimensiones, videam illas aptas inhærere, tunc non solam rationem specificam ac differentialem quantitatis concipiam, sed totam essentiam quantitatis, prout constantem ex genere & differentia.

SECTIO DECIMA.

An Attributa Dei alia in aliis includantur.

I. **Q**uæstio non est de attributis generalibus respectu inferiorum, puta de scientia Dei universaliter sumpta, respectu scientiæ quam habet de prædestinatis, vel de tali prædestinato; sed de

attributis, aut contra distinctis, ut sunt intellectus, & voluntas; misericordia, & iustitia: aut disparatis, ut sunt intellectus & misericordia. An unumquodque illorum includat aliud, ac proinde omnia alia attributa.

2. Affirmant Suarez lib. 1. de essentia Dei cap. 13. Molina quæsti. 28. art. 2. disp. 4. Granadus tract. 2. disp. 7.

3. Negant communiter alii. Horum sententia probatur quia attributa non sunt attributa nisi præsupposita distinctione virtuali, & per ordinem ad nostrum intellectum vel inadæquatè concipientem. Si enim secundum se absolutè spectetur Deus, omnia sunt unum absque ulla nisi personarum distinctione. Posito autem quòd secundum illam eminentialem multipliciter spectentur, & secundum conceptibilitatem in ea fundatam, aliquid negetur de uno quod de alio affirmatur, putà de voluntate negatur quod generet, & de intellectu quod spiraret. Imò unum negetur de alio, hoc pacto, intellectus formaliter non est voluntas, & misericordia, non est formaliter iustitia: necesse est unum ab alio perfectè præscindere, alioquin idem negaretur de se ipso. Et præterea Spiritus sanctus tam produceretur, per intellectum, quam per voluntatem, eique natura eodem modo communicaretur

municaretur ac filio, siquidem voluntas idem diceret quod intellectus: & quæ formaliter idem omnino dicunt, non distinguuntur, ne quidem formaliter, etsi unum dicat aliquid expressius, & aliud magis implicite, ut constat ex definitione & definito.

4. Confirmatur, quia attributa non sunt nisi res eadem, sive entitas Dei, prout correspondens diversis creaturarum perfectionibus, vel ad diversos effectus relata. Atqui res prout correspondens uni perfectioni virtualiter distinguitur à se ipsa, prout correspondet alteri perfectioni: & sic conceptus ejus non debet ferri in ipsam, ut correspondet alteri. Nam ad concipiendam rem illam prout correspondet sapientiæ creatæ, impertinens est concipere illam ut correspondentem durationi nostræ, & sic de cæteris. Ergo unum attributum non includit in suo conceptu conceptum objectivum alterius: quod solum hic intenditur.

5. Objiciunt primò, Attributa singula includunt differentialiter essentiam Dei. Ergo unum quodque includit aliquid de formali alterius.

Respondeo falsum esse antecedens; ut constat ex sectione præcedenti.

6. Objiciunt secundò. Unumquodque attributum est infinitum in ratione entis.

Ergo totam perfectionem summi entis, optimo modo includit; ac proinde non identicè tantum, sed essentialiter, et si de tota illa perfectione non ita expressè, neque formaliter mens nostra cogitet. Ita Suarez.

7. Respondeo satis esse, si unumquodque attributum sit in una ratione entis, seu in sua propria ratione infinitum, idque non essentialiter, sed ita ut infinitas ei in sensu formali conveniat: Neque aliter ipsi Deo infinitas convenit, quæ nullo modo est essentia ejus, sed proprietas per se ex ea sequens, ac de Deo in sensu formali, sicut quævis proprietates de iis, ex quorum essentia oriuntur, prædicabilis: Ratio est, quia infinitas de se est negatio terminorum in aliqua perfectione. Illi autem negationi præsupponitur perfectio quæ est radix, & fundamentum ejus. Sic ante negationem terminorum in potentia Dei, præcedit vis creativa omnium naturalium, & supernaturalium. Ante negationem terminorum in essentia Dei præcedit ratio perfectionis simpliciter simplicis omnes alias à se perfectiones simpliciter simplices ac Dei proprias radicaliter continentis: quæ ratio est aseitans.


8. Quæres an attributa Dei sint numero infinita eo modo quo potest esse numerus

in virtualiter distinctis, nempe non formalis, sed virtualis.

9. Respondeo ipsa attributa, si strictè sumantur non esse numero infinita: sed perfectiones Dei esse numero virtuali infinitas. Probatur quia attributa sunt quædam generales perfectiones, subdivisibiles in multas rationes inferiores, putà scientia in scientiam hujus objecti, & in scientiam illius objecti: idemque est de volitione, nec non de omnipotentia, quæ subdividi potest non modò in creativam, & eductivam: itemque in creativam substantiarum, & creativam accidentium, &c. Sed in creativam hujus rei, & creativam illius alterius rei, & sic in infinitum. Omnes enim illæ rationes formales sunt diversi conceptus objectivi. Et una quæque est perfectio digna Deo, nullam scilicet imperfectionem involvens. Et vis quidam creativa cujusvis effectûs, putà Petri, est perfectio simpliciter simplex, quia est melior ipsa quam non ipsa. Visio autem talis rei, putà ejusdem Petri, non est perfectio simpliciter simplex, quia non est melior cognitione quæ esse potuit de non existentia Petri; est autem perfectio ad compositionem perfectionis simpliciter simplicis quæ est omniscientia Dei, disjunctivè requisita, & de facto illius compositionem ingrediens.

supposita determinatione divinæ voluntatis ad creationem petri. Non sunt autem omnes illæ perfectiones tot idem attributa, quia assertâ ratione genericâ, sufficienter illas de Deo dicimus, unde in attributis Dei explicandis, non ulterior fit progressus. Jam illæ rationes generales non sunt numero, etiam virtuali infinitæ, quia generica sunt pauciora sub quibus cætera continentur: & omnia ad unum reduci debent nempe ad rationem actûs puri. Subdivisionum autem non datur terminus: & ideo tantum non est in illis numerus infinitus, quia in virtualiter tantum distinctis non est numerus nisi virtualis. Ex his constat datæ responsionis veritas.





QUÆSTIO QUARTA.

De Visione Dei.

SECTIO PRIMA.

An Deus sit naturaliter invisibilis omni intellectui creabili.

1. **C**ertum est nullam de facto dari creatam substantiam, cui naturale sit videre Deum: quæritur autem an de absoluta Dei potentia possit aliqua dari talis. Affirmant esse probabile, aut non satis probari quod istud implicet, Major in 4. dist. 49. q. 4. in fine Molina ad quæst. 12. art. 5. disput. 2. Valentia disp. 1. quæst. 12. puncto 3. & alii.

Negant D. Thomas 1. p. q. 12. a. 4. & Theologi communiter, Scotus, Cajetanus, Suares, Vasques, &c.

2. Horum sententia probatur primò ex scriptura. Nam 1. ad Timoth. c. 6. de Deo dicitur: *Qui lucem habitat inaccessibilem*, quæ verba absolutè prolata, absolutè quoque debent intelligi. Sicut & ista ejusdem c. 1. *Regi seculorum immortalis, invisibili.*

3. Probatur secundò ex Patribus, inter quos Augustinus epist. 112. c. 15. sic habet, *si queras quomodo sit invisibilis, si videri potest, respondeo esse invisibilem naturà, videri autem cum vult, sicut vult.* Consimilia habet D. Gregorius lib. 18. moralium cap. 39. & alii multis locis.

4. Probatur tertio rationibus. Prima est, quia si creatura aliqua posset naturaliter videre Deum, esset de se naturaliter beata cum solo concursu Dei ipsi debito. Non potest autem creatura sic esse beata, quia beatitudo debet esse bonum quod de se sit præmium conferibile à solo Deo, nec aliter acquisibile quàm per meritum propter cultum ipsi exhibitum. Decet enim Deum sic compensare virtutem, & amorem quo eum liberè super omnia diligimus. Quod ita verum est, ut etiam in statu puræ naturæ, qui absolute possibilis est, cum natura de se non sit mala, sed bona, & ad Dei gloriam ordinabilis, Deus daturus esset in præmium virtutis & cultûs qui ipsi exhiberetur, cognitionem sui abstractivam quidem ab existentia ejus, nec intuitivam, sed tamen ita perfectam, ut vires naturæ Physicas superaret, & isti cognitioni, atque amoris ex ea sequenti, annexa esset impeccabilitas ex peculiari Dei providentia circa statum beatitudinis, de cujus ratione est, ut in-

quit. S. Thomas, stabilitas sempiterna. Non debemus autem virtuti naturalialicujus creaturæ possibilis hoc attribuere, ut per vires suas Physicas sit beatissima, etiam ea beatitudine quæ est vel præmium gratiæ per auxilia & opera supernaturalia acquiratæ, vel hæreditas debita adoptioni per acceptam in Sacramentis gratiam constitutæ.

5. Secunda ratio est ex sancto Thoma, quæ sic proponitur. Ubi est impotentia ad cognoscendum aliter quàm ad modum entis potentialis, est impotentia ad videndum naturaliter Deum. Atqui in omni creabili ente est impotentia ad cognoscendum aliter quàm ad modum entis potentialis, id est entis, quod est de se in potentia ad actum, etiam suæ existentia, qua carere potest: ergo in omni ente creabili est impotentia ad videndum naturaliter Deum.

6. Major probatur, quia quandiu cognoscetur Deus ad modum entis potentialis, non repræsentabitur ut in se est, ac proinde non cognoscetur immediatè per seipsum in ratione objecti quod est de ratione visionis, atque intuitionis, quæ proinde repræsentat rem ut in se est.

7. Minor probatur, quia modus cognoscendi sequitur modum essendi, ita ut cognitum sit in cognoscente per cogni-

tionem ejus secundum modum cognoscen-
tis. Unde ens intellectuale quod cognos-
cit aliquid altioris ordinis, intelliget il-
lud non qualiter in se est, sed modo sibi
conformi, nempe ut corporeum, si ipsa
causa intelligens est corporea, ut homo,
& per modum saltem entis potentialis, &
creati, quia ipsa est ens potentiale, &
creatum. Quod confirmatur primò, quia
alioquin operatio esset nobilior, & par-
ticiparet de ratione entis altiozem gra-
dum, quàm principium ejus: quod non
potest esse verum de operatione merè
naturali. Confirmatur secundò, quia ob
illam rationem, seu ob impossibilitatem
cognoscendi ex propriis naturæ viribus
aliter quam per modum sui, & per spe-
cies sibi proportionatas, homo non po-
test naturaliter videre Angelum: nec po-
test illius impotentiae alia afferri causa,
quàm ista necessitas conformitatis inter
modum cognoscendi, & modum essendi.
Igitur per se & universaliter loquendo
nihil potest ex naturæ suæ viribus per se
præcisè sumptis, quidquam cognoscere,
nisi per modum sui. Ratio enim formalis
ex qua aliquid sequitur, debet universa-
liter valere, & illud inferre ubicumque
ipsa reperitur. Quo posito, omnis crea-
tura possibilis semper cognoscet Deum ad
modum entis potentialis, & per species

tali enti proportionatas, cum ipsa sit ens potentiale, ac proinde nunquam Deum per se, & immediatè, prout in se est, attinget: quod esset ipsum videre.

8. Confirmatur hoc ipsum ulteriùs, quia si creatura posset meliùs cognoscere quàm per modum entis potentialis, plus sese efferret ultra naturæ suæ conditionem, quàm si homo naturaliter cognosceret aliquid non per modum entis corporei, & videret Angelum. Nam ens per essentiam, quod solum est expers potentialitatis, magis est remotum, & secretum ab omni genere entium potentialium, & magis alterius ordinis, quàm res purè immaterialis, supra animam hominis. Cum igitur naturaliter sit impossibile homini transcendere modum cognoscendi cum aliqua similitudine ac proportionem ad res corporeas, ac sensibiles; unde non potest videre Angelum; multò magis erit impossibile cuivis spiritui creato, transcendere modum cognoscendi cum aliqua similitudine ad ens potentiale. Unde non poterit videre Deum, cum cognitio ad modum entis potentialis repugnet visioni intuitivæ entis per essentiam, de cujus visionis ratione est, ut ipsum, prout in se est, repræsentet.

SECTIO SECUNDA.

Solvuntur objectiones.

1. **O**bjicies primo ex Scoto. Angelus inferior videt naturaliter superiorem. Ergo modus cognoscendi non sequitur dicto modo ipsum essendi modum.

2. Respondeo primò supponi in antecedente doctrinam quæ à multis negatur, & repugnat plurimorum sanctorum Patrum auctoritati, nempe dari inæqualitatem, & diversos gradus naturæ inter Angelos. Docent enim communiter sancti Patres diversitatem ordinum, quæ est in differentibus Hierarchiis ipsorum, peti ex diversitate meritorum, indeque gloriam eorum disparem, & inæqualia esse lumina, & sic alios ab aliis aliquid participare, & illuminari ab ipsis, naturam verò & essentiam per se sumptam, esse in illis sicut in hominibus, unam specie. D. Basilii lib. 3. contra Eunomium, cum Eunomius objiceret, Spiritum sanctum esse naturæ diversæ à Patre, & Filio, quandoquidem ordine est ultimus in divinis Personis, respondet id non sequi. Nam in Angelis esse aliquem ordinem & tamen ultimum Angelum non idcirco esse diversæ naturæ ab aliis. Et eodem libro. Angeli,

inquit, *omnes, ut appellationis, unius sic ejusdem naturæ sunt inter se.* Athanasius homiliâ in id Christi Domini Matth. 11. *Omnia mihi tradita sunt à Patre meo, post medium, ita habet: Angeli inter se, & generis ratione, & cætera omnia cognati sunt, & ejusdem naturæ.* Idem in quæstionibus ad Antiochum, quæst. 3. cum interrogasset, quid inter se differant Angelorum essentia & essentia Dæmonum, hic respondet. *Essentia non differt, sed voluntas diversa est: sicut boni & mali hominis animas inter se differt.* Et quæst. 4. interroganti quæ sint Angelorum essentiæ, respondet *Una & eadem est essentia, sicut etiam: una tantum est essentia hominum.* Aliqui negant librum illum quæstionum esse Athanasii, sed certum est vel ejus esse, vel eo doctrinam illius contineri. Homilia verò ante citata, sine dubio, secundum omnes, illius est. Sanctus Damascenus in lib. primarum institutionum, cap. 7. ait, Angelum esse speciem infimam. Et lib. 1. Parallelorum cap. 6. refert ex Didymo istam sententiam. *Angeli omnes, ut nomen unum, sic unam quoque naturam habent.* Et Cyrillus Alexandrinus lib. 8. Thesauri cap. 2. naturam Angelorum appellat unam, priùsque locutus fuerat de unitate specifica. Idem habent multi alii sancti Patres ut fatentur ipsi

auctores scholiastici, qui pluralitatem specierum in Angelis ponunt. Augustinus in Enchiridio cap. 29. Docet propterea non fuisse redemptam naturam Angelicam, sicut fuit humana quia *tota natura humana* in peccatum incidit. *Non tota natura Angelica*. Quæ ratio, ut valeat, necesse est ut sit paritas in unitate naturæ plura sub se individua continentis, ac proinde potentis totaliter, vel non totaliter cadere: disparitas autem reperta sit in totalitate & non totaliter elapsorum in peccatum. Quod si in una natura specifica Angelica unicum esset individuum, quot ceciderunt Angeli, tot naturæ totæ periissent, ac proinde redimi debuissent. Merito igitur non admittitur diversitas, & inæqualitas in Angelis, quam sancti Patres improbant.

3. Dices, non esse possibilem in Angelis pluralitatem individuorum sub una specie. Ergo omnem pluralitatem in illis esse specificam. Antecedens probatur, quia implicat dari distinctionem merè numericam sine formali ipsius principio quod est materia, à qua Angeli planè secreti sunt, nullumque ad eam ordinem dicunt, sicut animæ rationales, quæ sunt corporum formæ.

4. Respondeo negando antecedens, cujus contrarium probatur positivè, quia

posito uno naturæ unius individuo, potest Deus producere aliud ens quod habeat parem vim ad producendos pares effectus, & non addet vim ad nobiliores, aut diversos. Alioqui producta anima una rationali non posset producere aliam huic sine defectu, aut excessu virtutis, æquivalentem, nec dissimilium effectuum capacem. Posita igitur illa paritate virtutis, ejusdem erunt naturæ specificæ, quia ad constituendam diversam speciem, requiritur differens principium, aut altiorum, aut saltem dissimilium operationum. Ergo erit tantum aliud individuum ejusdem naturæ specificæ. Et idem est de alia quavis natura creata, sub qua poterunt similiter produci plura singularia paris omnino virtutis. Ergo cujuscunque naturæ creatæ possibilia sunt plura individua.

5. Ad probationem, nego materiam esse per se principium omnis individuationis, ac distinctionis merè numericæ. Nam si hoc esset, variatâ materiâ, varieretur id quod per ordinem ab ipsam haberet suam individuationem. Itaque eadem numero anima non posset esse primum quidem in minimo infantis corpore, deinde in corpore senis, quod non est idem, nisi quoad modicissimam quantitatem, post tot aggenerationes, non tantum ad

augmentum corporis, sed ad reparationem deperditarum partium. Unde vix est aliter idem quàm per negationem desitionis in suffectione partium, non autem per negationem distinctionis ab illa prima corporis substantia. Quia igitur est eadem invariabiliter anima, non habet à materia suam ab aliis differentiam numericam. Nam ut illa debet esse semper eadem, ita & principium ejus. Deinde non possent esse in eodem subjecto duæ formæ solo numero differentes, siquidem ratio differendi non potest esse aliquid commune ipsis à se invicem differentibus. Possunt autem esse duæ formæ solo numero differentes in eodem subjecto, putà calor A, qui fuit heri, & calor B, qui est hodie in eodem ferro, quo modo non component unum ex ipsis conflatum totum, unde sine identitate continui numero planè differunt, & possunt à Deo conservari seorsim, etiam extra subjectum. Quo posito, per habitudinem ad idem connotatum tantum extrinsecè suam differentiam accipient: in quo est multiplex contradictio & similiter possunt esse duæ cognitiones de eadem re in eodem intellectu, una hodie, altera cras: & in voluntate duæ volitiones solo numero differentes, quo posito, erunt eadem contradictiones. Quare

implicat habitudinem ad subiectum esse rationem formaliter constitutivam multiplicitatis numeralis.

6. Quod si quæras, quænam ergo sit illa ratio, Respondeo esse entitatem quamlibet ejusdem speciei cum alia, prout sub communi ratione totius essentiæ ultimò differt, & dividit gradus superiores, quibus nullum addit principium agendi diversum, estque in se indivisa, & divisa à quocunque alio, & hæc ratio invenitur, non in rebus tantum multiplicabilibus per divisionem, quæ numerum efficit; sed etiam in iis quæ cum indivisibiles sint, seipsis sunt multæ, & distinctæ, sub eadem natura, in qua habent relationem identitatis, & in duabus animabus humanis, quæ alioqui non essent ejusdem speciei. Sic manet possibilitas multorum individuorum intra unam speciem, in omnibus entibus creatis, ac proinde in Angelis. Unde non est facile recedendum à sententia Patrum asserentium id reipsa, & de facto esse quoad omnes Angelos.

7. Et pro hac sententia valet ratio quam afferunt communiter illius auctores, Albetus magnus apud Carthusianum, & S. Bonaventura in 2. dist. 9. q. 1. art. 1. Gregorius à Valentia in 1. part. disp. 4. q. 1. punct. 3. & alii. Ratio illa est quia

unitas naturæ in omnibus Angelis fuit aptior ad communem societatem, & amoris conjunctionem, quam Deus inter illos esse voluit.

8. Et ex hoc principio respondeo, etsi detur quod in Angelis sit specifica diversitas, species illas constitui per differentias quæ potiùs varietatem, quàm ingentem præminentiam efficiant. Unde non se habent sicut rationale, & irrationale ad animal, quæ ita differunt, ut rationale nihil percipiat eorum quæ ad rationale ut sic pertinent, sed sicut ad animal irrationale differentia ipsum subdividentes, quæ constituunt species ejusdem ordinis, inter quas quæ sunt inferiores, cognoscunt id quod est nobiliorum proprium: quo modo animal debilius & timidum, novit fortitudinem, & audaciam leonis: & canis bene novit, & quodammodo sentit præminentiam hominis, ut agentis sensibilis cum ipsi se subjiciat, & suo modo famuletur ob pabulum.

9. Hic adverte, ex eo quòd aliquod ens non possit cognoscere nisi ad modum sui, seu cum aliqua similitudine ad suum esse, non sequi præcisè & formaliter quòd non possit videre aliquid seipso perfectius, sed quòd non possit videre id cujus visioni repugnat repræsentatio ad modum talis cognoscentis. Nam cum possit ali-
quid

quid videri minùs quàm visibile sit, visione scilicet, etsi immediata, at minùs tamen clara, nec comprehensiva, si in cognitione, pefectus æqualitatis cum perfectione visibilis non impedit ne ipsa sit imago rei ut in se est, etsi minus pefecta, non adimet tali cognitioni rationem visionis. Sic beati cognoscentes Deum ut in se est, etsi minùs quàm sit visibilis, verè ipsum vident visione non comprehensiva. Et contingit ut aliquis habens oculos minùs perspicaces, aliquid videat ut in se est, quia non videt modo contrario, sed tantùm non videt quantùm visibile est. Quare defectus aliquis in modo cognoscendi non tollit rationem visionis, cum res non repræsentatur per modum rei ipsi oppositæ. Tunc autem tollit, quando res repræsentantur per modum objecti ab ipsa contradistincti: & isto modo repræsentatur, quando cognoscens & cognitum plane differunt genere, suntque plurimùm disparia. Tunc enim quod est generis inferioris, non repræsentat superius, nisi modo ipsi contradistinctè opposito, ut homo Angelum; & multò magis ob disparitatem infinitam, ut creatura Deum, quem non cognoscit nisi per modum entis potentialis per se oppositum enti per essentiam, & necessitati subsistendi à seipso. Unde non est ejus vi-

siva. Inter Angelos autem non est tanta diversitas, ut cognitio quam de superiore habet inferior, cum similitudine aliqua quoad modum repræsentandi ad seipsum, non sit repræsentatio illius ut in se est, etsi minùs perfecta, ac proinde ne sit visio non comprehensiva & propter hoc congruum fuit ut Deus crearet Angelos non improporcionatè distantes, ut ex illis omnibus unam posset componere totalem Hierarchiam, in qua essent illuminantes & illuminati, & perfecta societas, ad quod requiritur visio, locutio, auditio, & quidquid ad intellectualem communicationem pertinet. Quod si crearet aliquam intelligentiam ita præcellentem Angelis qui jam existunt, ut cognitio ad modum istorum non sufficeret ad illius ut in se esset, repræsentationem, consequenter dicendum esset, non esse illius naturaliter visivos.

10. Objicies secundò, si verum est illud principium, nihil cognoscit nisi ad modum sui, non sufficiet lumen gloriæ cum intellectu ad videndum Deum, quia totum illud principium semper erit aliquid creatum, ac proinde non cognoscetur Deus nisi per modum entis potentialis: unde non videbitur.

11. Respondéo complexum ex intellectu creato, & lumine gloriæ, verè non

esse totum, proprium, & specificum principium visionis Dei, sed Deum quoque in ratione causæ particularis, & specificæ ingredi principium totale talis effectus, in quo est aliqua ratio quæ non potest nisi ab eo principaliter peti, nempe intuitio entis per essentiam, ut in se est.

Hic observa, illud axioma, nihil cognoscit nisi ad modum sui, intelligendum esse de cognoscente per se, & per principia sibi intrinseca, in ratione causæ particularis totalis, non exigentis à Deo nisi concursum generalem cum ea, quam in se habet, virtute, sive concursum merum qui non sit nisi cooperatio causæ primæ cum causa, completè quidem effectum continente, sed dependente, & impotente per seipsam solam agere: non valere autem de cognoscente etiam per influxum, & actionem specialem causæ superioris, à qua ut principio particulari, sit in cognitione aliquis gradus perfectionis qui non possit existere, neque ab ipso cognoscente per se sumpto, neque à principio ipsi superaddito, ut à causa particulari principali, sed tantum ab illa causa superiori ut à causa particulari principali, & à principio illi superaddito, ut à causa instrumentali illius causæ superioris: quod omnino hic evenit. Nam visio illa creata, in qua sunt gradus actionis vitalis, &

intellectionis, &c. Et gradus talis entis supernaturalis seu ratio intuitionis respectu Dei, quæ per se sumpta superat vim omnis naturæ creabilis, ita est ab intellectu creato, ut à causa particulari principali vitalitatis, ut sit etiam à Deo tanquam à causa particulari principali supernaturalitatis, seu illius per se supernaturalis rationis, à lumine autem gloriæ non est nisi ut à causa instrumentali, subordinata quoad hoc Deo ut causæ principali illius. Quod non impedit ne illud lumen sit adhuc realiter causa vitalitatis, & aliarum rationum quæ sunt in illa cognitione, eo modo quo cæteri habitus sunt cum potentiis causæ totius effectus, qui ab illis provenit, etsi singulæ rationes formales quæ sunt in effectû, non proveniant per se ab illis nec sint formaliter id quod eorum virtuti correspondet.

12. Quod autem lumen gloriæ prout est causa supernaturalitatis, quæ est in Dei visione, sit sub hac ratione instrumentum Dei, non verò intellectus creati, probatur, quia id quod est instrumentum supernaturalitatis sub hac ratione subordinatur illi causæ à qua ut principio principali particulari est supernaturalitas, seu ratio quæ per se supernaturalis est: atqui lumen gloriæ non est nisi causa in-

strumentalis supernaturalitatis quæ est in visione Dei, seu rationis illius ob quam visio superat vires omnis naturæ creabilis, quæ est intuitio entis per essentiam, non est, inquam, lumen gloriæ causa nisi instrumentalis illius formalitatis: quia ad repræsentandum objectum in ratione causæ principalis aliter quàm per modum entis potentialis, requiritur principium quod non sit ens potentiale. Unde Deus solus est causa principalis illius supernaturalitatis formaliter sumptæ. Ergo lumen illud prout dicit ex sua propria ratione ordinem ad supernaturalitatem visionis, subordinatur Deo, estque instrumentum ejus ad talem effectum.

13. Quod si quæras quomodo ergo lumen illud est virtus elevans ipsum intellectum, habetque in homine rationem potentiae respectu visionis intuitivæ Dei, si est formaliter instrumentum Dei ad illam. Respondeo per hoc ipsum quod lumen gloriæ est in intellectu hominis, exigitque concursus Dei ad illam actionem ad quam est ejus instrumentum, nempe ad visionem, ad quam de se non sufficit intellectus, exigit, inquam, ut principium illius actionis proximum, atque ultimum, cujus est determinare actionem, ideo dare simpliciter intellectui vim producendi talem effectum, & habere respectu ejus id quod

omnibus habitibus infusis convenit, respectu suorum actuum, nempe rationem potentiae, ob illam scilicet concursus exigentiam, per quam intellectui de se insufficienti adjungit causam principalem, etiam particularem ipsius supernaturalitatis, quæ est in effectu vires hominis superante.

14. Objicies tertio ex Molina ad quæst. 12 art. 5. disp. 2. Conjunctum ex intellectu & lumine gloriæ, est principium connaturale visionis Dei, quia hoc conjunctum includit principium ejusdem ordinis cum visione illa. At creabilis est intellectus qui solus adæquet hoc conjunctum, quia vis hujus conjuncti est finita, & intellectus sunt creabiles in infinitum alii aliis perfectiores. Quare nihil est cur non creari possit aliquis vim illam certam & determinatam adæquans.

15. Respondeo ex jam dictis, distinguendo majorem, connaturale principium totale, itaut in illo conjuncto includatur omnis causa particularis illius visionis, & maximè causa principalis supernaturalitatis quæ in ipsa est, nego: connaturale principium, non totale, neque includens illam causam particularem principalem, sed tantum exigens societatem illius eò maximè quod includat causam particularem illi superiori subordinatam, & determinatam.

tivam illius ad coagendum principaliter, concedo. Ad probationem majoris, concedo quidem lumen gloriæ esse ejusdem ordinis cum visione Dei, sed non ejusdem ordinis cum objecto ejus, quod per se requiritur ad illud prout in se est repræsentandum. Ad minorem negatur illa simpliciter, quia si crearetur substantia cujus intellectus adæquaret illud conjunctum, produceretur, non modo aliquid illi conjuncto æquivalens, sed præcellens per excessum qui illam substantiam constitueret in eodem ordine cum Deo, eo modo quo Angelus inferior secundum eos qui naturæ diversitatem ponunt, est in eodem genericè ordine cum Angelo superiore: quod implicat quia debet semper esse infinita distantia & disparitas, & improportio in genere entis, inter Deum & quamvis creaturam, & infinitè major diversitas, quàm inter hominem & Angelum; qui non est ab homine visibilis. Sequela probatur, quia produceretur causa principalis illius visionis, etiam spectatæ secundum rationem formalem intuitionis immediatæ: cujus, ut dictum est, causa particularis principalis non includitur in illo conjuncto intellectus & luminis gloriæ, quia solus Deus est hujusmodi causa.

16. Dices, sic intellectus nihil conferet formaliter loquendo ad rationem intuitio-

nis sumptam prout ipsa ab aliis rationibus formalibus visionis virtualiter distinguitur.

17. Respondeo non conferre in ratione principii completi, solum Dei concursum exigentis, sed conferre in ratione principii incompleti elevabilis, per se quidem requisiti ad productionem ejus, non tamen exigentis societatem principii elevantis. Cujus ratio est: quia intellectus est facultas ad omne verum sibi repræsentandum, sed neque ad perfectè repræsentandum aliquod verum; neque ad repræsentandum immediatè per se solum sine principio superiori id quod est ordinis genericè superioris. Et ratione istius defectus dicitur non continere rationem ipsam intuitionis, non quòd nullo modo, ne quidem inchoatè, & incompletè illam contineat, sed quòd non contineat eo modo quo causæ communiter dicuntur continere effectus suos. Et similiter dicitur illam formaliter non efficere, non quòd ad illam formaliter sumptam nihil conferat, & producat tantum in sensu reali. Nam implicat intuitionem esse tantum identicè à vidente formaliter; sed quòd non producat nisi cum causa elevante, cujus societatem non exigit de se. Quare non ipsi, sed causæ elevanti ascribitur talis productio.

18. Objicies præterea ex eodem Molina,
ordo

ordo substantiarum non est inferior ordine accidentium. Neque enim Deus est minùs potens in creandis substantiis, quàm in creandis accidentibus. Neque est minùs participabilis, & imitabilis per substantias creatas, quàm per accidentia. Ergo potest creare substantiam quæ sit ejusdem ordinis cum lumine gloriæ, cuique lumen illud sit connaturale, & debitum, quæ proinde naturaliter Deum videbit.

19. Respondeo negando antecedens intellectum de substantiis simplicibus. Nam si sermo sit universaliter de substantiis, sive simplicibus, sive compositis, compositum Theandricum evehit genus substantiarum creatarum supra omnia accidentium genera. Ratio negandi est, quia sunt quædam accidentia de se elevativa sui subjecti, & procedentia ab activitate substantiæ non creabilis, sive Dei, supra exigentiam substantiæ cui conveniunt. Ad probationem, dico ad hoc ut Deus sit non minùs potens in substantiis, quàm in accidentibus producendis, satis esse quòd tam in uno, quàm in alio genere non detur ultimus finitus effectus potentiæ ejus, ultra quem non possit progredi: non esse autem necesse ut in uno ordine semper sit aliquid æquè excellens ac in alio. Alioqui Deus minùs esset potens in corporibus, quàm in spiritibus producendis: idemque est de

participabilitate, & imitabilitate quæ debet in utroque ordine carere termino, sed non semper habere paritatem terminorum, quia aliqua genera superant alia quoad aliquid, cum forte vicissim superentur ab illis. Et sic genus accidentium superat genus substantiæ simplicis in immediatione respectûs ad Deum, quæ ob specialem causam in substantiis secundum suam naturam sumptis implicat, eo quòd argueret in illis quandam proximitatem ad Deum, seu quandam paritatem, ac proportionem ordinis, ita ut repræsentatio ad modum earum, esset repræsentatio Dei prout in se est: superatur autem illud idem accidentium genus à substantiæ genere, hoc ipso quòd accidentia non sunt substantia, nec constituuntur habentia id quod per illa habet substantia, nempe non constituuntur videntia, amantia, aut possidentia Deum.

20. Instabis omne accidens est alicui subjecto connaturale. Ergo & lumen gloriæ. Antecedens probatur, quia omnis perfectio est alicui connaturalis. Accidens autem est perfectio, & dicit ordinem ad subjectum.

21. Respondeo negando antecedens. Et ad probationem, dico omnem quidem perfectionem esse bonam subjecto suo proprio, sed non necessariò esse connatu-

turalem. Alioqui nihil posset Deus cuiquam dare supra exigentiam ejus. Et ipsa unio hypostatica, quæ est summa perfectio communicabilis ad extra, esset connaturalis omni substantiæ, saltem intellectuali. Ad id quod dicitur de ordine accidentis ad subjectum, respondeo illum non esse semper reciprocum quoad connaturalitatem, quia fieri potest ut unum exigat aliud, & hoc non exigat reciprocè illud. Sic unio hypostatica exigit naturam creatam: creata autem natura non exigit illam. Et in alio genere, creaturæ exigunt, & supponunt Deum: Deus autem neque exigit, neque supponit creaturas, sed tantum infert possibilitatem earum.

22. Objicitur ultimò, non implicat substantia creata supernaturalis. Tali autem substantiæ connaturale erit videre Deum. Ergo. Major probatur primò, quia quod est perfectionis in genere inferiori, non repugnat superiori. Sed supernaturalitas convenit qualitati. Ergo ipsa non repugnat substantiæ, quæ est superior qualitate.

23. Probatur secundò, quia si supernaturalitas repugnat substantiæ creatæ, vel, repugnat ex eo quod sit creata vel ex eo quod sit substantia, vel denique conjunctim, ex eo quod sit substantia creata. Nihil horum dici potest. Ergo. Non primum, quia aliquid

creatum est supernaturale, nempe visio Dei. Non secundum, quia unio hypostatica est substantialis, & simul maximè supernaturalis. Non tertium, quia illa unio est etiam creata, & compositum ex humanitate Christi & Verbo continet cum sua summa supernaturalitate rationem substantiæ creatæ completæ. Ac denique in eo quòd aliqua substantia creata sit supernaturalis, nulla apparet contradictio.

24. Respondeo negando Majorem. Ad primam probationem, dico per eam non probari quòd supernaturalitas non repugnet substantiæ creatæ, sed quod non repugnet substantiæ ad quod sufficit si Deum complectatur, qui omnem supernaturalitatem continet, si non formaliter, eo quod supernaturalitas dicat aliquam cum maxima perfectione imperfectionem, nempe rationem formæ connotantis subjectum cujus exigentiam superat; at eminenter, cum sit ipsius supernaturalitatis terminus, ad quem prout in se est pertingere per unionem, sive substantialem, qualis est in Christo, sive accidentalem qualis datur in beatis, est hoc ipsum quod per se superat vires, & exigentiam omnis substantiæ creatæ, aut creabilis.

25. Respondeo secundò ad eandem primam probationem, falsam esse majorem, quia fecunditas, seu vis producendi

sibi simile, quæ est in corpore elementari, non convenit corporibus cœlestibus, quæ sunt generis perfectioris : & multò minùs creatis spiritibus, qui sunt ordinis multò sublimioris.

26. Ad secundam probationem dico implicare ex infinita distantia à Deo, & infinita disparitate naturæ, quæ est in ratione substantiæ merè creatæ. Quia enim substantia supernaturalis debet hoc habere ex natura sua quod exigit unionem immediatam cum Deo, sive substantialem qualis est hypostatica, sive accidentalem, qualis sit per visionem beatificam, infinita distantia tollit exigentiam unionis substantialis, & infinita disparitas ac diversitas naturæ reddit impossibilem naturaliter omni substantiæ creatæ visionem Dei, cum ipsa non possit quidquam cognoscere, nisi ad modum sui, ac proinde ad modum entis potentialis. Quod autem non est cognoscitivum Dei nisi ad modum entis potentialis, non est naturaliter illius visivum. Sic nulla substantia merè creata potest esse supernaturalis. Quod si ratio supernaturalitatis convenit substantiæ non merè creatæ, hoc ideo est quia hæc aliquid increatum includit, & in tantum est supernaturalis, in quantum in ea est aliquid quod substantiæ merè creatæ in ea inclusæ, omnem exigentiam superat,

nempe componens increatum, cui per se sumpto, nihil supernaturale est.

SECTIO TERTIA.

An Deus supernaturaliter videri possit ab intellectu creato.

1. **R**espondeo affirmativè. Probatur primò ex scriptura Matth. 5. *Beati mundo corde, quoniam ipsi Deum videbunt* 1. cor. 13. *Videmus nunc per speculum, & in anigmate, tunc autem facie ad faciem.* 1. Ioan. 3. *Similes ei erimus, quoniam videbimus eum sicuti est.* Probatur secundò ex definitione Ecclesiæ, quia in Concilio Florentino, sessione ultima, in decreto Eugenii, dicitur *beatas animas clarè intueri Deum trinum & unum, sicuti est.* Hinc res est planè de fide. An autem possibilitas hujus visionis ratione naturali demonstrari possit, quæretur sectione sequenti. Nunc solvendæ sunt difficultates, quæ contra constantem ex fide possibilitatem afferri possunt.

2. Obicies primò, debet esse proportio inter potentiam & objectum ad visionem objecti. Non est autem proportio inter intellectum creatum, & Deum.

3. Respondeo proportionem quæ ad visionem requiritur, consistere in hoc

quod sicut objectum est de se visibile, ita potentia de se elevabilis à Deo, sit supernaturaliter saltem visiva illius. Quod convenit intellectui nostro respectu Dei. Nam cum intellectus habeat pro objecto omne verum, in quo proinde nihil est non attingibile per se directè ab ipso, debet ipse absolutè posse sive cum solo Dei concursu, sive accedente elevatione, & consortio causæ superioris, videre quodlibet verum, ac proinde Deum.

4. Instabis, sola distantia facit ut oculus corporeus non possit sibi repræsentare res spirituales. At major est inter Deum & intellectum creatum distantia, Ergo illa causabit absolutam videndi Dei impossibilitatem.

5. Respondeo non per distantiam fieri ut oculus non possit videre res spirituales, sed ex qualitate potentiæ visivæ, quæ habet tantum colores pro objecto. Unde non potest oculus attingere lonos, aut sapes, etsi sint aliquid corporeum. Non est autem idem de intellectu creato respectu Dei, cum Deus sit intra objectum omnis intellectus creabilis, siquidem est ens, & verum. Ex distantia autem quæ est inter oculum & res spirituales, hoc tantum sequitur, quòd si oculus posset res spirituales cognoscere non posset tamen naturaliter eas, ut in se sunt,

attingere. Idque adhuc non præcisè ex distantia sequitur sed ex distantia, quæ magnam generis disparitatem facit ; quia scilicet in omni cognoscente modus cognoscendi consimilis est, & conformis, ac proportionatus modo essendi unde intellectus creatus, qui est ens potentiale, non potest Deum naturaliter cognoscere nisi ad modum entis potentialis, ac proinde non ut in se est.

6. Objicies secundò non potest videri Deus nisi visione infinita. Quia igitur intellectus noster non est capax visionis infinitæ, implicat Deum ab ipso videri.

7. Respondeo negandò antecedens, & dico cognitionem non ita sumere suam essentiam ab objecto, ut induat naturam, & conditiones objecti. Nam alioqui cognitio substantiæ esset substantia, sed tantùm ita ut habeat determinatum ordinem ad tale objectum, quem ordinem nulla cognitio alterius objecti habet : unde per hunc ab omni alia cognitione distinguitur. Et quia non potest à nobis talis cognitio explicari, neque concipi nisi per illum ordinem, etsi ipse non sit de ejus essentia secundum se, ut pote aliquid relativum, quo datur semper aliquid prius in entitate absoluta per se sumpta, ideo secundum nos, cognitionem illam specificat, sed in hoc tantùm sensu, quòd sic se habeat ad

tale objectum, quo modo nulla alia cognitio. Denique specificatio illa fit non per adæquationem cum objecto, sed per determinationem ad ipsum, quæ potest esse valde imperfecta, non obstante perfectione ipsius objecti. Nam de Deo potest haberi valde imperfecta cognitio. Et ipsa visio Dei, etsi valde perfecta in ratione visionis ac repræsentationis, si tamen determinatè sumatur, quo modo necessariò est, dum existit, est semper imperfectior aliis non tot quin pluribus visionibus Dei possibilibus, quæ possunt esse clariores atque intensiores in infinitum. Quòd si valeret objectio, sequeretur quoque ex ea infinitas, ac proinde & impossibilitas visionis Dei abstractivæ, & cujuscunque de Deo cognitionis, propter infinitatem objecti.

8. Instabis primò, quo perfectius est objectum, eò nobilior est cognitio. Ergo visio objecti infiniti, quia visiones alias superabit proportionatè ad suum objectum, erit infinita.

9. Respondeo distinguendo antecedens, si cætera quoque principia cognitionis crescant similiter supra principia aliarum cognitionum, concedo: aliter, nego. Nam alioqui cognitio quam habet Angelus de re corporea, est nobilior in se, quàm cognitio quam habet homo de seipso, vel de alio homine, imò & ea quam

habet homo per solas naturæ suæ vires de Deo. Est enim perfectior imago, etsi non ita nobile objectum repræsentet. Ratio est quia dispar est causa efficiens utriusque cognitionis, & intellectus Angelicus est nobilior humano. Quia igitur nunquam intellectus creatus crescet ad æqualitatem cum objecto visionis qua attingitur Deus, nunquam visio illa commensurabitur objecto suo. Qued inde confirmatur, quia cum sunt plures causæ effectus alicujus, infimæ superiores limitant & maximè oritur limitatio ex causa efficiente, quæ nisi sit infinita, non poterit infinitus esse effectus.

10. Instabis secundò, Cæteris paribus, visio Dei quæ erit ab intellectu humano, est nobilior omni alia visione quæ erit ab eodem intellectu, cùmque quavis data visione rei creatæ, quæ sit ab humano intellectu, possibiles sint ab eodem non tot quin plures aliæ aliis perfectiores in infinitum, quarum tamen nulla exæquabit visionem Dei, ipsa erit infinita, quia illud est infinitum, quod finita non tot quin plura, sese semper excedentia, superat.

11. Respondeo ad talem exuperantiam sufficere diversitatem ordinis. Nam homo superat non tot quin plura bruta possibilia infra se, alia aliis perfectiora. Et sic contritio superat quoad vim placativam

Dei, attritiones non tot quin plures alias aliis perfectiores : & angulus rectilineus non tot quin plures majores semper ac majores angulos contingentia, quoad aperturam linearum. Sicut ergo in istis non requiritur infinitas ad exuperantiam supra non tot quin plura inferioris ordinis, ita nec requiretur infinitas in visione Dei ad superandas non tot quin plures de aliis entibus visiones.

SECTIO QUARTA.

An possibilitas visionis Dei sola ratione probari possit.

1. **Q**uæstio est de probatione quæ sit apta per se præcisè fundare ac determinare prudens judicium, non autem de ratione aliqua congrua, quæ rem jam fide certam aliquo modo illustret, ejusque credendæ difficultatem minuat. Ad hanc igitur quæstionem.

2. Respondeo negativè. Ita communius Theologi contra Scotum, & quosdam Thomistas, qui rem à S. Thoma demonstratam putant. Probatur assertio primò, quia universaliter rerum in substantia supernaturalium, si determinatè secundum suam propriam rationem specificam sumantur, possibilitas nobis sufficienter

ad judicandum prædicto modo de illis , innotescere non potest. Et si enim certum fit in genere potentiam Dei , cum sit infinita , extendere se ad multa quæ naturæ vires & exigentiam superant , tamen nescimus an hoc , aut illud contradictionem aliquam importet. Et licet nobis non appareat contradictio , nihil aliud sequitur inde , nisi nostrum assensum esse suspendendum. Ratio porro cur rerum in substantia supernaturalium determinatè sumptarum possibilitas naturaliter non constet, est quia ipsæ de se ob eminentiam sui esse , sunt supra sphæram intuitionis nostræ naturalis ; & effectus qui in natura nobis apparent , non habent necessariam connexionem cum iis quæ omnino sunt supra ordinem , & exigentiam ipsius naturæ.

3. Probatur secundò assertio , quia probationes quæ hætenus ab auctoribus sunt allatæ , non sunt per se sufficientes ad fundandum prædictum judicium , ut patebit ex consideratione præcipuarum.

4. Prima est ex S. Thoma. Finis & beatitudo creaturæ rationalis non est aliquid impossibile. Visio autem Dei est eiusmodi finis. Ergo.

5. Respondeo visionem Dei esse aliquid altius sine hominis naturali , qui in statu puræ naturæ constitisset in clara quidem,

sed abstractiva cognitione Dei, & in fruitione tali cognitioni proportionata: ipsum autem finem supernaturalem non esse determinatè secundùm se cognoscibilem antecederet ad fidem, & ex ea sola nobis constare.

6. Secunda ratiocinatio ex eodem sancto Thoma, hæc est, appetitus naturalis non fertur in impossibile, quia alioquin ipse auctor naturæ errasset, si talem appetitum indidisset. Atqui in homine est appetitus naturalis videndi Deum, quia visis effectibus, naturaliter expetimus videre causam, idque desiderium provenit ex admiratione, quæ nascitur ex intuitione effectûs, & ignorance causæ. Ergo.

7. Respondeo stando intra naturæ ordinem, non esse prudens desiderium videndi Deum, idque quia possibilitas talis visionis non constaret ob ipsam supernaturalitatem ejus. Hinc dicendum est, non esse in hominis natura appetitum innatum videndi Deum, quia talis appetitus est potentia insita per modum inclinationis ad aliquod bonum naturaliter possibile, quod res ipsa cui inesse dicitur appetitus, possit efficere, aut recipere solis naturæ suæ viribus, vel adjuta ab aliis causis naturalibus, cum solo concursu generali. Alioqui diceretur quoque in esse nobis

appetitum innatum ad unionem hypostaticam, nomen appetitus innati tribuitur capacitati ad aliquod bonum quod per solas naturæ vires effici aut obtineri nequeat. Ad probationem, dico nos stando intra naturæ ordinem, non posse prudenter desiderare visionem altissimæ causæ, sed tantum cognitionem ejus quatenus ipsa cognoscibilis est à nobis, per motiva quæ naturaliter occurrunt, ex creatis scilicet effectibus, intra quod cognitionis genus, Deo addente evidentiam quæ virtutis in via exercitæ præmium esset, posset homo esse beatus beatitudine naturali, quæ esset multò minor supernaturali, sed tamen beatitudo, in qua homo perfectè acquiesceret, nihil ulterius expetens, & summo bono meliùs quàm ullo alio fruens.

8. Tertia ratiocinatio est Scoti, in 4. dist. 49. q. 8. ubi rem sic existimat demonstrari. Perfectio quæ est simpliciter possibilis potentiæ inferiori, multò magis est possibilis potentiæ superiori. Atqui in potentiis cognoscitivis, visio intuitiva est perfectio simpliciter possibilis visui corporali, qui est potentia inferior intellectu. Ergo multò magis visio intuitiva est possibilis intellectui, ac proinde maximè respectu Dei, qui est ens omnium maximè intelligibile.

9. Respondeo primò argumentum nimis probare, quia si valeret, efficeret Deum in hac vita debere à nobis videri per intellectum multò magis quàm entia corporea, quorum visionem sensibilem comitatur in nobis visio quoque intellectualis.

10. Respondeo secundò, falsum esse universaliter illud principium quod omnis perfectio quæ convenit inferiori naturæ, conveniat etiam superiori. Nam incorruptibilitas, quæ convenit quibusdam corporibus inanimatis, ut cælo, & stellis, non convenit corporibus animatis, nec beatis, nec ipsi homini, etsi in eo sit aliquid incorruptibile. Facultas producendi sibi simile convenit elementis, non cælis, aut stellis. Item eadem facultas convenit homini, non Angelis. Cujus rei ratio est quia virtus illa, seu prædicatum quod convenit potentiæ inferiori est que de se sub abstractissima ratione perfectio simpliciter simplex, si concipiatur contrahi ad certam speciem, putà facultas producendi sibi simile in natura, ad facultatem, quæ sit in Angelo ad producendum similem sibi Angelum requirit eminentiorem perfectionem qua superat gradum talis entis. Contra autem illud idem prædicatum reperitur in potentia inferiori imperfectissimo modo, unde

in tali potentia naturaliter existit talis perfectio : non reperiatur autem in superiori, quæ quoad hoc non erit perfectior, sed simpliciter erit perfectior, quia omnis ejus actus erit aliunde nobilior, quàm actus potentiae inferioris. Hinc ut insistam jam allato exempto, si quæretur cur Angeli non producant sibi simile, respondetur, quia si producerent, crearent, & totum effectum sine subiecto producerent, quod superat vim totius naturæ creabilis, estque proprium entis omnipotentis. Et si idem quæretur de cælis, sole, & sideribus, respondetur, quia si producerent, generarent sine alteratione, quod aliquo modo ad creationem accedit. Et deberent à materia expellere qualitates primas quæ non sunt proportionatæ formæ cæli, sine productione oppositarum illas excludentium. Nam qualitates cæli non sunt aliis oppositæ, sed alterius rationis, & disparatæ. Destruere autem talem formam sine introductione oppositæ, ejus est à cujus concursu omnia pendent itaque id non potest convenire cælo, nec stellis, aut soli : pari ergo modo seclusa fide, dici posset, intellectum humanum non posse videre Deum, licet oculus corporeus possit videre objectum suum, quia visio quæ in oculo imperfectissimo modo, per representationem

sentationem divisibilem colorum , dum contrahitur ad visionem Dei , requirit potentiam aliter cognoscitivam , quàm ad modum entis corporci , aut etiam quàm ad modum entis potentialis , ad quem tamen modum virtus intellectus humani , et am-que Angelici diceretur absolutè determinata. Quod licet sit falsum , quia verum tantùm est , operationem naturalem talis intellectus non elevati , ita esse limitatam , tamen seclusa Dei revelatione , cum apparentia veri assereretur ita esse ex natura rei , absolutè , & necessariò : nec contra hoc valet allata ratiocinatio.

II. Prædictis probationibus insufficientibus seclusa fide , hæc quoque addi potest. Quid est per se objectum nostri intellectus , & non tantùm per accidens , aut consequenter ad aliud , potest per se , & præcisum ab omni alio , directè , & immediatè cognosci , ac proinde videri. Atqui Deus est per se , & ratione sui , & non tantùm consequenter ad aliquid aliud , objectum nostri intellectus. Ergo. Major probatur , quia implicat. Aliquid esse per se objectum alicujus potentia , & non posse per se ab illa attingi , modò adsint omnes conditiones requisitæ , quæ necessariò debent esse possibiles , posito quòd illud sit per se objectum talis potentia. Sic implicat colorem non posse per se at-

tingi ab oculo, quia est per se objectum
visûs, in quo differt à visibilibus per ac-
cidens, quæ ab oculo percipiuntur con-
sequenter ad perceptionem coloris, nam
motus, Verbi gratia, advertitur ab oculo
quia color mobilis advertitur transeunter
in spatio motûs. Et quantitas, quia co-
lor est longus, & latus, & sic de cæ-
teris. Minor probatur, quia objectum for-
male nostri intellectus per se est ens, ac
verum in tota sua amplitudine. Unde for-
mat propositiones de ente, in quibus
ens sumitur universalissimè. Ut contingit
in Syllogismis Metaphysicis ipsam ratio-
nem entis esse medium terminum, putà
in isto, omne quod habet essentiam, est
unum, verum, bonum. Omne ens ha-
bet essentiam. Ergo omne ens est unum
verum, bonum. Hic Syllogismus non
valeret, nisi ipsa ratio entis posset adæ-
quatè distribui. Cum igitur nullum sit
ens quod non contineatur intra objectum
nostri intellectus, Deus per se præcisè
sumptus, ac seorsim à quovis alio, est
ejus objectum partiale, ac primarium, ac
proinde per se ab eo attingibile & si de
facto deest in hac vita aliquid ad illam
immediatam cognitionem necessarium, il-
lud necessariò possibile & absolutè, quia
ad hoc quod per se possibile est, nihil ne-
cessarium est impossibile. Posito igitur quòd

Deus per se , & immediatè sit cognoscibilis à nostro intellectu, hoc ipso est visibilis , quia cognitio immediata , & visio non differunt.

12. Responderi potest seclusa fide, hanc propositionem , cognitio immediata, & visio non differunt , intellectam de visione de cujus possibilitate hîc agitur, posse non admitti.

13. Quod ut intelligatur notandum est duobus modis aliquid posse immediatè cognosci. Primò per actum simplicem, seu compositionis ex subiecto & prædicato expertem, quo rem aliquam per se immediatè moventem percipimus, ita ut motivum talis cognitionis sit ipsa præsentia physica rei, repræsentationem sui objectivè causans. Et talis visio in nostro intellectu comitatur perceptionem objectorum externorum quæ fit per sensus. Nam cum videmus aut audimus, aut sentimus aliquid, putà calidum aut frigidum, non manet sine actu noster intellectus, sed est in eo perceptio spiritualis, in qua non est compositio prædicati & subiecti, quia potest noster intellectus meliùs, & sine isto defectu, rem præsentem agnoscere, ac discernere : sed est simplex intuitus, seu advertentia, cujus objectum & motivum est ipsa res, ipse color, aut sonus, aut calor, aut frigus. Et quæ ad hanc opẽ

rationem intellectûs præcedunt species ab objecto provenientes, itemque actus sensûs, externi, & interni, non se habent ut medium cognitum, sed ut id quo objectum externum intellectui proponitur: quod proinde ab illo immediatè immediatione objecti, attingitur. Secundus immediatæ cognitionis modus fit per actum compositionis mentalis quo duo extrema sine discursu, & medio termino, ob ipsum convenientiam per se notam identificamus. Et motivum hujus judicii est illa immediata convenientia seu identitas. Sic istas propositiones, Omne totum est majus sua parte, Omne ens est bonum, Omne coloratum est visibile, & alia principia per se necessariò vera judicamus. Et talia principia per se visa dicuntur, & si sunt prima, & universalissima, dicuntur primò visa ob evidentiam simul, & immediationem judicii: Non tamen eorum cognitio appellatur visio, quia hoc non obtinuit usus loquendi, qui est regula acceptionis verborum.

14. Posita istâ duplici immediatæ cognitionis acceptione, dici potest ex argumento allato hoc tantùm sequi, Deum esse immediatè cognoscibilem alterutro ex illis modis, sive per immediatam compositionem mentalem istorum terminorum, Deus est, seu Deus necessariò exi-

stit: live per actum simplicem & compositionis expertem, quo ipsa Dei præsentia Physica per se objectivè movens attingatur. Et hanc intuitionem, de qua quæstio est, negari potest, seclusa fide, esse possibilem. Aliam verò esse possibilem facile conceditur. Et de facto talis in Philosophia naturali datur.

15. Quod ut pateat, adverte multa quæ tantum per discursum à posteriori, & ex effectibus primò cognoscuntur, posse adhibitâ consideratione, quâ penitiùs inspiciantur, ex seipsis immediatè vera judicari. Et isto modo cognoscuntur scientiarum principia. Nam prius causa cognoscitur per effectum, deinde per causam secundum se inspectam, & jam per se cognitam, effectus demonstratur. Sic primò cognoscitur rationalitas hominis per risibilitatem, hoc pacto, Omne risibile est rationale. Omnis homo est risibilis. Ergo omnis homo est rationalis. Postea ista conclusio, omnis homo est rationalis, consideratur, non jam ut conclusio, sed secundum se, & ex penitiori intelligentia terminorum, agnoscitur, ac judicatur ipsos esse essentialiter connexos, & rationalitatem esse differentiam hominis, & principium risibilitatis, sicut & virtutis admirativæ, & libertatis, & moralitatis. Quare sic assumitur ut princi-

pium, ad demonstrandam à priori risibilitatem, hoc pacto, Omne rationale est risibile. Omnis homo est rationalis. Ergo omnis homo est risibilis. Et hic progressus vocatur, regressus, qui non est formalis circulus, seu circulus vitiosus, cum conclusio non assumatur ut principium, nisi ut optimo modo cognita, & planè aliter quàm per vim illativam prioris Syllogismi. Sic in Physica, ex mutatione substantiali eorum quæ corrumpuntur, & generantur, infertur eorum compositio ex materia, & forma. Deinde per compositionem ex materia & forma demonstratur à priori eorum corruptibilitas, & generabilitas; & propositio quæ fuerat conclusio, fit principium secundæ demonstrationis. Primus Syllogismus est iste omne quod mutatur substantialiter, constat materia, & forma. Omne sublunare mutatur substantialiter. Ergo omne sublunare constat materia & forma. Secundus Syllogismus est, omne constans materia & forma, est generabile, & corruptibile. Omne corpus sublunare constat materia, & forma. Ergo omne sublunare est generabile, & corruptibile. Hinc ista propositio, omne corpus sublunare constat materia & forma, quæ fuerat probata per effectum mutationis substantialis, jam secundùm se considerata, & hoc inf-

pecto quòd causa multabilitatis sit compositio ex materia permanente, & forma quæ advenit, & expelli potest, sit per se nota ex intelligentia immediatorum terminorum. Pari igitur modo quoad primam omnium causam, cognoscitur primò ens necessarium ex dependentia, & contingentia rerum creatarum, deinde ex necessitate talis entis, infertur ipsum esse omnium contingentium causam. Primus Syllogismus sic se habet. Implicat dari contingentia, absque eo quòd detur ante illa ens necessarium, seu quod necessariò necessitate naturæ existat. Nam hoc sublato, si contingentia non existerent, ut supponi potest, cum id ipsorum naturæ non repugnet, essent tunc absolutè impossibilia ex defectu entis necessarii, à quo acciperent existentiam. Unde per se ad illorum possibilitatem prærequiritur ens necessarium. Atqui dantur entia contingentia, ut patet ex generationibus, & corruptionibus rerum alterabilium ergo datur ens quod necessariò naturæ subsistit. Facto isto Syllogismo inspicitur ipsa per se conclusa propositio: & advertitur esse de essentia illius entis necessarii, quod est Deus, ut existat, illosque terminos ita necessariò esse immediatissimè connexos, sicut sunt isti. Ens necessarium quod est Deus, essentialiter est. Hoc ita formato

neque actus compositionis expers, sed
judicium fundatum in summa, & essen-
tiali terminorum convenientia ac neces-
saria per se identitate. Quare negabitur vi-
sionem strictè sumptam circa Deum, per
allatam ratiocinationem probari, & ex
illa id tantum sequi quod jam explicatum
est, contendetur.

16. Cæterum, etsi seclusa fide, possit
non admitti possibilitas visionis propriè
dictæ, secundum rem tamen valet dicta
ratiocinatio, etiam contra datam respon-
sionem, quia & verum est, omne ens
esse visibile visione intellectuali propriè
dicta, ab omni intellectu qui habeat omne
ens pro suo proprio formali objecto: &
verum est etiam, non tantum composi-
tionem illam objectivam, quæ intervenit
in supradictis judiciis, continere veram
rationem entis ac proinde esse immediatè
cognoscibilem ac judicabilem, modo jam
dicto; sed etiam hoc singulare, & simpli-
cissimum objectum, quod est Deus,
sumptum antecederet ad illam compo-
sitionem ex terminis immediatis, seu ex
subjecto & prædicato, inter quæ nihil
mediet, esse per se optimum ens, ac
proinde summè visibile, visione propriè
dicta: & si ad ejus visionem requiritur
elevatio supernaturalis, illam esse possi-
bilem. Et jam hoc totum adjuncta fide,

quæ rei certitudinem facit, etiam per se judicabile est: potestque constare non esse vitium, nec quidquam falsi in illo discursu: quod ipsi assensui fidei, facilitatem affert, sublatâ nimirum, quæ ex apparentia, aut suspitione impossibilitatis, oriri posset, difficultate.

SECTIO QUINTA.

An intellectus creatus possit videre Deum sine lumine gloria.

1. **L**umen gloriæ est habitus intellectum creatum elevans ad producendam Dei visionem, sicut habitus fidei ad actum fidei: itemque habitus spei, & charitatis, ad suos proprios supernaturales actus. Quo posito, ad quæstionem.

2. Respondeo affirmativè. Ita Major, Suares, & alii contra Scotum, Caietanum, Ferrariensem, &c. Probatur, quia Deus potest cum quavis causâ creata efficere quidquid cum ipsa, & aliis, suppleendo defectum illarum, proprio concursu effectivo. Quia igitur lumen gloriæ non requiritur nisi ad agendum cum intellectu habente tantum vim incompletam, & inchoatam ad visionem Dei, nec exigentem concursum ejus, Deus sine tali principio poterit extrinsecè per seipsum

elevare intellectum ad producendam visionem. Major probatur, quia talis sup-
plendi modus imperfectionem non dicit,
sicut nec ipsum agere, aut concurrere cum
causis secundis, & ad illum modum om-
nipotentia, quæ continet vim omnium
causarum, eminentissimè sufficit. Sic Deus
in peccatore, sine habitu charitatis, pro-
ducit actum contritionis cum ipso homine
carente tali habitu, qui datur tunc illi
tantum posteriùs ad actum sine ipso exer-
citum.

3. Objiciunt adversarii primò, damna-
tos esse à Concilio Viennensi Beguardos,
eo quod dicerent non esse necessarium lu-
men gloriæ ad videndum Deum.

4. Respondeo esse damnatos eo quòd
dicerent posse naturaliter videri Deum,
& quia negando necessitatem luminis
gloriæ, hoc ipso simul omnem necessita-
tem aut principii, aut influxûs supernatu-
ralis, excludebant.

5. Objiciunt secundò, non potest ali-
quis videre Deum nisi ipse efficiat visio-
nem, quia visio est actus vitalis; & vi-
vere in actu secundo est operari à seipso
in seipso: non potest autem intellectus
efficere visionem Dei sine illius principio
activo, quod est lumen gloriæ.

6. Respondeo intellectum de se sine
lumine gloriæ esse principium activum,

etſi incompletum viſionis illius : & in hoc differe ab oculo corporeo qui ne quidem inchoativè habet vim ad cognoscendum aliud quam colorem & lucem corpoream. Addo illud principium eſſe in aliquo genere principale completum, nempe prout attingit in viſione rationem intellectiſionis, & qualitatis ſpiritualis, unde idem dicendum eſt de ratione vitalitatis, quia hæc non ſuperant vim ejus, ſuntque communia viſioni Dei cum noſtris naturalibus cognitionibus: nego autem quod repugnet actui vitali indigentia, & neceſſitas elevationis ſupernaturalis ad aliquam rationem quæ in actu ſuperat vires potentiæ naturalis perſe præciſe ſumptæ, modò talis potentia habeat vim inchoatam, & incompletam ad illam ipſam rationem, quæ etiam exigat comproduci ab illa potentia divinitus elevata. Niſi enim id verum eſſet, abſolutè omnes actiones in ſubſtantia ſupernaturales eſſent impoſſibiles, cum id in omnibus reperiatur hoc ipſo quòd ſunt ſupernaturales.

7. Cæterùm, etſi non ſit abſolutè neceſſarium lumen gloriæ ad viſionem Dei, decuit tamen dari illud beatis, quia conveniens eſt, & magis connaturale ut res quæ agit habeat formam intrinſecam qua elevetur, quaque augeatur virtus ejus activa, & exigatur concuſſus Dei, quàm

ut solum extrinsecè eleuetur per adjunctionem causæ alterius à qua assumatur, cum nihil habeat talem assumptionem exigens. Et hæc est causa cur justis Deus infundat habitus permanentes fidei, spei, & charitatis. Unde actus qui sunt ab illis, connaturalius sunt, quàm qui à peccatoribus, aut hæreticis, quibus talia defunt principia.

SECTIO SEXTA.

An ad visionem Dei sit necessaria species impressa, & an de facto detur in beatis.

1. **R**espondeo ad utrumque negativè. est communis Theologorum doctrina.

Prima pars probatur, quia si est necessaria species ad visionem Dei, vel ad coagendum cum intellectu, vel ad constituendam congruam objecti præsentiam. Neutrum dici potest. Ergo non est necessaria.

2. Non primum, quia species ex genere suo non sunt effectivæ, siquidem illæ quæ secundum omnes sunt maximè necessariae, ut potentia imperfectissima, quæ illis absolutè indiget, operetur, nempe species objectorum sensibilium, quæ ab ipsis objectis ad sensum provē-

niunt, illæ, inquam, non concurrunt effectivè ad sensationem, quia si ita concurrerent, agerent ut virtus objecti à quo emissæ sunt, ac proinde objectum illud quod est res inanimata putà paries albus, esset una causa principalis effectiva sensationis, nempe visionis. Illud enim est causa principalis alicujus effectus, cui virtus aliqua est per se subordinata ad productionem ejus: quod hîc contingeret. Est autem supra vires & gradum rei inanimatæ, esse unam causam principalem actûs vitalis. Ac proinde species de se non requiritur ad agendum: sed ubi species necessariae sunt, requiruntur ad reddendum objectum vel simpliciter, vel congruo modo præsens potentia cognoscitivæ. Deinde si species requireretur ad coagendum, Deus posset supplere defectum ejus, sicut defectum luminis gloriæ, & cujuscunque causæ efficientis, juxta dicta superiori sectione.

3. Secundum item dici non potest, nempe quòd sit necessaria species ad constituendam congruam objecti præsentiam, quia Deus, & necessario est præsens per seipsum, & congruo modo præsens. Primum quidem, quia impossibile est Deum non esse ubique, secundum autem, quia quòd principium particulare cognitionis est nobilius, tantò aptius est ad producen-

dam cognitionem rerum sine specie repræsentante ipsas, ut patet primò in Deo, cui quod verum est, hoc ipso quòd verum est, etiam futurum, vel absolutè, vel conditionatè, vel merè possibile, sufficienter est propositum. Secundò in intellectu Angeli, qui, ut docent D. Thomas, Bonaventura, Scotus & Theologi communiter, intelligit seipsum sine specie sui, eo quod ipse sit sibi sufficienter præsens hoc ipso quòd est indistans à se. Unde etiam plurimi dicunt ipsum cognoscere res sibi præsentis localiter, absque specie, quam dicunt ipsi necessariam tantum ad cognoscenda distantia, & præterita. Jam autem in principio particulari effectivo visionis beatificæ comprehenditur ipse Deus. Igitur respectu talis principii, essentia Dei est satis & congruo modo præsens per seipsam.

4. Et hinc solvitur difficultas quæ occurrit ex eo quod anima nostra non intelligit se ipsam, etsi sibi ipsi præsentissimam, nisi per speciem sui; quod etiam verum est de cognitione quam habet de internis corporis partibus, quas non cognoscit ex eo quòd sint ipsi Physicè præsentis. Respondetur enim id oriri ex imperfectione, & limitatione animæ, quæ est determinata ad intelligendum tantum ad præsentiam intentionalem objectorum,

quando scilicet ipsa est totum particulare principium intellectiōis cum solo Dei concursu generali. Ex quo magis patet, id quod facit necessitatem specierum, esse imperfectionem principii particularis cognitionem producentis. Cum autem hīc Deus ingrediatur totalitatem principii particularis visionem efficientis, necessitas illa, & indigentia hīc non repetietur.

SECTIO SEPTIMA.

Solvuntur objectiones.

1. **O**bjicies ex Esparza hic quæst. 12. Lumen gloriæ est aliquid indistinctum à specie impressa. Quare cum detur lumen gloriæ, negari non potest species impressa Dei. Antecedens probatur, quia intellectus non est juvabilis, neque elevabilis ad aliquid supernaturale, nisi per species supernaturales, eoquod naturaliter in suis operationibus non juvetur nisi per species. Universaliter enim loquendo nulla causa, sive efficiens, sive materialis, est elevabilis divinitus præterquam ad effectus & formas specialiter affines effectibus & formis sibi connaturalibus, & per aliqua promotiva eorundem intra proprium cuiusque genus, & perfectionem peculiarem. Quod autem intellectus naturaliter &

de se non juvetur nisi per species, probatur, quia cum sit tantum assimilativus intentionaliter, non potest juvari nisi per principium ex suo conceptu pariter assimilativum, cuiusmodi est species impressa, quæ est similitudo intentionalis virtualis objecti cognoscendi.

2. Respondeo negando antecedens, ex quo sequeretur primò, habitum fidei non esse nisi speciem impressam veracitatis, & locutionis divinæ, quod dici non potest, primò, quia ut probatum est, species ex suo genere non sunt effectivæ, sed tantum repræsentativæ. Habitus autem fidei est effectivus actuum fidei supernaturalium, & per hoc instrumentum Dei, & causa elevans intellectum ad producendas cognitiones in entitate supernaturales. Secundò quia si non datur alius habitus fidei ad credendum, nisi melior propositio objecti per speciem impressam, non dabitur alius habitus ad diligendum Deum supernaturaliter, nisi melior, & supernaturalis cognitio bonitatis diligendæ, quia ita se habet ad voluntatem cognitio intellectualis, seu species expressa objecti, sicut ad intellectum ipsa virtualis repræsentatio objecti, quæ fit per speciem impressam: si ergo in intellectu species expressa est id totum quo juvatur, similiter cognitio intellectus prævia actui voluntatis, erit totum quo juva-

bitur voluntas. Quod est falsum, ex ipso Esparza, apud quem, quæstione citata, dantur in voluntate creata habitus qui sunt qualitates inhærentes, effectivæ, distinctæ à prærequisitis cognitionibus. Et inprimis datur habitus charitatis ita distinctus. Ergo & absolutè dantur alii habitus in intellectu quàm species impressæ rerum cognoscendarum.

3 Jam ad probationem illius indistinctionis, nego intellectum non esse divinitus juvabilem ad actiones supernaturales, nisi per species, quia sicut juvabilis est voluntas per aliquod principium quod in effectione suarum operationum supernaturalium, se habeat ut quod, non autem tantum ut quo, ita per ejusmodi principium juvabilis est intellectus. Ratio à priori est, quia in operationibus supernaturalibus, sive intellectûs, sive voluntatis, est aliqua ratio quæ incompletè tantum attingibilis est ab intellectu aut voluntate, nempe ipsa supernaturalitas, aut modus qui per se est supernaturalis, & superat vim omnem naturæ creabilis. Debet igitur dari talis rationis principium, quod habeat rationem potentiæ, & additum potentiæ constituat potentiam in actu primo completam. Species autem non est tale principium, cum ex antedictis, nullo modo sit activa, sed tantum aliquid potentiam

proximè disponens ad operationem talem quâlis in ipsa principii virtute continetur. Et similiter se habet cognitio respectu actuum voluntatis. Ergo præter species, & cognitionem quæ tantum proponunt objecta, requiruntur habitus realiter ab illis distincti.

4. Ad illud axioma, nulla causa aliter est iuvabilis &c. Ipso concessio, dico habitus esse causas affines potentiis, & effectibus earum supernaturalibus, & aliquid talium effectuum promotivum intra idem genus, nempe assimilationis intentionalis, cujus supernaturalitatem seu modum naturæ omni creabili inattingibilem, potentiâ continent.

5. Objicit præterea E sparza, si principio elevabili ab effectu connaturali ad effectum supernaturalem, tanta fiat proportionalis additio perfectionis ex parte principii supernaturalis, ultra perfectionem principii connaturalis, quanta facienda est additio ex parte effectûs supernaturalis, ultra perfectionem effectûs connaturalis, eo ipso principium naturale reddetur adæquatè sufficiens ad effectum supernaturalem: & quidquid ulterius superadditur, erit superfluum, & consequenter impossibile ex natura rei. Concursus autem objectivus præstitus à Deo, vel per seipsum immediatè, vel per speciem impressam propriam ipsius

secundum se , tantundem superat excessu perfectionis concursum objecti præstitum à creaturis , vel per seipsas immediatè , vel per species proprias ipsarum , quanto excessu perfectionis visio immediata Dei , cognitionem abstractivam ejusdem : quandoquidem in prioribus utriusque comparationis extremis , provenit excessus , eodem proportionaliter modo , ab excessu Dei supra creaturas. Superflueret ergo lumen gloriæ , nec posset existere ex natura rei , si vel existeret species impressa Dei distincta realiter ab ipso lumine ; vel Deus per se immediatè exhiberet concursum objectivum in visionem sui. Non autem superfluit lumen gloriæ , & datur de facto. Ergo est indistinctum realiter à specie impressa propria Dei : nec Deus immediatè per seipsum concurrit objectivè ut quo , & ut quod , ad visionem beatificam.

6. Respondeo distinguendo majorem , si tanta fiat additio ex parte comprincipii propriè effectivi , & se habentis ut quod , in illa effectione , concedo : si tanta fiat additio ex parte comprincipii tantum propositivi , non autem effectivi , & licet esset effectivum , se habentis in illa ipsa effectione ut quo , idque non ex parte potentiæ intelligentis sed ex parte objecti , itant sit id quo objectum confert ad visionem , & nihil ultra , nego. Et dico speciem impres-

sam non esse effectivam sed tantum repræsentativam, seu propositivam objecti propter rationem jam allatam. Dico præterea illam se habere tantum ut virtutem qua objectum quomodocumque confert ad intellectionem, siquidem objecto congruè per se præiente, fit intellectio sine specie impressa, ut cum Angelus intelligit seipsum, in quo casu nihil deest ex parte principii effectivi. Unde species de se non agit, nec principium effectivum per se complet, quasi addendo ei virtutem propriè activam, sed tantum vel supplet defectum præsentiae objecti: vel si objectum est præiens, & per eam intelligitur, facit novo modo præiens, & proponit illud modo de se sufficiente ad intellectionem ac visionem ejus, siquidem ipsam ejus præsentiam, proponit. Ergo ipsa non est totum, neque id quod per se est necessarium ad effectum ut sic, operationis supernaturalis, quatenus supernaturalis est: sed ad hoc requiritur aliud principium supernaturale, ut connaturaliter fiat talis operatio, & Deus non sit tota causa particularis effectiva ipsius supernaturalitatis, seu rationis per se supernaturalis. Et tale principium non est nisi habitus dans ipsum posse formaliter, & non tantum inchoativè respectu rationis per se supernaturalis, & per hoc habens aliquo modo ra-

tionem potentiaë : quod de habitibus Theologicis docent Theologi.

SECTIO OCTAVA.

An possit dari species impressa qua videatur Deus, ut in se est.

1. **N**egant communiter Thomistæ, & multi alii. Affirmant Scotus, Bonaventura Aureolus, Molina Valentia, Suarez, &c.

2. Horum sententia probatur primò, quia talis species nullam implicantiam involuit, ut patebit ex solutione objectorum.

Secundò quia capacitas attingendi aliquid sine intermedia causa, quæ se habeat ut id quo illud attingatur, non tollit capacitatem attingendi illud idem per tale medium, quod ipsi potentiaë insit, & eam juvet ad illud attingendum, modò potentia de se talis medii sit capax. Sic in nostro intellectu, capacitas intelligendi ex ipsa immediata connexionione terminorum; non adimit intellectui discursûs capaci potestatem cognoscendi illam per præmissas. Unde consequenter dicendum est, capacitatem videndi aliquid sine specie impressa, non adimere intellectui, qui de se talium specierum ad visionem objectorum, est capax, potestatem videndi illud ipsum per

speciem quæ illud repræsentet eo modo quo unaquæque res per sui speciem propriam repræsentatur. Quare id quoque contingere poterit circa Deum qui non caret ea proprietate quæ aliis rebus inest, ut sint productivæ specierum repræsentantium ipsas prout in se sunt. Hoc enim imperfectionem non dicit in rebus ipsis, sed in subiecto talis passionis capaci, seu apto tales recipere species.

3. Neque dicas Dei repræsentationem, qualis fit per propriam speciem objecti, superare perfectionem possibilem reperiri in re creata, quia universaliter loquendo non est supra perfectionem possibilem reperiri in specie impressa, repræsentare ut quo, id quod per speciem expressam repræsentatur, siquidem ista vitalis repræsentatio, faciens formaliter cognoscentem intellectum, est in hoc genere repræsentationis ultimus finis, ac proinde optimum in quo in hoc genere sistitur. Et propter hanc ulterioritatem perfectionis, causa principalis speciei expressæ debet esse alia quàm species impressa, quæ etiam, ut ostendi, non est effectiva. Quare est ipsa potentia intellectiva, & respectu intellectiōis supernaturalis, etiam Deus, non tantum ut causa prima, sed ut causa particularis ipsius supernaturalitatis. Hinc nulla est contradictio in

hoc quòd species expressa sit perfectior quàm impressa, quæ est tantùm causa intermedia, se habens ad productionem illius ut virtus alterius principii, nempe objecti, de cuius ratione non est agere, sed ipsum præcisè objici, & reddi congruo modo præsens potentiæ assimilativæ.

4. Confirmatur primò, quia Angelus qui videt se sine specie sui per seipsum præcisè in ratione objecti, potest quoque videre se per speciem sui, siquidem potest sic ab alio Angelo videri. Et non potest ille alius Angelus ipsum distantem sine tali specie videre. Potest igitur ipsi Angelo viso dari ejusmodi species, qualis est in alio: quo posito, non est cur ipsa sit necessario inutilis in intellectu ejus. Et potest Deus concurrere ad visionem aptam ex ipsa oriri.

5. Præterea etsi non indigeat Angelus specie ad videndum objectum sibi intimè præsens, putà alium Angelum, cur non poterit idem objectum præsens videre per illud idem per quod videt ipsum distantem, nempe per speciem. Quare quod potest videri sine specie, potest quoque per speciem videri ab intellectu c pace speciei. Unde non est cur id circa Deum implicet. Et tantùm verum est Deum per speciem non videri nobilissimo quo potest videri

videri modo , siquidem ex genere suo cognitio quæ habetur sine specie , estque omni modo immediata , perfectior est eâ quæ fit per speciem.

6. Confirmatur secundò, quia qui videt intuitivè visionem quam de facto habet Beatus , in illa ipsa Deum cognoscit quidditivè. Quod si potest res aliqua creata, non ordinata de se ad hunc effectum , ut ex ipsa sequatur , ac procedat aliquo modo talis Dei cognitio , quæ continet maximam visionis perfectionem , nempe rationem notitiæ quidditivæ , cur non possit alia res de se ordinata ad hoc ut Deus per eam cognoscatur , cujusmodi est species impressa Dei , efficere ut omnino Deus videatur. Maximè cum id quod facit ut jam dicta visio visionis non sit visio objecti ipsius , non sit defectus potissimæ perfectionis , quæ est notitia quidditatis , sed perfectionis minùs ex genere suo excellentis , nempe defectus immediationis , quæ de se cadit in cognitiones non quidditativas , cujusmodi sunt cognitiones eorum quæ sensibus obijciuntur. Neque enim canis dum leporem videt , & sequitur , quidditatem ejus cognoscit , homini vel doctissimo ignotam.

S E C T I O N O N A.

Solvuntur objectiones.

1. **O**bjiciunt Delugo , Arrubal & alii, implicat forma quæ essentialiter ordinetur ad dandum alicui effectum formalem quem jam habet illa res per suam essentiam. Sic quia homo est per seipsum animal rationale, non potest id habere per aliud à se. Atqui Deus est proximè intelligibilis per essentiam suam, ergo non potest reddi intelligibilis per speciem impressam.

2. Respondeo primò , Deum non esse intelligibilem per essentiam suam eo modo quo homo est animal rationale per suam essentiam, nempe itaut hoc sit de essentiali conceptu ejus, sed tantum hoc sensu, quòd aptitudo ad ingenerandam objectivè notitiam sui , ejus essentiam necessariò consequatur, eo modo quo aptitudo quam habet Angelus ad hoc ut videatur per seipsum ab alio Angelo, dum ipsi intimè localiter præsens erit, sequitur essentiam ejus, imò sequitur totam ejus entitatem, seu omnia quæ ipsi insunt. Hæc autem aptitudo ad terminandam immediatam alterius Angeli visionem, non impedit ne ille ipse alter Angelus istum videre possit per speciem per quam de facto illum à se

certo intervallo spatii distantem videt. Nam sphaera intuitionis unius Angeli se extendit extra locum ejus, & non sine specie videt ea omnia quibus non est intimè præsens. Quare videt quæ intra illam sphaeram distantia sunt per species ipsorum.

3. Respondeo secundò Deum non esse eodem modo intelligibilem per seipsum, sed per suam essentiam physicam, atque entitatem, quo est intelligibilis per speciem. Nam per seipsum principaliter, & infinitè, & omni modo immediatè est intelligibilis; per speciem autem, instrumentaliter, finitè & cum aliquo immediationis defectu, quia aliquid inter potentiam & objectum mediat, se habens ut quo, seu ut id quo attingitur objectum. Item per se præcisè ita est intelligibilis, ut solo illo modo sit intelligibilis sibi: per speciem autem, soli intellectui creato, propter limitationem quæ de se inest tali cognoscendi modo. Non implicat autem unam rem habere per se ipsam aliquem effectum formalem uno modo, & per aliud habere illum eundem effectum sed cum aliqua disparitate, & alio modo. Sic Deus potest esse præsens, vel per solam suam immensitatem, vel aliter, nempe per unionem Hypostaticam. Item facere miracula seu effectus insolitos præter naturæ ordinem, aut etiam quemvis effectum

physicum, vel per seipsum solum, vel cum causa, aut à se assumpta, aut ad talem effectum de se ordinata. Et substantiæ creatæ sunt activæ tum per se, tum per accidentia sibi addita. Sic ignis potest in se producere calorem si ille aliunde immittatur: & potest per suum calorem calefacere, itaut non à solo calore oriatur actio, sed etiam ab igne. Quod clarè apparet prope os furni, ubi plus producitur caloris per lineas ab igne rectas, quam à latere, quia per lineas rectas ignis cum calore, & per calorem ut per suam virtutem agit, ad latera autem calor per se, sine tali concursu & influxu ignis, ipsum quodam modo elevantis ad plus agendum. Quare ignis est activus duobus modis, & per se, & per calorem, cum quo dum agit, major est effectus, quàm si solus calor per se agat. Idque clarè pateret si Deus igne destructo, calorem qui est prope os furni, conservaret. Tunc enim non plus produceretur caloris versus unam partem, quàm versus aliam, quia æqualiter per omnem circumferentiam produceretur. Nulla igitur est implicantia, si idem objectum ad sui cognitionem movet, & per seipsum, & per speciem. Ratio est, quia sicut sunt multi effectus qui sunt indifferentes ad hoc ut sint vel ab hac, vel ab illa causa, etiam diversæ speciei, ita multi sunt indifferen-

tes ut sint vel ab hac per se, vel ab hac eadem per aliquam vicariam ipsius virtutem: præsertim si in illa diversitate se tenente ex parte principii, sit aliqua etiam diversitas, aut inæqualitas in effectu.

4. Instant supradicti auctores, pluribus exemplis in oppositum. Et præter illud jam allatum de animalitate, & rationalitate, quæ non possunt ab homine haberi aliter quàm per propriam ipsius essentiam, allegant plurima Dei attributa, quorum effectus formalis non potest aliter convenire Deo, quàm per propriam ipsius naturam. Nam non potest Deus esse sapiens, bonus, immensus, omnipotens per aliquam formam sibi extrinsecam. Ex his duo inferunt, nempe primò veritatem illius sui principii, quòd effectus formalis quem res habet per seipsam, non possit ab ea per aliud à se haberi. Secundò quòd similiter, & à pari Deus non possit esse intelligibilis nisi per seipsum, non autem per formam à se distinctam, & ipsi extrinsecam.

5. Respondeo negando utramque consequentiam. Et ad primam dico non rectè inferri principium universale ex aliquibus particularibus exemplis, quia res genericè sumpta potest multis modis determinari, & in quibusdam particularibus sub ipsa contentis, potest determinari ad unum.

modum, in aliis autem habere indifferentiam ad hunc vel illum determinationis modum.

6. Ad secundam consequentiam, disparitatem assigno, quia rationes illæ animalitatis ac rationalitatis in homine, & sapientiæ, bonitatis, immensitatis, omnipotentiae, & aliæ tales in Deo sunt prædicata vel essentialia, vel rei naturam sequentia, sine respectu ad extrinsecum, ad quod ens tale diversimodè se habere possit. Esse autem intelligibile proximè, & ultimè, est prædicatum quod dicit respectum ad effectum extrinsecum, qui est indifferens ut à re intelligibili sit vel isto, vel illo modo, nempe vel ab illa præcisè sine intermedia virtute, vel ab ea per intermediam virtutem. Unde licet esse verum, seu intelligibile radicaliter, diversitatem in eadem re non admittat, tamen esse intelligibile proximè, & ultimè, diversitatem, & multipliciter quoad modum admittit; & diversitas illa in hoc consistit, quòd res cognitionem sui causare possit, vel per seipsam præcisè, vel per supplementum sui, quod est species ejus vicaria in repræsentando: Et Deus quoad utrumque causandi modum liber est. Nam præsentia ejus non necessariò hunc effectum habet. Unde & videntibus seipsum potest in seipso unum manifestare, non aliud,

putà objectum unius decreti, in illo decreto, non autem objectum alterius decreti, sicut nec illud aliud decretum. Itaque exercitium actuale intelligibilitatis divinæ diversimodè determinabile est.

7. Objicies secundò cum Granado. disput. 5. sect. 4. si possibilis esset species Dei impressa, emanaret necessariò ab essentia ejus, ut est prior voluntate, quemadmodum necessariò dimanant species ab objectis creatis. Et verò essentia divina, ut prior voluntate, visibilis est à Beatis. Ergo ei, quà tali, corresponderit species. Inde autem tria sequuntur absurda. Primum, Deum fore causam necessariam in productione alicujus creaturæ. Secundum speciem istam fore omnino infinitam, quia seclusa libertate, nihil erit unde limitetur activitas, & virtus essentiæ ad producendam repræsentationem sui: maximè cum intellectus creatus per potentiam obedientialem sit infinitè capax. Tertium talem speciem emanaturam à Deo semper, & in omnem intellectum, eo modo quo sol omnem hinc inde aërem necessariò illuminat.

8. Respondeo negando sequelam, quia etiam in creatis, species intellectuales non producuntur ab objectis quorum sunt species, sed ab aliqua causa efficiente, quæ quoad hoc agit proportionatè ad subje-

ctum in quo recipiuntur, nisi ipsum tale subiectum sit illud ipsum agens. Ac primò quidem in Angelis species objectorum, quoad primam perceptionem eorum, infunduntur illis à Deo, vel dum Deus creat ipsos Angelos, vel dum adsunt objecta: species autem actuum quæ ad recordationem inserviunt, ab ipso Angelico intellectu produci docent communiter Theologi. In hominibus autem species intellectuales, præsupposita propositione objectorum per sensationes externas, & internas, producuntur ab intellectu agente, à quo & fiunt species ad recordationem, postquam intellectus patiens, seu possibilis, actus suos exercuit. Adeo porro verum est species intelligibiles non produci ab objectis, ut homo non habeat speciem sui cerebri per intimam præsentiam ejus. Unde si cognoscit se habere cerebrum, id habet ex visu cerebri in aliis capitibus conspecti, & à pari. Quare cum alia sit causa specierum intelligibilium, quàm objectum ut sic, quod solum habet in hac productione rationem causæ exemplaris, aut prototypi, Deus non erit causa speciei impressæ qua ipse repræsentetur, nisi ut agens efficienter ad extra, quod non fit ab eo sine libertate, & secundùm exigentiam, aut capacitatem, sive naturalem, sive supernaturalem, semper finitam,

tam, subjectorum creatorum. Unde cor-
ruunt omnes sequelæ, quæ ex necessaria
emanatione talis speciei à Deo infere-
bantur.

9. Objicitur tertio, species impressa ex
sua ratione essentiali ordinatur ad supplen-
dum defectum præsentia, aut proportio-
nis objecti. Ergo si talis defectus est im-
possibilis quoad aliquod objectum, spe-
cies illius impressa erit impossibilis. At-
qui defectus ille est impossibilis quoad
Deum, qui est ubique necessario præ-
sens, & per seipsum in ratione objecti
est proportionatus, modò adsint omnia
necessaria ex parte principii visionem ef-
ficientis, siquidem per se videtur sine
specie à beatis per lumen gloriæ, quod
est aliud quàm talis species, ex prædictis.
Ergo ad Dei visionem species impressa
dari non potest. Prima consequentia pro-
batur, quia ubi defectus est impossibilis,
est quoque impossibilis natura realis, quæ
ordinetur ad supplendum defectum.

10. Respondeo speciem de se ordinari
ad proponendum suo certo modo & re-
præsentandum, quantum ipsa potest,
objectum, siue illud sit aliter repræsen-
tabile, & proximè aptum movere po-
tentiam, siue non: neque enim repugnat
pluribus modis idem diversimodè fieri, &
potentiam ad idem sic cum diversitate.

aliqua attingendum , multipliciter disponi , aut perfici. Et quidem si objectum est sublimius ipso intellectu , & supra sphaeram intuitionis ejus naturalis : tale objectum melius est per se visibile , quàm per ullam speciem modò potentia elevetur per concursum Dei nobiliorem ad illud sic attingendum. Et hoc modo , non tantùm Deus , sed etiam ea quæ sunt in entitate supernaturalia , ut gratia , melius videntur per seipsa , sine specie , quàm per speciem. Sed ad hoc necessarium est ut Deus nobiliori concursu , in ratione etiam causæ particularis , magis potentiam de se inferiorem elevet. Et minùs debitus est ille concursus quia non habet potentia id quod ex parte objecti superioris , & naturaliter ab ipsa inattingibilis , requiritur ad illum exigendum. Cum autem habetur species , minùs bene videtur objectum per imaginem præcisè sui , quàm per seipsum , maximè si ipsum est superioris ordinis ad omnia creabilia quibus repræsentari possit , ut Deus. Sed tunc magis esset debitus concursus , quia quò potentia magis est completa ad aliquem effectum , habetque omnia conferentia ad illum , eò magis exigit ut cum talibus principiis Deus concurrat. Hinc visio beatorum , quæ de facto produci-
tur sine specie , hoc ipso fit modo magis

supernaturali, ut sit ipsa perfectior. Quod si deest aliqua, quæ per maiorem exigentiam concursus haberetur, connaturalitas, præstat huic connaturalitati illa magis supernaturalis excellentia, quæ non est aliunde sine sua connaturalitate, in quantum lumen gloriæ, quod est principium visionis effectivum, exigit disjunctivè, ut vel addita specie objecti vicariâ, vel sine specie, ad videndum excellentiùs per moventem de se in ratione objecti essentiam, Deus concurret.

11. Obijciunt quartò, si daretur species Dei impressa, illa connaturaliter efficeret Dei visionem, & non efficeret. Primum quidem, quia complet intellectum ad visionem, eâque positâ nihil requiritur nisi qui ex parte Dei debetur, concursus: Secundum autem, quia essentia divina comparatur ad illam virtutem, ut principale agens ad substitutum, quod cessat in præsentia proprii, & principalis agentis.

12. Respondeo negando consequentiam, & dico speciem causaturam simul cum essentia Dei visionem, non effectivè, sed proponendo, ac repræsentando objectum, quod licet per seipsum optimè repræsentetur, per eam quoque alio modo, non æquè nobili, ut dictum est, sed non impossibili, repræsentatur.

13. Quod ut ampliùs constet, adverte primò idem pluribus modis posse simul proponi, ut cum idem per seipsum, & in speculo simul videndum objicitur, vel eadem propositio per duo media, ambo sufficientia, probatur.

14. Adverte secundò, in tali casu posse dari unicum actum, in intellectu, quo res ita apprehendatur, ut in eo sint veluti duæ perceptiones, quarum una æquivalebit uni actui, qui rei uno tantum modo propositæ corresponderet: altera alteri actui, quo eadem res alio modo proposita attingeretur. Idque hîc contingeret. Nam visio unica Dei causata tum immediatè ab essentia, tum ab ea mediante virtute ejus vicariâ aliquid habebit quo sit similis visioni quæ de facto est in beatis, & aliquid quo similis erit visioni quæ à sola specie procederet, essentia perinde se habente quoad causalitatem objectivam immediatam, ac si abesset.

15. Ad id autem quod dicitur de agente substituto. Respondeo cum Martinonio, disputatione 8. de Deo sect. 4. id verum tantum esse in moralibus, in quibus hoc est constitutum, ut potestas substituti cesset in præsentia principalis & substituentis. In Physicis autem contrarium clarè apparet in calore, qui cum sit vir-

tus ignis, etiam agit cum illo per se quoque, ut dictum est, agente. Hic autem speciatim dico, speciem Dei impressam, non esse substitutum ejus ex impotentia ipsius Dei ad movendum per se objectivè intellectum, sed ex possibilitate alterius minùs perfectæ, at verè tamen quidditivæ, & intuitivæ visionis, quæ modo etiam aliquatenus magis connaturali fiat, hoc ipso quòd non fit sine aliquo principio, præter id totum quod in alia intervenit, concursus Dei magis exigente. Quo posito, nihil vetat utriusque visionis perfectionem in unico actu reperiri, sicut possunt in eundem actum concurrere perfectio scientiæ, & perfectio opinionis.

16. Objicitur quintò, species impressa debet esse immaterialior, & elevatior objecto, quod apparet in speciebus intentionalibus rerum materialium. Atqui nihil potest esse immaterialius, aut elevatius Deo. Ergo non potest dari species ejus impressa. Consimile est argumentum quod alii sic proponunt. Accidens objectivum, seu se tenens primariò ex parte objecti, debet perficere & complere ipsum objectum, sicut accidens subjectivum, seu quod ordinatur ad perfectionem subjecti, perficit & complet ipsum subjectum. Et ratio universalis est,

quia accidens est essentialiter perfectio ejus cujus est accidens. Atqui species impressa est accidens objectivum rei quam repræsentat. Ergo species impressa essentialitæ divinæ deberet illam perficere, & complere in ratione intelligibilis, sive objecti: quod implicat, cum ipsa tum in omni genere perfectionis, tum etiam quo ad hoc sit summè completa, nec relinquat locum ulteriori perfectioni.

17. Respondeo negando majorem immaterialitatem speciei in communi, cum species spirituales possint esse multò imperfectiores objecto, putà species quam habet Angelus infimus de supremo. Illa enim ordinatur ad speciem expressam productibilem ab ipso infimo Angelo, ac proinde non habet perfectionem proportionatam perfectioni supremi Angeli. Quoad autem species intentionales rerum materialium, dico illas esse magis immateriales privativè, non autem positivè: quod est ipsas habere entitatem non ita solidam, ut ita loquar, sicut habent aliæ res corporeæ, neque ita sensibilem ut quod cum vel nunquam ipsæ, vel tantum ut receptæ in corpore reflectente, ut contingit in cubiculo clauso, percipi à sensu possint, non autem habent entitatem magis immaterialem, quasi in ipsis esset aliquid non corporeum, aut perfectius

corpore causante ipsas. Hoc enim implicat, cum non possit esse plus perfectionis in effectu, quàm fuit in causa.

18. Ad id quod dicitur de accidente ob-
jectivo, nego illud esse perfectivum omnis
omnino objecti, si perfectivum strictè su-
matur pro eo quod adiicit aliquam perfe-
ctionem rei. Non enim est perfectivum
objecti infiniti in quo ipsum cum infinita
eminentia continetur. Quare est tantum
perfectivum objecti finiti, ac per hoc per-
fectibilis, cujusmodi est omne objectum
creatum. Est autem, universaliter lo-
quendo, virtus objecti, quæ ipsa sit bona,
& illi adjuncta faciat majus bonum ex-
tensivè saltem, non autem intensivè, ubi
objectum est multò perfectius, quàm po-
tentia speciei receptiva. Et huc spectant
ea quibus ostenditur unionem hyposta-
ticam verbo additam, nullo modo ipsum
perficere, sed tantum cum illo constituere
effectum formalem bonum, & perfectum,
etiam infinitè, nempe compositum Thean-
dricum, non autem aliquid melius, aut
perfectius nisi quantitativè & numerali-
liter.

quam affert. S. Thomas, quia immaterialitas est radix cognitionis, & secundum modum immaterialitatis est modus cognitionis. Quare cum Deus sit in summo immaterialitatis, est quoque necessario in summo cognitionis.

5. Tertiò probatur ab effectibus, in quibus summa elucet ratio, ita ut ex iis nostra ratio instruatur, Non enim potest esse perfectissimus, & universalissimus ordo in rebus dissimilimis, & maxime oppositis, quin hoc proveniat ab agente per intellectum. Unde, quia in rebus naturalibus, & cognitionis expertibus, est perfectissimus ordo, isque talis ut mutato unius situ, puta solis, vel cohibito motu, non possit haberi finis naturæ, qui est hominum, quoad speciem, subsistentia, & conservatio, necesse est agens per intellectum esse prius agente per naturam, & illud agens esse primum omnium agens, sive Deum.

6. Quæres an sit in Deo intellectus per modum potentiae, & scientia per modum actûs, cum distinctione actionis ratiocinatae inter illa.

Respondeo esse per modum potentiae logicae, seu aptae concipi abstrahendo à perfectione actûs: & simili modo esse ipsum actum, utaliquid posterius conceptibile, & virtualiter promanans ab illa

potentia. Probatur, quia id datur in Deo
cujus ratio propria, & nomen manet, se-
clusis omnibus imperfectionibus, cum
quibus de facto in aliquibus entibus re-
peritur. Et hæc est regula quam tradit Au-
gustinus, libro primo ad Simplicianum.
quæst. 2. circa medium: quam etiam va-
riis exemplis declarat, & illustrat, ut
cum dicit, *De ira hominis detraho turbu-
lentum motum, ut maneat vindictæ vigor,
atque ita utcumque assurgo in notitiam il-
lius quæ appellatur ira Dei.* Atqui in po-
tentia illa logica, & actu logicè promanente à tali potentia, stat ratio potentiæ,
seu virtutis conceptibilis præcisivè ab
actu, & cum infinito perfectionis excessu
correspondentis, atque æquivalentis po-
tentiis physicis: item ratio actûs, seu per-
fectionis posterius conceptibilis, & cor-
respondentis cum infinita eminentia, acti-
bus distinctis potentiarum creatarum.
Ergo.

7. Dices ipsam rationem potentiæ uni-
versaliter involuere imperfectionem, ac
proinde in Deo implicare.

8. Respondeo negando antecedens,
quia hoc tantum verum est de potentia
physica, quæ potest carere actu, & ab
ipso distinguitur realiter, non autem de
ea quæ nec potest carere actu, nec di-
stingui ab illo, sed tantum præscindi.

Ratio est, quia illud de se non dicit imperfectionem, cujus contradictorium maximam imperfectionem necessariò includit. Atqui contradictorium potentiaë, seu principii intellectivi illo modo sumpti, maximam dicit imperfectionem, nempe non posse intelligere: unde sequitur non posse velle. Ergo falsum est potentiam illo modo sumptam, seu principium intellectivum, sumptum præciscivè ab intellectione, sine exclusione ejus, dicere imperfectionem.

SECTIO SECUNDA.

*Quodnam sit objectum formale Scientia
Divina.*

1. **A**Dverte primò, objectum formale posse sumi duobus modis. Primò ita ut causalitatem aliquam ac dependentiam importet in notitiam sui, & potentiam juvet, saltem mediatè per speciem sui ad illam notitiam. Multi etiam ab eo specificationem actûs, & determinationem, quasi à vera causa petunt. Secundò ita sumitur, ut ab istis omnibus imperfectionibus, quæ in sciente ac scientia connotantur, abstrahat, solùmque dicat id quod per se, independentè ab omni alio, in quo repræsentetur, intelligibile

est, & sic intelligitur, non autem tantum ut representatum in alio, vel consequenter ad illud.

2. Adverte secundò, terminum cognitionis posse etiam dupliciter accipi. Primò ita ut sit id quod cognoscitur tantum in alio, vel consequenter ad aliud, & sic dicitur objectum terminativum contradistinctè à formali per se intelligibili. Secundò ita ut sit id quod quomodocumque cognitionem terminat, abstrahendo ab hoc quòd vel per se, vel tantum in alio, aut consequenter ad aliud, cognoscatur.

3. His positis, quæritur quodnam sit objectum formale scientiæ Dei secundo modo, cum primus modus locum in Ente summè perfectò habere non possit. Itemque quomodo alia ab objecto illo, eandem scientiam terminent. Et circa hoc tres sunt potissimum sententiæ.

4. Prima asserit solam Dei essentiam prout abstrahit ab attributis, & personalitatibus divinis, esse tale objectum, itaque attributa & personalitates in ipsa, ut eminenter continente, ac repræsentante, videri. Ita recentiores aliqui apud Ruis, disp. 5. de scientiâ Dei. Sect. 8. num. 1. Et citant illi pro se antiquos sententiæ jam secundo loco referendæ auctores, asserentes Deum in essentia sua omnia videre: quod illi de essentia non ita præcisivè sumpta intelligunt.

5. Secunda ergo sententia docet totam Dei entitatem esse objectum formale adæquatum scientiæ Dei, ita ut cum dicitur, Deum in essentia sua videre omnia, sensus sit, in perfectionibus absolutis Dei omnia videri, ita tamen ut per se etiam videantur quæcumque Deo insunt, ut personalitates. Et ab objecto formali per se terminativo scientiæ Dei sola excludantur creata Deo extrinseca. Ita S. Thomas. Durandus, Bannes, Molina, Ruis, Suares, &c.

6. Tertia sententia docet objectum formale primarium scientiæ divinæ, esse omnia Deo intrinseca, sed creaturas quoque esse objectum formale alicujus cognitionis quam Deus habet de ipsis, si illa sumatur præcisivè ab omni alia cognitione Dei: etiamque ab ea quâ Deus videt illas creaturas in se ipso. Ita Vasquez, Granadus, Arriaga, & alii. Conformiter ad hanc tertiam sententiam.

7. Dico, objectum formale adæquatum scientiæ divinæ est omne verum: formale primarium est essentia Dei, & omnia ipsi intrinseca: formale minùs principale, non quidem scientiæ Dei sine addito, sed scientiæ alicujus quam Deus habet de creatis, ipsa creata, sive possibilia, sive futura, sive existentia, sive præterita.

8. Prima pars probatur, quia illud omne

ingreditur objectum formale intellectus summè perfecti, quod seipso immediatè est cognoscibile sine imperfectione. At tale est omne verum, hoc ipso quòd verum est. Et imperfectio est in intellectu, si illud hoc ipso non cognoscat: & licet per aliquid prius cognoscat, etiam imperfectio est, si illud in se quoque immediatè, & præciso quovis alio, non videat. Ergo.

9. Confirmatur quia alioquin objectum formale potentiæ finitæ, nempe intellectus creati, latiùs pateret objecto formali potentiæ infinitæ, nempe intellectus divini. Illud enim esset omne verum: hoc primum quidem, sed non omne verum.

10. Confirmatur secundò, quia alioquin aliquid esset verum, & nondum esset cognoscibile à Deo, nempe illud quod suam determinationem accipit, non à Deo, sed à libertate creata, idque jam in statu conditionato, non absolutè, sed conditionatè. Hæc enim veritas, verbi gratiâ, Antichristus, si ponatur in talibus circumstantiis, peccabit, seu se determinabit ad peccatum, non est cognoscibilis in illo Dei prædicato antecedente ipsam: quia nullum est Dei prædicatum ipsam antecedens, quod necessariam habeat connexionem cum illa. Itaque aliquid jam verum erit, & nondum à Deo cognoscibile. Quod ne admittatur,

dicendum est : scientiam Dei mediam necessariò habere pro objecto suo formali illam conditionatè futuram determinationem.

II. Quod si dicas veritatem illam esse intelligibilem in essentia Dei, seu in potentia Dei determinata per illam determinationem creaturæ : respondeo determinationem omnipotentia potius quàm essentia Dei ad respectum in quo illa sit cognoscibilis, esse ratione nostra posteriorem illa ipsa determinatione, prout se tenet ex parte creaturæ. Nam quia illa se determinat, Determinatur quoque omnipotentia Dei ad concurrendum cum ea, in quo est prioritas à quo, sive originis. Jam ergo in illo priori, determinatio creaturæ debet esse cognoscibilis à Deo, cum in illo instanti habeat suam veritatem, ratione cujus potest terminare actum intellectus creati, & esse objectum formale ejus : quod continget, si quis temere judicet, fore illam determinationem in tali hypothese, quæ judicii temeritas non impedit veritatem ejus. Est autem absurdum aliquam veritatem sumptam in aliquo priori, esse cognoscibilem à creatura, & in illo priori non esse cognoscibilem à Deo, ita ut scientia Dei sit quidem prior æternitate, sed posterior quoad objectum formale, quia ipsa habebit pro objecto formali aliquid certo modo

posterius illa veritate, nempe habitudinem omnipotentiae ad illum effectum conditionatè futurum: cognitio autem creata habet pro objecto formali illum ipsum effectum prout à causa creata determinatè futurum si ipsa in talibus circumstantiis ponatur: quod in hac re est, primum, etsi non independentè à Deo, potentiam quidem dante, & offerente concursum, sed ad utrumlibet ex oppositis, & relinquente indifferentiam causae sibi subordinatae, id est non potenti sine ipso agere.

12. Secunda pars probatur, quia illud est objectum formale primum, quod & per se cognoscibile est, & infinitè est nobilius. Talis autem est essentia Dei, & omnia Deo intrinseca, si cum creatis conferantur. Ergo.

13. Tertia pars probatur ex hac ipsa inferioritate, & infinita distantia rerum creatarum à Deo, quae etiam à Deo aliter quàm in se ipsis, perfectissimè cognoscuntur, nempe in ipso Deo, & quidem quoad possibilitatem in omnipotentia, quoad futuritionem absolutam, in decretis: quoad conditionatam, in omnipotentia conditionatè determinanda, quae licet, non sit prima de illa conditionata futuritione, est tamen summè perfecta cognitio. Quare infinitè in ratione objecti praestat Deus omnibus ipsi extrinsecis.

14. Adde quòd infinita excellentia cognitionis Divinæ habetur, aut arguitur ex objecto ejus increato, per ipsam comprehenso, non autem ex creato: quod proinde, nequidem secundum nos, sive arguitivè, specificat scientiam Dei, quatenus est infinitè perfectà cognitio: specificat autem tantum secundum quid, secundum nos, inquantum distinguit eam ab alia cognitione, quæ vel de alio objecto, vel aliter habetur.

SECTIO TERTIA.

Solvuntur objectiones.

1. **O**bjicies primò, illud solum est objectum formale scientiæ Dei, quod est primum cognoscibile, in quo omnia alia cognoscibilia sunt at talis est essentia, etiam ut anterior attributis, & personalitatibus. Ergo. Minor probatur, quia essentia continet omnia eminenter, & est primus eorum fons, unde ut ipsa comprehendatur, debent illa omnia in ipsa comprehendi, tanquam in principio ipsa connotante, & sic perfectissimè repræsentante: nam essentia est exemplar per illa imitabile, ac proinde ipsa repræsentat terminos illius imitabilitatis.

2. Respondeo ad objectum formale

adæquatum, non satis esse si sit aliquid quod per se recognoscatur, & per quod alia cognoscantur, sed requiri ut nihil per se cognoscatur nisi in illo, aut consequenter ad illud. Hinc si per eundem actum videretur in Deo res creata, & etiam ipsa in se perinde, ac si non videretur in Deo, Deus non erit objectum formale totale talis visionis, sed tantum primum, & magis spectabile. Item si quid in medio scientifico, & in medio probabili cognoscatur, medium scientificum non erit totale objectum formale sed tantum principale. Jam autem in essentia Dei, ut præscindente ab attributis, non sic videntur omnia ut in ea sola videantur. Nam etiam per se cognoscuntur, & attributa, & personalitates, & quidquid Deo intrinsicum est, & creaturæ, & quidquid habet rationem veri, ut supra dictum est.

3. Respondeo præterea continentiam eminentialem ex qua Deus potest producere singula, itemque participabilitatem essentia per modum causæ exemplaris, & prototypi, esse Dei perfectiones attributales. Unde cum dicitur Deum in essentia sua omnia videre propter illam continentiam, & participabilitatem, non potest sumi essentia ut præscindens ab attributis sic enim dicit tantum spiritum à se, & nihil ultra, & quicumque adjicietur conceptus obje-

ctivus, erit inde fluens, ac proinde attributalis.

4. Objicies secundò, objectum formale scientiæ Dei debet esse aliquid commune tribus personis. Ergo non includit personalitates.

5. Respondeo distinguendo antecedens, commune in ratione objecti per se attingibilis ab illis, concedo. Commune in modo habendi illud quod est tale objectum, nego id verum esse de objecto formali totali. Nam etiam personalitates quæ non sunt aliquid commune, ingrediuntur tale objectum. Et ipsa etiam creata, ut ostensum est, sunt objectum minùs principale alicujus Dei scientiæ, circa quod notandum est, non esse necesse ut objectum formale cognitionis sit intrinsecum cognoscenti, sed satis esse si illud sit de se representabile, & in cognoscente sit facultas ad illud sibi vitaliter exprimendum. Sic Angelus penetratus ab alio, & locus ipse in quo est, omniaque in eo inclusa, sunt ipsi objectum formale per se ipsa, etiam sine specie sui, quæ sit Angelo cognoscenti intrinseca, quia per se sufficienter sunt applicata, & cognoscibilia, unde Deus non dat eorum speciem ad hoc ut cognoscantur.

6. Objicies tertio, objectum formale scientiæ Dei debet ipsam scientiam ante-

cedere, ergo illud debet esse essentia, ut est prior attributis.

7. Respondeo distinguendo antecedens, objectum illud secundum omnia quæ includit, & secundum omnes rationes formales, debet antecedere totam Dei scientiam, nego: debet ita antecedere, ut cuiusvis cognitionis virtualiter distinctæ ab alia, objectum sit prius illa sic sumpta cognitione, concedo. Sic essentia est prior cognitione ipsius essentiæ: & cognitio illa essentiæ est prior cognitione illius cognitionis: & quævis alia perfectio est prior cognitione ad ipsam terminata, ipsiusque repræsentativa.

8. Obijcies quartò, res creatæ sunt aliquid insufficiens ut respectu scientiæ divinæ habeant rationem objecti formalis: quod probatur primò ex Patribus inter quos S. Dionysius de divinis nominibus, cap. 7. ita habet. *Non igitur propriam sui notitiam Deus habet, aliam autem quæ communiter ac generaliter ea quæ sunt omnia comprehendit. Ipsa enim se ipsam omnium causa noscens, nullo prorsus modo ea quæ à se perfectæ sunt, & quorum causa est; ignorabit.* Sic ergo Deus ea quæ sunt noscit, non rerum notitiâ, sed sui. Et Augustinus libro 5. de Genesi ad literam cap. 15. verba illa Joannis. *Primò, Quod factum est in ipso vita erat,* sic explicat, in

qua vita vidit omnia quando fecit & sicut vidit ita ea fecit non prater se ipsum videns, sed in se ipso. Probatur secundò, quia cum cognitio specificetur ex objecto formali, si Deus cognosceret creata in seipsis, cognitio illa esset imperfecta. Deus autem non cognoscit nisi perfectissimè.

9. Respondeo distinguendo antecedens, si per objectum formale intelligatur objectum propriè motivum, aut specificativum simpliciter, etiam secundum nos, id est per se notificativum excellentiæ quæ cognitioni inest, concedo. Si nec propriè motivum, ut movent ea quæ producant speciem sui, neque specificativum simpliciter, etiam arguitivè, & secundum nos, sed tantum secundum quid, in quantum unam Dei cognitionem per se distinguit ab alia, cum tamen ex ipso non possit argui excellentia illius divinæ cognitionis, quæ tota habetur, & infertur ex principio ipso intellectivo. Nego. Et dico cum tota specificatio actuum ab objectis non sit nisi notificatio ipsorum actuum per objecta, ob similitudinem intentionalem, & respectum qui inter illa intercedit, aliqua esse objecta, quæ parum, etiam isto modo, notificant actus, quia non important per se excellentiam eorum, sed tantum distinctionem ab aliis actibus qui sunt circa alia objecta. Sic cognitio quam Angelus ha-

bet de lapide per ipsam cognoscibilitatem lapidis, parum specificatur ab illo objecto, & ne quidem distinguitur ab humana cognitione de eodem lapide, sed tantum ab aliis cognitionibus quæ alia objecta repræsentant. Contrà autem in visione quam habet Angelus de alio Angelo per se viso, objectum illud magis declarat excellentiam talis cognitionis, quia visio Angelici, qua ipse per se attingitur, non potest esse nisi valde excellens, maximè si sit proportionata cognoscibilitati ejus, cujusmodi est in Angelo non inferiore. Sic ergo cognitio quidem Dei, quam habet de seipso, potest, dici specificari secundum nos ab ipso in ratione objecti, in quantum constat & evidens est ad tale objectum comprehendendum, quomodo illud necessario Deus comprehendit, necessariam esse infinitam perfectionem in cognitione. At verò cognitio quam Deus habet de re creata, non sic specificatur, quia objectum illud non notificat de se excellentiam cognitionis divinæ, quæ tantum habetur, & infertur ex perfectione principii intellectivi: sed tantum notificat distinctionem formalem illius cognitionis divinæ de tali re creata, ab alia Dei cognitione de alia re, & hic tantum secundum quid specificat infra ipsum commune spe-

cificandi genus ; quod nullam imperfectionem in cognitione Dei, aliunde suam habente infinitam perfectionem importat.

10. Ad auctoritatem Patrum, respondeo ipsos hoc tantum velle ; Deum cognoscere omnia in se ipso, & non indigere existentia actuali rerum ut cognoscat ipsas. Itemque cognitionem quam habet de illis adæquatè sumptam, non esse ita distinctam à cognitione quam habet de se ipso, ut in ipsa non comprehendatur, quia verè in comprehensione Dei includitur cognitio creaturarum excellentissima quo ad modum, qua nimirum videntur ut termini cum Deo connexi, & in ipso fundati, ac procedentes ab ipso, & ad ipsum ordinati, cum quo stat quod conjunctim, non autem divisim, termini illi, etiam videantur directè in seipsis. Idque sic sumptum à Sanctis Patribus non negatur, quamvis hoc ab illis non attendatur.

11. Ad rationem solutio est in distinctione antecedentis.

Instabis. Satis est ad perfectionem divinæ cognitionis, si res creatæ sint objecta ejus merè terminativa & materialia. Et per hoc adhuc cognitio de una re distinguetur formaliter à cognitione quæ est de alia re, quia una dicet extensionem divinæ comprehensionis ad unum objectum mate-

riale; alia extentionem ejusdem ad aliud.

12. Respondeo distinguendo antecedens, satis ad perfectionem aliquam, eamque maximam, concedo: satis ad omnimodam, nego. Quia creaturæ etiam in se sunt intelligibiles sine imperfectione intelligentis, & imperfectio esset illas non sic attingere. Quod si ratio objecti terminativi sumatur abstractiùs, & non excludat immediatam repræsentabilitatem sui per cognitionem, sed tantùm vim motivam intellectûs, & vim specificandi simpliciter & absolutè, secundùm nos cognitionem sui, concedo creaturas esse objecta terminativa cognitionis divinæ, & tantùm terminativa, hoc sensu quòd non sint motiva, nec specificativa simpliciter? cum quo stat quòd per se immediatè repræsententur ab illa cognitione.

13. Ad id quod additur de futura sufficienti distinctione cognitionis quam Deus habet de una re, & cognitionis, quam habet de alia, per varias extentiones comprehensionis divinæ: Respondeo repræsentationem creaturarum per se ipsas, non poni ad habendam quomodolibet distinctionem cognitionis divinæ circa ipsas, quia jam dicto modo aliqua distinctio talis cognitionis haberetur: sed poni, quia talis cognitio directæ per se est perfectio simpliciter simplex, quæ debet tribui Deo. Dico autem
hac

hac posita repræsentatione directâ, distinctionem cognitionis quâ attingitur unum objectum, ab alia quâ attingitur aliud, bene peti ex illis objectis, licet non petatur simpliciter & adæquatè ab illis specificatio cognitionis divinæ, etiam directæ circa illa ipsa, in quantum talia objecta non notificant per se excellentiam illius cognitionis : unde meliùs sunt distinctiva, quam specificativa, & esse distinctiva convenit illis simpliciter, esse autem specificativa tantum secundum quid.

14. Instabis præterea si datur in Deo cognitio immediatè terminata ad rem creatam, illa non erit Theologica ex objecto. Ergo erit imperfecta.

15. Respondeo cum Arriaga, & aliis non fore imperfectam positivè, sed per præcisionem, sine exclusionem, in quo nulla est implicantia, quia ut aliquid locum habeat in Deo, non est necesse neque ut omnem, neque ut maximam ex genere suo, & formaliter perfectionem includat : alioqui non esset in Deo vita ut sic, quæ ex genere suo non tantam dicit perfectionem, quantam spiritus, & sapientia : sed satis est si dicat perfectionem non conjunctam cum ulla positiva imperfectione : quo modo erit perfectio simpliciter simplex, & hoc totum dictæ cognitioni convenit.

SECTIO QUARTA.

An Deus cognoscat futura contingentia.

1. **C**irca scientiam Dei difficultas est, quomodo illa se extendat ad ea quæ in nullo sui principio futuritionis suæ determinationem habent, cujuscumque sunt ea quæ pendent à libertate creata, hæc enim, positis omnibus tum ex parte Dei, tum ex parte causæ creatæ, ad ipsa prærequisitis, & antecedenter se habentibus, possunt non esse, & nondum ipsa in se existunt. Itaque non faciliè apparet in quo fundari possit judicium de futura eorum determinatione.

2. Dico tamen cum omnibus Theologis, Deum illa cognoscere. Et quo-ad modum illa cognoscendi, dico cum quamplurimis, illa cognosci in se ipsis.

3. Prima pars probatur, primò ex scripturæ testimoniis. Psalmo 138. Intellexisti cognitiones meas de longè. Et omnes vias meas prævidisti. Danielis 13. Nosti omnia antequam fiant, &c.

4. Probatur secundò ex prædictionibus futurorum contingentium, quæ habentur in scriptura, ut cum Deus revelavit Abrahamitarum descensum in Ægyptum, & reversionem post quingentos annos: Pharaon.

nis indurationem, & vexationem Judæorum ab Ægyptiis : quæ omnia à plurimorum libertate pendebant. Item Judæ proditio- nem, & Petri negationem, & similia, ob quæ omnia rectè Tertullianus libro secun- dō contra Marcionem cap. 5. ait, præscien- tia Dei tantos habet testes, quantos fecit prophetas.

5. Probatur tertiò ratione, quia evi- dens est naturaliter intellectum infinitè perfectum, qualis est solus divinus, per se necessariò scire omne quod est scibile. Et tale est omne quod est verum, modò nihil desit ex parte potentia: unde res- pectu potentia infinitè perfectæ omne ve- rum est immediatè se ipso scibile, & op- positum, argueret defectum in potentia. Jam autem una ex duabus propositionibus contradictoriis de futuro contingenti per se distinctè, & determinatè sumpta est vera. Ergo.

6. Minor probatur primò quia si una non est determinatè vera, ambæ erunt falsæ: non possunt autem ambæ esse falsæ; Ergo una ex illis est determinatè vera. Major probatur, quia si una non est de- terminatè vera, id inde proveniet quòd res contingens ante positionem sui, neque sit futura, neque non futura. Hoc autem posito utraque illarum propositionum con- tradictoriarum erit falsa, quia illa pro-

positio est falsa quæ dicit rem futuram, quæ non est futura, aut quæ negat rem futuram, de qua non est verum quod non sit futura: atqui posito quod res contingens, antequam sit, neque futura sit, neque non futura, ita se habebunt illæ propositiones, quia una affirmabit futuritionem de re, quæ non erit futura: & altera negabit futuritionem de re de qua non erit verum eam non esse futuram. Ergo positâ illâ doctrinâ, utraque ex illis contradicentibus erit falsa. Jam autem quòd duæ contradictoriæ etiam de futuro contingenti, non possint ambæ esse falsæ, probatur. Primò, quia posito quòd una sit falsa, si altera quoque sit falsa, ipsa non maximè illi opponetur, quia falso aliquid potest magis esse oppositum, quàm falsum: siquidem verum de eodem objecto magis est illi oppositum. Quod si una alteri non maximè opponitur, non erunt contradictoriæ, quia oppositio contradictoria est maxima: Itaque ad eam requiritur ut non possit esse in utraque contradicente falsitas.

7. Confirmatur, quia oppositio contradictoria in enuntiationibus, per hoc differt ab oppositione contraria, quòd contingat oppositas contrariè ambas esse falsas, ut sunt istæ duæ. Omnis homo est justus, nullus homo est justus: cum con-

tradictoriè oppositarum una semper in quacumque materia sit vera, & altera falsa: ut si dicatur, omnis homo est justus, aliquis homo non est justus. Petrus est justus, Petrus non est justus. Quare non potest in utraque admitti falsitas.

8. Probatur hoc ipsum secundò, quia si semel ambæ sint falsæ, non modò de facto aberit ab utraque contradicente veritas, sed nec fieri poterit ut ex illis altera sit vera. Nam si una ex illis nunc non veris, potest aliquando esse vera, tunc incipiet esse vera, quando causa, putà Petrus, actu se determinabit. At tunc non erit vera, quia propositio quæ enuntiat objectum futurum, non est vera quando actu est objectum, sicut quando res est præsens, non est vera propositio quæ dicit illam præteritam, quia non est conformis objecto. Quoniam igitur ne quidem per prædictam determinationem poterit reddi vera, numquam absolutè poterit esse vera.

9. Neque dicas propositionem istam, Messias veniet, esse veram, etsi venerit Messias, quia cum est vera, accipitur ut olim dicta, & scripta à Prophetis, ita ut sensus sit illam prædictionem antea fuisse veram, quod quærimus. Si autem acciperetur ut pertinens ad tempus præsens, esset falsa. Et sic illam credentes Judæi

falluntur, quia propositio quæ enuntiat rem futuram, si accipiatur ut pertinens ad tempus præsens, importat rem illam non esse adhuc. Unde non potest esse vera nisi ante existentiam rei, aut considerata ut ante illam existentiam facta. Non potest verò fieri, ut cum vera non fuerit antea, jam incipiat esse vera. Quis autem non videt, rationi id repugnare, quòd duarum contradictoriarum, non modò neutra sit aut fuerit vera, sed quòd neutra unquam possit esse vera.

10. Objectiones quæ contra hoc fiunt, jam à me solutas vide in selectis quæstionibus Metaphysicis.

SECTIO QUINTA.

*An Deus cognoscat contingentia
conditionata.*

1. **A**Dverte primò ex Boëthio, propositionem in còmmuni, rectè dividi in Categoricalam, & hypotheticam: Categoricala est quæ ab Aristotele una dicitur, & simpliciter seu absolutè aliquid affirmat. Hypothenica, quam subdividit in conjunctivam, disjunctivam, & conditionalem, ita ut sit genus ad istas, & quæ ita est una conjunctione plurium, ut vel totius veritas à singularium simul veritate dependeat, ut in conjunctivis; vel

veritas unius à veritate alterius, ut in conditionalibus ; vel etiam unius veritas à falsitate alterius, ut in disjunctivis. Nam in conjunctivis asseritur veritas totius, ad quod non sufficit ut vera sit una, sed totum est falsum, si una sit falsa, ut, Cræsus & dives est, & pauper. In disjunctivis asseritur veritas unius, licet indeterminatè, consequenter ad falsitatem alterius, etiam indeterminatè, ut, vel dies est, vel nox. In conditionalibus asseritur veritas unius consequenter, & dependenter à veritate alterius, ut si sol lucet, dies est. Potest etiam Hypothetica in genere definiri, ea in qua non simpliciter aliquid affirmatur, aut negatur, ut in cathégorica, sed ita ut copula sit modificata aliquâ vel conjunctione, vel disjunctione, vel conditione. Et adverte in iis quæ modales dicuntur, copulam non modificari, sed simpliciter asseri rem modificatam. Unde illæ sunt categoricæ. Nam cum dicitur, Verbi gratiâ, Petrum esse animal necessarium est, simpliciter affirmatur necessitas animalitatis, ita ut modificatio cadat, non supra copulam, sed supra animalitatem, cujus non ratio formalis præcisè, sed necessitas, quæ est extra conceptum ejus, affirmatur.

2. Adverte secundò his verbis à Boëthio definiri conditionalem, propositionem.

Quæ non omnino alterum de altero prædicat, sed tantum dicit esse alterum, si alterum sit, ut ista apud eundem. Si est homo, est animal. In hac enim ut idem explicat nec dicitur primò, esse hominem, nec secundò, esse animal, nec tertio, idem esse hominem & animal, nec quarto, id quod habet humanitatem, esse id quod habet animalitatem, sed quinto, ut idem loquitur, id tantum proponitur, quod si fuerit aliqua res, quæ sit homo, sit aliqua, quæ sit animal.

3. Adverte tertio, in propositione conditionali, particulam, si, esse ultimò distinctivam. Ratio est, quia cum copula propositionis in universum, sit forma ejus, hæc particula modificat, & determinat copulam talis propositionis, ad significandum consequens, non quomodocunque, sed ex hypothesi quod ponatur antecedens. Hinc patet omnem conditionalem strictè sumptam, esse aliquo modo illativam: si enim omnis omnino illatio desit, non erit quò à categorica distinguatur, quia tunc simpliciter, & sine ulla modificatione, aliquid enuntiabit, licet illud quod enuntiabit, sit modificatum. Itaque modificatio non cadet in affirmationem, sed in rem affirmatam, ut contingit in modalibus, quæ proinde sunt categoricæ.

4. Adverte quartò , tot esse species, aut quasi species conditionalium , quot modis potest sumi tò , si , quod est earum constitutivum. Illud autem universè dupliciter sumi potest, nempe vel ita ut significet conditionem quæ habeat cum consequente aliquam connexionem , vel ita ut importet conditionem quæ nullam involuat antecedentis ad consequens habitudinem , aut causæ , aut signi , unde dignosci possit illius consequentis veritas. Rursus cum tò , si , importat conditionem , quæ habet aliquam connexionem cum consequente , vel illa connexio est necessaria ex natura rei & infallibilis , ut cum dicitur , si est homo est animal ; vel illa connexio est tantùm contingens de se , ut cum dicitur , si vocetur , veniet. Si est primo modo necessaria connexio , ejusmodi conditionalis dicitur strictè illativa, non quòd aliæ etiam non significant inferendo , cum sine hoc non possit esse propositio conditionalis , sed quòd in istis reperiatur infallibilis , & semper certa ex natura rei consequentia. Si connexio est tantùm de se contingens , conditionalis vocatur materialis , quia enuntiat non naturæ consequentiam , sed actualem , quæ de facto sit in re , cum aliter esse posset , connexionem , cum aliqua tamen habitudine , aut etiam influxu morali antecedentis in con-

sequens. Porro conditionalis de conditione necessaria, non significat existentiam, sed consequentiam formalem consequentis ex antecedente. Unde ad veritatem earum, satis est si non possit esse antecedens, sine consequente, ut in allato exemplo, si est homo, est animal. Et ad falsitatem, sufficit si è contra possit esse id quod pro antecedente ponitur, absque eo quòd sit id quod ponitur pro consequente, etsi de facto existat tam illud consequens, quàm antecedens, ut si est animal, est homo. Posteriores de conditione non necessariò, sed nec merè secundùm accidens, connexa, significant non consecutionis necessitatem, sed existentiam consequentis, ut pendentem ab antecedente, tanquam à causa quæ ad illud aliquo modo, licet non necessariò conferat, aut à conditione quæ prærequirebatur ad illud, cum tamen illud, ipsâ positâ, posset non poni. Unde ad earum veritatem non est necessaria naturæ consequentia, sed determinatio existentiae quæ poterat non esse. Ratio cur ita significant, est quia unaquæque propositio naturalius significat id secundùm quod potest esse vera, quàm id secundùm quod potest esse falsa. Item potius significat id quod verè significare potest, quàm id quod non potest significare nisi falsò. Unde prædicatio per rem subiectam modi-

ficatur. Atqui conditionalis de conditione necessaria, infallibiliter est vera si enuntiet præcisè necessitatem consequentiæ. Si autem enuntiaret existentiam consequentis, contingeret illam esse falsam, ut, si est animal, est vivens. Nam homo secundum esse possibile, quo modo est animal, est vivens, nempe essentialiter: & sic propositio est necessariò vera. Si autem vivens sumatur participialiter, & actualitatem vitæ significet, cum tamen antecedens priore modo, seu præscindendo ab existentia accipiat, erit falsa. Itaque conditionalis de conditione de se necessaria, necessitatem consequentiæ significat, non existentiam consequentis. Quæ autem est de conditione verè quidem de facto, sed non necessariò inferente, semper esset falsa, nisi restringeretur ad enuntiandam solam existentiam consequentis, quia diceret necessitatem connexionis, & dependentiæ, quæ non est. Itaque significat illam existentiam consequentis, non autem necessariam consecutionem.

5. Quod spectat ad eas quæ sunt de conditione impertinenter se habente ad consequens, significant etiam, etsi falsò, existentiam consequentis, ut pendentem ab antecedente, aut consequentem ex illo, quia cum debeant significare quomodo.

cunque aliquam connexionem , ut pote habentes rationem hypotheticarum , quæ per hoc differunt ab absolutis : si significarent necessariam connexionem , magis essent falsæ , seu plus dicerent falsi , aut aliquid magis alienum à natura rerum subjectarum , idque ex acceptione æquivalenter universaliori , aut magis absoluta à limitatione temporis , quàm si significant tantum actualem connexionem , quod patet in ista , si avis volat in India , hic est hyems , aut æstas. Nam si significaret necessariam connexionem , sensus esset. Quoties avis volat in India , hic necessario est æstas , quæ propositio continet falsitatem extendentem se ad omnia tempora : si autem actualem existentiam , falsitas ejus restringitur ad hoc tempus.

6. Aliqui dicunt istas conditionales de conditione impertinenti , non esse conditionales , cum non importent aliquid quod sit conditio , sed aliud est id quod importatur ut conditio , non esse conditionem , aliud ipsum non significari ut conditionem. Potest significari ut conditio id quod non est re ipsa conditio , & propositionem conditionalem falsam reddit , non autem impedit ne ipsa sit conditionalis , id est aliquid significans non absolute sed sub conditione.

Addunt alii solas conditionales de con-

ditione necessaria esse conditionales, aut saltem solas esse veras, eo-quod solæ habeant consequentiam quæ per tò, si, importatur. Sed id omnino falsum est, quia cum dentur effectus ex aliqua causa, aut conditione, non necessariò quidem, sed reipsa tamen sequentes, existentia talium effectuum, ut ex tali causa, aut conditione sequens, enuntiari potest, quia quidquid est in re, est objectum assertionis veræ. Itaque cum de talibus effectibus loquimur, accommodatur ad materiam subiectam enuntiatio. Unde non necessitatem consequentiæ affirmamus, quæ non est: sed existentiam quæ de facto sit. Et per hoc quod affirmatur existentia, non necessitas consequentiæ, distinguuntur materiales ab illativis.

7. Adverte quintò quo-ad propositiones quæ sunt conditionales de objecto sub conditione futuro, alias esse de futuro conditionato exclusivè, seu de futuro quod nunquam erit, defectu conditionis excludente existentiam rei, alias de futuro præcisivè, quod quidem reipsa futurum est, sed spectatur adhuc ut indifferens ad existentiam, & tantum habiturum illam, si conditio ponatur, quæ ipsa adhuc in statu indeterminationis intellectui proponitur. Primi generis exemplum sit illud è scriptura 1. Rege 27. Si David Ceilæ re-

mansisset, Ceilani eum tradidissent. Item illud, Matth. 11. & Luc. 10. Si Christus Tyriis, & Sydoniis prædicasset, & talia miracula patrasset, pœnitentiam egissent. Secundi generis exempla sint istæ propositiones, si Petrus tali modo tentetur, Christum negabit. Si Saulus tali modo vocetur, convertetur, & fiet vas electionis. His præmissis.

8. Quæritur an Deus cognoscat omnia conditionata objecta, etiam de conditione non importante necessariam connexionem, sed tantum existentiam prædicati, ut pendentem ab antecedente. Et quæstio hæc se extendit tum ad conditionata exclusivè, tum ad conditionata præcisivè, per quorum cognitionem hoc habet Deus quod possit regere infallibiliter creatam voluntatem, nihilque, etsi liberum, nobis eveniat, quod non prius noverit quàm existentiam ejus viderit, ipsam scilicet conditionatam futuritionem præsciendo, ante suum absolutum de conditione decretum, cui præscientia illa prælucet.

9. Dico, Deus omnia conditionatè futura determinatè novit. Probatur primò ex scriptura, in qua Deus sæpe talia declaravit. Ut constat ex allatis exemplis conditionatorum exclusivè, in quibus quod respondit Davidi Deus, quodque asseruit

de Tyriis Christus, aliter non potest intelligi, quàm de cognitione ad ipsos conditionatè futuros effectus terminata.

10. Probatur secundò ex Patribus, inter quos D. Augustinus lib. 2. de Genesi ad literam cap. 6. contra illam Manichæorum objectionem, cur crearet Deus quos præsciebat malos futuros, post multa sic addit. *Cur ergo eos creavit, quos tales futurus esse præsciebat? Quia sicut prævidit quid mali essent facturi, sic etiam prævidit de malis factis eorum, quid boni esset ipse factururus.* Et cap. 11. *Cum eos vitiis propriis malos futuros esse præsciret, non eos tamen creare destitit.* Ibi vides ex Augustino ante decretam absolutè conditionem creationis, prævisa esse creandorum peccata. Alia testimonia tum Augustini tum aliorum Patrum videri possunt fusè relata apud Ruiz integris disputationibus 65. & 69. Ubi & refutantur adversariorum responsiones ad illa testimonia.

11. Probatur tertio ratione, quia omne verum. Itemque omne falsum à Deo cognoscitur, neque id negant adversarii. Atqui quævis condicionalis de futuro contingenti sive præcisivè, sive exclusivè, est determinatè vera, aut determinatè falsa: non autem indeterminatè, ut volunt adversarii, qui ex duabus talibus contradictoriè oppositis alteram quidem conce-

dunt esse veram, & alteram falsam; sed tantum disjunctivè. Ergo Deus unamquamque per se sumptam cognoscit esse determinatè veram, aut determinatè falsam.

12. Minor probatur, quia si unaquæque est tantum indeterminatè vera, aut falsa, privativè opposita in suo proprio, ac determinato subjecto, indeterminatorem habebunt. Ita ut eorum neutrum tali subjecto conveniat nempe veritas & falsitas in propositione determinata, determinatum quid determinatè, etsi sub conditione asserente. Consequens est falsum, quia est impossibile ut ex iis quæ sive formaliter, sive æquivalenter privativam oppositionem habent, neutrum proprio ac determinato subjecto insit: & per hoc privativa respectu proprii subjecti contradictoriis æquivalent, quod sicut contradictoriorum terminorum alter cuique subjecto necessariò convenit, nec datur medium carens utroque, ita privativè oppositorum terminorum alter semper subjecto ipsorum capaci inest, nec fieri potest ut neuter ei insit, ut patet in vidente, & cæco, respectu hominis actu existentis. Jam autem veritas & falsitas sunt æquivalenter privativa, quia illa saltem virtualiter privativam oppositionem habent, quæ nequidem divinitus componi possunt, & ita se habent ut unius positio destruat

destruat aliud in proprio eorum subjecto , & negatio similiter hujus in eodem subjecto sit positio illius , in quo differunt à multis contrariis quæ divinitus possunt simul poni in eodem subjecto , vel simul auferri , non obstante capacitate illius subjecti ut calor in summo gradu , & frigus item in summo gradu , & similia. Atqui veritas formalis , & falsitas item formalis de eadem re , circa idem , ne divinitus quidem componi possunt , & negatio veritatis semper ac necessariò falsitatem importat in proprio subjecto , sive in eo quod aliquid repræsentat. Nam quod repræsentat , si non habet conformitatem cum objecto , hoc ipso difformitatem habet : sicut si non habet difformitatem cum objecto , necessariò est illi conforme. Itaque veritas & falsitas sunt virtualiter privativa respectu proprii subjecti , quod est propositio quævis singularis , seu individualiter existens , cujusmodi sunt illæ de quibus nihil refert quòd objectum earum non habeat determinatam actualiter existentiam. Nam ad determinationem propositionis , satis est quod objectum ejus sit hoc , non autem illud : & hoc ipso est determinatum in ratione objecti , seu in ratione repræsentabilis. Quod probatur , quia quod de facto determinatè repræsentatur hac numero repræsentatione , est

hoc numero in esse repræsentabilis; quod etiam verum est de terminis universalibus, siue universalissimè, siue confusissimè sumptis, ut si dicatur homo ut sic est rationalis, vel aliquis oculus est necessarius ad videndum, in quibus neque universalitas neque maxima indeterminatio rei, quæ est objectum, impedit ne ipsum objectum, in ratione objecti, sit maximè singulare, & determinatum. Quòd si in propositione de futuro, requiritur ut res illa quæ est objectum, sit aliquid in se determinandum, siue re ipsa, siue sub conditione, si propositio est de futuro conditionato, id non requiritur, neque ut objectum in ratione objecti sit determinatum, neque ut propositio sit determinata, neque hæc numero propositio, sed ut sit vera; est autem determinata propositio hoc ipso quòd repræsentat hoc objectum, & non illud, sic igitur dabitur propositio determinata, quæ neque erit vera, neque falsa determinatè, sed vera aut falsa tantùm indeterminatè. Itaque extrema quæ privativam oppositionem saltem virtualiter habent in subjecto proprio, & determinato, quod est propositio determinata, indeterminationem habebunt. Atque ita non conveniet privativis mutua exclusio illorum propria.

¶ 3. Sed & ulterius sequitur quod osten-

sum est circa propositiones simplices absolutas de futuro contingenti, nempe oppositionem contradictoriam non fore maximam si neutra illarum est determinatè vera, aut determinatè falsa, quia per illam indeterminationem quæ de se implicat in propositionibus determinatis, ambæ reip-sa essent falsæ, ac proinde minùs oppositæ quàm illæ quarum una est vera & altera falsa. Ambæ inquam essent determinatè falsæ, quia illa est determinatè falsa, quæ affirmat aliquid futurum sub conditione, de quo non est verum quod ipsum existeret, etsi conditio poneretur. Tales autem sunt illæ tam affirmans, quàm negans si neutra illarum est determinatè vera, & neutra determinatè falsa. Ergo ex illa indeterminatione sequitur ambas esse determinatè falsas. Quo posito, simultas falsitatis summam oppositionem tollet, ad quam requiritur ut unaquæque alteram quoad veritatem aut falsitatem sibi dissimilem arguat, vera nimirum alteram falsam, & falsa alteram veram.

14. Addo, licet id tantùm sumatur quod concedunt, & docent adversarii, nempe ambas, neque veras, neque falsas fore determinatè, in eo inveniri quamdam concordiam, consistentem in hoc quòd ambæ abstrahant à veritate ac falsitate. Nam abstrahentia ab iis quæ oppo-

sitionem constituunt, hoc ipso unitatem quandam habent negativam, cujusmodi est generum, & specierum, abstrahentium à differentiis suis, ac diversitatibus quæ in illis determinatè sumptis reperiuntur. Itaque contradictoria non summè opponentur, & quamdam neutralitatem habebunt, quæ notioni contradictionis repugnat. Quare negari non potest ex duobus contradictoriis, etiam conditionatis, de futuro contingenti, alteram esse determinatè veram, & alteram determinatè falsam. Unde sequitur necessariò unius veritatem, & alterius falsitatem à Deo, omne verum, & omne falsum introspiciente, cognosci.

15. Dices differentię Entis genericè sumpti, neque sunt Ens, neque non ens, Ergo alicui subjecto considerato in aliquo statu, potest neuter ex duobus terminis contradictoriè oppositis, convenire.

16. Respondeo si Ens, & non ens sumatur in eodem invariato sensu, nempe vel utrimque in sensu reali, vel utrimque in sensu formali, quo modo contradictoria sunt, & non aliter, tunc alterum eorum determinatè convenire differentiis Entis, etiam in sententia ponente præcisionem illarum differentiarum ab Ente. Primò enim, si utrimque sumatur ens in sensu reali, patet differentias esse identicè

ens. Si autem utrobique sumatur in sensu formali, adhuc quidem in sententia negante prædictam præcisionem, erunt ens. In sententia autem præcisionem asserente, erunt non ens, id est non formaliter Ens, seu aliquid in suo conceptu non includens rationem formalem Entis, quo modo rationalitas non est animalitas, & similia, ad quæ de se invicem formaliter neganda, sufficit præcisio unius ab alio. Et ex hac quidem non inclusione Entis in differentiis Entis bene probatur illas fore nihilum, quia illud nihil est, quod ab universalissimo abstrahit, siquidem sublato eo quod omnia comprehendit, nihil restat. Et si Ens genericè sumptum non omnia formaliter comprehenderet, esset universalissimum, ut supponitur, & non esset, quia daretur aliquid superius tam ad ipsum, quàm ad illud quod ab ipso abstraheret. Omnibus enim contradistinctis positivis datur aliquid superius, idque est Ens, cum sit id per quod contradistincta illa, hoc ipso non universalissima, conveniunt in eo quod opponantur omni non Enti. Quia igitur differentiæ præscindentes ab Ente, hoc ipso essent formaliter extra universalissimum, extra quod formaliter sumptum, impossibile est dari aliquid positivum, essent omnino nihil. Sed hoc tantum est consequens ex illa non inclusione. Spe-

Etando autem illos præcisè terminos, Ens & non Ens, idque in sensu formali, & præsupposita abstractione differentiarum ab Ente, non ens, seu non formaliter Ens, est terminus infinitatus, qui nihil aliud tollit nisi rationem formalem Entis, sicut, non homo, est terminus qui nihil tollit nisi hominem, & de omni alio dicitur. Quare si aliqua ponantur formaliter distincta à ratione Entis, cujusmodi erunt differentiae ejus in prædicta sententia, non formaliter Ens illa non tollet, & de iis rectè prædicabitur, sicut non homo de quovis alio ab homine, & universaliter omnis terminus infinitatus de omni alio ab eo cui negationem præfixam habet. Et quia valet consequentia à prædicato infinitato ad negatum: tam verum erit dicere, differentiae non sunt formaliter Ens, quàm sunt non formaliter Ens. Sic neque in terminis, neque in propositionibus exceptionem patitur universalitas contradictoriae oppositionis, & cuicumque subjecto inest, de eo prædicatur alter ex terminis ita oppositis. Cujus rei ratio est quia oppositio contradictoria fundatur in principio universalissimo, nempe in isto, non potest idem esse & non esse, quod se extendit ad quidlibet, & ad quancumque formalitatem, & ad quemcumque rei statum. Unde etiam ad res contingentes, & ad

statum earum conditionatum perinde se habet , quo-ad importandam necessitatem unius ex taliter oppositis , sicut se habet quo-ad parem necessitatem , & impossibilitatem neutralitatis circa res de facto existentes. Quo-circa illa omnia æquè cognoscit intellectus divinus , qui quo-ad nullum verum deficere potest , & hoc ipso omne verum attingit , quodd est verum.

17. Confirmatur quia magna esset imperfectio in Deo si conditionatè futura non nosset. Nam eâ sublatâ cognitione gubernatio ejus in multis certitudine , & infallibilitate careret siquidem Deus pro eo instanti quo decernit dare , & quo dat hanc numero gratiam , non sciret qualis sit futurus effectus ejus sed id tantum in posteriori absoluta effectûs existentia videret. Itaque non posset infallibiliter aliquem convertere per medium illud per quod de facto convertetur. Quia ante effectum absolutè sumptum nihil esset unde haberetur infallibilitas talis effectûs per tale medium obtinendi. Quod si Deus aliquem velit infallibiliter convertere , infallibilitas illa debebit consistere in hoc quodd si non consentiat huic gratiæ dabit aliam , & semper aliam , donec conversus fuerit ; qui procedendi modus multum defectuosus est. Et verum esset Deum , cum dedit virgini gratiam ex qua liberè con-

senfit in maternitatem suam, ac generationem Christi, non habuisse pro illo instanti quo dabat gratiam, infallibilitatem Deo dignam de obtinendo illo consensu, sed tantum moralem certitudinem, cujus absolute potest esse contrarium. Itaque infallibilis certitudo secuta, tantum habita fuerit per effectum, & ista non pertinet ad constituendum Deum infallibiliter agentem. Sequeretur quoque Deum si alicui interroganti de existentia alicujus effectus sub quadam conditione futura, si ad sensum interrogationis qua illam ipsam existentiam, non autem dispositionem causarum exquirat, respondere velit, nihil aliud posse dicere nisi se rem ipsam certo non scire, maxime ubi causa libera esset valde indifferens, & ipsa futura anceps, & dubia ante determinationem suam.

18. Et hæc eadem sequuntur absurda ex doctrina illa quod Deus non videat res nisi ratione coexistentiæ physicæ ad æternitatem, indigeatque illa præsentia ad visionem. Tolluntur autem illi defectus per scientiam supradictam. Ergo ipsa est omnino conveniens, & necessaria Deo.

19. Et verè talis cognitio est de se perfectio simpliciter simplex: idque per se notum videtur, siquidem talem scientiam Ethnicus, etsi cum errore circa suos Deos,
tamen

tamen ex vera notione, quòd ipsa deo inesse debeat, supponebant in falsis illis Diis, dum ab eorum oraculis non conjecturam aliquam, neque propensionem causarum, sed, ut supra dictum est, de Davidis interrogatione, futuram determinationem exposcebant. Nulla autem perfectio simpliciter simplex Deo negari potest.

SECTIO SEXTA.

Solvuntur objectiones.

1. **O**bjiciunt adversarii primò, Deum sæpe in scripturis aliqua prædicere non infallibiliter, sed per conjecturam sumptam ex præcedenti dispositione: siquidem quæ sic prædicuntur non eveniunt re ipsa, ut Isaïæ 38. *Dispone domui tuae, quia morieris tu, & non vives.* Et Jonæ 3 *adhuc quadraginta dies & Ninive subvertetur.* Ergo in aliis prædictionibus ante-allatis, de futuris conditionatis, non est quærenda alia veritas.

2. Respondeo negando antecedens, quia in illis prædictionibus comminatoriis Deus non enuntiat existentiam futuri, aut non futuri effectûs, sed ipsam futuritionem conditionatam, si aliquid non fiat, ad quod hortatur homines, & talis futuritio est omnino certa Deo, qui novit quidem etiam

res illas non futuras, sed non utitur tali cognitione, neque enuntiat objectum ejus in talibus comminationibus. Itaque nullo modo utitur scientiâ conjecturali. Non est autem absurdum, Deum non dicere totum quod scit. Sed repugnat eum dicere aliquid quod non sciat infallibiliter.

3. Objiciunt secundò, sancti Patres reprehendunt semipelagianos quòd ponerent in Deo præscientiam meritorum conditionatorum, & talem præscientiam negant, ut sanctus Prosper, Epistolâ ad Augustinum, ubi ait, *in tantum commentitiis meritis electionem Dei subjiciunt, ut novo apud illos absurditatis genere, & non agenda præscita sint, & præscita non acta sint.*

4. Respondeo Patres non reprehendere in semipelagianis quod dicerent Deum prævidere opera sub conditione futura, sed quòd abuterentur illa præscientia Dei, & dicerent Deum ideo ex duobus infantibus eligere unum qui baptizabatur, & reprobare alium qui non baptizabatur, quòd videret illos, si ad ulteriorem ætatem pervenissent, dissimilia acturos; unum bona opera, alterum mala, & sic vocarent merita, quæ non erant merita: Siquidem nec erant, aut fuerant actu, nec erant antecedentia ad baptismum ut essent motivum conferendæ per illum primæ gratiæ: nunquam autem intenderunt negare simplici-

ter Deum prævidisse quid essent acturi illi infantes. Item abutebantur Massilienses illa præscientia ut dicerent Deum idcirco multis populis negare ministeria magistrorum qui Evangelium eis prædicarent, quòd prævideret illos non credituros: & sic futura conditionatè incredulitas puniretur per illam prædicatorum negationem. Hoc itaque reprehendebant Patres, inde maxime quòd si Deus talia conditionatè tantùm futura demerita attenderet, ac puniret, debuisset damnare eos quos rapuit ne malitia immutaret intellectum eorum. Itemque debuisset salvare illos Tyrios, atque Sidonios, quos præscivit acturos fuisse pœnitentiam, si Christum, ejusque miracula vidissent, & doctrinam audivissent, ut Judæi.

5. At inquires, sanctus Prosper simpliciter negat præscita quæ non agenda sunt.

6. Respondeo valere hîc regulam illam logicam talia sunt prædicata, qualia patiuntur esse subjecta. Nam cum materia subjecta hunc sensum postulet ut negetur præscita absolutè in ratione meriti, quæ nunquam agenda sunt, & quæ præscita fuerint tanquam merita, ac proinde absolutè prævisa, nunquam existere hoc tantùm negat divus Prosper appositè scilicet ad errorem semipelagianorum, cui sufficientissimè contradicit ille sensus.

7. Objiciunt tertio, D. Thomas quæstione 14. art. 9. duplicem tantum in Deo scientiam agnoscit, nempe scientiam visionis, quæ est de illis quæ fuerunt, vel sunt, vel erunt, & scientiam simplicis intelligentiæ, quæ præcisè est de iis quæ sunt in potentia Dei, aut creaturæ, & tamen nec fuerunt, nec sunt, nec erunt. Atqui scientia conditionatorum ad neutrum divisionis membrum, sumendo utrumque sub illa præcisè notione, pertinet, ut per se patet. Ergo est contra mentem sancti Thomæ.

8. Respondeo scientiam conditionatorum reduci ad scientiam simplicis intelligentiæ, quæ est de omnibus abstrahentibus ab existentia, etiamque de iis quæ existent, at consideratis antecederet ad decretam eorum existentiam: & hæc scientia præluet decreto de iis ponendis. Quoad mentem autem sancti Thomæ de hac scientia media, dico illam constare ex eo quod 3. p. quæstione 1. art. 5. ad 2. approbat illud quod Augustinus, libro de perseverantiæ dono, capite 4. ait, illa Christi verba Mathæi 11. *Si in Tyro & Sydone &c.* Fuisse attestationem de Tyriorum, & Sydoniorum poenitentia, quæ tantum conditionatè fuit extitura. Omnis autem attestatio Dei supponit certam, & infallibilem rei assertæ notitiam, ex cujus certitudine, & infallibilitate, ipsi attestationi falsum subesse

non possit : unde etiam oritur securitas fidei. Deinde ibidem sanctus Thomas ex propria sententia dicit notum fuisse Deo quòd multi populi, si prædicatum illis fuisset Evangelium, cum signis, & miraculis, fidem amplexi fuissent, quibus tamen occultas, sed justas ob causas, non ita subvenit : & ad hoc aptat illud Apostoli, *non est volentis neque currentis, sed misereantis Dei.*

9. Objicit quartò Didacus Alvares disp. 7. de auxiliis ea quæ nos dicimus futura conditionatè, non esse scibilia, quia non habent determinationem, neque in se, neque in causa, neque in Dei decreto, quale ille ponit ad cognoscenda libera absolutè futura.

10. Respondeo habere determinationem conditionatam in se ipsis consequenter ad determinationem conditionatè futuram causæ liberæ, quæ per actum suum determinari apta est, cum ante actum sit indifferens. Hinc per se immediatè scibilia sunt respectu intellectûs cui sufficit aliquid esse verum, ut ab eo immediatè sine alia propositione cognoscatur. Ratio à priori est, quia proprium est entis, esse repræsentabile eo modo quo ens est, sive actu, sive potentiâ, sive absolutè, sive conditionatè, & in hac cognoscibilitate consistit veritas entis quæ præsupponitur bonitati, sive ap-

petibilitati ejus. Quia etiam consequenter ad hanc entis proprietatem, convenit à contrario non enti alia opposita repræsentabilitas, terminativa conceptûs objectivè negativi, quæ præsupponitur odibilitati, seu potius non amabilitati, & non eligibilitati non entis. Et sic ea quæ non sunt futura, possint licet conditione sub qua esse possunt, sunt se ipsis à Deo cognoscibilia in ratione non entium, sicut se ipsis sunt non entia, determinata ad non esse, etsi conditio poneretur per quam esse possent.

11. Confirmatur hoc totum, quia tam determinatio illa conditionata ad esse aut non esse sufficit ad veritatem affirmativæ propositionis conditionalis, aut negativæ de tali objecto, quàm absoluta determinatio ad esse, aut non esse, sufficit ad veritatem propositionis absolutæ, affirmativæ item, aut negativæ, de futuro, aut non futuro absolutè. Minus enim requiritur ad veritatem conditionalis, cum illa minus dicat, & satis est objectum ipsius sic se habere, vel habiturum, aut non habiturum esse sub conditione, sicut illa repræsentat, ad hoc ut ipsa sit vera. Quia igitur determinatio futura absolutè sufficit ut propositio simplex, sive absoluta de futuro contingenti, sit vera, & objectum ejus per se immediatè cognoscibile à Deo, ita deter-

minatio conditionatè futura sufficiet, ut propositio conditionalis de tali objecto sit etiam vera, & objectum ejus per se immediatè à Deo cognoscibile, idque independentè à derminatione rei absoluta ad esse, aut non esse, de qua talis propositio nihil dicit.

12. Instabis, implicat aliquid extra Deum esse quomodocumque absque ullo ejus decreto. Talis autem conditionatè futura determinatio erit suo illo modo absque ullo Dei decreto. Ergo non sine implican-
tia id asseritur.

13. Respondeo determinationem illam non fore sine decreto conditionatè præsupposito inter conditiones quæ prærequiruntur ad futuritionem conditionatam illius determinationis, & effectûs. Hæc enim summè necessaria est conditio, sine qua nulla causa secunda potest agere. Quare istius propositionis, si Petrus ponatur in talibus circumstantiis, hoc faciet, sensus est iste, si ponatur in illis circumstantiis Deo offerente illi concursum suum in actu primo paratum atque indifferen-
tem per decretum de tali taliter ipsi exhibendo concursu, hoc faciet. Iste autem in decreto præsuppositionis modus sufficit, non ad positionem absolutam, sed ad futuritionem conditionatam effectûs, eique est omnino proportionatus. Porro istud de-

cretum non est determinativum rei, quæ alioqui non fieret liberè à causa secunda sed est causa sine qua, causa secunda agere non potest, utpote pendens necessariò à Deo, ut quoad suum esse, ita & quoad suum operari.

14. Quæres an qui primi de scientia media tractatus ex professo ediderunt, prædictum decretum conditionatum in objecto illius scientiæ admiserint. Nam quidam recentior docuit eos non ideo ab Alvare, & aliis Thomistis impugnatos, quòd ponerent in Deo scientiam, quam vocant mediam, sed quòd illam astruerent sine præsupposito illo Dei decreto.

15. Respondeo illos auctores tale decretum semper admisisse & inter conditiones ad determinationem voluntatis creatæ requisitas supposuisse, & tantum negasse illud esse determinativum rei. Hoc clarè docet Suarez in opusc. lib. 1. de absoluta scientia futurorum contingentium, ubi dicit decretum conditionatum quod implicite continetur in objecto scientiæ mediæ, non magis esse sufficientem causam cognoscendi effectum, ad quem concursus indifferens per illud decretum offerretur, quàm decretum absolutum de offerendo in statu absoluto concursu, pariter indifferenti, sit ratio cognoscendi determinationem ponendi effectus, quia utrobique decretum de con-

currendo concomitanter se habet ad voluntatem creatam, non autem causaliter.

16. Vasquez in 1. part. disput. 67. c. 4. num. 22. ita habet dicendum est ita Deum certò cognoscere futura sub conditione, ut etiam sub conditione subintelligatur Dei decretum de concurrento cum arbitrio, hoc modo, si Petro in hac occasione, vel illa darem hanc, vel illam vocationem, & ego cum illo cooperarer secundum quod illa postularet, nec miraculosè subtraherem concursum meum, fieret tale opus. His verbis nihil expressius esse potest & hinc mentem, ac doctrinam cæterorum qui prioribus illis, ac primariis auctoribus adhæserunt, sine dubitatione intelligere possumus.

Addo non repugnare scientiæ mediæ; si dicatur Deum habere hanc volitionem absolutam ex parte ipsius, at conditionatam ex parte objecti, qua dicat, volo, si Petrus in talibus circumstantiis poneretur, offerre illi concursum indifferentem ad se determinandum liberè: Et quia video, hoc posito, illum se determinaturum ad hoc, volo, si esset illa hypothesis, concurrere ad talem determinationis effectum. Hoc decretum rectè admittitur, tum quia non tollit libertatem creaturæ, quia non tollit determinationem ejus à seipsa elevata à Deo, se illi determinabilem exhibente, tum quia tollit

omnem inactionem à voluntate Dei , quam decet esse circa quodlibet volibile , atque agibile determinatam , sed vel à seipsa sola , ut in effectibus quos per se solum Deus producit , vel consequenter ad prævisam etiam in statu conditionato determinationem creaturæ liberæ , cui nisi omnipotentiam suam determinabilem offerret , non posset illa liberè agere , nec suam libertatem exercere. Cæterum talis decreti esse absolutum , seu actualitas non pertinet ad objectum scientiæ mediæ , quæ cum non sit nisi de rebus in statu conditionato spectatis , earum etiam causas , inter quas est tale decretum , non præsupponit nisi conditionatè. Quod inde patet , quia de rebus etiam absolutè futuris , at spectatis antecedenter ad esse absolutum , seu ad existentiam quam habebunt , Deus habet scientiam mediam , putà de Antichristo , de quo hoc novit , si homo ille existat , taliterque per suos pravos habitus disponatur , fiet hominum pessimus , & se contra Deum efferet. Qua præsupposita cognitione , Deus non desinit in posteriori instanti habere decretum de ipso producendo , & permittenda ejus impietate ob justas ipsi cognitæ causas , putà quia abusus priorum gratiarum rectè punitur non dando nisi minus potentes , quæ crescente cordis malignitate atque induratione , obstinatè ab eo spernentur.

17. Dices, si negatur in Deo decretum determinans absolute effectus conditionatè futuros, tolletur ratio primæ ac supremæ causæ à qua omnia immediate pendeant, quia creatura subterfugiet causalitatem Dei, & videbit Deus determinationem concursus sui non descendere à suo decreto, sed ex determinatione voluntatis creatæ, ac proinde videbit illam determinationem non esse à se, siquidem illam expectat à creatura, & ideo expectat, ut videat quam in partem flexura se sit voluntas.

18. Respondeo non tolli rationem primæ ac supremæ causæ, sed eam optimo modo cognosci, cum dicitur, causam etiam liberam non posse agere nisi sub Deo præveniente per decretum quo illi concursus indifferentem offert; nec subterfugi causalitatem Dei, dum nihil sit nisi dependentèr à concursu ejus per tale decretum oblato: nec minui dependentiam ab eo, dum ipse ita liberum facit utrumvis ex oppositis, ut maneat impossibilitas agendi sine ipso: dumque attendit, & quodammodo expectat determinationem creaturæ, in hoc elucere bonitatem, qua implet officium causæ primæ respectu causæ secundæ liberæ, cujus conditioni & libertati à se datæ se accommodat, permittendo usum oblati concursus indifferentis. Cœterum dico non esse opus ut determinatio talis causæ sit ab

ipſo Deo , ſub ratione formali determinati-
onis , tum quia univerſaliter loquendo
non eſt opus ut res omnis ſit à Deo ſub
quacumque formalitate , putâ difformitatis
cum lege, cum ratione , cum regulis actûs,
cum prototypo , & ſimilibus , ſed ſatis eſt
ſi res omnis ſit à Deo , quoad ſuam enti-
tatem , & omnes perfectiones ac proprie-
tates ipſam conſequentes & non provenien-
tes à defectu & fallibilitate, & errore crea-
turæ : Tum quia per ſe implicat ut deter-
minatio creaturæ , prout eſt determinatio
creaturæ , ſit formaliter ſub iſta ratione à
Deo , cum ſic ſit actio creaturæ, quæ prout
eſt actio creaturæ , non eſt actio Dei niſi
realiter , in quantum eadem res eſt effectus
Dei & creaturæ , ſub uno quidem reſpectu
actio Dei , & influxus cauſæ independentis,
ſub alio autem actio creaturæ , & influxus
cauſæ dependentis , & ipſa relatio depen-
dentiæ. Quare ſimiliter determinatio creatæ
voluntatis liberæ , prout eſt determinatio
ipſius , non eſt formaliter ſub iſta ratione à
à Deo , quia ſic non ipſa ſe determinaret,
ſed determinaretur , cum tamen debeat
ſe ſe determinare ut libera : ſed eſt à Deo
entitativè. utpote cooperante cum illa cauſa,
eſtque ipſi Deo libera per reſpectum ad de-
cretum præveniens, quo obtulit indifferen-
tem concurſum : quod decretum niſi fuiſſet
liberè à Deo poſitum , impoſſibile fuiſſet

creatam voluntatem agere ac se se determinare neque potest aliter esse à Deo determinatio causæ liberæ. Imò etiam determinatio causarum necessariorum, putà ignis ad comburendum, aut lapidis ad cadendum deorsum, ita est à Deo realiter & entitativè, ut non sit ab ipso immediatè formaliter sub ratione determinationis proximæ. Nam alioqui non essent istæ causæ ex se, & natura sua determinatæ ad tales effectus producendos, ubi non est obex, & adsunt omnia requisita; sed essent merè passivè indifferentes, quod nemo dixerit. Tantùm enim indigent concursu ad suos effectus, ad quos habent potentias necessarias ad unum determinatas. Hinc magis pater nihil esse implicantia si determinatio creaturæ liberæ non sit à Deo proximè, sub ista ratione formali determinationis, sed tantùm realiter & entitativè, per identitatem unius effectûs, qui sub uno respectu est actio & determinatio creaturæ, sub alio est actio & cooperatio illi determinationi accommodata, & conformis, ad quam Deus antecederet se se determinabilem liberrimè præbuit: quod sufficit ut ad concursum sit simpliciter, & absolute liber. Neque necesse est, aut possibile, Deum esse ad omnia quæcumque agit proximè indifferentem, sed satis est si vel proximè, vel in aliquo priore sit indifferens. Nam

posito quòd promiserit aliquid , non est
indifferens ad illud adimplendum : neque
perfectio libertatis , exigit indifferentiam
ad illud. Nam est potius defectus libertatis
esse indifferentem ad satisfaciendum pro-
missioni : unde similiter , posito quòd Deus
obulerit indifferentem concursum ad utrum-
vis ex duobus oppositis non est defectus,
sed perfectio indefectibilis libertatis , per-
mittere usum talis concursus conformiter ,
& consequenter ad subjectam antecederet
liberè determinabilitatem.

19. Quod si tollatur illa determinabili-
tas , & loco decreti indifferentis quo illa
constituetur , ponatur decretum antecedens,
absolutè determinans, ex quo etiam sequa-
tur prævia ad actionem creaturæ præde-
terminatio physica, tria nullo modo admit-
tenda sequentur. Primò Deus erit omnis
mali causa determinans. Unde malum esset
ei ascribendum, quia effectus semper as-
cribitur causæ determinanti , & multò ma-
gis , quam determinatæ , si hoc tantum
spectetur quòd una sit determinans , altera
determinata. Quod ideo dico quia si deter-
minata ad aliquem effectum , præintendit
illum , & ad ipsum hortata est , & providit
ut fieret , deditque ad hoc potestatem ex
prævia illa intentione , tunc est magis, &
meliori modo causa , quàm determinans
proximè. Et sic Deus est magis , & meliori

modo causa bonorum operum, quàm homo qui proximè se determinat ad illa, quia Deus præintendit, & hortatus est, & gratiam dedit supra ordinem naturæ, ut illa fierent. Respectu autem mali, cum illud non intendat, & dehortetur, & vetet, non est illo modo causa, neque omnino causa moralis, cum nullo modo in illud tendat; neque etiam est causa difformitatis, cum non agat contra legem, sed sicut exigit officium, & debitum causæ primæ universaliter concurrentis, & ut sic determinetur à creata libertate. Sic munus causæ primæ nullam includit causalitatem in ratione mali, & solam actûs mali physicam entitatem efficit.

20. Secundum consequens non admitendum, illud est, quòd creata voluntas non esset libera, quia non est libertas sine expedita facultate determinandi se ad utrumvis ex oppositis. Volunt autem adversarii impossibile esse, ut aliunde sit ulla determinatio, quàm à Deo, per decretum absolutum circa quodlibet.

21. Tertium consequens est, quòd nulla futura sit culpa hominis malum agentis, quia in tali actione homo sequetur causalitatem Dei, quam non poterit excludere, quia ut id posset, deberet ei esse possibilis actus oppositus, per quem fieret ista exclusio. Non est autem ei possi-

bilis actus oppositus, quia non habet id sine quo non potest ille ab ipso poni. Nempe non habet prædeterminationem ad illum, nec potest habere ex hypothesi illius prædeterminationis quam jam habet. Et hæc hypothesis independenter ab ipso est, à Deo scilicet decreto prædeterminante ad actum malum, & causante physicam intrinsecam prædeterminationem ad illum.

22. Hæc sunt quæ sequuntur ex sententia ponente necessarium ad actus causarum liberarum decretum absolutum prædeterminans, & negante quidquam illis possibile sine tali antecedente decreto. Quæ cum & repugnent Dei sanctitati, & tollant libertatem creatæ voluntatis, & æquitatem damnationis, qua punietur malum quod non potuit evitari, admittendum omnino est pro causis liberis decretum offerens paratum ad opposita concursum, sub quo decreto creata voluntas possit uti determinato concursu, manente impotentia agendi sine concursu. Et sic nullo modo independenter à Deo aget, sed cum dependentia quæ causæ liberæ congruit.

23. Objicies quintò, ratio qua ostensum est futura conditionata habere veritatem, nempe quòd ex duabus propositionibus contradictoriis una sit determinatè

minatè vera, & altera falsa, non efficit id quod intendimus. Nam hoc concessio non sequetur eum qui cognosceret veritatem unius, cogniturum determinationem rei, seu existentiam effectûs qui dicitur conditionatè futurus, sed tantùm sequitur cogniturum defectum necessariæ connexionis inter antecedens & consequens, quia contradictoria affirmativæ in materia contingenti, non est illa quæ significat non existentiam effectûs in tali hypothese, sed quæ negationem connexionis necessariæ inter antecedens & consequens, quæ ne quidem erit vera etiamsi secuturus sit effectus: putà contradictoria istius, si Saulus tali modo vocetur, convertetur, non est ista quam volumus, si Saulus tali modo vocetur, non convertetur, quæ significat non existentiam conversionis, quamque nos dicimus falsam, sed ista, non si Saulus tali modo vocetur, convertetur: quæ significat non necessariò sequi ex tali Sauli vocatione conversionem ejus, & vera est etsi sit convertendus reipsa Saulus. Itaque ex illa præcisè notione, quòd Deus ex duabus contradictoriè oppositis cognoscat semper veritatem unius & falsitatem alterius, hoc tantùm sequetur, quòd Deus cognoscat veram esse negativam, quæ negat necessariam consecutionem, & nihil dicit de

existentia rei, & falsam proinde affirmativam, quæ dicit necessariam esse consecutionem consequentis ex antecedente.

24. Jam quòd prædicta propositio, quæ particulam negativam toti affirmativæ præponit, sit contradictoria non autem alia, quæ illam soli consequenti præponit. Probatur primò, quia contradictoria negans debet perimere id quod ponit affirmans. Atqui affirmans conditionalis ponit tò, si. Ergo illud perimere debet negativa. Probatur secundò, quia in conditionalibus de materia necessaria ita fit: putà contradictoria istius, si est homo, est animal, est ista, non si est homo, est animal. Et ratio ita præponendæ particulæ negativæ ante ipsum, si, seu ante totam affirmativam, petitur ex ipsa ratione generica conditionalium, quarum natura est affirmare vel negare ipsum, si, quo constituuntur in ratione conditionalium. Ergo idem erit de omnibus conditionalibus, ac proinde de illis de quibus agitur.

25. Respondeo negando contradictoriam conditionalis in materia contingenti, esse illam quæ toti affirmativæ negationem præfigit. Ad primam probationem distinguo minorem, affirmans conditionalis ponit tò, si, semper in eodem sensu necessariæ consecutionis, nego. Ali-

quando in sensu necessariæ consecutionis, aliquando autem in sensu dependentiæ & connexionis, de facto contingenter extituræ, concedo. Et dico tò, si, in hoc ultimo sensu aptius perimi per particulam negativam soli consequenti propositionis hypetheticæ præpositam, quàm per eandem toti propositioni ipsique particulæ conditionali præfixam, quia audito illo modo loquendi, non si, &c. Ingeneratur nobis iste conceptus non necessariò ex tali antecedente sequitur tale consequens. Quando autem soli consequenti præponitur, ingeneratur iste alius conceptus, etsi ponatur conditio, aut causa, ex qua posset sequi consequens, non tamen ita eveniet. Sic contradictoria istius, si Saulus tali modo vocetur, convertetur, est ista. Si Saulus, aut potius, etsi Saulus tali modo vocetur, non convertetur, quæ est falsa, sicut affirmativa in sensu quem intendimus, est vera.

26. Ad secundam probationem, negationem cur in conditionatis de materia necessaria præponatur particula negativa toti affirmativæ, ad faciendam ejus contradictoriam, peti ex conditione generica conditionalium, quia licet illis genericum sit perimere to, si, hoc fit, ut dixi, adhuc alio modo quàm præponendo negationem toti propositioni, nempe fit præ.

ponendo soli consequenti particulam negativam. Quare ratio præponendæ ante totam propositionem negationis, est ipsa qualitas materiæ, quæ sicut determinat affirmationem conditionalem ad sensum necessariæ connexionis, ita in contradictoria exigit negationem illius connexionis, quæ negatio per illam particulam negativæ antepositionem optimè intelligitur fieri. Cujus rei contrarium, cum reperiatur in conditionalibus enuntiativis, aliter debet poni particula negativa, nec nisi ante consequens: unde aptè ante ipsum collocatur.

27. Obicies sextò, ex anonimo, lib. de Priori & Posteriori cap. 25. nulla scientia in suo conceptu essentiali imperfectionem involvens, Deo tribuenda est. Talis autem est omnis cognitio conditionata, quia conceptum, & terminorum multitudinem, compositionem, connexionem unius cum alio, successionem, & illationem consequentis ab antecedente, & alias imperfectiones involvit. Quod constat ex eo quòd particula, si, ex sua vi & natura, sit conjunctio illativa, & nota illationis mentalis. Igitur si propter prædictas imperfectiones scientia enuntiativa, & discursiva à Deo removenda est, etiam & conditionata erit excludenda.

28. Respondeo, etsi cognitio objecti

conditionatè futuri possit esse cum prædictis imperfectionibus, posse etiam esse sine illis, sicut cognitio veritatis quam nos habemus per compositionem prædicati cum subiecto, & connexionis, & consequentiæ quam habemus per discursum, sive formalem, sive virtuale, potest haberi à Deo sine compositione & discursu. Dicimus autem tantum, Deum clarè intueri dependentiam illam re ipsa futuram consequentis ab antecedente, si ponatur antecedens, absque diversitate conceptuum, & illatione, quæ reperitur in nobis. Nempe videt Deus statum rerum pro tempore quo Saül Davidem insequabatur, futurum fuisse Cēilanis motivum ob quod reipsa Davidem tradidissent, si mansisset apud eos. Item novit quòd Tyrii, & Sydonii, audita Christi prædicatione, & visis miraculis, conversi essent. Neque tantum videt nos cognoscere per illationem, sed videt ipsas veritates, quæ sunt objectum illationis nostræ, sine illatione, sicut videt sine discursu veritates quas cum discursu cognoscimus.

29. Objicies septimò ex eodem. Nemo hæctenus ita desipuit, ut judicia, & decreta hypothetica simul cum absolutis conciperet de eadem re. Quis enim lucentem cernens lunam, dixerit, si luceret luna, eam aspicerem; aut breviarium tenens,

& legens dixerit, si haberem breviarium, illud legerem. Atqui Deus habet absoluta ab æterno judicia, & decreta de rebus omnibus quæ absolutè fieri possunt, statuitque eas fore, aut nunquam fore. Igitur indignum est, cum illis adhuc ei tribuere scientiam, & voluntatem hypotheticam de iisdem. Verbi gratiâ, cum statuerit ab æterno Paulum per preces Stephani convertere, quid opus est eum prius etiam ratione, ab æterno hypotheticè judicasse, & voluisse, quòd si Stephanus oret pro Paulo, sit convertendus.

30. Respondeo repugnare quidem coëxistentiam judiciorum absolutorum, & hypotheticorum sine diversitate signorum, seu instantium rationis, itemque repugnare nisi hypothetica sint naturâ priora, & conducant ad res absolutè ponendas, & videndas. Cujus rei contrarium habetur in allatis exemplis de aspectu lunæ, & lectione Breviarii, in quibus idcirco repugnat talis conjunctio judiciorum, & voluntatum. At nego repugnare simul illa omnia pro diversis instantibus rationis, & cum prædicto ordine. Et addo necessaria esse hypothetica judicia in multis rebus, ut de ipsis faciendis prudenter decernatur. Nam non prudenter Deus voluisset Saulum convertere per preces Stephani, nisi vidisset cum per obtentas illis

precibus gratias convertendum, & sic de aliis. Itaque scientia conditionatorum præluceat decretis absolutis, ex quibus sequitur futuritio rerum, & scientia visionis. Quod si valeret objectio, probaret, ut rectè argumentatur Martinon tom. 1. disp. 9. sect. 11. Deum non habuisse voluntatem conditionatam salvandi reprobos, id est, salvandi eos, si vellent mediis oblatis uti. Habuit enim ab æterno voluntatem absolutam eos damnandi ex prævisis demeritis. Consequens est contra Apostolum 1. Tim. c. 2. Vult omnes homines salvos fieri. Sequeretur etiam Deum non velle conversionem eorum quos prævidit non convertendos, & veniam non consecuturos: quod est contra illud 2. Petri 3. Nolens aliquos perire, sed omnes ad pœnitentiam converti.

31. Objicies ultimò, si Deus novit futura conditionata, cognoscet etiam disparata, & consequentia ex hypothese impossibili. Consequens rationi repugnat, & poneret in Deo cognitiones, quæ in homine essent nugatoriæ. Ergo non novit futura conditionata.

32. Respondeo negando sequelam quoad disparata in sensu intento, quasi in iis cognosceretur consequens exiturum cum aliqua dependentia ab antecedente. Nam cum in disparatis nulla sit connexio,

& dependentia, ut, si avis volat in India, Petrus hîc sedet, aut dormit: omnia talia sunt falsa, & à Deo ut falsa cognoscuntur. Itaque in istis omnes, & solæ negativæ sunt veræ, etsi antecedens, & consequens simul futura sint, quia non est veritas in affirmato tò si.

33. Quoad futura conditionatâ consequentia ex hypothesi impossibili, modò conditio illa importet causalitatem aliquam, etsi non necessariam, concedo cognosci à Deo, & nego id esse absurdum, quia cognoscere quidlibet, in quo est quomodocunque veritas, saltem conditionata, est perfectio simpliciter simplex. Et in homine quidem qui dum inutilibus occupat intellectum, hoc ipso excludit cognitiones meliores, culpabile est talibus, de quibus etiam judicare non potest, inhærere: Deo autem convenit nihil qualecunque sit, ignorare.

SECTIO SEPTIMA.

An Deus futura contingentia cognoscat ratione presentia ad eternitatem.

1. **A**ffirmant Thomistæ communiter, & multi alii. Negant Scotus, Durandus; & plurimi alii. Ad rei resolutionem.

2. Adverte triplicem hîc spectari posse ex mente authorum præsentiam. Prima est, quam Thomistæ ponunt, coëxistentia existentia quæ aliquando futura est, ita ut coëxistentia nunc sit, & semper fuerit cum Dei duratione; Etsi ipsa in se non sit existentia, & hæc est præsentia in essendo cum Dei æternitate, conveniens, ut volunt, rebus etiam in se non existentibus. Secunda, quam ponunt auctores secundæ sententiæ, est oppositio sufficiens rerum quæ aliquando erunt, per hoc ipsum quòd aliquando erunt, ad hoc ut ab intellectu Divino immediatè videantur quoad illam ipsam existentiam quam habebunt, quia intellectus divinus hanc habet vim, ut non aliam requirat propositionem existentia futuræ quàm veritatem illius aliquando suam actualitatem habituræ. Unde illa jam apta est ab eo videri cum eadem evidentia, & certitudine, cum qua videbitur, cum actu erit. Et hæc est præsentia objectiva in actu, habens pro termino intellectum Dei, & pro mensura durationis suæ æternitatem ejus. Nam verè hæc aptitudo ad videri per intellectum Dei, semper fuit intra illum improprium existentia modum, quo aliquid esse potest nemine cogitante in ratione objecti, etsi non sit quoad suum esse actuale physicum. Porro res illæ non tan-

tum semper fuerunt in ratione objecti respectu Dei, sumendo genericè rationem objecti, sed in ratione objecti per se immediate visibilis, ita ut respectu Dei nihil illis defuerit perfectionis quoad rationem objecti, cujus sunt capaces. Et talis ratio objecti dicitur præsentia ad intellectum Dei, ipsam visionem naturâ antecedens. Tertia præsentia, quam admittunt omnes, est ipsum esse visum passivè sumptum, seu denominatio ex visione consequens in rebus ipsis futuris. His positis.

3. Dico primò, futura contingentia non videntur à Deo ratione præsentia quam habeant in essendo cum Dei æternitate.

4. Probatur, quia falsò asseritur talis præsentia. Unde ipsa non potest esse Deo ratio videndi futura.

5. Antecedens probatur, primò quia præsentia est duorum coëxistentia, coëxistentia autem supponit extremorum existentiam actualem physicam, & implicat in terminis id quod non est, actu coëxistere.

6. Probatur secundò, quia coëxistentia est relatio quæ identificatur suo subiecto, sicut quævis relatio suo fundamento, & tantum connotat in obliquo rem cui coëxistit, absque eo quòd illam inclu-

dat. Quo posito ut talis relatio sit realis realitate physica, oportet subjectum habere suum esse physicum: Et nihil confert ad esse reale illius, quòd terminus connotatus realiter existat. Relatio enim non est realis realitate termini quem tantum extrinsecè connotat, sed fundamenti cui identificatur. Quare implicat coëxistentiam rei quæ non est, esse realem, & ad hoc nihil conferet realitas termini, seu æternitatis Dei.

7. Probatur tertio, quia nihil coëxistit nisi productum ad extra, atqui res creatæ non sunt ab æterno productæ, sed in certo, tempore esse incipiunt, Ergo non coëxistunt Deo ab æterno, sed ei in tempore incipiunt coëxistere.

8. Probatur quarto, quia si quæ ratio est asserendæ illius coëxistentiæ, illa est indivisibilitas æternitatis Dei, cui cum res illæ aliquando coëxistant, semper coëxistere debeant. At hoc non sequitur ex illa indivisibilitate. Ergo. Minor probatur, quia illa indivisibilitas non impedit ne æternitas Dei habeat partes virtuales æquivalentes cum infinita eminentia perfectionis, successivæ durationi rerum temporanearum, & sine defectu id præstantes quod facit duratio huiusmodi rerum. Sicut ergo in rebus temporaneis per successionem illam, & durationem fit

ut una res quæ plures habet partes durationis, superet aliam quo-ad hoc quòd ipsa existat dum illa non est, & tunc non sit inter illas coëxistentia, licet pro alia parte durationis coëxistant: Ita fiet per illas partes virtuales durationis divinæ in infinitum à parte ante procedentes, ut superet Deus rem creatam quoad hoc quod præextiterit infinitè. Et sic quando res creata non erat, non fuerit inter Deum & illam coëxistentia, etsi sit postea cum res illa existet.

9. Confirmatur primò, quia indivisibilitas immensitatis non facit ut qui est tantum hîc, & non in Japonia, Deo coëxistat in Japonia. Nam coëxistere Deo in Japonia, importat coëxistentem esse illic: quod cum non sit, etsi Deus, qui semper actu est, sit totus in Japonia, non tamen qui hîc tantum est, Deo illic coëxistit. Ergo à pari indivisibilitas æternitatis Divinæ non faciet ut qui nondum est absolute, & secundum se, jam illi coëxistat, cum hoc æquè supponat illum nunc existere, sicut coëxistentia in Japonia supponit existentiam in Japonia.

10. Confirmatur secundò argumento quod valet in adversarios Thomistas, asserentes durationem Angeli esse indivisibilem, & in sua æviternitate carere successione, ac proinde nunc esse eandem

quæ fuit ante mille annos. Hoc enim posito, sic dico. Indivisibilitas durationis angelicæ non efficiebat ante mille annos, ut Petrus qui hoc sæculo natus est, ei corresponderet illo tempore. Tam enim tunc potuisset Angelus videre Petrum, sicuti dicunt Deum ob illam coëxistentiam videre futura: Ergo neque indivisibilitas durationis divinæ efficiet in rebus creatis correspondentiam ad seipsam pro tempore quo illæ nondum sunt; item, ratio à priori cur Angelus, data illa indivisibilitate durationis ejus, non coëxisteret Petro pro tali tempore, est quia implicat dari coëxistentiam cum aliquo quod non existat, & illud quod præexistit, hoc ipso excludit aliud à coëxistentia quam secum habeat pro illo tempore pro quo præexistit, & ipsa præexistencia est ejusmodi exclusio. Ergo hæc quoque ratio in Deo valebit: & cum fuerit infinita præexistencia, erit infinita exclusio à coëxistentia, pro toto scilicet spatio præexistentiæ.

II. Respondebis contra prædicta id quod Cajetanus hîc. q. 14. a. 3. dubio 3. docet nempe coëxistentiam illam sumi posse dupliciter, uno modo ita ut nunc seu præsentis instanti temporis respondeant futura æternitati, & coëxistentia illa præsentis tempore mensuretur: alio

modo ita ut abstrahendo à præfenti tempore , correfpondeant præfenti nunc æternitatis , ita ut coëxiftentia cujuflibet rei ad æternitatem , falvetur in quolibet nunc æternitatis , & menfura ejus non adæquata , fed exceffiva fit æternitas. Et hoc erit verum ; quia æternitas non habet nifi unum nunc , quod adæquatur ipfi , & excedit omne tempus. Itaque in propofitione illa omnia quæ funt præfentia æternitati , & fimilibus , to nunc non fignificat nunc temporis , fed æternitatis.

12. Refpondeo rationes fupra allatas abfolutè probare id quod eft futurum , non habere coëxiftentiam ad æternitatem quando non eft. Ad id quod dicitur effe unicum nunc æternitatis ; Refpondeo effe virtualiter multiplex , ita ut in Dei duratione fit potentia ad coëxiftendum nunc uni , nunc alteri parti temporis , tenente fe fucceffione propriè dictâ ex parte ipfarum rerum fuccedentium fibi invicem. In quo eft idem ac de immenfitate , de qua prout Japoniæ præfens eft , verum eft quod Petrus qui eft hîc , non fit ei illic præfens , non defectu immenfitatis , fed fui. Ratio cur fic poffit immenfitas effe ubi non eft Petrus , eft quia licet ipfa fit in fe tota fimul , non habet illam totalitatem & fimultatem per defectum ex-

ensionis, sed per impossibilitatem divisionis. Atqui simili modo æternitas est unum nunc non per defectum durationis, sed per impossibilitatem existendi secundum prius & posterius successionis. Ergo tam potuit æternitas esse quando aliquid nondum est eique non coexistere quam immensitas esse ubi aliquid non est, idque non habere sibi illic præsens.

13. Ad id quod dicitur, æternitatem esse mensuram illius coexistentiæ, non coæquatam, sed excedentem. dico inde effici contrarium rei intentæ. Nam si est mensura excedens aliquando non est coexistentia, cum est æternitas, quod verum erit, maximè cum nondum res futura existit. Quomodo ergo tunc ratione coexistentiæ illa videbitur. Idem sequitur ex eo quod conceditur hoc tempore res futuras non coexistere æternitati. Nam quæritur quomodo Deus hoc tempore videat futura. Si ergo non videt nisi ut physicè præsentia æternitati, verum erit hoc tempore non esse in Deo illorum visionem siquidem hoc tempore non sunt ei præsentia.

14. Adde quod non rectè dicitur, verbum, est, aut, sunt, abstrahere à præsentia tempore, siquidem nulla vox abstrahit ab eo quod per se importat. Atqui tale verbum de præsentia sicut & quod-

libet aliud per se adsignificat tempus præsens, & huic quidem peculiare est ut adsignificet, vel solum tempus præsens, vel omne tempus distributivè, & copulativè sumptum, ut in propositionibus illis æternæ veritatis, homo est animal rationale, est capax divinorum, &c. Sed non per hoc quod habet aliquid præ aliis, caret eo quod est ipsi commune cum illis. Confirmatur quia, est, per hoc differt ab erit, aut fuit quod adsignificet tempus præsens sive solum, ut dixi, sive cum omni alio tempore. Ergo tam non potest non significare præsens quàm, erit, non potest non significare futurum, aut, fuit, non significare præteritum.

15. Nec valent in oppositum exempla, quæ quidam afferunt, propositionum in quibus volunt, est, non significare hujusmodi præsens tempus, nempe, ego sum, qui sum. Deus est trinus. Die Dominica est concio, cum dies quo id dicitur, sit dies alterius hebdomadæ. Nam quod ad illas priores attinet, de illis idem est ac de aliis propositionibus æternæ veritatis, in quibus, est, importat, ut jam dictum est, omne tempus, ac proinde & præsens. Quod ad postremam, dico to, est, esse ibi abalienatum à suo proprio sensu, & per conjunctionem ad voces significantes tempus Dominicum, adsig-

nificare illud ipsum. Quod si istæ propositiones, Res sunt præsentēs æternitati, intelligantur conformiter ad illa exempla; sensus erit, vel res semper esse præsentēs æternitati si adæquatè sumatur æternitas; Ita ut numquam sit æternitas quin sint præsentēs: Nolunt autem semper, seu omni tempore esse præsentēs. Vel si inadæquatè sumatur pro parte virtuali suæ amplitudinis, sicut, est, sumitur pro una certa hora diei Dominicæ, sensus ille non importabit præsentiam sufficientem, ut quovis tempore videantur à Deo.

16. Respondetis præterea cum eodem Cajetano, ad argumentum petatum ex eo quòd indivisibilitas durationis Angelicæ non causet præsentiam futurarum ad ipsum Angelum, nec prævisionem eorum ab Angelo, præsentiam quidem causari ad substantiam Angeli, sicut ad æternitatem Dei, eo quod non sit disparitas, positâ indivisibilitate in duratione Angeli, sed non causari præsentiam ad cognitionem ejus, quia hæc non mensuratur ævo sicut substantia Angeli, sed instanti temporis discreti: cognitio autem Dei mensuratur æternitate sicut & esse ejus, unde non sequetur Angelum futura prævidere ob durationis suæ indivisibilitatem, etsi illa prævideat

Deus ob suæ æternitatis indivisibilitatem.

Sed contra est, quia ad hoc ut sequatur pro tota duratione Angeli cognitio rei futuræ, satis est quòd semper ipsa sit illi præsens pro tota sua duratione. Idque tam debet sequi, quàm necesse est aperto oculo semper præsentem colorem videri. Et quia secundum Cajetanum necessarium esset ad istam perpetuam cognitionem, ut ipsa cognitio mensureretur ævo, sicut & Angelus, ideo inconsequenter dicitur illam habere aliam mensuram ab ipso ævo.

17. Dico secundò, futura contingentia videntur à Deo ratione præsentiae obiectivæ quam habent ad intellectum Dei, sumptæ in actu primo, seu ratione applicationis, & propositionis perfectissimæ quam habent respectu talis intellectus, ex eo quòd aliquando futuræ sunt: ita ut antequam sint, ex eo quòd futuræ sint, tam sint aptæ videri secundum existentiam illam tali temporis addictam, & correspondentem, quàm quando erunt actu, ita Ruitz de scientia Dei, disputatio. 28. sect. 3. Suarez. lib. 2. de scientia futurorum. c. 8. num. 9. & alii.

18. Probatur, quia re ipsa datur, & sufficit ad visionem talis applicatio, cum intellectus, quò perfectior est, eò pau-

ciora requirat ex parte objecti ad propositionem ipsius sibi sufficientem. Unde respectu Dei, sufficit quod veritas insit in objecto, ad hoc ut ei sufficienter applicetur, ac proponatur. Atqui ex eo quod futura sunt aliquando extitura habent veritatem determinatam suæ futuritionis, seu existentiae, pro tali tempore futuræ, ergo per hoc præcisè quod sunt futura absque eo quod actu coëxistant æternitati Dei, sufficienter sunt applicata, ut præsentia Deo, ut videantur ab eo.

19. Confirmatur, quia quodlibet objectum cognitionis speculativæ prius natura debet constitui in ratione objecti, & intra sphæram cognoscibilitatis respectu potentiae cognoscitivæ, quàm de facto cognoscatur. Nec sufficit sola præsentia objectiva, quæ consistit in sola denominatione cogniti, quia cum hæc constituitur per ipsam cognitionem, non est ipsa prior, ut sit quodammodo causa ejus. Atqui res futuræ non aliter habent rationem objecti visibilis respectu intellectûs divini, quàm per hoc quod verum est illas extituras: & sufficit Deo ad propositionem objecti veritas ejus, & ad visibilitatem veritas existentiae futuræ. Alia autem præsentia coëxistentiæ realis ad æternitatem ejus supra refutata est. Ergo

fic, & non aliter, res futuræ sunt Deo visibiles.

20. Dico tertio, existentia futurorum, quæ suo tempore erit, per hoc quòd tunc erit, jam confert ad visionem eorum. Probatur, quia ipsa est quæ determinat veritatem hanc, quòd aliquando futuræ sint; quæ veritas constituit illas Deo visibiles, & ante illam nihil est aliud quod talem veritatem determinet, cum omnes causæ illam existentiam præcedentes sint indifferentes ut ad ipsam existentiam, aut negationem ejus, ita est ad veritatem ejus aut negationem talis veritatis, & veritatem oppositi. Ergo illa existentia primario & radicaliter confert in ratione objecti, ad visibilitatem rei futuræ.

21. Confirmatur, quia nullo alio modo potest effectuum liberè futurorum certa esse, & infallibilis præscientia, nisi quia quæ supponit rem suo tempore existere, & omne quod est, quando est, necesse est esse. Ergo illa existentia in ratione objecti primario determinantis, & rem certò visibilem constituentis, confert suo modo ad visionem.

SECTIO OCTAVA.

Solvuntur objectiones.

1. **O**bjiciuntur primò multa sanctorum Patrum testimonia, asserentium res omnes esse Deo præsentibus, eique nihil esse præteritum, nihil futurum, ideoque omnia ab eo videri.

2. Respondco primò Patres loqui de præsentia rerum respectivè ad scientiam Dei, & sæpissime loqui de præsentia, non quæ præsupponitur scientiæ, sed quæ constituitur per ipsam præscientiam rerum. Itaque loqui de præsentia objectiva non in actu primo, sed in actu secundo sumpta. Id patet ex modo quo loquitur Augustinus, quem citant contra assertam sententiam. Sic enim habet libro de prædestinatione, & Gratia c. 5. *Mundus quamvis pro tempore ex quo factus est, ceperit, in illa divina præscientia luce faciendus nullum potuit habere principium & quantumcunque vel ex Adamo, usque in hodiernum diem, homines nati sunt, vel post nostram aetatem sunt transaturi, apud Deum nati sunt jam, & decurso totius vite tempore transierunt, in illa nihilominus divini obtutûs luce permanentes. Ibi Verba illa, in divina præscientia luce, & divini obtutûs*

luce, determinant aliorum sensum, sicut proprium est vocum modificantium determinare significationem earum quibus adjunguntur.

3. Respondeo secundò, si dicant Patres, aut dicere videantur, ideo videri quia sunt præsentia, eos præcisè loqui de præsentia quæ sit aliquo modo prior quàm præscientia, cujusmodi est applicatio supra-dicta, consistens in eo quòd verum sit illas aliquando futuras, ex quo petitur determinatio ad visionem.

4. Respondeo tertiò, si de præsentia physica loquantur Patres, eos tantùm velle in Deo esse durationem, quæ in se immutata correspondet illis omnibus, & coëxistit quando sunt, ita ut dum res creatæ acquirunt esse, ipsi nullum novum accedat esse, quod non importat coëxistentiam æternam, sed ex parte Dei existentiam cui nihil deest ad coëxistendum semper, nisi existentia reciproca. Quòd si inde inferatur æterna Dei scientia, hoc fit propter connexionem quæ est inter æternitatem essendi, & æternitatem sciendi. Non autem quasi ideo scientia Dei antevertat physicam rerum existentiam, quòd æternitas præstet coëxistentiam cum illis, & præsentiam physicam, qua indigeat Deus sicuti nos, ad res videndas. Nihil enim tale dicunt aut volunt Patres.

Idque in Deo maximam indigentiam poneret.

5. Objicitur secundò auctoritas S. Thomæ , & hic ejus discursus q. 14. a. 13. in corpore. Cognitio Dei mensuratur æternitate ejus , sicut etiam ipsum esse Dei , æternitas autem tota simul existens ambit totum tempus. Unde omnia quæ sunt in tempore , sunt Deo ab æterno præsentia , non solum ea ratione qua habet rationes rerum apud se præsentia , ut quidam dicunt , sed quia ejus intuitus fertur ab æterno supra omnia , prout sunt , in sua præsentialitate.

6. Respondeo distinguendo majorem hujus discursus. Cognitio mensuratur æternitate adæquatè sumpta , secundum omnes virtuales partes durationis suæ , concedo : sumpta secundum unam virtua-lem partem illius amplitudinis , per quam virtualem partem correspondet existentia rei contingentis , Nego : quia quod mensurat aliud , debet adæquare ipsum. Æternitas autem sumpta secundum unam præcisè partem virtualem suæ infinitæ amplitudinis , non adæquat durationem scientiæ , quæ toti totaliter sumptæ æternitati commensuratur. Quare ipsa sic inadæquatè sumpta non est mensura cognitionis Divinæ , sed ipsa adæquatè sumpta , quo modo non correspondet semper rebus , quæ sem-

per cognoscuntur, quia id implicat, sed ad æternam notitiam rerum quæ nondum illi coëxistunt, satis est quòd verum sit illas fore, & coëxtituras aliquando: quo modo illa ipsa, existentia quam habebunt, terminat semper scientiam visionis, quæ quia est æterna, sicut Deus, bene dicitur mensurari æternitate ejus.

7. Objicies tertio visio & intuitio ex propria sua ratione fertur in rem per se physicè præsentem, & ad eam non sufficit si res sit præsens objectivè in actu primo, Ergo si futura non coëxistant Deo physicè, illa non videbit.

8. Respondeo negando antecedens, & dico ad visionem & intuitionem satis esse si immediatè attingatur existentia quæ ipsa per se sit cognitionis causa determinans, & suam cognoscibilitatem per se constituat. Implicat enim cognitionem quæ directè fertur in existentiam ita se habentem vi suæ propriæ cognoscibilitatis, esse abstractivam.

9. Instabis. Sic Ergo Angelus videbit rem præteritam quando illam cognoscet, quia præterita est.

10. Respondeo Angelum non posse cognoscere rem præteritam, quia præterita est, sed tantum quia recordatur se vidisse rem quæ est præterita. Nam alioqui, si cognosceret præteritum, quia præteritum
tum

tum est, æquè cognosceret futurum, quia futurum est, eo quòd ad cognitionem objecti sufficeret ipsi illud esse verum. Itaque ad cognitionem rei præteritæ movetur per id quod restat ex actu præterito, & causat recordationem ejus, nempe per speciem, quæ supplet defectum præsentia. Unde cum cognitio ejus non determinetur præcisè per existentiam rei, ipsa non est visio,

11. Objicies quartò, Dei cognitio mutari non potest per rerum contingentium existentiam. Atqui cum sunt actu, videntur ratione coexistentiæ suæ physicae ad Dei æternitatem. Ergo sic semper videntur, ac proinde sic sunt præsentés. Major tum per se patet, tum etiam probatur, ac declaratur primò ex scriptura Ecclesiastici c. 23. *Ante quam crearentur omnia, nota sunt tibi, sic & postquam consummata sunt.* Secundò ex Augusti no, qui lib. 15. de Trinitate c. 13. in illum locum, ita habet *sic & non aliter & antequam crearentur & postquam consummata sunt.*

12. Respondeo negando minorem, quia nequidem cum sunt & videntur, coexistentia est ratio videndi eas, sed existentia præcisè, quæ est pro tali tempore, est causa applicationis earum pro tota æternitate ad intellectum Dei, ut semper illa

ipsa eodem modo videatur intuitu semper immediatè ad illam terminato, & sic cum accedit coëxistentia, & existentia illa physicè est pro suo tempore, nihil mutatur in objecto scientiæ Dei, prout ejus objectum est, quia antequam esset per hoc quòd verum erat ipsam futuram, illa ipsa habebat totam rationem objecti, quia perfectissimè proposita erat Deo, & visibilis visibilitate quæ non posset augeri per actualitatem existentia ejus.



QUÆSTIO SEXTA.

De Voluntate Dei.

SECTIO PRIMA.

Quid Deus necessario amet.

1. **C**ertum est esse in Deo voluntatem; cum enim voluntas nihil aliud sit quàm potentia appetitiva boni, per intellectum propositi, & capax fruendi illo bono, si ipsum tale est ut sit fruitionis objectum nempe bonum summè amabile, nec per se ad aliquid ulterius referibile: patet ejusmodi potentiam maximam includere perfectionem,

sine qua non possit esse, neque virtus, neque beatitudo, & aliunde nullam ex se imperfectionem involuit talis potentia, si sumatur abstractè à determinatione quam habet in creaturis intellectualibus, cuiusmodi est capacitas ad actum Physicè distinctum, & inhærentem, & ad malas volitiones, & ad mutationem propositi, &c. Hinc fit ut in Deo, in quo necessario est omnis perfectio simpliciter simplex, voluntas formaliter ponenda sit, eaque perfectissima; & ab ea tollenda omnis illa imperfectio voluntatis creatæ. Id sequitur ex dictis de scientia, quia omnem cognitionem sequitur appetitus conformis eique proportionatus. Nempe in ipsis belluis cognitionem corpoream sequitur appetitus animalis, item corporeus; & in homine cognitionem spirituales sequitur appetitus rationalis, seu voluntas quæ est multò perfectior illo inferiore appetitu. Itaque ubi est cognitio infinitè perfecta, voluntas similiter infinitæ perfectionis esse debet.

2. Positâ igitur in Deo voluntate, quaeritur primò, quid Deus necessario amet. Ad quod statuendum. Adverte amorem ex genere suo duplicem esse, unum qui est plena voluntatis adhæsiō ad objectum, ita ut sit efficax ille motus, si bonum quod volumus amato, non existit, &

pendet ejus effectio à nobis : vel si non est efficax, id non proveniat ex defectu determinationis, & adhæſionis in nostra voluntate, cum tanta illa sit, quanta ea quæ est efficax, aut major, sed ex eo quòd id quod nobis placet, amori præſupponatur. Talis est amor ille quo nos amamus, qui respectu bonorum quæ nobis possumus acquirere, est efficax, respectu verò nostri esse, quod ipsi præſupponitur, si non est efficax, id non provenit ex eo quòd debilis sit ille amor, vel non satis fortis adhæſio nostræ voluntatis ad nos ipsos, sed ex eo quòd illud esse aliunde habeatur, & præſupponatur illi amori. Et idem adhuc contingit, cum bonum quod nobis placet, est impossibile, ut cum quis vellet se non peccasse, in quo casu displicentia de facto peccato, si non est efficax, id non provenit ex imperfectione ipsius odii sed ex impossibilitate objecti, ex hypothesis quod res sit facta. Alter amor est complacentia de se inefficax, nec vim habens volitionis efficacis, qua tamen placet nobis, quòd res talis sit, vel taliter se habeat, vel possit habere esse reale. Et huic utrique amori correspondet ex opposito duplex odii genus, unum quo vel efficaciter de facto, vel quantum est ex vi actûs & sufficientia aversionis ad effectum ipsum, si pos-

sibilis esset, optamus alicui malum. Alterum quo simpliciter res nobis displicet, vel placet nobis malum quod ipsi inest, vel possibile est, absque eo quod talis actus sit sufficiens determinatio voluntatis ad positionem illius mali. Primi odii exemplum est tum in odio quo quis malum infert alteri, tum in odio dæmonum erga Deum, quo vellent ipsum annihilare, si possent. Secundi in alienatione animi quam quis experitur erga alium, cui tamen nocere non vult, aut in gaudio quod sentit ex malo ejus, quod tamen nollet. His præmissis.

3. Dico primò Deus amat se ipsum necessario cum summa, & perfectissima voluntatis determinatione. Quia talis amor circa summum bonum est summa perfectio, & necessitas amoris circa optimum, infinitum, ac necessarium, est melior ipsa quàm non ipsa. Et circa hoc libertas defectum involuit. Item negari non potest quin Deus se ipso fruatur. Fruitio autem est amor presentis boni, in quo sistitur, seu quod non ad aliud ordinatur. Porro necessitas illa amoris extendit se tantum ad ea quæ Deo intrinseca sunt, ac necessaria, nihilque involuit quod non sit perfectio simpliciter simplex. Cætera enim etsi infinita sint, ut bonum incarnationis, tamen hoc ipso quod involunt, aut

supponunt aliquid defectuosum, nempe rem aliquam creatam, ut bonum illud unionis hypostaticæ supponit humanitatem, non necessitant voluntatem, cui ipsa talis boni, quo-ad aliquid limitatio potest esse motivum non volendi illud.

4. Dico secundo, Deus amat necessario possibilium, sed amore inefficaci. Prima pars probatur, quia quod necessario est bonum, id respectu voluntatis summæ perfectæ, est necessario amabile, & dignum complacentia circa bonitatem ejus, nec potest circa illud rectè se habere voluntas, nisi amando aliquo modo. Atqui possibilium habent aliquam bonitatem sibi necessario convenientem, nempe capacitatem ad habendum verum, & bonum esse; & per hoc à chymæris differunt. Ergo Deus, cujus voluntas est perfectissima, illa necessario amat. Deinde voluntas infinite perfecta debet adæquare suum objectum, ac proinde amare omne bonum, sicut & odisse omne malum, quemadmodum intellectus infinite perfectus debet judicare omne verum, & negare omne falsum. Et ex his patet Deum amare possibilium, non tantum in obliquo, & ut terminum omnipotentia, amando ipsam omnipotentiam, sed immediatè, & directè, ratione bonitatis quæ illis inest possibiliter.

5. Secunda pars, quòd amor ille necessarius possibilium sit inefficax, per se patet, & probatur quia finita bonitas ad efficacem prosecutionem sui non necessario movet, & ob ipsam finitudinem potest non eligi. Deinde multa possiblea impossibilia sunt, ut peccatorem damnare, & convertere eum, ac peccata condonare. Ergo illorum positio debet esse libero Dei arbitrio, objectum non necessariae volitionis

6. Objicies 1. creaturæ possibilee non habent bonitatem, quia sunt non entia.

Respondeo habere possibiliter, in quo à chymæris differunt: & id sufficit ad simplicem complacentiam qua ipsa possibilitas placeat.

7. Objicies 2. creaturæ possibilee sunt tantum finitæ bonitatis. Ergo non habent unde necessitent Deum ad amorem sui. Confirmatur quia voluntas humana potest resistere cuilibet motioni boni finiti, ergo multò magis divina.

Respondeo necessitatem complacentiæ circa bonum, oriri in perfectissima voluntate, non tantum ex infinitate, sed etiam ex necessitate ipsius boni, quod hoc ipso quòd non potest non esse conveniens, non potest non esse objectum complacentiæ. Rationi enim repugnat illud quod est conveniens non placere ei cujus voluntas

est optima. Confirmatur quia peccatum quod non est infinitæ malitiæ, ut pote limitationem accipiens à finitudine nostræ voluntatis, etiamque veniale peccatum, putà mendacium, necessariò displicet Deo, quia non potest non esse malum. Ergo quidquid est necessariò bonum, saltem transcendentaliter, ut res possibiles, necessariò ab ipso, saltem per simplicem complacentiam amabitur.

8. Ad confirmationem objectionis, nego voluntatem creatam posse resistere cuilibet simplici complacentiæ circa bonum finitum propositum sub ratione boni, impediendo ipsam complacentiam. Tantùm enim potest resistere impediendo ne sit efficax. Quod si aliquid sub sola ratione mali alicui proponatur, tunc merè illud oderit, sed nihil Deo taliter proponitur, quia nihil secundùm se est tale.

9. Objicies tertiò, si Deus amat omnia possibilia, amabit mala, & ipsum materiale peccati, licet sit intrinsecè malum. Hoc autem repugnat bonitati ejus.

Respondeo Deum amare possibilia bona sub ratione boni quæ illis inest, & ipsum materiale actûs qui est intrinsecè malus, esse bonum physicè, ipsumque comparatum ad Deum, pro ut est possibile ab ipso in ratione causæ primæ concurrentis ad exigentiam creaturæ, esse bonum moraliter,

liter, sic enim est aliquid debitum, & concursus ad ipsum est solutio debiti. Nec implicat id quod prout est ab uno est malum, esse, prout est ab alio, bonum, quia fit ab uno contra regulam, ac legem, ab alio autem secundum rectam rationem, & regulam talis agentis. Itaque sic rectè amatur à Deo actus bene ab eo factibilis, ac denominans ipsum honestè agentem: Unde non est tantum permissionis objectum, quod nullo modo ametur, ut volunt aliqui.

10. Objicies quartò, si Deus amat necessariò bona possibile, etiam mala possibile ipsi displicebunt necessariò, propter ipsam malitiam quæ necessariò illis inest. Hoc autem repugnat beatitudini ejus. Ergo non necessariò illa amat.

Respondeo Negando minorem, quia Deo illa displicere, est placere ipsi, quod talia mala, putà ipsum Dei odium, blasphemix perjuria sint difformia, seu disconvenientia rationi, & illicita, & punibilia si ponantur, suumque subjectum redant malum, & odibile. Est autem bonum quod hoc placeat. Quòd si valeret objectio, probaret Deum non posse odisse peccatum existens re ipsa, quia displicentia de se major, multò magis contraria est beatitudini ejus. Non est autem contraria, quia displicentia non obest beatitudini, quan-

do ipsa est volitio mali, quod rectè infer-
tur vi talis volitionis, & consequenter ad
ejus rectitudinem, cui resisti non potest.
Et Deus suo ipso odio circa peccatorem,
& inflictione pœnæ suam justitiam exercet,
& manifestat, & finem gloriæ suæ extrin-
secæ obtinet.

II. Objicies quintò, si Deus necessa-
riò odit malitiam possibilem, & subjectum
ejus ut ipsi subjacens, oderit pro quovis in-
stanti quemvis hominem, & Angelum,
etiam beatum, quia nullus est homo, ne-
que Angelus, qui pro quovis instanti non
possit esse malus.

Respondeo displicentiam illam, quæ
est planè inefficax circa malitiam tantùm
possiblem, non cadere in hominem, aut
Angelum absolutè, sed tantùm factâ hyp-
pothesi, quòd malitia ipsi inesset. Sic au-
tem Deo quemlibet displicere, est summa
voluntatis divinæ perfectio: & nihil no-
cet iis qui non sunt actu mali, neque quid-
quam imminuit de amore efficaci quo Deus
illos prosequitur, sed tantùm arguit de-
fectibilitatem eorum secundùm suam præ-
cisè naturam spectatorum. Et Beati sunt
planè conformes voluntati divinæ quo-ad
talem de se ipsis ita consideratis displicen-
tiam.

SECTIO SECUNDA.

An sit in Deo libertas.

1. **A**Dverte libertatem circa positionem bonorum finitorum, præstare necessitati circa illa eadem, quia posita necessitate ejusmodi, non omne bonum esset amabile: siquidem ex finitis bonis multa sunt impossibilia, ut cessio, & retensio juris, volitio, & nolitio ejusdem rei, visio rei existentis, & cognitio vera de non existentia ejus pro eodem instanti, si illa non extitisset. Implicat autem aliquid simpliciter bonum, non esse amabile, & per libertatem ad illa ipsa impossibilia bona, stat illorum omnium amabilitas. Itaque circa talia libertas necessitati præstat. Præterea bonum est dominium in ejusmodi ordinabilia bona, Et dominium libertatem supponit. Denique nulla est virtus sine libertate, virtus autem est perfectio simpliciter simplex. Igitur & quicquid ad eam ex natura rei necessario requiritur. Quare libertas de se est perfectio simpliciter simplex.

2. Hinc patet libertatem Deo inesse, quia Enti à se nulla perfectio simpliciter simplex deesse potest. Et hoc ipsum constat ex ratione naturæ intelligentis, quæ in

objecto limitatæ virtutis ponendo, varias dignoscit rationes boni, & mali, seu incommodi, quæ rationes mali evitari possunt per non positionem ejus, & hæc est proxima causa libertatis, cum ipsa convertibilis, unde in Deo perfectissimè intelligente, non potest deesse libertas.

3. Porro cum duplex sit libertas, una contrarietatis quæ est ad objecta vel contraria, vel diversa, & impossibilia: Altera contradictionis, quæ est ad unum idem, & ad negationem ejus; utraque in Deo reperitur. Prima quidem, quia ex duobus impossibilibus bonis, cujuscumodi sunt exercere justitiam, negando peccatoribus veniam, & damnando eos, vel mittere Redemptorem ad salvandos ipsos, potuit Deus hoc, vel illud statuere. Alioquin aliquod bonum fuisset ipsi impossibile, & non amabile. Secunda autem, quia potuit mundum creare, quia id bonum erat, aut non creare quia videbat mala inde futura, quæ potuit per non creationem ejus evitare. Sic omnis libertas ejus est formaliter, tantum ad bonum, aut ad evitandum malum. Libertas autem ad peccatum non est pars libertatis, sed defectus ejus, & ad hoc se se extendit tantum per accidens in ente quo-ad moralia defectibili.

4. Contra Dei libertatem senserunt Aristoteles lib. 8. Phys. text. 9. & lib. 9.

Metaph. text. 17. ex eo quod primus motor mutationis sit incapax, & in æternis nihil sit in potentia. Unde infert non esse timendum ne cœlum quiescat, eo quod neque ipsum, neque motor ejus sint in potentia ad non movendum. Item ob easdem rationes. Averroës, Simplicius, & Avicenna.

5. Sed ad hæc respondetur immutabilitatem non obesse libertati, sed esse perfectionem quæ tunc illi inest, quando ens quod se liberè determinat, est incapax defectûs qui est in ipsa mutatione propositi, ac decreti. Idque probatur, quia immutabilitas Dei debet se extendere ad omnia bona ejus, & ad omnes perfectiones simpliciter simplices, inter quas est libera volitio circa hoc vel illud, & determinatio circa quidlibet, proportionata qualitati ac conditioni objectorum, absque suspensione circa illum, vel necessitate circa aliquid cujus contrarium potuerit terminare volitionem bonam, & honestam.

6 Quo-ad impotentialitatem, Respon-
deo libertatem, nihil ei contrarium involvere, quia libertas in ente perfectissimo est capacitas determinandi se ab æterno ad alterutrum è duobus quorum neutro tale ens perficiatur. Itaque in eo non est vacuitas, nec suspensio, nec adventus ullius perfectivi, quæ sola potentialitatem dicunt. Hæc

enim est capacitas ad perfectionem quæ vel non habita fuerit, vel potuerit non haberi neque in se neque in aliquo in quo cum infinita eminentia contineretur. Quod si id ad quod est capacitas, non est perfectivum, non est potentialitas.

SECTIO TERTIA.

Quid actus Dei liber superaddat entitati actûs necessarij.

1. **A**Dverte primò cum libertas ex dictis superiori sectione, sit perfectio simpliciter simplex, de ejus essentia non esse id quod in facultate aut exercitio nostræ voluntatis imperfectionem involvit. Cumque maxima imperfectio nostræ libertatis sit indigentia actûs realiter distincti ab ipsa libertate, & physica atque entitativa productio talis actûs, id omnino non esse de ratione ipsa libertatis, ac proinde sine hoc libertatem posse reperiri in Deo, in quo est omnis perfectio sine imperfectione. Item cum sit maximus defectus in quolibet actu nostro, quod sit limitatus ad unius, aut talium præcisè objectorum prosecutionem, ita ut per eum non possit voluntas respicere aliud objectum, aut circa hoc aliter se habere. Unde ad volendum oppositum, opus est ei alio realiter actu:

Dicendum similiter est illam limitationem, & multipliciter actuum non esse de essentia libertatis, quæ sic maximos defectus involneret, ac proinde sine tali limitatione actus posse in Deo reperiri, in quo proinde & unicus erit actus voluntatis, & ad quodvis ex objectis disjunctivè eligibilibus atque impossibilibus determinabilis.

2. Adverte secundò, id quod seclusis illis imperfectionibus restat in facultate & exercitio liberi nostri arbitrii, esse de ratione propria & intrinseca libertatis ut sic, eique essentielle. Id autem quod restat in facultate ipsa est quod sit indifferens ad electionem alterutrius ex contrariis, & impossibilibus objectis, vel ad eligendum unum, aut negationem ejus. In primo indifferentiæ genere consistit libertas contrarietatis, quæ est potestas tendendi in hoc, aut illud. In secundo consistit libertas contradictionis, quæ est potestas tendendi in hoc, aut tendendi in non hoc, ita ut tota istorum omnium determinatio pendeat ex ipsa potentia volitiva, propositis diversis rationibus boni, aut boni, & mali in objecto. Quòd si spectetur ipsum exercitium actuale voluntatis, seu libertas in actu secundo, id quod seclusis omnibus nostræ libertatis imperfectionibus restat, est electio hujus ut procedens à potentia à qua poterat esse electio alterius oppositi: vel

electio hujus, ut procedens à potentia à quo poterat eligi negatio ejusdem. Quare necesse est hæc esse in Deo absque prædictis imperfectionibus, ita ut actus qui est necessarius secundum se, & indistinctus à potentia volitiva Dei, sufficiat per se ad præelectionem alterius ex bonis incompossibilibus, putà ad volendam salutem alicujus præ damnatione ejus, quam etiam posset velle, cum sit peccator. Item ad volendum aliquid, putà creare mundum, præ negatione ejus quam etiam velle potuit. Unde actus ille est virtute infinites multiplex, & æquivalet ipsis contrariis actibus nostris, potestque habere effectum unius, non habendo effectum alterius, & ex iis quæ potest præstare, formaliter præstare unum, non autem aliud, idque ob suam infinitam perfectionem in ipsa ratione actus liberi, ob quam determinabilis est ad quamlibet electionem honestam. Ut autem in hoc nullam esse contradictionem appareat.

3. Adverte tertiò, etiam in entibus finitæ virtutis, fieri posse ut una res quo-ad suam entitatem immutata, diversimodè se habeat ad aliqua extrinseca. Nam in sententia quæ modales entitates negat, eadem anima potest animare per se ipsam, vel non animare corpus, cui erit intimè præsens. Et si sit præsens duobus corporibus

penetrativè positis, poterit unum informare, non aliud, & rursus hoc deferere quo-ad informationem, & uniri substantialiter alteri: quod totum fiet sine ulla productione entitatis simplicis distinctæ ab anima, & ab illis corporibus. Item una causa efficiens potest producere terminum sibi præsentem, vel non producere, putà sol lumen, quodd vel à solo Deo, vel ab ipso etiam sole pendeat. In quo id considerari potest, quodd cum actio possit sumi duobus modis, vel activè, vel passivè, ita ut sit vel effectus connotans causam à qua pendeat, vel causa connotans effectum à se pendentem, quarum relationum nunquam una est sine alia, poterit sol seipso habere rationem illuminationis activè sumptæ, vel non habere illam. Et quando illam habebit, lumen per talem habitudinem tantum connotabitur, non autem in ea includetur. Quare sol seipso est aliquid capax ut sit intrinsecè illuminatio activè sumpta, vel non sit talis illuminatio.

4. Adverte quartò, etiam fieri posse ut res aliqua creata ex sua propria & libera determinatione habeat talem habitudinem realem, aut non habeat, nullâ in ipsa factâ mutatione entitativâ. Nam quando nostra voluntas producit aliquem actum liberum ipsa se determinat ut sit productio ejus activè sumpta, quam habitudinem non con-

stituit ipse actus qui est tantum connotatum extrinsecum illius habitudinis, non inclusum in ipsa juxta veriore philosophiam, quæ terminum relationis in ejus entitate non includit. Quod si in rebus finitis est talis capacitas & vis etiam se determinandi ad varios effectus formales, quos possunt non habere, multò magis id convenire poterit enti infinite perfectò, nempe Deo, & actui voluntatis ejus indistincto ab ipso. Et licet in finitis illis rebus prædicta diversitas non possit esse absque eo quòd mutatio entitativa, vel in ipsis, vel in subjectis in quæ agunt, concomitetur illas diversas habitudines, non tamen ad hujusmodi mutationis concomitantiam, restringendus est ille Dei actus qui potest tendere præcisè in aliquod morale, quod extrinseco subjecto adveniat, putà si Deus sine ullo infuso dono peccatum homini condonet. Et talis mutatio sufficit ex parte termini ad novam determinationem libertatis humanæ, ut cum quis sine ullo alio beneficio condonat alicui offensam, & cedit jure ad indignationem. Unde si posset homo velle liberè sine actu distincto à sua voluntate, non requireretur ad exercitium libertatis ejus ulla mutatio physica. Cum ergo possit Deus velle liberè sine actu à se distincto, potest absolutè exerceri ejus libertas factà solâ positione alicujus moralis, & nullà

QUÆST. VI. *De Voluntate Dei.* 223
existente mutatione physicâ. His prænotatis.

5. Dico actus liber Dei nihil addit entitati actûs qui secundum se necessarius est nisi terminationem activam ad existentiam, aut non existentiam creaturarum, quam sua efficacia causat aut infert, cum possit non causare, neque inferre. Itaque materiale actus liberi est, non quidem propriè actus necessarius, ut necessarius, sed entitas illius actus qui necessariò est: Formale autem est prædicta terminatio.

6. Probatur, quia sic habetur in Dei libertate id totum quod est essentiale libertati, & omnis perfectio ejus absque ulla imperfectione & compositione. Et nulla est in hoc contradictio, ut patet ex prænotatis, & magis adhuc ex solutione obsectorum infra sect. 5. Constabit.

SECTIO QUARTA.

An id quod actus Dei liber superaddit entitati actus necessarij habeat rationem perfectionis realis Deo intrinseca.

1. **A**dverte perfectionem accidentalem, seu convenientem rei præter essentiam ejus, de qua perfectione hîc quaestio est, posse sumi dupliciter. Primò pro ratione formali quæ cum subjecto cui adve-

nit, constituit effectum formalem bonum & perfectum, ipsique subjecto convenientem, nec non, si ipsa perfectio moralis est, laudabilem, absque eo tamen quod talis rationis adventu subjectum reddatur melius, aut perfectius, quàm foret sine ea, imò hoc ipsum excludendo. Nam fieri potest ut subjecto infinitè perfecto, adveniat aliqua ratio formalis, constituens cum illo effectum formalem bonum, & perfectum, ipsique subjecto infinito convenientem, & moraliter honestum, ac laudabilem, quæ tamen illud non reddet melius, aut perfectius: quia infinitum, hoc ipso quod est infinitum, nullius accessione perfici potest. Imò ipsi propriè loquendo nihil advenit strictè sumpto adventûs nomine, quia ad hoc requiritur, ut quod de novo ipsum denominat, & afficit, non jam antecederet in ipso, cum infinita eminentia contineretur. Hoc enim ipso quod aliquid cum infinita eminentia præhabetur, & si formaliter non habeatur, addi propriè non potest. Alioqui non sine defectu præhabitum fuisset: quod cum infinita continentia eminentia pugnat. Sic unio hypostatica adveniens verbo, est ratio formalis quæ quidem effectum formalem bonum & perfectum, & verbo convenientem constituit, cum reddat illud optinè & substantialiter communicatum, & consequenter

infinité sanctificans hominem, quod sum-
mè laudabile est, nec tamen reddat Ver-
bum melius aut perfectius, quàm si non
fuiſſet unitum: Quia Verbum antecederet
est infinitè perfectum, & in ejus infinita,
& necessaria perfectione contingens illud
communicationis & sanctificationis bo-
num, etsi non formaliter at eminenter,
idque non qualicumque eminentiæ genere,
sed cum infinita eminentiæ excellentia
præhabebatur. Unde illi propriè nihil ad-
ditur. Quod verum est etsi illud quod ei
qualitercunque advenit, sit denominatio
realis, & intrinseca. Nam verè ejusmodi
est denominatio uniti quæ Verbo advenit
in incarnatione. Neque enim sola huma-
nitas propriè est unita Verbo, sed ipsum
quoque Verbum per necessariam correla-
tionem intrinsecè est unitum humanitati
unione substantiali, indistincta ab ipso, &
humanitatem formaliter non includente,
sed connotante; sicut unio humanitatis
cum ipso, non includit ipsum, sed con-
notat, ipsique humanitati identificatur.
Unde patet aliquam rationem intrinsecam
effectus formalis boni ac substantialis con-
stitutivam, posse advenire infinito, absque
perfectione ipsius infiniti, seu absque eo
quod ipsum reddatur melius per illum ef-
fectum formalem bonum, & perfectum.
Et hæc est prima acceptio perfectionis pro

ratione formali constituyente effectum formalem bonum ac perfectum, non tamen perficiente subjectum, hoc est non meliorante ipsum, & si adjiciat illi aliquod formaliter novum bonum.

2. Secunda acceptio communis, & quæ universaliter locum habet in omni perfectione creata, est quod sit ratio formalis quæ subjecto suo adveniens, non modò constituit cum illo effectum formalem bonum & perfectum, sed ipsum subjectum reddit melius & perfectius, eo quod adveniat illi quod deerat. Deerat autem, quia non præhabebatur cum infinita eminentia. Unde accessus ejus est melior subjecto, quàm negatio ejus. Et hoc semper evenit in creatis propter finitudinem eorum. Unde est illud axioma, omne finitum accessione novi boni perficitur, & fit melius. Et quia perfectio communiter sic accipitur, idque repugnat in ente infinito, cui nulla fieri potest accessio propriè & usitato modo sumpta, ideo non sine distinctione & explicatione aliqua concedendum est, id quod illi qualitercunque advenit, habere rationem perfectionis. His positis.

3. Dico terminatio illa activa ad existentiam aut non existentiam rerum quam actus liber Dei superaddit entitati actus necessarij, est perfectio primo modo supra-dicto,

sed non secundo : Sive est ratio formalis constituens cum ipso effectum formalem bonum, non autem reddens ipsum meliorem.

4. Primam partem à fortiori tenent, qui docent id quod actus liber actui necessario superaddit, esse simpliciter perfectionem sine limitatione ac modificatione illius termini, nempe Cajetanus, Salas, Henrikes, Martinon & alii. Probatur prima illa pars, quia quidquid est intrinsecum Deo per se formaliter sumptum, habet aliquo modo rationem formalem perfectionis. Idque hoc ipso quòd differt à non entibus, & iis quæ sunt merè in potentia. Ac si illud morale est, aut moralitatis subiectum necesse est esse bonum, atque honestum. Atqui prædicta terminatio est aliquid intrinsecum Deo quod connotat quidem aliquid extrinsecum, sed non includit illud. Ergo.

5. Probatur secundò, quia id quod est differentia quædam actûs vitalis, constituens vitam in actu secundo, est perfectio superans ex genere suo omne quod est in gradu præcisè substantiæ, & in rebus inanimatis.

6. Probatur tertio, quia id in quo invenitur ratio formalis alicujus virtutis, est aliquo modo perfectio. Atqui in illa terminatione invenitur ratio cujusvis virtutis, nullam imperfectionem involuentis, nempe

in terminatione ad mundum creandum, ratio bonitatis : In terminatione ad redimendos homines, ratio misericordiæ : In terminatione ad præmiandum, ratio Justitiæ distributivæ : In terminatione ad damnationem, ratio Justitiæ vindicativæ, &c.

7. Probatur quartò, quia immeritò Deum laudaremus ob decretam incarnationem, & alia beneficia, nisi in illa determinatione esset aliqua perfectio moralis, quæ poterat non esse. Unde in illa est aliquid laudabile præter rationem actûs secundum se necessarii. Neque est solùm effectus, quia etiam laudatur beneficentia, & misericordia ex qua processit. Propter ejusmodi rationes, Granadus tractatu tertio de voluntate Dei, disputatione 5. sect. 1. num. 1. referens sententiam Cajetani, ait eam revera niti firmissimis fundamentis, quibus doctores multi recentiores subscribunt.

Secunda pars probatur. Quia, ut dictum est, infinitum non est ulterius perfectibile. Atqui bonitas actûs in se necessarii est infinita, & continet cum summa eminentia omnem perfectionem intra genus moralitatis possibilem, in quantum est infinita adhæsió ad optimum, & summum bonum. Ergo per nullam etiam moralem bonitatem perfici potest.

8. Confirmatur quia in rebus etiam creatis,

QUÆSL. VI. *De voluntate Dei.* 329
creatis, etsi forma adveniēns subiecto in-
hæſionis ſemper conſtituat aliquid melius
quàm ſit negatio ejus abſolutè loquendo,
ſi tamen id attendatur quòd aliqua forma
diſconveniat ſubiecto denominato, cui
per accidens advenit, nempe composito
ſubſtantiali, in cujus deſtructionem ten-
dit, ut cum calor advenit aquæ, aut ligno,
ſic non perficiet illud ſubjectum, nempe
aquam, aut lignum, ſed tantum materiam,
cui inhæret in ordine ad novi compositi
conſtitutionem, ad quam diſponit. Quod
ſi melioritas reſpectu aquæ tollitur per il-
lam rationem contrarietatis, & diſconve-
nientiæ, poterit in alia re non reperiri
propter aliam rationem, & in ſubjecto
infinite perfecto locum non habebit,
propter impoſſibilitatem addendi aliquid
ad infinitum, cum infinita eminentia
præhabens id quod ipſi advenit.

SECTIO QUINTA. .

Refelluntur oppoſitæ ſententiæ.

1. **P**rima ſententia oppoſita eſt Aureoli
in 1. diſt. 479. unica art. 1. &
ſeqq. qui ut removeat à Deo omnem for-
malitatem intrinſecam quæ potuerit non
eſſe, nullam ei tribuit voluntatem ad
creaturas, niſi ſimplicis complacentiæ,

E e

in quantum, inquit, sibi complacet in sua essentia, & per consequens in omni entitate creata & creabili. Determinationem autem ad earum productionem per hoc fieri dicit, quod suppositâ illâ complacentiâ, potentia Dei non indiget amplius ullo determinante intrinseco, sed se immediatè determinat, & in actu secundo efficacem reddit per ipsammet operationem extrinsecam. Sic Deus voluntariè, & liberè producit, quia, inquit, complacenter producit, & cum dominio, ac potestate, ita ut possit eas non producere. Et hanc vim dominativam, ac potestativam ponit in omnipotentia, seu in Deitate prout habet rationem omnipotentiae, quæ se habet, sicut si ignis, dum ignit, posset non ignire: & sicut de facto nostra voluntas sic producit suum actum internum, ut possit non producere.

2. In hac sententia duo sunt quæ non probantur. Primò in Dei voluntate non erit electio, ac determinatio rerum, nisi metaphoricè, quia nullus erit actus voluntatis efficax circa res quæ fiunt, & perinde se habebit ipsa voluntas Dei, & omnis actus ejus secundus internus ad ea quæ in tempore producuntur, ac ad ea quæ nunquam erunt. Hoc autem per se rationi repugnat, & contrarium est Scripturæ in qua habetur, omnia quæcunque voluit,

QUÆST. VI. *De Voluntate Dei.* 331

fecit. Psal. 113. Quod planè significat determinationem ipsius voluntatis circa ea quæ facta sunt, ac proinde aliquem modum se habendi erga illa in Deo, qui potuit non esse. Et secundùm mentem Aureoli dicendum esset, Omnia quæcunque fecit Dominus, fecit. Quo modo voluntati Dei non adscriberetur rerum effectio, quam tamen illi scriptura adscribit.

3. Secundò in illa sententia, id quod proprium est voluntatis, tribuitur potentiae executivæ, nempe dominium, & vis determinativa hujus aut illius effectus. Quod tam rationi repugnat, quàm si intellectui tribueretur volitio, aut voluntati intellectio. Et verò omnipotentiam vocat voluntatem Dei extrinsecam, quæ sic ipsa indifferens sit ad effectus, sicut voluntas nostra ad suos actus, & effectus illos absque ullo prævio motu possit producere, vel non producere, cum interea complacentia & delectatio interior habeat se per modum spiritualis quietis, idèoque non sit motiva ad extra, sicut voluntas efficax esse debet. Propter hanc confusionem rerum, & defectum decreti, & dependentiæ ab ipsa voluntate Dei, non placet Theologis illa Aureoli sententia. Sed nec illa evitat id quod fugere intendit, nempe ne ponatur aliqua formalitas intrinseca Deo, quæ potuerit non esse.

Nam potuit non esse illa determinatio omnipotentiae erga rem quæ sit. Et talis determinatio includit aliquem modum quo se habet omnipotentia, indistinctum ab ipsa, ex quo procedit res effecta, quam tantum connotat. Et alioquin omnis actus liber Dei intrinsecè, & differentialiter constitueretur per ipsum effectum: Quod in secunda sententia refutandum est.

4. Secunda ergo sententia est, actum liberum in esse liberi, & efficacis, compleri per terminum ipsius, seu per denominationem ab eo petitam: Quæ denominatio cum potuerit esse, vel non esse, sic habebitur ratio contingentis in actu libero Dei, & illa non erit in Deo, seu in actu ejus necessario, sed extra ipsum in effectum: Ita Valquez, Arrubal, & alii.

5. Refellitur hæc sententia. primò, quia nulla res consistit in denominatione petita à suo effectum. Prius enim debet esse causa in suo esse constituta, quàm sit effectus. Atqui actus liber Dei est causa termini sui, Ergo ipse non constituitur per denominationem à suo termino-petitam.

6. Secundò, quia actus liber Dei est aliquid vitale, ac proinde debet esse totum ipsi principio vitali intrinsecum.

7. Tertiò, quia idem de scientia libera dicendum erit, ipsam compleri, & diffe-

rentialiter constitui per denominationem petitam ab objecto, cum tamen ipsa debeat esse vitalis repræsentatio ejus, ipsi cognoscenti planè intrinseca. Illud, inquam, dicendum erit, quia alioquin esset in Deo seu in actu scientiæ ejus, aliqua formalitas intrinseca, quæ potuit non esse: quod nolunt illi auctores.

8. Tertia sententia est, actum liberum Dei superaddere necessario relationem rationis ad objecta creata. Et quo-ad hanc relationem, quæ potuit non esse, actum liberum habere rationem contingentis. Ita Ferrariensis, Bannes, Medina, Molina, & alii. Hæc sententia non placet, quia actus liber Dei est aliquid independens ab omni intellectu ipsum considerante, neque indigens intellectu nisi ad cognitionem objecti, ipsi præviā. Quod si per relationem rationis intelligatur concipiendæ relationis fundamentum, de hoc redibit difficultas, & quæretur quid sit illud fundamentum, & quid addat actui necessario voluntatis divinæ: neque hoc in tali sententia assignatur. Si denique per relationem rationis intelligatur vera ac realis relatio, sola ratione distincta ab ipso actu voluntatis necessario. Primò, hoc malè appellatur relatio rationis, quia aliud est quomodo relatio sit, an realiter, annon, aliud quomodo ipsa distinguatur.

Præterea vel illa relatio erit de genere earum quæ intrinsecus advenientes appellantur, id est, positæ fundamento & termino, ex ipso fundamento resultantes: Vel erit de genere earum quæ ipsæ fiunt, aut quomodocunque à determinatione agentis proveniunt, & suos terminos causant, ut creatio, & quævis actio, & receptio formæ à materia sustentante, absque tamen imperfectionibus quæ plerisque existis relationibus insunt. Si primum, relatio illa erit posterior Dei decreto, & ipsum supponet, & se habebit ut paternitas in homine qui generavit, & relatio Creatoris ac dominium in Deo posterius naturâ, ad creationem. Si secundum, non satis explicatur vis & activitas illius relationis, seu modus se habendi ad extrinsecum per hoc quod appellatur relatio rationis. Quin potius hoc videtur importare relationem secundum dici, seu quæ non sit in re, nisi fundamentaliter, & tantum secundum nostrum concipiendi modum conveniat rei secundò intentionaliter, ut relatio principii, quæ rationali tribuitur respectu risibilis. Cæterum sententia in hoc secundo, non satis explicato sensu accepta, vera est, & cum supra asserta convenit: Et in ea sic intellecta solus non placet explicandi defectus.

9. Quarta sententia est, actum Dei li-

berum consistere in hoc quòd actus necessarius Dei, cum ob suam infinitatem sit sufficiens ad attingenda quælibet objecta contingentia, non tamen necessariò habeat omnem effectum formalem quem habere potest, sed se ipso determinetur ad unum potiùs volendum quàm aliud: Quæ determinatio fiat per hoc quòd eadem forma, quæ in priori signo rationis non habebat unum effectum formalem in suo subjecto, quem poterat habere, sine additione ullius perfectionis, eo quòd totam suam perfectionem formaliter jam haberet: Illa inquam eadem forma, per eandem illam formalem perfectionem, jam constituat talem effectum formalem. Ita sensit Suarez disput. 30. Metaph. sec. 9. cujus mens clariùs patet ex refutatione sententiæ Cajetani, cui suam illam sententiam opponit.

10. Refellitur hic explicandi modus. Primò quia si omnis ratio formalis possibilis in Deo, de facto in illo est, erunt rationes oppositæ, ut volitio, & nolitio hujus mundi. Nec dici potest tales rationes, defectu extrinseci, non constituere singulos effectus formales sibi proprios. Nam illæ debent inferre suos terminos, & quia illi termini contradictoriè opponuntur, implicat illas rationes formales ipsorum illativas, esse simul in Deo sive

esse unicam formalitatem, quæ sit adæquatè in Deo.

11. Refellitur secundò, quia per se impossibile est formam esse in subiecto secundùm totam perfectionem quam formaliter habere potest, & non conferre totum effectum formalem qui ab ea in ratione formæ possibilis est. Siquidem effectus formalis per hoc constituitur, quod forma insit subiecto. Nam quid est aliud esse album, simile, &c. quàm albedinem similitudinem, &c. inesse subiecto suo. Hinc dicendum est actum necessarium Dei, antecedenter ad determinationem qua respiciat hoc objectum extrinsecum ut producendum, habere totam eminentiam, suæ perfectionis, seu totam perfectionem eminentialem, non autem totam sibi possibilem formalitatem, seu non totam formalem determinationem.

12. Quinta sententia est recentiorum apud Ruiz, disp. 11. sect. 8. asserentium Deum volitione necessaria velle efficaciter objectum quod hac propositione disjunctiva significatur. Volo producere, vel non producere mundum. Ad complementum autem liberæ volitionis, præsuppositâ illâ volitione necessariâ efficaci, nihil requiri nisi actuale emanationem creaturæ ad extra, sive actionem transeuntem per quam producat, ipsumque in obliquo

obliquo connotatum esse illud ipsum complementum per quod volitio disjunctiva transeat in absolutam.

13. Refellitur hæc sententia, quia sic Deus imperfectè vellet, non determinando objectum in quod ferretur libera volitio ejus. Et maximus esset defectus in homine si vellet indeterminatè alterum è duobus disjunctivè inevitabilibus, & non ultra progredereetur: unde nihil fieret saltem dependenter ab eo.

14. Neque dicas determinationem fieri per objecti positionem, quia, ut dictum est, voluntas prius debet se determinare, quàm determinetur objectum, quod alioqui non determinabitur ab ea. Et actio externa non est volita neque electa, nisi per redundantiam, & denominativè ab actu interno voluntatis eam imperante ac eligente.

15. Hinc secunda ratio ducitur, quia ponetur effectus formalis sine forma constituyente ipsum, si inter volitionem illam necessariam de objecto disjunctivè spectato, & positionem liberam unius determinati effectus, quæ positio effectivè est ab omnipotentia, nihil mediat ex parte voluntatis divinæ. Dabitur enim liber effectus sine forma ipsum denominante talem: Siquidem nulla præcedet volitio nisi indifferens ad oppositum, & necessaria,

& incapax per se ad determinationem talis effectus.

SECTIO SEXTA.

Solvuntur objectiones contra terminationem ad extrinsecum in actu Dei libero inclusam, ejusque differentialiter, & ultimò constitutivam.

1. **C**UM in constituendo libero Dei actu, duo dicta sint, primum, actui voluntatis divinæ secundum se necessario supervenire determinationem, & habitudinem intrinsecam ad extrinsecum. Secundum determinationem illam certo modo habere rationem perfectionis, contra utrumque multa objiciuntur.

2. Contra primum. Objicitur primò, si datur talis intrinseca determinatio, aliquid erit Deus, quod potuerit non esse. Consequens implicat, quia quidquid est Deus, de necessitate absoluta est. Sequela probatur, quia quidquid est in Deo, est Deus, ac proinde illa formalitas determinationis, quia erit formaliter in Deo, erit Deus, unde quia ipsa poterit non esse, aliquid quod est Deus, poterit non esse.

3. Respondeo distinguendo majorem, aliquid, id est aliqua res, Nego. Aliquid, id est aliquis modus se habendi ad extrin-

secum , subdistinguo , poterit non esse entitativè , seu per desitionem entitatis , iterum nego ; poterit non esse per desitionem præcisè illius respectus , qui Deo ut libero , contingenter convenire debet , concedo. Et dico tò non esse , ibi non importare ullius entitatis destructionem , neque desitionem perfectionis , cujus defectu subjectum infinitum minoritatem patiatur : Et negationem istius contingentiae adimere Deo libertatem , quia hac sublatâ , fuisset Deo impossibilis determinatio ad salvandum Judam , & determinatio ad damnandos peccatores , quos per suas gratias ad pœnitentiam perduxit , quique jam sunt in cœlo , cum enim determinatio activa quam habuit ad reprobationem Judæ sit indistincta à Deo , & realiter Deus , non potuisset non esse : Et determinatio quam habuit ad dandas illas gratias , propter parem indistinctionem , non potuisset similiter non existere. Quare in recto sensu , admittendum illud est , cujus negatio adimeret Deo libertatem , ac proinde tolleret Deitatem. Quod si valeret objectio , unio-hypostatica Verbi , prout se tenet ex parte Verbi , & tantum connotat humanitatem , cum sit Verbo intrinseca , ut pote ab ipso indistincta , & realiter Deus , debuisset necessariò esse ab æterno. Quod cum sit manifestissimè

falsum falsum omnino est, omnem formalitatem quæ est realiter Deus, necessario existere aliter quàm entitativè, cum quo-ad se formaliter sumptam, contingenter inesse debeat, si non est perfectio simpliciter simplex, quod non convenit huic determinationi Dei libertatis ad hanc partem contrarietatis, aut contradictionis, cum potuerit Deus se determinare ad alteram. Hoc ipsum patet in aliis innumeris exemplis. Nam coëxistentia quam Deus habet ad rem quamlibet temporalem, est ei intrinseca, ut pote indistincta ab ipso, sicut quævis relatio à suo fundamento. Itaque ipsa est realiter Deus, & tamen illa potuit non esse: Unde ad necessitatem divini esse, id tantum pertinet quod res ipsa quæ est Deus, & ratio formalis per quam constituitur formaliter in esse Dei, & proprietates atque omnia quæ ab ea ex natura rei manant, non possint non esse, cum, quo-ad ea quæ extrinseca Deo sunt, aut esse possunt, Deus aliter, atque aliter, se habere possit per suam propriam entitatem diversimodè, etiamque activè illa connotantem.

4. Objicies secundò, idem manens idem, semper facit idem. Unde ut sit determinatio de contradictorio, sive quod fuit, sive quod esse potuit, ad aliud contradictorium, requiritur aliqua mutatio.

Atqui actus Dei est in se semper idem, neque mutari potest. Ergo per illum sine ulla alia entitate sumptum, non potest Deus constitui volens mundum, cum potuerit esse non volens mundum manente semper eodem illo actu. Quare requiritur ut volitionem liberam mundi ingrediatur ipse mundus, tanquam terminus, ut aliqua mutatio sit extra Deum, cum in Deo esse non possit.

5. Respondeo distinguendo majorem, idem manens idem tam absolute quam relative, concedo; manens idem absolute, sed non idem relative, nego, Et dico aliquem relativum se habendi modum, qui potuerit non esse, sufficere ad ejusmodi determinationem, ut patet in nostra voluntate, quæ se ipsa se determinat ad actum quem non producebat, ita ut talis determinatio connotet & inferat ipsum actum, sed non includat. Ad minorem dico actum Dei in se absolute immutatum aliter se habere relative, idque ex propria potestate, quæ inest voluntati divinæ circa finita & contingentia objecta.

6. Objicies tertio, si decretum sic explicatur, ratio ultimò constitutiva decreti erit relatio. Hoc autem est falsum. Primò, quia decretum est actus vitalis, actus autem vitalis non est relatio ad extrinsecum. Secundò, quia quod est accidentale uni

speciei , non potest esse essentia alterius contra distinctæ. Atqui relatio ad objectu n est aliquid accidentale volitioni creatæ , quæ est in se aliqua qualitas absoluta. Ergo id non est essentiale ulli volitioni increatæ.

7. Respondeo distinguendo majorem, erit relatio de genere earum quæ sunt meri respectus , qui non nisi posito fundamento & termino exurgunt, nego. De genere earum quæ proveniunt à determinatione agentis, & suos terminos causant, aut ad illorum positionem quomodocunque influunt, cujusmodi sunt actio respectu effectûs , unio partium respectu compositi , motus localis respectu ubicationis, quæ per eum acquiritur, sublatis tamen defectibus, cum quibus sunt hujusmodi relationes in creatis, concedo. Et in hoc nihil esse absurdi contendo, quia quod aliquid non semper, seu non necessariò se ipso formaliter præstat, non præstat unquam se ipso nisi relativè, vel cum aliqua negatione sumpto, siquidem absoluta positiva rerum propria, & indistincta ab illis, inseparabilia sunt ab ipsis. Atqui actus necessarius Dei non necessariò Deum formaliter constituit, volentem efficaciter positionem hujus objecti. Ergo, cum sic velle sit aliquid positivum, id non potest præstare se ipso nisi cum aliqua re.

QUÆST. VI. *De Voluntate Dei.* 343
latione sumpto. Jam posito quòd actus
necessarius id præstet per additam sibi re-
lationem, patet illam non esse exurgen-
tem ex fundamento & termino, quia ter-
minus non est etiam futurus antecedenter
ad talem relationem, decreti divini con-
stitutivam. Et in actu necessario per se &
antecedenter ad eam sumpto, nihil est
quod eam fundet, siquidem actus ille est
indifferens ut subsit contrariæ terminatio-
ni, sitque volitio oppositi. Igitur oportet
ut illa relatio sit ab aliquo agente ut sic,
nempe à voluntate Dei, & actui necessa-
rio adveniat ex determinatione ipsius.

8. Ad id quod dicitur actum vitalem
non posse esse relationem ad extrinsecum.
Respondeo primò, decretum Dei liberum
non esse propriè ipsum actum vitalem
voluntatis divinæ, sed aliquid vitale,
nempe illius actus extensionem ac modifi-
cationem. Non implicat autem aliquid
vitale esse dicto modo relativum, quia
vivens, quà tale, potest se habere aliquo
modo ad extrinsecum. Idque patet primò
in motu locali animalium, qui est aliquid
vitale, cum sit à principio in quo reci-
pitur, agente in seipso. Et simul est rela-
tio de genere earum quæ positis absolutis
possunt non esse, nempe est actio effectiva
correspondentiæ ad unum atque alium lo-
cum, ad quam actionem ex virtute sua

se quodammodo determinat id quod movetur, ita ut non generanti, sed ipsi per se agenti tribuatur hæc actio. Secundò patet in exercitio nostræ libertatis, quod etiam strictè sit vitale, & in eo essentialiter includitur relatio illi ipsi exercitio essentialis.

9. Quod ut intelligatur, adverte qualitatem illam, quam producit nostra voluntas, dum aliquid volumus, quæque est actus ipse voluntatis, ita esse posse ut ipsa non sit actus ejus, nec tendentia actualis in objectum, si nimirum à Deo solo producat, etiam extra ipsam voluntatem, & non sit in ullo subjecto. Quare ipsa non est essentialiter tendentia actualis in objectum, sed est id per quod productum à nostra voluntate, & receptum in ea, ipsa tendit in illud, ita ut tendentia actualis sit aliquid relativum, ratione distinctum ab illa ipsa qualitate, quod posset non esse, ipsa aliter existente. Et talis relatio est de genere earum quæ sunt à determinatione agentis, & non exurgit, sicut intrinsecus advenientes, ex positis absolutis, siquidem terminus ejus per eam sæpe sit remotè ac moraliter, cum per eam imperatur potentiaæ executrici ejus effectio. Hoc igitur essentialiter est exercitio nostræ voluntatis, quod plus dicit quàm productionem qualitatis illius,

quæ est actus noster, & non est essentialiter tendentia in objectum, si quidem exercitium illud formalissimè dicit illam tendentiam, & nostra voluntas idcirco tantum producit illam qualitatem, quia non potest tendere sine ipsa: ac si illam posset producere eo modo, quo Deus, ita ut non simul per eam fieret actu ista tendentia, hoc esset quidem agere, sed non velle.

10. Et hinc concidit secunda ratio quæ allata est ad probandum actionem vitalem non posse formaliter esse relationem, eo quod scilicet relatio ad objectum sit tantum aliquid accidentale nostræ volitioni. Concedo enim illam relationem esse accidens metaphysicum illius qualitatis per quam volumus, ut per medium tendendi in objectum, sine quo medio non possumus in illud tendere. Nego autem illam relationem esse aliquid accidentale exercitio nostræ libertatis, quia hoc per illam formalissimè constituitur, ita ut propter eam tendentiæ relationem, illa ipsa qualitas producat. Unde quia Deus, ut tendat in unum ex propositis impossibilibus bonis, & ad hoc se determinet, non habet opus tali qualitate, neque ulla entitate sibi superaddita, cum præhabeat actum illi qualitati, cum infinita eminentia æquivalentem, satis est ad exerci-

tium libertatis ejus , quòd actui illi necessario superveniat illa relatio tendentiæ, & terminatio activa ad effectum. Et sic ista relatio est aliquid vitale, hoc ipso quòd constituit liberam ejus à se ipso determinationem. Atque ita in Deo reperitur id quod est perfectum in nostra libertate, & maximè illi essentialè, non autem id quod in ejus exercitio est imperfectum,

11. Objicies quartò, si ratio differentialis decreti divini consistit in relatione ad extrinsecum, ubi non erit speciale extrinsecum, non poterit esse decretum. Falsum consequens, quia ponamus Deum condonare peccatum sine infusione gratiæ, aut ullius doni creati : ibi erit decretum, & nulla erit creata entitas quæ illi correspondeat. Ergo ratio differentialis decreti non potest esse relatio ad extrinsecum.

12. Respondeo ibi esse aliquid morale, quod est effectus illius decreti, nempe jus quod accipit homo, cui condonatur peccatum, ut non habeatur odio à Deo, neque amplius sit eo dignus, neque pœnæ obnoxius. Ad hoc igitur terminatur habitudo illa decreti liberi constitutiva. Neque ad hoc morale ponendum est opus mutatione physica, sed satis est si aliquid aliter se habeat physicè, quod hic contingit cum Deus de non volente jus illud,

fit volens jus illud. Esse enim volentem, est quid physicum. Quare verè ibi aliquid physicum, nempe novus physicè se habendi modus præsupponitur moralitati quæ supervenit, nempe honestati talis actus, & effectui morali ejus, in quo nulla est mutatio physica, multò minùs quàm in unionè hypostatica, etiam ut se tenente ex parte Verbi, & sanctificatione humanitatis infinita per ipsum Verbum, etiam activè sumpta.

SECTIO SEPTIMA.

Solvuntur aliæ objectiones contra inclusam in decreto Dei libero formaliter sumpto, aliquam perfectionis realis intrinsecæ rationem.

1. **Q**Uæ contra Cajetani sententiam de libera perfectione superveniente actui Dei necessario, proponi solent, ea vel absolutè non valere, vel contra perfectionem in sensu explicato intellectam, non habere vim ullam, ex eorum solutione ostendendum est.

2. Objicies ergo primò, ex Didaco Ruiz disp. 13. sect. 1. perfectio quæ potuit non esse, imperfectionem habet admixtam, quia hoc ipsum quod est non necessarium fuisse quidditativè, dicit possi-

bilitatem qua potuerit in æternum nihil esse, sicut omnes volitiones efficaces quas circa alios mundos creandos potuerit habere Deus, nihil sunt, & nihil erunt in æternum. Quia igitur non est admittenda in Deo perfectio habens admixtam imperfectionem, non potest in eo locum habere modus decreti qui perfectionem contingentem includat.

3. Respondeo possibilitatem non existendi, si importet possibilitatem recidendi in nihilum, dicere imperfectionem, si autem sit tantum possibilitas non sic se habendi relativè, seu non sic afficiendi, ac referendi subjectum (unde malè appellatur possibilitas non existendi, quæ de se dicit potestatem recidendi in nihilum) nego quod talis possibilitas quæ non cadit in rem, sed in rei formalitatem de se accidentalem, necessariò, & de se imperfectionem dicat. Et de facto nullam dicit, si formalitas illa non sit meliorativa rei, itemquæ, si formalitas sic tantum potest in se non esse formaliter, ut non sit negatio entitatis quam afficeret ac referret, sed negatio alicujus habitudinis ac respectûs de se contingentis: & præterea si dum ipsa non est, alia adsit perfectio, nullum defectum involvens, quo modo dum non est nolitio mundi, est volitio ejus. His enim omnibus positis, possibi-

litas non existendi dicit tantum aptitudinalem negationem alicujus modi, quo sublato res non minus bene se habet, & semper cum infinita eminentiæ perfectione continet id quod formaliter in ea non est. Hoc autem nullam omnino imperfectionem dicit, sed plenitudinem cui nihil propriè perire possit, nihilque accidere, quo possit crescere.

4. Objicies secundò ex eodem, Artiani asserebant libera voluntate Patris fuisse productum filium, ut inde probarent esse creatum. Contra Patres ut defenderent non esse creatum, negabant libera voluntate patris productum. Itaque apud omnes hoc stabat, illud omne esse creatum quod per liberam Dei voluntatem ita fuisset, ut potuisset non esse. Atqui talis erit illa perfectio quæ asserta est. Ergo illa erit aliquid creatum ac proinde aliquid in Deo impossibile.

5. Respondeo, & Arianos, & Patres locutos esse de re quæ potuerit quo-ad suam entitatem esse, & non esse, & remanere intra nihilum, de qua re verum est ipsam esse creaturam; non autem esse locutos de formalitate, quæ etsi ipsa non fuisset, necessariò tamen fuisset entitas ejus, seu res cui contingenter identificatur.

6. Dices implicare aliquid identificari

contingenter. Respondeo distinguendo, identificari contingenter, ita ut sensus sit aliquando identificari & aliquando distinguere, seu existere sine identificatione reali, concedo. Identificari contingenter, ita ut contingentia cadat supra formalitatem, manente tamen impossibilitate distinctionis entitativæ, & necessitate identitatis realis, ex hypothesi quod sit illa formalitas, nego. Verum enim est modum illum se habendi ad extrinsecum convenire contingenter Deo, & nunquam distinguere ab eo, & actu identificari, quando est, ita ut si non identificetur actu, id proveniat ex eo quod non sit actu illa formalitas. Sic in creatis, esse dextrum aut sedentem identificatur Petro contingenter hoc etiam sensu, quod licet ex hypothesi quod sit ratio illa dextri, aut sessio, impossibile sit talem relationem ab eo distinguere, contingat tamen manente Petro illam non esse.

7. Objicies tertio ex eodem, si datur talis perfectio, vel illa Deitatem includet, vel ratione ratiocinatâ ab ea præscindet, vel etiam distinguetur ex natura rei, ut modus à re modificata. Nihil horum dici potest. Non primum, quia implicat aliquid, quod sit essentialiter Deus, posse non esse, & id quod non est, ut volitio alterius mundi, essentialiter postulare ut

fit Deus. Non secundum, quia impossibile est aliquid esse in Deo quod non sit ipse Deus, ita ut non tantum in concreto, sed etiam in abstracto prædicari possit de divinitate. Alioqui si non est essentialiter Deus, non erit essentialiter ens infinitum, unde essentialiter erit ens finitum. Omnis enim essentia non includens positivè infinitatem, est finita: & ex his tertium multò minùs dici potest, quod etiam simplicitati Dei repugnat.

8. Respondeo perfectionem illam præscindere à divinitate, & sola ratione ab ea distingui. Ad probationem, nego quidquid est in Deo esse Deum formaliter. Nam satis est quod sit Deus identicè. Et addo sicut aliis rebus, ita Deo aliquem modum habendi se relativè ad extrinsecum, posse contingenter identificari, modo supradictò, seu contingenter inesse, etsi necessariò indistinctum entitativè, sicut unio hypostatica, quæ est contingens verbo, identificatur ipsi prout se tenet ex parte ipsius, & ipsum denominat unitum. Et idem est de relatione creatoris, & dominii actualis, quæ sicut aliæ relationes, identificantur fundamento, & terminum tantum connotant, non autem includunt.

8. Ad id quod dicitur de prædicatione in abstracto respondeo illam valere tan-

tum in sensu identico, quia universaliter loquendo, una formalitas non est formaliter alia. Sic risibilitas in homine non est rationalitas: ac proinde nec in Deo justitia est Deitas ipsa formaliter. Unde nec illa perfectio de qua agitur, erit ipsa formaliter aseitans, quam implicat non esse.

9. Ad sequelam de finitudine, quæ conveniet essentiæ Dei, nego planè id sequi. Neque enim valet consequentia à præcisione ad exclusionem. Et independenter ab hac controversia, infinitas ponitur inter attributa quæ ab essentia Dei præscindunt, neque ex eo quòd infinitas non ingrediatur essentiam Dei, Deus desinit esse infinitus, sicut non desinit homo esse risibilis, ex eo quòd risibilitas ab ejus essentia præscindat.

10. Objicies quartò, ex eodem, si daretur perfectio quæ volitionis liberæ Dei constitutionem ingrederetur, ut differentia ejus, illa esset perfectio simpliciter simplex. Consequens repugnat. Ergo & antecedens. Sequela probatur, primò quia illa perfectio est simpliciter simplex, quæ nullam habet admixtam imperfectionem, illa autem talis erit. Ergo. Probatur secundò quia ultimus actus immanens est perfectior quam potentia. Sed potentia cujus illa perfectio esset actus immanens, est

est perfectio simpliciter simplex, nempe libertas divina in actu primo. Ergo illa perfectio erit simpliciter simplex. Jam quod hoc implicet, probatur, quia omnis perfectio simpliciter simplex necessariò convenit Deo, quod est contra rationem actus liberi.

II. Respondeo negando sequelam majoris. Ad probationem, nego ad perfectionem simpliciter simplicem sufficere quòd nullam habeat admixtam imperfectionem. Alioquin unio hypostatica, prout se tenet ex parte verbi, & ipsi identificatur ut quævis relatio suo fundamento, esset perfectio simpliciter simplex, quæ proinde fuisset necessariò in Deo. Requiritur ergo ad perfectionem simpliciter simplicem, ut ipsa nullam excludat aliam, quæ etiam nullam imperfectionem includat, nec à tali possit excludi & hæc est causa cur unio hypostatica non sit perfectio simpliciter simplex, quia ipsa excludit determinationem quam Deus habere potuit ad negationem talis unionis, aut ad aliam unionem cum alia humanitate, aut cum alia natura: quæ determinationes nullam habuissent admixtam imperfectionem. Et illæ hanc quæ de facto est, unionem hypostaticam excluissent. Dico autem perfectionem de qua quæstio est, quæque in quovis decreto Dei libero repe-

ritur, excludere perfectionem quæ nullam haberet admixtam imperfectionem, & à qua ipsa excludi potuit, nempe volitionem sibi oppositam. Unde ipsa non est perfectio simpliciter simplex. Id autem quod in hoc genere est perfectio simpliciter simplex, & necessarium est, est quod Deus circa quodlibet ex objectis indifferentibus sit vel hoc, vel illo modo determinatus, & vel hoc velit, vel illud, & circa nihil suspensus maneat, aut sine actu se habeat. Et hæc quidem vel illa determinatio ingreditur constitutionem perfectionis simpliciter simplicis, in quantum ingreditur totalem determinationem Dei, quæ abstrahendo ab hoc vel illo modo determinationis, est perfectio simpliciter simplex: sed quia ita ingreditur, ut excludi posset per oppositam sibi determinationem, quæ nullam de se includit imperfectionem, non est perfectio simpliciter simplex. Et idem est de scientia visionis circa hoc objectum, cujus contrarium Deus videre potuit, ut consideranti patebit. Quare quidquid objiciunt adversarii contra istam perfectionem in decreto libero inclusam, debent ipsi solvere circa talem scientiam.

12. Ad secundam probationem, distinguo majorem, actus est perfectior potentia complebili, transeat: non comple-

bili, eo quòd ipsa contineat cum infinita eminentia id quod finitarum potentiarum vacuitatem complet: nego: quia in potentia infinitè perfecta non est vacuitas ejusmodi, & ipsa cum infinita eminentia continet quidquid ultimum ejus actum constituet. Dixi transeat, quia cum actus sit effectus potentiæ, & effectus non possit esse nobilior sua causa principali, si potentia est causa principalis, actus non est perfectior, velut intensivè, tali potentiâ sed tantùm hoc sensu, quòd junctus cum potentia in creatis constituat aliquid quantitativè perfectius ipsa sola. Sed hoc locum non habet, ubi in potentia, est incapacitas ad augmentum perfectionis propter infinitam ipsius excellentiam.

13. Objiciunt quintò si ratio decreti divini includit perfectionem contingentem cum alia contingente impossibilem, erit quoddam malum Deo, dum habet unam, non habere aliam.

14. Respondeo negando. sequelam, quia ut non habere perfectionem exclusam, esset malum, oporteret eam esse meliorativam subjecti infiniti, quo modo per exclusionem minùs benè se haberet Deus. Non est autem illa meliorativa, ut dictum est. Ergo illam non habere non est malum. Adde quòd non habendo illam,

habet hoc ipso aliam, per quam tollitur suspensio voluntatis, in qua esset imperfectio.

16. Instabis, ex illis perfectionibus una erit major aliâ si semel habeant rationem perfectionis. Nam in volitione incarnationis, ratio bonitatis, & misericordiæ præstabit perfectioni justitiæ, quæ esset in volenda negatione ejus, sicut inter homines, actus quo quis læsus parceret, & beneficium conferret offensori, esset melior quàm quo vindictam quæreret. Ergo per illam majoritatem perfectionis, perficeretur actus divinus & melior esset, quàm si determinaretur ad oppositam minorem perfectionem.

17. Respondeo primò etsi una perfectio ex genere suo major sit quàm alia, quod solum probari potest de perfectionibus illis abstractè à subjecto consideratis, aliam non desinere esse in Deo infinitam, quia cum modus tendendi in certum objectum formale possit esse de se perfectior ac perfectior semper ex parte ipsius actus, & tendentiæ, unde in duobus hominibus idem volentibus potest esse inæqualitas bonitatis quæ inerit in actibus eorum, idque in uno diversos actus successivè exercente reperiri potest, & multò magis illa diversitas locum habebit in actu Angeli, & in actu hominis circa idem :

cum, inquam, hoc sit verum, actus divinæ voluntatis in quodvis objectum bonum, atque honestum, cum infinita ipsius tendentiæ perfectione verlabitur, unde non erit inæqualitas, aut majoritas in infinitate ut sic sed in qualitate rationis illius, cui semper in Deo infinitas adveniet. Quare nullus semper erit defectus in Deo nihilque in eo finitum.

18. Respondeo secundò, etsi infinitas in perfectione de se majori, præstet de se infinitati quæ esse posset in perfectione ex genere suo minori, si infinitum esset possibile in subjectis perfectibilibus, hoc est in creatis: quo modo infinitas in gratia, si possibilis esset, præstaret infinitati in calore, tamen perfectionem infinitam etiam dicto modo majorem, non perficere subjectum in quo ipsa cum infinita eminentiæ perfectione contineretur, quia alioqui continentia illa infinitè perfecta, fuisset infinitè perfecta, & non fuisset, siquidem formalis continentia perfectionem ejus augeret, & subjectum utriusque redderet melius. Hinc sanctificare infinitè humanitatem, etsi sit perfectio infinita, & de se melior quàm non sanctificare, non tamen perficit Verbum, quod sine formali sanctificatione illam ipsam perfectionem radicaliter, cum infinita eminentiæ perfectione, continebat. Et nisi hoc

fit verum, Verbum per illam sanctificationem activè sumptam, quomodo ab ipso est indistincta, estque correlatio sanctificationis passivè sumptæ, quæ se tenet ex parte humanitatis, perficeretur ac mutaretur moraliter, sicut per ipsum physicum aliter se habendi modum, seu per ipsam unionem substantialem, etiam infinitè excellentem, physicè mutaretur. Non mutatur autem ob præsuppositam illam infinitam perfectionem continentia eminentialis. Et hæc est potissima, & planè ultimata solutio per quam consimilibus objectionibus respondetur.

SECTIO OCTAVA.

An sit in Deo amor amicitia erga homines.

1. **R**espondeo affirmativè. Et probatur primò ex scriptura. Psal. 145. Dominus diligit justos. Et proverb. 8. Ego diligentes me diligo.

Probatur secundò ratione, quia verè homo est diligibilis secundum se amore benevolentia, in quantum est ens intellectuale, virtutis capax, & felicitatis, ipsiusque Dei possidendi: itemque capax amandi Deum amore benevolentia; quo posito, congruum est ut Deus qui bonita-

te præcellit, ipsum præveniat, &, supposito quòd homo eum diligat ex benevolentia affectu, æquum est seu decens, ut Deus ipsum quoque novo benevolentia amore prosequatur, quia benevolentia ex se ad reciprocam benevolentiam movet.

2. Objicies Deus homines diligit ut media ad suam gloriam, quam intendit ut finem omnium ad extra. Ergo non diligit eos propter ipsos, sed propter se. Hoc autem est contra rationem amicitia, quæ exigit ut is qui amatur, ametur propter seipsum. Alioqui non amaretur amore benevolentia. Antecedens probatur, primò ex scriptura universa propter semetipsum operatus est Dominus Proverb. 16. v. 4. Secundò ex sancto Augustino, qui lib. 1. de Doctrina Christiana, c. 77. dicit Deum non frui creatis, sed uti. Tertiò ratione probatur, quia ea quæ inferiora sunt, per se & ex natura sua ordinantur ad id quod supremum est. Itaque Deus ea amat secundum hanc eorum conditionem. Et præterea nullum est objectum infinitæ voluntati proportionatum, ita ut eam per se moveat ad amorem sui in ratione finis, quod necessarium est ad amorem benevolentia, quo intenditur per se bonum personæ amata, nisi bonitas infinita.

3. Respondent Suarez, Valentia, &

alii, Deum non referre bonum quod nobis vult nostramque beatitudinem, ad suam gloriam, quasi iis indigeat, aut quidpiam utilitatis, commoidve inde percipiat: sed quòd cum ipse sit naturaliter finis omnium, omne bonum, habet hoc ex naturâ suâ, quòd ad ultimum suum finem referatur si honestè ametur. Jam autem quod aliquod ens honestè ac debito modo ametur, id non præjudicat amicitiae quæ honesta esse debet. Et inter homines etiam, si amicus debito modo diligitur, debet diligi cum subordinatione ad id ad quod de se ipse refertur, nempe ad Deum ut finem omnium.

4. Refellitur hæc responsio quia instando in ipsa non explicatur ratio benevolentiae Dei, ac proinde nec amicitiae erga hominem. Quòd enim Deus non indigeat nostra beatitudine, id non impedit ne dum refert illam ad gloriam suam, amor iste sit concupiscentiae: sicut quod bonis adhibeat medium aliquod ad consequendum bonum quo non indiget, id non impedit ne verè illud medium ex amore concupiscentiae eligat, quia universaliter loquendo, qui amat aliquod bonum, sive ipso indigeat, sive non indigeat, & ad tale bonum obtinendum, medium aliquod adhibet, si medium tantum amat in ordine ad illud bonum, quod ei placet,
quod

quodque amat per se, et si absque indigentia talis boni, medium ipsum amat per se, et si absque indigentia talis boni, medium ipsum amat tantum amore concupiscentiæ: idque utile est hoc sensu quod sit ad finem placitum, atque intentum conducibile, quod ad amorem concupiscentiæ sufficit. Denique quod nostram felicitàtem ordinet ad finem debitum, cui nisi subordinetur, honestè amari non potest, id non tollit ab amore rationem concupiscentiæ, sed concupiscentiam honestam facit.

3. Respondeo ergo cum Lessio, de Lugo & aliis, distinguendum esse in amore Dei duplicem virtualiter actum, unum quo nos & nostram beatitudinem propter suam gloriam diligit, in quantum videlicet per eam elucescunt divina attributa, & accedit Deo clara cum laude notitia à creaturis. Et hic actus non habet rationem benevolentiae erga nos sed concupiscentiæ erga bonum quod sibi vult Deus. Alterum, quo vult illam nobis, ut nostrum bonum proprium, quod non est impossibile cum illa priori ordinatione ad suam gloriam. Et hæc secundaria intentio, minusque principalis, est actus benevolentiae erga nos. Neque Deum dedecet talis actus, quia cum unum duobus modis est honestè amabile, potest utroque amari, dummodo non sint

impossibiles sed potius connexi , quomodo virtus rectè amatur ab homine , & ut per se honesta , & ut medium ad beatitudinem. Est autem nostra fœlicitas duobus modis honestè à Deo amabilis. Primò , ut medium ad gloriam ejus. Secundò , ut bonum nostrum , & beneficium quod confert homini , qui per se etiam est diligibilis , seu capax ut ab eo diligatur. Nam ille est per se diligibilis amore benevolentiaë , cui quatenus tali , propter perfectionem ejus intrinsecam , omnis recta voluntas potest velle jus utendi , ac fruendi aliquo bono. Atqui omni enti creato intellectuâli , si per se spectetur , id est antecederet ad omne meritum ac demeritum , in illo priori , propter perfectionem ejus intrinsecam , id est propter ipsam ejus intellectualitatem , omnis recta voluntas potest velle usum aliquorum bonorum , nempe usum nobilissimarum facultatum intellectus , & voluntatis , & concursus divini ipsi debiti ad exercitium virtutis , & consecutionem beatitudinis , saltem naturalis , in statu puræ naturæ , ita ut una per se considerabilis ratio volendi hoc , sit , quia est ens habens naturam intellectualem , & capacitatem ad illa bona : Et Deum decet ipsi velle consecutionem fœlicitatis voluntate saltem antecedente , quia ipsa natura talis entis intellectualis id postulat : quod est velle ei

tale bonum propter ipsum, ac proinde ex amore benevolentiae. Et præterea potest homo esse ab ipso Deo considerabilis propter obsequia quæ ipsi exhibuerit, & amorem quo eum prosecutus sit: Et sic majorem benevolentiam suo modo ab ipso Deo exiget, in quantum Deum decet semper esse liberaliorem, & superare amorem sibi exhibitum. His omnibus modis Deus nostram fælicitatem vult, tanquam nobis bonam; & quæ allata sunt in oppositum, nihil efficiunt. Nam auctoritas scripturæ, & prima ratio tantum probant nos amari à Deo ut media ad ipsius gloriam: Ex quo nullo modo colligi potest, non dari in Deo alium amorem ad nos terminatum.

6. Ad testimonium Augustini, dico per hoc quòd Deus non fruitur creaturis, non excludi amorem erga illas, qui aliquo modo illarum bono, sed non ultimè acquiescat. Frui enim tantum de ultimo fine dicitur. Et hoc solum in Deo respectu nostri non admittit Augustinus, quia hoc solum quo-ad hanc rem implicat.

Ad secundam rationem, seu ad id quòd dicitur, nullum, objectum aliud à bonitate infinita esse infinitæ voluntati proportionatum. Respondeo distinguendo, proportionatum in ratione finis primarii, concedo: in ratione finis secundarii, nego: quia omne ens per se diligibile amore bene-

volentiæ, est ei finis cui secundarius, & fælicitas ejus finis qui, etiam secundarius, quia voluntas infinita debet amare omne bonum amore congruo, & per se diligere id quod per se diligibile est. Sen capax ut rationabiliter diligatur, cum talis extensio amoris sit perfectio voluntatis omne bonum eo modo quo bonum est adæquantis. Quia igitur homo per se est diligibilis, modo jam dicto, dummodo amabilitati quæ in ipso est, non ponatur obex, ut in damnatis, congruit ut Deus ipsum propter se diligat. Neque meritum hominis hac in re ponitur, sed capacitas recipiendi boni, juncta cum intelligentia, & facultate redamandi. Quod declaratur à fortiori, in objecto misericordiæ. Nam illius objectum est ipsa miseria sublevabilis, quæ inest enti intellectuali, & tolli potest per communicationem boni quod est in misere. Quare ut homo sit, non quidem dignus amore Dei, sed capax terminandi amorem ejus, quod solum dicit diligibilitas de qua hîc agitur, ad possibilitatem, ac decenciam, non autem ad debitum amoris, ut, inquam, sit ita capax, etiam antequam existat, satis est quod possit à Deo recipere esse, & donum ipsum intelligere, ut manans à donante, & redamare. Unde potest præveniri per amorem.

7. Confirmatur primò, quia homo se-

QUÆST. VI. *De Voluntate Dei.* 365
cundum se est capax Dei inimicitiae. Ergo
& amicitiae alicujus. Nam quod est Capax
unius contrarii deterius, & sibi mali, quo
excluditur melius, est quoque capax me-
lioris; & non est capax deterius, nisi per
accidens, ut hic contingit per malum usum
creatae libertatis. Alioqui posset ordinari de
se ad id quod est sibi malum. Et certum est,
inimicitiam Dei posse per aliquid destrui
positivè, quod non fiet nisi per oppositam
ipsi benevolentiam.

8. Confirmatur secundò, quia ex ve-
riori doctrina plurimorum Theologorum,
Deus cognoscit creaturas, non modò in se
ipso, sed etiam in ipsis creaturis, quia
creaturæ sunt illo etiam modo cognosci-
biles sine defectu, & pertinet ad intelle-
ctum infinitum cognoscere secundum se
omnia, quæ per se cognoscibilia sunt sine
defectu cognoscentis. Ergo cum aliqua
creatura, nempe rationalis, sit amabilis
duplici benevolentiae amore, uno amore,
benevolentiae, nempe, prout Deo connexa,
altero, ut per se absolutè secundum boni-
tatem sibi propriam spectata: utroque mo-
do diligitur ab infinita bonitate, quæ ita
objectum suum exhaurit, ut unumquodque
diligat modo sibi proportionato.

SECTIONONA.

An dentur in Deo decreta conditionalia.

1. **I**Nter varia decretorum divinatorum genera, aliqua sunt de quibus est controversia, an in Deo dentur, ut conditionata, & disjunctiva. De conditionatis primò est quæstio, circa quam.

Dico, dantur in Deo decreta conditionata. Est communis Theologorum sententia. Et probatur, quia tale est decretum de quo loquitur Apostolus 1. ad Timotheum, c. 2. quo nimirum Deus vult omnes homines salvos fieri. Qui enim vult alicui dare media, ut media, ad aliquem finem, eaque sufficientia, aliter vult finem illum, quàm per complacentiam simplicem. Igitur vel absolutè, vel aliquo alio modo medio inter simplicem complacentiam, & volitionem absolutam, qui modus non potest assignari alius, nisi sub conditione operis boni, ac meriti.

2. Præterea sacra scriptura multa alia decreta ejusmodi, satis apertè significat, ut de mittendis Angelis ad defensionem, ac liberationem Christi, si ipse voluisset, & patrem rogasset, Mat. 26. quia enim Christus non rogavit, voluntas illa per quam Deus erat paratus mittere Angelos,

conditionata mansit item lib. 1. Regum c. 13. declaratur voluntas quam Deus habuit de firmando in perpetuum Saülis regno, si obedivisset mandatis Dei. Nec custodisti, inquit Samüel, mandata domini tui. Quod si non fecisses, jam nunc præparasset Dominus regnum tuum super Ishaël in sempiternum.

3. His accedit Ratio hæc universalis, quia multa sunt quæ congruit Deum velle, non absolutè, & independenter ab omni conditione nobis libera, sed ex hypothesi alicujus talis conditionis, putà meriti: Et sic decet eum creaturæ liberæ finem ac beatitudinem velle.

4. Contra hanc doctrinam auctor libri de priori & ordine, cap. 21. objicit, si datur decretum conditionatum in Deo, vel illud esset de objecto aut conditione aliquando futuris, hoc est de eodem objecto de quo est decretum absolutum: vel de objecto, aut conditione nunquam futuris. Neutrum dici potest. Non primum, tum quia vanum omnino, & inutile esset tale decretum, cum ad ponendum ejus objectum, & effectum, sufficiat decretum absolutum: tum quia alioqui de omni effectu absolutè futuro, tam necessario, quàm libero, Deus haberet decretum conditionatum. Cur enim de uno potius quàm de alio? Imprudentis autem est, & stulti,

velle conditionatè id omne quod vult absolute. Non secundum, ita ut esset de objecto & conditione nunquam futuris, tum quia frustra esset tale decretum, cum nullum esset habiturum effectum, tum quia de omnibus creaturis possibilibus, quæ nunquam erunt, vel fuerunt, Deus haberet decreta conditionata.

5. Respondeo Deum habere decreta conditionata, aliqua quidem de rebus aliquando futuris, ut est decretum de salvandis electis, antecedens tempore seu æternitate merita eorum, ipsamque dationem mediorum; & aliqua de rebus nunquam futuris; ut est directum de salvandis iis qui damnabuntur. Ad id quod dicit decreta illa fore vana, & inutilia. Respondeo per ea voluntatem Dei circa objecta eorum conditionatè spectata, suam habere determinationem, & sine illis decretis fore suspensam, & negativè se habituram circa illa sumpta antecederet ad positionem conditionis, putà meriti, pro quo instanti nondum est decretum absolutum, quod non est nisi de re facienda propter positam conditionem, vel consequenter ad eam. Negatio autem illa determinationis circa objecta taliter spectata, imperfectionem involuit, & defectum extensionis ad quilibet ex volibilibus. Adde quod decretum conditionatum de bono dando creaturæ

existenti pro aliqua temporis differentia, movet Deum ut det media ad illud bonum obtinendum : quo modo decretum de danda hominibus beatitudine , si eam mereantur , movet ad dandas gratias quibus ponatur illa conditio : & ad hoc non spectat decretum absolutum , quod nullum est quo-ad reprobos : quo-ad electos autem non est nisi consequens positionem meritorum , & prævisionem eorum. Quod si decretum conditionatum est de dando bono creaturæ quæ nunquam existet , hoc Deum constituit in actu primo adæquatè completo ad bene agendum in tali circumstantia possibili , ita ut quo-ad actionem in tali casu , ipsi Deo convenientem , nihil ei desit. Et sic Dico Deum habere decreta conditionata circa omnia objecta conditionata ab ipso volibilia , ut ab eo omnis indeterminatio libertatis , & defectus in ratione causæ tollatur. Ad id tamen quod dicitur , Deum habiturum talia decreta de omni effectu etiam necessario. Respondeo negando sequelam. Nam non est decreto conditionato locus , neque ejus objectum , ubi res volibilis non habet aliquam dependentiam à conditione , aut connexionem cum ea.

SECTIO DECIMA.

An dentur in Deo decreta disjunctiva, & an tale sit illud ex quo cum causa libera concurrat ad actus ejus.

1. **R**espondeo quo-ad utramque partem, affirmativè. Quo-ad primam probatur, quia in tali decreto nulla est imperfectio, & alioqui non posset Deus offerre homini optionem unius ex duobus mediis ad finem quem absolutè veller. Posito enim quod det talem optionem, sicut dedit Davidi optionem aut belli, aut famis, aut pestis, ad finem pœnæ, ac vindictæ, quam de ejus peccato sumere volebat, volet tantùm disjunctivè hoc aut illud medium, & absolutè ipsum finem.

2. Quo-ad secundam partem, probatur applicando hoc ipsum ad decretum ex quo Deus concurrat cum causa libera, quod dico sic esse concipiendum, ut Deus cognoscens objecta ad quæ creata libertas debet posse se determinare, consequenter ad propositionem ipsi factam ab intellectu, statuatur illi dare suam omnipotentiam determinabilem, vel ad hujus speciei hunc individuum actum, putà vel ad hunc amorem, vel ad hoc odium, vel ad hanc numero volitionem abstinendi tam ab amore,

quàm ab odio, quo modo erit determinatio ad agendum ut sic, sed non ad hunc, aut illum actum, aut agendi modum, in quo est libertas. Quo posito, voluntas erit completè potens ad omnia à se eligibilia, simulque perfectè dependens à Deo: & tamen non erit determinata, aut ullo modo necessitata ad hanc vel illam speciem actûs; Itaque decretum Dei de concurrento non tollit libertatem causæ creatæ. Tale autem debere esse illud decretum, probatur, quia qui vult efficaciter & absolutè aliquid spectatum genericè, & nullam ejus speciem vult adhuc determinatè & absolutè, vult illius generis species, seu modos disjunctivè. Atqui pro illo instanti naturæ, quod antecedit determinationem libertatis nostræ circa objectum cum indifferentia objectiva propositum, vult Deus efficaciter & absolutè concursum ut sic, & nullam ejus speciem cum absoluta & efficaci determinatione. Ergo varias concursûs differentias vult disjunctivè. Minor per se est clara. Major probatur, primò, quo-ad primam partem, quia in veriori sententia, quam probavi, in selectis quæstionibus physicis quæst. ult. nempe quod non detur omissio libera sine actu, necessarium est voluntatem, cum est proximè libera circa aliquod objectum, aliquem actum producere quo amet, aut oderit, aut suspendat

amorem, siue odium, siue utrumque. Itaque officium causæ primæ exigit ut velit absolutè concurrere quocumque modo; siquidem voluntas quæ ad agendum ut sic, necessitatur, & est libera tantùm ad speciem actûs, aut exercitium talis actûs, sicut qui est liber ut sit in loco, non est liber ut careat omni loco, sed ut sit in hoc, aut illo loco, non potest sine parato ejus concursu agere. Quo-ad secundam partem probatur eadem minor, quia causa libera exigit ut ipsa habeat determinationem sui actûs, ac proinde non debet ante determinationem ejus determinari concursus unicuique ei offerendus: quod si fieret, ipsa non haberet potestatem ad oppositum, cum implicet eam habere potestatem ad aliquid sine oblato concursu ad illud. Itaque vult Deus disjunctivè concursum ad quemlibet ex actibus ei possibilebus juxta propositionem objecti. Et in hoc decernendi modo nullam esse implicantiam ex parte Dei, constat ex prædicta optione facta Davidi, in qua Deus pœnam absolutè volebat: ex indulgentia autem determinationem aut belli, aut famis, aut pestis, Davidis arbitrio permisit.

3. Instabis, ut Deus ponat hunc numero concursum, opus est decreto determinato & absoluto: Ergo non sufficit disjunctivum. Antecedens probatur, quia ut potentia Dei non est determinabilis nisi

per voluntatem ejus, ita non est determinabilis ad ponendum hunc numero concursum, nisi per hoc quòd Deus determinatè velit hunc ipsum numero concursum. Et implicat eum qui agit per rationem ac voluntatem, facere determinatè nisi id quod velit determinatè; alioqui mens & voluntas ejus non se extenderet ad totam operationem, atque effectum ejus: neque id totum ab ea penderet, ac proveniret. Sic in iis quæ pendent ab hominis voluntate, ut fiat aliquid determinatè, opus est ut homo id determinatè velit, & quandiu volet tantum disjunctivè, manebit suspensus, & nihil fiet. Ergo similiter in Deo, cum potentia ejus in omnibus quæ ipse facit ad extra, agat tantum ex voluntate ejus, ut aliquid ponat determinatè, opus est ut illud sit volitum determinatè.

4. Respondeo ad ponendum hunc numero concursum, opus quidem esse decreto determinato, ut bene probat objectò: sed nego illud debere esse determinatum ante determinationem creaturæ, quia satis est si per ipsam, seu consequenter ad ipsam determinetur: idque omnino possibile est, præsupposito illo decreto disjunctivo, per quod voluntas Dei constituitur parata ad volendum determinatè quidquid per causam liberam determina-

bitur , ita ut consequenter ad hanc determinationem jam habeat decretum absolutum.

5. Instabis ut per determinationem creaturæ Deus habeat decretum jam determinatum , & absolutum , oportet Deum qui prius volebat disjunctivè hunc vel illum numero concursum , videre determinationem creaturæ priorem sua determinatione , & illâ visâ , velle determinatè concurrere ad hoc ipsum ad quod illa se determinat : at implicat sic videri priorem determinationem creaturæ. Ergo implicat Deum dicto modo habere jam decretum absolutum. Major probatur , quia non determinatur voluntas Dei per aliquid , nisi prælucente cognitione quæ ostendat illi aliquid propter quod ipse se determinet. Itaque si determinatur per determinationem creaturæ , oportet illam determinationem videri ante determinationem divinæ voluntatis ; sicut absolutè impossibilis est alia via determinandæ voluntatis ut sic , quæ est appetitus rationalis , seu rationem sequens. Minor probatur , primò quia si determinatio creaturæ videretur prior determinatione divinæ voluntatis ; determinatio creaturæ fuisset sine concursu Dei , siquidem nullus est Dei concursus ante determinationem voluntatis ejus. Secundò , quia

cum determinatio creaturæ identificetur effectui, si Deus videt determinationem creaturæ ante propriam suæ voluntatis determinationem, jam videbit effectum, antequam voluerit ad ipsum determinatè concurrere, ac proinde antequam concurrerit, cum non potuerit concurrere de facto, nisi volens determinatè ad hoc, & non ad aliud concurrere.

6. Respondeo negando minorem, & dico non esse implicantiam in eo quòd Deus videat determinationem creaturæ, ante determinationem sui decreti de dando hoc numero concursu. Quod ut stabiliatur.

7. Adverte in omni causa efficiente esse habitudinem ad effectum, priorem origine ipso effectu, ita ut talis habitudo & modus se habendi sit id per quod formaliter causa influit in effectum: & præterea habitudinem istam esse indistinctam ab ipsa causa, & in causa libera, positis omnibus ad agendum prærequisitis, posse hanc habitudinem esse, vel non esse dependenter ab ipsa: quæ omnia singillatim probantur. Ac primò quidem quòd detur in causa efficiente habitudo prior origine ipso effectu, probatur, quia ut sit in termino relatio dependentiæ, quæ est actio passivè sumpta, oportet dari correlationem ejus in causa à qua terminus ille procedit, quia fieri non potest ut sit in uno extremo

relatio realis, quin sit quoque in alio relatio reciproca, eaque realis, si illud est ens positivum, actu existens. Quod si relationi dependentiæ, seu actioni passivè sumptæ, quæ est in termino, correspondet in agente relatio, eaque realis, illa omnino est actio activè sumpta, seu causalitas ipsius agentis in terminum quæ est forma denominans ipsum agens. Certè actio passivè sumpta supponit actionem activè sumptam; & per se implicat esse modum se habendi passivè, seu recipiendi existentiam quin sit prius in causa modus se habendi activè, & communicatio illius existentia, per quam illa se habeat ut principium suam fecunditatem exercens. Et licet ex illis duobus se habendi modis, unus non possit esse sine alio, id non impedit prioritatem originis, seu emanationis inter unum & alium, quia verè modus se habendi passivè consequitur modum se habendi activè. Sic generatio activè sumpta, est prior generatione passivè sumpta, quam connotat, & prius est aliquo modo Deum esse creantem, quam Angelum esse creatum.

8. Jam quod relatio illa causæ ad effectum sit indistincta ab ipsa causa efficiente, probatur, tum quia universim relatio non distinguitur à suo fundamento, seu subjecto proximo: tum quia universaliùs
adhuc

adhuc loquendo, abstractum metaphysicum à suo concreto non distinguitur. Atqui causa efficiens est subjectum primum, & fundamentum prædictæ relationis ad effectum: Itemque agens est concretum cujus abstractum est actio. Itaque actio non est aliquid distinctum ab ipsa causa efficiente.

9. Denique quòd in causa libera talis relatio ita ipsi insit, ut potuerit non inesse, ipsâ contrario modo se habente, probatur, quia hoc ipso quòd causa est libera ad aliquem effectum, & potest illum non producere, libera est ad causalitatem suam in illam, & potest non habere talem causalitatis habitudinem. Alioqui contingeret esse causalitatem, & non esse effectum, quod implicat. Hinc in creatura libera est aliquid in quo habet aliqualem similitudinem cum eo quod summè mirabile est in libertate Dei: Nam quemadmodum in actu divinæ voluntatis est ista virtus, ut ipse se convertat; ac terminetur ad hoc, aut ad oppositum objectum: ita voluntas creata habet hanc vim quod ipsa seipsam determinet, ut sic causa hujus potius actus, quàm oppositi. Et hic veluti nutus, hæc determinatio, hæc causalitas dicens ipsam causam in recto, & effectum in obliquo, est id quod est formaliter primum in exercitio libertatis ejus,

10. Adverte secundò, cum duæ sunt causæ efficientes alicujus effectus, quarum una non potest illum producere sine alia, fieri posse ut unius, etsi altera indigentis habitudo, & causalitas in illum effectum, sit aliquo modo prior habitudine & causalitate alterius, sine cujus adjunctione non potest haberi ille effectus. Sic cum voluntas nostra, & habitus supernaturalis charitatis producant actum supernaturalem amoris, etsi voluntas non possit producere talem actum sine habitu, tamen causalitas ejus est aliquo modo prior causalitate habitus, in quantum ideo agit habitus, quia voluntas ipsa se determinat ad agendum: unde ille consequenter determinatur ad coagendum, non è contra. Itaque causalitas voluntatis est prior illa causalitate habitus, non obstante necessitate associationis: est inquam, prior illativè, ita ut ipsa inferat aliam, non autem exclusivè, quasi esse possit sine illa, sive est prior prioritate ordinis, ac determinationis, sed non prioritate absoluta à simultate.

11. Adverte tertiò: si causa quæ determinatur, sit summè intelligens, nihil esse cur determinatio ejus non possit fieri, visa determinatione alterius etiam ipsa indigentis, modò ipsa sit illi alteri indigenti indefectibiliter adjuncta, & illius de-

terminationem necessariò, factâ aliquâ hypothefi, cujufmodi est hypothefis prædicti decreti difjunctivi, fecutura, feu potiùs comitatura. Quod probatur, quia quod ab una caufa imperfecta fieri poteft fine cognitione, non implicat fieri à caufa summè intelligente cum cognitione, & per ipfam mediantem cognitionem ac voluntatem. Neque enim modus ille agendi per mentem & voluntatem ullo modo retardabit illud quod cum tali mediatione confequetur, modò cognitio & voluntas fint tantùm posteriores ratione, & præcisè fecundùm ordinem naturæ medient, ut contingit in Deo. Atqui caufa imperfecta neque intelligens poteft determinari per determinationem alterius fine ipfa non potentis agere, & neceffitas associationis non tollit fufficientem prioritatem ad illam determinationem caufæ, quæ debet illi adjungì, ut jam oftensum eft in determinatione habitûs charitatis per voluntatem. Ergo caufa summè intelligens, & non determinabilis, nifi per cognitionem & voluntatem fuam, poterit, mediante cognitione ac voluntate, determinari per aliam non potentem fine ipfa agere: & quod in priori cafu incognitum determinat caufam imperfectam, neque intelligentem, hoc cognitum iftam perfectam & summè intelligentem determinabit. Unde quia in illo

priori casu , id quod determinat causam non intelligentem , est determinatio ejus quæ non potest sine ipsa agere : pari modo id quod determinabit summè intelligentem , erit causæ ipsa indigentis determinatio item , sed cognita.

12. Confirmatur primò , quia si habitus charitatis esset ens intelligens , sicuti est ens immateriale , & non posset agere , nisi ex cognitione alicujus , unde determinaretur , putà ex cognitione determinationis quæ esset in causa cui adjungitur , tam bene sequeretur nutum & determinationem illius ex tali cognitione , quàm sequitur illam necessariò ex naturà rei : & mediatio cognitionis ac voluntatis quæ deberent esse simul tempore , nullo modo retardaret subordinationem ejus , neque tolleret simultatem associationis quæ est inter illum habitum , & voluntatem ad comproductionem amoris supernaturalis. Quare ergo implicabit causam summè intelligentem determinari per cognitam determinationem causæ non potentis sine ipsa agere? Cui causæ tam benè ipsa adest præsupposito suo decreto disjunctivo , quàm adest habitus in illa ipsa causa inexistens. Certè non implicat Deum facere intelligenter quod habitus charitatis facit sine cognitione : hoc autem posito determinabitur prædicto modo. Ergo in tali determinationis modo nulla est implicantiæ.

13. Confirmatur secundò, quia si dum homo pondus in aqua existens tollit, & sic sublatum nunc in istam, nunc in illam partem movet, determinando nunc istam, nunc illam aquæ partem ad causandam simul sublevationem, & juvandam motionem, Deus adimeret aquæ suam impenetrabilitatem, sine qua non posset ad istos effectus quidquam conferre: & juberet Angelo ut idem quo-ad eisdem effectus sua virtute, atque actione præstaret, quod priùs aqua præstabat: tam bene sequeretur ille, mediante cognitione, & volitione sua, determinationem hominis idem ex parte sua agentis, quam aqua illam sequebatur. Multò ergo magis Deus, cui quidquid est, evidens est, potest sequi intelligendo & volendo, determinationem causæ, cui per decretum suum disjunctivum ita se quodammodo obstrinxit, ut ei, posito tali decreto, non sit defuturus: unde ipsa est potens ad sui determinationem, non obstante necessitate associationis, quam debet habere cum Deo, quo summè indiget. Certè id quod aliquando prius est aliquo, priùs eo cognoscibile est ab intellectu, ad cujus cognitionem nihil requiritur, nisi veritas objecti. Unde quia determinatio causæ liberæ prior est suo modo determinatione causæ associatæ, etsi determinatio causæ liberæ non possit esse sine

sequenti determinatione causæ associatæ, Deus potest illam determinationem prius cognoscere, quàm istam: ac proinde si ipse est causa associata, cum sit agens per intellectum ac voluntatem, poterit suam determinationem, visâ illâ, ponere. Non enim implicat, si ex duobus unum est prius, aliud posterius, posterius poni, mediante visione prioris, modò, ut dixi, cognitio & voluntas solo naturæ ordine medient, & quæ in tali ordine sunt priora, non habeant prioritatem ordinis, ita ut unum quod sine alio esse non potest, sit ratio cur illud sit. Et ex his manet probata falsitas illius minoris, qua dicebatur implicare quòd Deus, visâ determinatione creaturæ, & mediante tali visione, seipsum determinaret ad coagendum cum illa.

14. Ad primam rationem, qua illa minor probata est. Respondeo Dei concursus non debere esse ad determinationem creaturæ, quasi haberet influxum in illam distinctum ab ipsa Dei cooperatione in terminum; sed debere ferri in ipsum terminum, & effectum quem spectat illa determinatio, ita ut creaturâ se determinante ad producendum talem effectum, Deus coagat, & comproducat illum ipsum effectum. Quod si Deus formaliter concurreret ad determinationem creaturæ, efficiendo ipsam, actio Dei determinationem illam

præcederet prioritate originis, eamque necessariò necessitate physica inferret, ut quævis causalitas physica suum terminum. Unde tolleretur libertas creaturæ quia illa causa non est libera, cujus determinationem aliquid præcedit quod ipsam physicè infert. Et hinc patet determinationem creaturæ formaliter sumptam non aliter esse immediatè à Deo, quàm per hoc quòd ipsa non possit esse absque eo quòd adjungatur Dei cooperatio in terminum utrique communem. Unde omnis actio creaturæ est tantùm comproductio exigens comproductionem, sine qua ipsa esse non possit. Et hinc etiam ulteriùs constat non omnem rationem entis, seu formalitatem debere esse à Deo immediatè concurrente ad ipsam, siquidem determinatio causæ liberæ creatæ non sic debet esse ab illo: sed tantùm omne ens realiter debere esse immediatè à Deo: & si quæ ratio non petatur formaliter ab eo, tamen debere pendere ab eo, hoc sensu quòd non possit esse sine illo coagente cum causa, à qua ipsa est formaliter.

15. Et sic omnia ita pendent à Deo, ut non magis pendere possint, nisi solus ipse omnia agat. Neque enim sive in causis necessariis, sive in liberis actio creaturæ reduplicativè sumpta, prout est actio creaturæ, potest esse formaliter à Deo, talem actionem immediatè producente. Nam non

datur actio ad actionem ut sic : sed in causis indivisibiliter operantibus, uniuscujusque operatio est ad communem terminum. Et sic cum Sol & Deus producant lumen, causalitas solis in lumen prout est causalitas solis, non est à causalitate Dei, quasi ipsa sit terminus ejus, sed tantum ipsa non est, nisi inadæquata productio luminis, exigens aliam comproductionem, sine qua sol non possit agere. Quod si in causis necessariis actio causæ dependentis, prout ejus actio est, non est effectivè à causa superiore, sed tantum per indigentiam associationis, sine qua ipsa causa dependens non possit agere : multò magis id est verum de actione causæ liberæ, ad quam formalissimè ex ipsa ratione causæ liberæ, necesse est ut sit ab ipsa determinante, Deo tantum & conservante ipsam causam liberam cum omnibus ad ejus libertatem prærequisitis, & ad terminum ab eo productum effectivè cooperante.

16. Ad secundam rationem, nego determinationem causæ identificari effectui ejus ; nam potius talis determinatio ipsi causæ identificatur, quia identificatur actioni activè sumptæ, & hæc ipsi causæ, sicut quævis relatio suo fundamento, & abstractum concreto. Confirmatur quia determinatio causæ consistit in eo per quod primum transit ipsa à statu indeterminationis, aut inactionis ad talem producendum effectum.

fectum. Hoc autem est prædicta habitudo, seu actio activè sumpta, ipsi suo principio, ac fundamento identificata: Ergo determinatio causæ ipsi causæ identificatur. Hinc Deus v. d. ns determinationem creaturæ, videt tantum aliquid per quod non quid in solum, & seorsim sumptum, sed junctum cum sua, quam ex hypothese decreti disjunctivi necessariò adjungit, determinatione, consequenter existit terminus. Et hoc ita videt, quia ita est: & prius videt illam determinationem, quam suam, aut utriusque terminum, quia verè est prior. Unde non est hîc opus scientia conditionata, sed solum scientia visionis.

17. Dices: quando Deus videt determinationem creaturæ, jam est terminus, posterius quidem ordine originis, sed ita ut quovis sublato alio, immediatè consequatur. Quia Ergo videt determinationem creaturæ, antequam suam videat, erit terminus antequam Deus se determinet ad concurrendum, ac proinde antequam concurrat. Antecedens probatur primò, quia determinatio illa creaturæ est actio ejus activè sumpta. Atqui actionem activè sumptam immediatè, quovis sublato alio, consequitur terminus: Ergo determinationem creaturæ immediatè consequitur terminus, qui proinde v. bilis erit, sublato quovis alio, etiamque eâ quam dictum est

sequi, determinatione Dei: probatur secundò, quia relativa sunt simul naturâ & cognitione, ita ut licet fortè sit prioritas & posterioritas ordinis inter illa, verum tamen sit quando unum est, aliud esse, etsi ab illo consequens, & dum unum cognoscitur, aliud simul cognosci.

18. Respondeo cum Deus videt determinationem creaturæ, eodem instanti reali terminum existere, & videri solo causalitatis, & originis ordine posteriorem, sed nego illud quod additur, quovis sublato alio terminum in illo instanti existere. Cujus rei ratio est, quia determinatio, & actio creaturæ non est productio adæquata termini, ut jam dictum est supra, sed tantum est comproductio, quæ non tantum terminum, seu effectum connotat; sed aliam etiam comproductionem, & respicit effectum ut ab illa etiam sibi superaddita dependentem. Sic determinatio voluntatis nostræ ad qualitatem supernaturalem amoris divini, connotat illam qualitatem ut existentem, etiam mediante determinatione alterius principii, seu habitûs, quia determinatio illa & actio voluntatis est tantum inadæquata productio illius qualitatis: seu est comproductio exigens, & inferens societatem alterius comproductionis ad existentiam termini quem cum illa ponit. Et hinc patet solutio

ad primam probationem antecedentis, quia terminus non consequitur omnino immediatè, nisi actionem adæquatè sumptam: sumptam autem inadæquatè, & præcisam ab addita comproductione nondum consequitur: quia inadæquata productio non est tota productio. Ad secundam probationem, dico inter relativa, aliqua esse quæ non connotant, neque inferunt se ipsis solis, seclusa omni alterius mediatione terminum suum; sed tantum inferunt illam quomodocunque eodem instanti reali cum posterioritate rationis, atque originis existentem. Sic in dato sæpius exemplo, determinatio voluntatis ad amorem supernaturalem non infert illum amorem sine cooperatione habitûs existentem: sed quia ipsa est comproductio determinans aliam comproductionem, connotat illum amorem, ut consequentem etiam ab illa quam infert comproductione. Et cum quis assentitur uni veritati ob duas rationes, quarum prima non obtineret assensum, nisi altera superveniret, causalitas primæ rationis in illum assensum, non connotat eum, secluso quovis alio, consequentem ex tali ratione, sed tantum ut sequentem ex ipsa juncta cum alia, ita ut non sit assensus, nisi prævia utraque causalitate inadæquata. Dico autem hic idem evenire

in determinatione creaturæ, quæ effectum connotat quidem eodem instanti reali, quo ipsa est, existentem; sed non eodem instanti rationis, quo ipsa spectatur præcisivè ab ea quam infert, Dei determinatione, ac cooperatione, quia nimirum ipsa non est adæquata causalitas in terminum, sed inadæquata tendentia per aliam complebilis, & implicans sine illa. Terminus autem non consequitur nisi adæquatam sui productionem.

19. Instabis: si determinatio creaturæ prius videtur, quam sit determinatio Dei, inter ea quorum unum est tantum origine prius, quam aliud, aliqua intercedent naturâ posteriora quam sit illud prius. Nam cognitio, qua Deus videbit determinationem creaturæ, erit naturâ posterior illa determinatione: deinde decretum Dei de dando tali concursu erit adhuc naturâ posterius illa cognitione: & ipsa determinatio divinæ omnipotentiae eodem modo erit posterior decreto. Videtur autem implicare quod inter ea quorum unum est tantum origine prius quam aliud, alia intercedant talem habentia naturæ posterioritatem.

Respondeo negando sequelam & dico illas prioritates, ac posterioritates quæ assignantur, non esse strictè loquendo naturæ prioritates ac posterioritates, sed

tantum esse rationis ratiocinatae, at æquivalere quo-ad rem præsentem prioritati ac posterioritati originis. Ratio est, quia ad prioritatem naturæ, requiritur, ut ab uno non valeat subsistendi consequentia ad aliud, quomodo animal est prius homine, & sol lumine à se producto, cum fieri possit divinitus ut sol existat, & non sit illa productio luminis. Item objecta sunt illo modo priora, quam cognitio creata, quæ potest illis existentibus non esse. At verò respectu Dei, cum ab objecto ad cognitionem ejus, & à cognitione de qua hîc agitur, qua nimirum videtur determinatio creaturæ, ad volitionem ad quam Deus, præsupposito suo decreto disjunctivo, & posita determinatione creaturæ obligatur, valeat existendi consequentia, & fieri non possit ut illam determinationem creaturæ non sequatur Dei cognitio, qua illam videt, & talem cognitionem voluntas dandi talem concursum, & ejusmodi voluntatem ipsa omnipotentia determinatio, & talis concursus, non est in istis prioritas naturæ strictè sumpta. Quod confirmatur, quia alioquin in Trinitate, inter Patrem, qui est tantum origine prior Filio, & ipsum Filium intercederet aliquid naturæ posterius Patri, & eodem modo prius Filio: Nam Pater jam existens, antequam producat Filium, cognoscit seip-

sum, & ex illa cognitione in comprehensione sui inclusa, producit Filium. Effet autem illa cognitio naturâ posterior Patri, siquidem Pater est objectum quod illa repræsentat ut existens: & esset natura prior Filio, siquidem in ejus principio continetur, ut aliquid ex quo ipse procedit Filius. Quia igitur incongruum est dicere inter Patrem & Filium, in quibus non est ordo nisi originis, intercedere aliquid cum tali naturæ ordine: non est verum universaliter objectum cognitionis, esse naturâ prius ipsa cognitione; sed tantum id erit verum de objecto comparato cum cognitione creata, ad quam non valet ab ipso consequentia. Et similiter non omnis cognitio erit naturâ prior volitione quæ ipsam sequitur; sed tantum illa cognitio, qua existente, potest non esse talis volitio. Unde hîc neque cognitio quam habet Deus de determinatione creaturæ, erit naturâ posterior ipsa determinatione, cum positam determinationem necessariò sequatur illa cognitio: neque decretum de dando tali concursu erit naturâ posterius illa cognitione, aut determinatio omnipotentia illo decreto, cum hæc similiter deesse non possint. Quod si aliquando prioritas & posterioritas quæ est in talibus, appellatur naturæ, hoc fit per quamdam analogiam ad eam ubi reperitur non sub-

QUÆST. VI. *De Voluntate Dei.* 391
sistendi consequentia in uno termino, &
subsistendi consequentia in alio.

20. Collige ex jam dato exemplo nihil
implicare, si ex duobus quorum unum sit
tantum posterius origine quam aliud, po-
sterius consequatur ex visione prioris, &
illa mediante existat: siquidem Filius qui
est tantum origine posterior Patri, pro-
cedit ex cognitione ipsius paternitatis.
Unde non est implicantia in eo, quod de-
terminatione Dei quæ est tantum posterior
origine quam determinatio creatæ volun-
tatis, ponatur ex cognitione qua Deus
videt determinationem creaturæ, siqui-
dem est utrobique idem intellectus.

SECTIO UNDECIMA.

Examinantur sententia prædictis contraria.

1. **Q**Uæres hic primò quid sentiendum
sit de decreto quod Vasquez 1. p.
q. 99. cap. 7. num. 43. ponit unicum
quidem absolutum, & determinatum; sed
cui præluceat scientia media ostendens de-
terminationem causæ creatæ in statu con-
ditionato prævisam. Deus enim, inquit,
per scientiam mediam quæ antecedit om-
nem prædefinitionem, videt quid factura
sit creatura, si in talibus existat circum-
stantiis & ad quid se se determinatura. Po-

fitis igitur talibus circumstantiis, ipse, prælucente illâ eâdem scientiâ, decernit concurrere cum creatura ad illum ipsum actum, quem in statu conditionato vidit ab illa oriri. Et licet hoc decretum necessariam habeat connexionem cum tali effectu, non tamen, inquit, necessitatem inducit nisi consequentem, quia supponit determinationem creaturæ conditionatè futuram.

2. Respondeo decretum hujusmodi quod ante determinationem creaturæ actu positam in statu absoluto, sit determinatum ad unum, & absolutum, itemque ante quod non præcesserit disjunctivum supra-dictum, non posse admitti, quia tolleret libertatem: siquidem per hujusmodi decretum maneret creatura impotens ad actum oppositum illi, ad quem producendum illud Dei decretum determinaretur. Sit enim aliquis qui peccet omittendo actum amoris divini, & ponendo odium eo instanti quo tenetur amare, urgente præcepto charitatis. De illo sic dico: deest illi id sine quo est illi impossibilis amor, & adest id cum quo non potest poni amor; Ergo ille non est indifferens ad amorem. Prima pars antecedentis probatur, quia deest illi præparatio concursûs ad amorem quæ præparatio in hac sententia fieri non potest, nisi per decretum absolutum de concursu determi-

nato ad amorem. Secunda pars probatur, quia non potest componi amor cum principio determinante ad odium, cujusmodi erit decretum absolutum, & efficax de concurrente ad odium: Ergo erit ille homo impotens ad amorem, nec poterit ab odio abstinere. Et talis impotentia ac necessitas proveniet ex principio antecedente omnem ejus determinationem in statu absoluto. Ad rationem Vasquis, & prævisionem illam quæ præcesserit in statu conditionato, nego Deum posse videre quid creatura, si in talibus circumstantiis poneretur, faceret, aut ad quid se determinaret, nisi prius creatura in illo statu conditionato videatur habere omnia quæ ad talem actionem, ac determinationem sunt necessaria: Alioqui videret impossibile per modum entis. Atqui inter ea quæ sunt ad talem actionem ac determinationem necessaria, locum tenet in-primis concursus Dei in actu primo indifferens, ac proinde & decretum de dando tali concursu, quod non potest esse nisi disjunctivum, ne sit determinatum ad unum: Ergo ista omnia, & hoc in-primis decretum cognosci debuerit in statu conditionato, ut aliquid prævium, & necessarium ad actionem liberam creaturæ. Unde in statu absoluto, ut sit talis actio ac determinatio, debet absolutè præcedere hoc

decretum. Rem sic magis declaro ; cum Deus hoc videt , si Petrus tali vocatione vocaretur , & illi non deesset meus concursus , liberè consentiret : conditio illa de concursu sic debet intelligi , si non deesset illi meus concursus in actu primo indifferens , & paratus ad utrumque , quem illi per decretum, absolutum quidem de concursu , sed disjunctivum de specie concursus offerrem. Nisi enim sic intelligatur , falsum erit istud , liberè consentiret : quia non posset liberè consentire , non habens principia omnia indifferentia ad consensum unde non posset Deus illum liberè consensurum per scientiam mediam videre. Ratio est , quia sicut res in statu absoluto non potest actu existere sine omnibus principiis ad ipsam prærequisitis actu positis , ita nec in statu conditionato potest esse sine iis conditionatè præsuppositis, ac proinde nec cognosci sine tali præsuppositione. Alioqui cognosceretur aliquid non futurum conditionatè , sed chymæricum.

3. Dicunt aliqui recentiores : videt Deus per scientiam mediam quid liberè factura , & ad quid se se determinatura esset creata libertas si posset sine illius concursu agere , & istam determinationem in tali hypothese , etsi impossibili , futuram vocant nutum , & inclinationem & exi-

gentiam creaturæ. Positâ igitur tali scientiâ, decernit Deus absolutè dare concursum ad illum præcisè actum, quem vidit tali nutu determinatum, & sic est libera creatura, quia decretum Dei de unico & determinato concursu, sequitur prævisum ejus nutum & exigentiam.

4. Respondeo primò, scientiam illam in Deo implicare, quia implicat objectum ejus, sicut implicat esse aliquem modum, quo volatura esset avis si careret alis, & in homine talem determinatè futuram cognitionem, si careret intellectu. Tam enim potentiam agendi in creatura destruit negatio concursus divini, quàm potentiam volandi carentia alarum, & futuritionem talis cognitionis, carentia intellectûs. Sicut igitur non videt Deus quo modo, vel quam in partem volaret avis, si alis ad volandum necessariis careret; nec quid cogitaret homo intellectu destitutus: sicut, inquam, hæc non videt nisi ut objecta implicantia, in quibus ejusdem rei involuitur esse & non esse, ita similiter non videt quid faceret creatura, si sine ipso agere posset; non videt, inquam, hoc nisi ut objectum contradictionem includens, judicando in tali hypothese actionem ac determinationem fore, & non fore; quod non est habere scientiam de determinata futuritione.

5. Respondeo secundò, dato, non concesso, quòd Deus habeat talem scientiam, malè acturum ipsum cum creatura libera, si consequenter ad id quod ipsa faceret in hypothesis aliqua impossibili, determinaret nunc actu eam ad opus malum, ex quo sequitur ejus damnatio. Determinabit autem eam actu ad tale opus, si decernit absolutè dare illi concursum ad illam solam actionem, nullum offerendo in oppositum; itaque de facto malè cum illa aget. Idque ulteriùs confirmatur, quia si ponamus esse hominem qui in primo usu suæ rationis obligetur à Deo ad actum amoris, & tamen voluntariè omittet hunc actum, statimque post volitam omissionem damnetur; de illo homine sic dico. Damnabitur ille homo ob omissum actum, ad quem in illa sententia nullam habuerit potestatem in statu absoluto; quia defuerit illi præparatio, & determinatio concursus ad amorem per decretum Dei absolutum; quæ præparatio, & determinatio in hac sententia necessaria est ad amorem: & constituit potestatem proximam ad talem actum: defuerit, inquam, illi concursus ejusmodi in actu primo, absque ulla culpa ipsius, quam in statu absoluto commiserit, quia erit ille primus ejus actus liber in statu absoluto. Quòd si Deus illum vidit in statu conditionato peccantem, viderit

id in hypothefi impossibili, in qua ipsa non habuerit potestatem amandi, quia ne quidem in illo statu inter alias conditiones requisitas ad potestatem amandi præsuppositum fuerit conditionatè decretum de dando illi concursu ad amorem; Ergo minùs æquè cum illo aget Deus. Quod cum sequatur ex eo quòd decretum de concurrendo sit unicum, absolutum, & determinatum ad unum, negandum est tale esse concurrendi decretum.

6. Quæres secundò, an rectè ad conciliandam cum Dei concursu libertatem creaturæ, admittatur decretum Dei conditionatum de concurrendo ad amorem, si creatura ad amorem se determinet; ad odium verò, si eò creatura se convertat habens paratam ad opposita omnipotentiam Dei. Quam sententiam videtur amplexus Suarez in *Metaph. disp. 22. sect. 4. num. 14.* dum dicit Deum non velle simpliciter illum actum, ad quem causa secunda libera se determinat; sed quasi sub intellecta hac conditione, si voluntas creata ad eum se determinet. Eandem sententiam tenent plurimi apud Suarem loco jam dicto.

7. Respondeo minùs rectè per tale & solum decretum conditionatum explicari voluntatem, ex qua Deus concurrat. Ac primò quidem per hoc solum non rectè

explicatur illa voluntas ; Nam ex dictis impossibile est ut Deus concurrat determinatè hoc numero concursu, nisi velit absolute, & determinatè hunc numero concursum, sine ulla suspensione, quæ adimeret efficaciam voluntati ad determinationem ipsius omnipotentia. Nec dici potest decretum conditionatum, posita determinatione creaturae, transire in absolutum sine formali nova volitione virtualiter ab ipso decreto conditionato distincta, eo quod in hominibus contingat volitionem conditionatam sine novo formali actu transire in absolutam, puta si quis dederit aliquid alteri sub conditione de futuro, quâ positâ voluntas illa prior, ipso licet dormiente, jam censetur absoluta. Id, inquam, in re praesenti dici non potest ; primò quia hic est defectus hominis. Quod posita conditione, non velit formaliter & expressè id quod vi prioris volitionis censetur moraliter velle, in quantum illa prior voluntas sufficit ad causandum hunc moralem effectum, nempe translationem dominii. Deinde ubi quaestio est de volitione faciendi aliquid physicum posita certa conditione, non sufficit ad actionem voluntas prior conditionata sine nova formali. Unde si quis dixisset, dabo centum nummos, vel ibo Romam, si tale quid eveniat ; numquam dabit, neque

ibit sine nova formali voluntate. Itaque hic ubi agitur de ponendo concursu, si creatura se determinet, numquam ponetur concursus sine alia formali volitione virtualiter distincta ab illa priori conditionata. Et hic est maximus in prædicta sententia defectus, quod non ponat in Dei voluntate determinationem quæ absolute necessaria est ad hunc concursum, & solum assignet decretum quod ad summum valere potest ad præparationem concursus indifferentis, cuiusmodi est conditionatum.

8. Sed nec illa præparatio concursus indifferentis ita bene explicatur per decretum conditionatum, sicut per disjunctivum. Nam oportet ostendere quomodo creatura reddatur potens ad opposita, & ad illa omnipotentiam habeat determinabilem, ita ut se & Deum simul determinare possit. Illa autem potestas supponitur quidem, dum ponitur decretum Dei conditionatum de concurrente, si creatura se determinet; sed non explicatur modus quo illa potestas habetur. Explicatur autem ille modus per decretum disjunctivum; Ergo illud præstat conditionato. Confirmatur, quia decretum quo Deus obtulit Davidi optionem unius ex tribus flagellis, melius dicitur disjunctivum quam conditionatum, quod deberet sta-

tus triplex sic resolvi ; offero tibi bellum si volueris ; item famem , si eam mavis , nec non pestem , si eam item mavis ; Et per hæc tria non explicatur necessitas eligendi unius ex tribus , sicut per disjunctivum. Par autem est ratio de concursu quem absolute dare statuit Deus , nondum videns ullam ex differentiis ejus , dum determinationem causæ secundæ relinquit. Igitur præparatio concursûs quæ antecedit determinationem creaturæ , & decretum Dei absolutum , dicenda est fieri potius per decretum disjunctivum , quàm per conditionatum , quamquam & hoc non omnino excluditur , cum involvatur in disjunctivo. Nam dum Deus dicit , volo concurrere vel ad hunc amorem , vel ad hoc odium , &c. Sub intelligitur ad amorem quidem , si creatura se determinet ad amandum ; ad odium verò , si ad illud se determinet. Quare hoc solum hic contendendo totale decretum , quo creaturæ offertur concursus indifferens , esse formaliter disjunctivum , nec bene explicari præparationem illam concursûs , nisi per disjunctionem eorum quæ sub genere absolute volito , non absolute , sed conditionate sunt volita.

9. Reffellunt aliter alii , sed invalidè , prædictam opinionem , tresque potissimum in eam rationes afferunt. Prima est , quia
decretum

decretum quo statuit Deus concurrere, debet esse liberum. Atqui illud conditionatum non est liberum Deo, nempe, concurrere si creatura me determinet, quia Deus talis decreti oppositum velle non potest, cum sit impossibile Deum non concurrere, si creatura determinet ipsum. Respondetur decretum illud fore liberum non proximè in se, sine ordine ad aliud antecedens, sed per ordinem ad illud quod subintelligi debet. Supponitur enim id quod expressè per decretum disjunctivum explicatur, nempe Deum velle concurrere cum voluntate libera juxta conditionem ejus, seu offerre ei concursum in actu primo indifferentem. Quo posito, non est absurdum ipsum consequenter velle necessariò concurrere ad hunc certum effectum, si à creatura determinetur ad eum producendum; nec propterea definit absolutè loquendo, concurrere liberè, quia ad hoc satis est eum esse indifferentem ad aliquid prius, ex cujus hypothese id necessariò sequitur, nempe ad priorem illam voluntatem concurrendi cum creatura libera juxta conditionem ejus. Sic cum Deus promisit præmium sub conditione meritum; etsi positis meritis necessariò velit dare præmium, tamen absolutè loquendo, liberè dat illud; quia id ex quo sequitur necessitas dandi, in priori naturæ est ab

eo liberè volitum. Et sufficit ad hoc ut aliquid sit agenti liberum, quòd sive proximè, sive remotè ab eo pendeat, & absolutè ac simpliciter sit in ejus potestate: quod hîc reperitur, cum absolutè loquendo posset Deus nolle concurrere cum creaturis.

10. Secunda ratio est, quia qui vult agere aliquid, posita conditione, debet videre conditionem positam priùs quam agit, ut tunc velit absolutè quod priùs voluit conditionatè. Atqui illa conditio quæ in hoc decreto includitur, nempe, si creatura Deum determinet, non potest impleri, antequam Deus concurrere velit, & de facto concurrat: quia sic actio creaturæ esset prior Dei concursu: Ergo Deus non potest habere voluntatem concurrendi sub illa conditione. Respondeo positis prædictis de ordine determinationum, sufficere, ut determinatio creaturæ, quâ visâ, ponetur determinatio Dei, sit prior ratione quàm & Dei determinatio, & effectus ab utraque procedens: itemque sufficere si Deus velit agere intelligenter quod habitus charitatis, qui per voluntatem determinatur ad producendum actum supernaturalem, agit sine cognitione consequenter ad determinationem ipsius voluntatis. Hoc enim posito, suam illam voluntatem sic exprimet, sicut

QUÆST. VI. *De Voluntate Dei.* 403
exprimeret habitus, si ipse esset ens intel-
ligens, concurrat si voluntas me deter-
minet.

11. Tertia ratio est, quia per illud de-
cretum aliquid ponitur sub conditione
sui ipsius, nempe ponitur concursus
sub conditione determinationis à qua
non distinguitur. Nihil autem ponitur sub
conditione sui. Respondeo ex dictis, id
quod ponitur sub conditione determina-
tionis quæ est propria creaturæ, esse primò
determinationem Dei quæ ab illa distin-
guitur, siquidem utraque suo principio
identificatur: ut pote actio ejus activè
sumpta, & abstractum metaphysicum
agentis, sola ratione ab eo differens.
Deinque consequenter ad utramque illam
determinationem, seu actionem activè
sumptam, existit terminus utriusque, seu
effectus, qui prout connotat Deum, est
influxus ejus passivè sumptus, & prout
connotat agens creatum, est productio
ejus passivè sumpta. Sic nihil ponitur sub
conditione sui, sed tantum sub conditio-
ne alicujus à se distincti.

12. Quæres tertio, quid sentiendum
sit de modo, quo Oviæus Controv. phys.
10. punct. 4. §. 4. explicat voluntatem
Dei circa dandum causæ liberæ concur-
sum. Dicit enim ut homo sit ad amorem
liber libertate contradictionis, Deum ha-

bere hoc decretum. Volo quatenus est ex me, ut sit actus amoris, ita tamen illum decerno ut voluntas possit ab illo cessare: quia licet ex me vellem talem actum, non tamen illum efficaciter decerno independentem à voluntate, ne libertatem illius lædam. Similiter dicit, ut voluntas sit indifferens libertate contradictionis ad odium, Deum sic decernere: volo ut quatenus est ex me, non deficiat actus odii, ut jura voluntatis non infringam: quem actum vellem ego non produci à voluntate, quia malus est, & inhonestus. Hinc infert nullum dari decretum indifferens ad amorem, vel odium, ut sit voluntas libera libertate contrarietatis, quia libertas contrarietatis, nihil aliud dicit quam libertatem ad duos actus contrarios. Cum per duo prædicta decreta voluntas sit libera libertate contradictionis ad quemlibet ex illis actibus contrariis, hoc ipso est libera libertate contrarietatis. Addit prædicta duo decreta non posse omitti, ut ponatur unum indifferens illorum loco, æquivalens ipsis, eo quòd amor & odium sint duo objecta, quodlibet ex se sufficiens terminare actum divinæ voluntatis, & Deus diverso modo, saltem inadæquato, feratur in illa, cum in actum amoris ex se, quantum potest, propendeat efficaciter illum decreturus, nisi libertas esset vo-

luntati servanda; in actum verò odii consentiat tantum ob morale debitum causæ primæ & universalis, recusaturus concursum ad illum, nisi munus talis causæ incumberet.

13. Respondeo hanc sententiam esse quidem probandam, & in quantum non ponit decretum ullum Dei determinatum ad unum certum concursum antecedenter ad ipsius creatæ libertatis determinationem, & in quantum ponit Deum dispari modo affici erga actum bonum & malum: sed absolutè refellitur, quia impossibile est per decreta de se inefficacia determinari potentiam Dei ad dandum de facto concursum. Atqui unum-quodque ex illis decretis est inefficax de se: tum quia implicat duo opposita decreta, quorum neutrum alteri prævalet absolutè, esse efficacia; tum quia quodvis ex illis ejusmodi est, ut non obstante ipso, possit deesse terminus ejus, seu objectum in quod tendit, & cum ipso potest stare determinatio ad oppositum effectum. Oportet autem volitionem Dei ex qua est hic numero concursus, talem esse ut ipsâ positâ, non possit deesse ejusmodi concursus, & cum ipsa non possit stare determinatio ad oppositum concursum; Ergo decreta illa sunt omnino insufficientia ad ponendum hunc numero concursum. Unde opus est decreto absolu-

to, & efficaci, quale supra est positum, cum aliter non possit fieri determinatio omnipotentiae divinae ad positionem hujus numero concursus.

14. Adde quòd in ipsa praeparatione concursus debet esse decretum determinatum ad concurrendum ut sic, etsi nondum determinatum ad species actuum; siquidem libera voluntas, proposito objecto in quo appareat ratio boni & mali, necessario debet agere, & tantum est indifferens ad agendum hoc vel illo modo. Implicat autem esse actionis genericè sumptae necessitatem sine determinatione ad concursum ut sic. Talis autem determinatio non includitur in illis inefficacibus decretis, at includitur in disjunctivo: itaque illis inefficacibus decretis praestat ad ipsam praeparationem concursus supra dictum disjunctivum.

15. Ad id quod dicit Oviedus, plura esse ibi objecta, quae singula sufficiunt ad terminanda propria, circa se decreta. Respondeo etiam ad decretum disjunctivum plura requiri objecta, eaque inter se opposita, & impossibilia in re, aut saltem quae voluntas nolit simul amplecti: Et praeterea multitudinem volitionum quae circa illa in particulari distinctae sunt, & seorsim considerabiles, non impedire ne omnes simul in unam compositam voli-

tionem coalescant. Sic in decreto illo disjunctivo quo Deus Davidi obtulit aut pestem, aut famem, aut bellum; includuntur istæ distinctæ, & seorsim spectabiles volitiones; volo pœnam peccati tui, idque absolutè; volo unam ex illis tribus; idque etiam absolutè; non adigo ad pestem eligendam; item non ad bellum; item non ad famem. Præterea permitto ut eligas pestem; permitto ut bellum; permitto ut famem. Et simplicium, seu non compositarum volitionum multitudo non impedit unitatem totalis compositæ, ac disjunctivæ, sicut universim multitudo partium non excludit unitatem totius. Et in intellectu multitudo propositionum simplicium, quæ ingrediuntur in compositionem unius totalis compositæ seu disjunctivæ, hypotheticæ, seu causalis, seu exclusivæ, non impedit istarum compositarum unitatem: Objectum igitur decreti disjunctivi rectè erit multiplex, nempe tot species concursus, quot sunt actus ad quos voluntas est in potentia proxima. Quo non obstante potest dici terminum illius decreti esse unicum, nempe concursum ut sic determinabilem ad unum ex illis, seu preparationem concursus liberi determinandi à voluntate creata.

16. Ad id quod dicit Oviedus, divi-

nam voluntatem diversimodè se habere ad actum amoris, & odii; itaque hæc non esse unius decreti objectum. Respondeo non esse de ratione volitionis disjunctivæ, ut æqualiter feratur in disjuncta quæ continentur sub eo in quod absolutè fertur; sed tantùm de ratione illius esse, ut quodlibet illorum disjunctorum quomodocumque permittat. Cui res non obstat quod unum intendat, & aliud patiatur; satis est enim ut non sit ultimò determinativa unius ex illis. Sic Deus volens absolutè gloriam suam in homine, sed quo-admodum disjunctivè, nempe vel per manifestationem bonitatis suæ, præmiando ipsum, & beando; vel per manifestationem suæ justitiæ, puniendo peccata ejus, si in iis moriatur; non æqualiter vult utrumque illud disjunctum; sed unum intendit ut finem particularem sub generali, qui est gloria ejus; & aliud non per se intendit; sed vult tantùm ex hypothesi quòd homo in peccato intereat, ad compensandum scilicet defectum illius finis particularis, quem conditionatè intendebat, & ad obtinendum finem ultimum quem absolutè volebat. Et hinc D. Thomas de veritate q. 6. a. 3. in C. docet providentiam Dei, etsi non possit deficere à generali, & ultimo fine, qui est gloria ipsius Dei extrinseca, posse tamen deficere

QUÆST. VI. *De Voluntate Dei.* 409
cere, ab aliquo fine particulari, qui est gloria bonitatis ejus. Numquam autem gloria justitiæ divinæ vocatur finis Dei, etiam particularis. Quare non est necesse ut quæ disjunctivè sunt volita æqualiter sint volita.

17. Et ex his solutionibus confirmatur modus supra-dictus explicandi concursum divinum per decretum, disjunctivum, antecedens determinationem creaturæ, & per absolutum ac determinatum eam consequens.



QUÆSTIO SEPTIMA.

De Prædestinatione.

SECTIO PRIMA.

*An prædestinatio sit prior prævisione merit-
orum, an posterior.*

1. **C**ertum est prædestinationem completè, & adæquatè sumptam, pro-ut comprehendit etiam præparationem primæ gratiæ, non posse respicere merita tanquam aliquid præsuppositum, à quo dependeat in genere causæ moraliter effectivæ, aut moventis Deum ad talem favorem, quia implicat primam gra-

tiam cadere sub meritum, ut testatur Apostolus Rom. 11. c. 5. *Si autem gratia, inquit, jam non ex operibus: alioqui gratia jam non est gratia.* Cujus rei ratio est ipsa supernaturalitas gratiæ, quam, nequidem merendo, potest attingere ulla vis naturæ, etiam creabilis. Quare de omnibus qui salvati fuerint, semper verum erit illud ejusdem Apostoli, ad Ephesios, c. 2. *Gratiâ salvati estis per fidem. Et hoc non ex vobis. Dei enim donum est: non ex operibus, ne quis glorietur. Ipsius enim sumus factura, creati in Christo Jesu.* Hoc autem posito, quòd prædestinatio non possit habere pro motivo opera nostra, secundum omnia quæ includit, quæritur an quatenus dicit decretum de danda gloria, respiciat de facto, ut respicere potest, merita prævisa, tanquam motivum, & causam meritoriam ipsa priorem; an verò tantum ut media perducentia ad finem antè decretum: ita ut primus actus Dei in processu prædestinationis, sit intentio absoluta dandi talibus hominibus, aut Angelis gloriam: quâ determinatione positâ, sequatur electio mediorum efficacium, per gratiam quæ relinquat liberi arbitrii indifferentiam, & tamen infallibiliter habitura sit effectum, prælucente Dei scientiâ, qua liberè etiam nobis agenda novit.

2. Anteriorem prævisis meritis prædesti-

nationem multi affirmant, in-primisque sanctus Thomas.

3. Posteriores asserunt Alensis, Albertus Magnus, D. Bonaventura, estque plurimorum Theologorum communior sententia, cui adhæreo.

4. Probatur primò ex scriptura, in qua Paul. Rom. 2.6. habetur *Reddet unicuique secundum opera ejus*. Unde constat felicitatem ab operibus ita pendere, ut hæc sint illius mensura, cui ex justitia Dei distributiva, beatitudinis gradus proportionetur. Talis autem mensura est de se prior mensurato, etiam objectivè in mente ejus qui talem justitiam exercet, talemque proportionem ponere statuit. Itaque conformiter ad scripturam, dicendum est, opera esse prius prævisa à Deo quàm sit decreta felicitas.

5. Nec dici potest, etiamsi per se merita sint dicto modo mensura præmii, & sint de se priora, non implicare tamen quominus Deus aliter constituerit, quia potuit destinare cuique ex iis quos selegit, talem determinatè gloriæ gradum, per merita acquirendum, & consequenter talia præcisè merita infallibili modo prævidere. Hoc, inquam, dici non potest, quia sic Deus homines nunquam excitaret ad majorem virtutem, quàm sit ea quam de facto exercent, quia hæc cum

ſua limitatione eſt proportionata illi deſtinato , ut ſupponitur , gradui quem de facto per illam aſſequuntur. Si autem excitaret ad ulteriorem perfectionem, vellet pro majoribus meritis , eam tantum tribuere gloriam, quæ de facto per minora condignè obtinetur: & ſic vellet præmium per merita ſuperari ; quod ejus juſtitix remunerativæ repugnat. Quia igitur hoc admitti non poteſt, quod Deus homines plerumque tepidos, & laxius vi-ventes, non excitet ad meliorem vitam, & peccatores , qui aliquando per ſeram poenitentiam juſtificabuntur, ac ſalvabuntur, non hortetur interea ad reſipiscendum promptius & ad exercenda bona opera, quibus altiorem felicitatis gradum mereantur, falſa eſt illa anterior præviſis operibus determinatio talis felicitatis.

6. Quod ſi dicas Deum prædeſtinäſſe quos ſelegit ad felicitatem ut ſic, non autem ad talem felicitatis gradum, quem reliquerit ex meritis determinandum.

Contra eſt primò , quia ſic aſſertores prædeſtinationis antecedentis præviſa merita, inde etiam anterioritatem illam probant, quòd præſtantiùs putent prædeſinitum eſſe à Deo taliter perfectum cœleſte regnum, talibus conſtans partibus, in individuo cognitis, cum proportionem illarum ad ſe invicem, in numero gradibus, aliis-

que determinationibus, quæ præconcep-
tam, ac præordinatam talis totius pulchri-
tudinem, ac perfectionem explerent.

7. Contra est secundò, quia incon-
gruè & minùs consentaneè diceretur,
id quod in felicitate infimum est, putà id
quod minimus Beatorum possidet, prove-
nire ab illo quem ponunt adversarii, spe-
ciali Dei erga electos amore, ex quo illos
ante prævula merita prædestinavit; emi-
nentiam autem felicitatis, quæ est ali-
quid multò altius ipsa præcisè felicitate,
non procedere ab illo magis favorabili,
magisque charitativo amore. Id enim po-
tius in quod ferri debet specialis benefi-
centia, est id quod est excellentissimum,
& ipsa præeminentiæ prærogativa. Plura
de scriptura, ex quibus arguitur prædesti-
nationis posterioritas ad merita, vide apud
auctores qui de hac controversia agunt.

8. Probatur secundò ex Patribus, in-
ter quos Augustinus quem suum esse ad-
versarii contendunt, ita habet expressè.
lib. 1. ad simplicianum, quæstione 2. *Non
præcedit justificationem electio, sed ele-
ctionem justificatio.* Quæ verba, cum per se
clarissima sint, eorum sensus magis con-
stat ex ratione quam subdit. *Nemo enim
eligitur nisi jam distans ab illo qui rejici-
tur*; ita ut ratio, & causa electionis sit
differentia justificarum à non justificatis:

& sicut hi rejiciuntur, quia non justificati sunt, ita illi eliguntur quia justificati. Et inde, eodem loco, infert Augustinus, non apparere quomodo intelligendum sit id quod in sacris litteris legitur, de parato electis regno à constitutione mundi, nisi dicatur electos esse per præscientiam, qua ipsorum ab impiis differentiam, & merita Deus prænovit. Verba ejus sunt, *Quod dictum est, quia elegit nos Deus ante mundi constitutionem, non video quomodo sit dictum, nisi præscientia.* Quod si Augustinus in aliis locis, prædestinationem soli Dei bonitati videtur adscribere, & omnibus hominum meritis priorem statuere, dicendum est ipsum loqui de prædestinatione ad gratiam, & maximè ad primam: qua de re erat quæstio cum hæreticis, attribuentibus justificationem, & merita omnia, libero arbitrio, & naturæ viribus, cum hæc essent gratiæ, quam Deus dat gratis, & ante omne meritum, attribuenda.

9. Hieronymus ad Hebidiam Epist. 105. quæstione decima, *Vasa misericordie, quæ preparavit in gloriam suam, non irrationabiliter salvat, sed causis præcedentibus.* Ex quo ostenditur, non gentes eligi, sed hominum voluntates. Idem in cap. 1. Malachiæ. *Dilectio Dei, inquit, nascitur ex præscientia futurorum.*

10. Ambrosius in Epistolam ad Romanos, cap. 9. ad illa verba, *Jacob dilexi; Esau autem odio habui*, sic habet. *Hoc quasi præsciens, non quasi personarum acceptor Deus. Nam neminem damnat, antequam peccet. Neminem coronat, antequam vincat. Et paulò post, sciendo quod unusquisque illorum futurus esset, dixit, Jacob dilexi; Esau autem odio habui: unum elegit præscientiâ, alterum sprevit.* Idem explicans illa verba Apostoli, *Quos præscivit, & prædestinavit*, ita ait, *Quorum merita præscivit, eorum præmia prædestinavit.*

11. Sanctus Athanasius eundem locum Apostoli, eodem modo explicat, docetque Deum ideo prædestinasse justos quia præscivit iustos.

Sanctus Chrysostomus, explicans illa verba Mathæi, *Venite benedicti Patris mei, possidete paratam vobis regnam à constitutione mundi*, sic habet. *Nam quia sciebam vos, antequam nati essetis, hujusmodi futuros, hæc vobis à me preparata sunt.* Idem Chrysostomus Homilia 1. in epistolam ad Ephesios si adoptio, inquit, *filiorum ex sola Dei voluntate penderet, salvari omnes oporteret.*

12. Sanctus Ioannes Damascenus, libro contra Manichæos, pagina 172. ita loquitur, *Providens Deus ea quæ nos fa-*

turi sumus, ea scilicet quæ sunt in nostra potestate, ea etiam quæ non sunt in nostra potestate, præmia, & supplicia prædefini- vit. Id est ab omni æternitate definivit. Ex his aliisque plurimis, quæ referunt Auctores, ex sanctis Patribus, constat, communem esse illorum de prædestina- tione prævisa merita consequente, sen- tentiam.

13. Probatur tertio eadem sententia rationibus, quarum prima est, quia re- ctus intentionis ordo postulat, ut prius voluerit Deus se ab homine coli, quam hominem esse beatum. Itaque de facto intentio cultus, qui in bonis operibus consistit, præcessit voluntatem dandæ bea- titudinis, quam proinde Deus non decre- vit, nisi præviso cultu, & bonis operibus. Antecedens probatur, quia conveniens fuit ut Deus prius intenderet illud, cu- jus non potest in ullo casu velle contra- rium, quam id cujus contrarium potest in aliquo casu velle. Atqui cultus ipsius Dei, qui in piis operibus situs est, est aliquid cu- jus Deus non potest velle in ullo casu con- trarium, siquidem contrarium illud est inhonoratio, & contemptus Divinitatis. Nostræ autem felicitatis contrarium est aliquid quod Deus potest velle in aliquo casu, nempe est damnatio, quam potest velle supposito peccato, ut pœnam ejus,

ex motivo iustitiæ. Ergo conveniens fuit ut Deus prius vellet cultum suum, quam nostram felicitatem, ac proinde ut non vellet felicitatem, nisi præsupposito ac præviso cultu, sive piis operibus. Major probatur, quia de ratione finis, loquendo de eo qui sit per se finis, est ut sit bonum merè conveniens, & amabile necessariò, necessitate saltem specificationis. Illud autem cujus quis potest velle contrarium, hoc ipso non est ita conveniens ipsi, neque sic ab ipso amabile. Ergo illud inter volibilia ab ipso non habet de se rationem finis, neque in intentione ejus est primum, seu principium ordinis quem in agendo tenet.

14. Secunda ratio est, quia non habet Deus præviam absolutam voluntatem dandi bonum ad quod. obtinendum dat aliqua media inefficacia. Atqui dedit innumeris hominibus qui sunt salvati & dat plurimis qui salvabuntur, multa media inefficacia ad salutem, ac felicitatem, nempe multas gratias inefficaces, quibus de facto prævalent incitamenta vitiorum. Ergo non habuit præviam illi dationi absolutam voluntatem dandi illis felicitatem. Sed conditionatam, ex hypothese scilicet quòd bene uterentur dandis gratiis, quarum effectum permisit libertati ipsorum, per tales elevatæ & adjunctæ gratias. Ma-

jor probatur, quia adhibere ad finem absolute intentum media inefficacia, quibus contrarii obices prævalituri sint, unde oporteat istis irritis mediis alia substituere, defectus est qui non cadit nisi in agens finitum, cujus nec cognitio sit infallibilis, nec virtus insuperabilis. Repugnat autem inefficacitas illa mediiorum agenti summè perfecto, cujus infinita sit sapientia, & potentia. Unde si de facto dat inefficacia, inde manifestum redditur, illum finem non fuisse ab eo absolute volitum, sed tantum conditionatè.

15. Dices primò. Repugnat quidem agenti infinitè perfecto adhibere media inefficacia ad finem quem velit ipse per se attingere, non autem ad finem quem velit acquiri ab alio.

Respondeo repugnantiam in eo esse quòd adhibeat inefficacia ad finem absolute à se volitum, sive per se, sive per alium velit illum attingi. Nam agens infinitè sapiens, & cui omnia subsint, debet indeclinabiliter, etiam per causas subordinatas, eò pervenire quòd vult, nec ullo modo ab intento aberrare; unde, posito quòd velit ab homine obtineri finem absolute à se intentum, debet per sapientiam, ac potentiam suam hoc efficere, ut absque deviatione, aut errore, ad illum finem tendat. Quare si medium

est re ipsa inefficax, signum est Deum non voluisse finem hominis, nisi conditionatè, ex hypothesi scilicet quòd homo oblato medio uti velit.

16. Dices secundò, satis esse si Deus præter media inefficacia, det etiam aliqua efficacia, quibus felicitas tandem obtineatur.

Sed contra est, quia agenti infinitè perfecto repugnat vel unum adhibere medium inefficax ad finem ab ipso absolutè intentum. Perinde enim est quoad ipsum frustrationis effectum, ac si homo habens in mente aliquod negotium magni momenti, quòd absolutè vult confici, illius negotii curam, & procuracionem committat servo industrio, qui tamen ejus intentioni non correspondeat, nec rem curet: unde negotium demandat alteri, qui fideliter rem exequitur. Quo modo, etsi res fiat, tamen homo ille, qui frustratus est per primum à se constitutum procuratorem, id passus est quod non est ab homine fallibili, & defectibili alienum. In Deo autem nihil tale potest habere locum. Et tamen id continget, si absolutè intendit felicitatem ad quam dat gratiam inefficacem. Nam gratia illa est ex parte Dei procuratrix salutis, ejusque sollicitatrix in corde hominis, nec tamen per illam promovetur salus, sic à Deo volita. Ergo verè Deus

illâ vice frustratur fine à se absolutè intento.

17. Nec dici potest illam gratiam, quæ est inefficax; non dari ad finem ultimum salutis. Nam omnes gratiæ ad illum ordinantur, & de se sunt media ad illum. Repugnat autem Deo dare medium quod est de se medium ad finem quem ipse vult obtineri, & non dare illud ut medium, dando scilicet materialiter, sed non formaliter medium. Igitur continget in Dei providentiâ, id quod per se defectuosum est, nempe irrita ad finem absolutè intentum adhibitio medii, quod cum non debeat admitti, dicendum est gratias dari, non ex absoluta sed ex conditionata voluntate felicitatis, quam Deus non prius vult absolutè, quàm prævideat merita, nec dat nisi ut mercedem, quæ est finis, non quidem Dei, sed hominis debentis propter ipsam operari.

18. Confirmatur dicta defectuositas, quia inefficacitas medii ad finem absolutè intentum, per hoc tantum excusabilis est, vel quòd putaretur illud medium habiturum effectum, vel quòd non posset adhiberi melius. Talis autem error, & impotentia non cadit in agens infinitè perfectum. Igitur tali agenti repugnat adhibere ullum medium inefficax ad finem à se absolutè intentum. Quod si tamen ad-

hibet multa quæ inefficacia sunt, inde constat finem non esse ab eò absolutè, sed tantum conditionatè volitum, nec esse finem propriè respectu ejus, sed respectu illius qui tenetur non reddere inefficacia media quæ Deus dat ut bona, & idonea, sicut reipsa sunt.

19. Dices tertio, potest Deus ad manifestandam vim suæ gratiæ, permittere ut aliqui multum aberrant à fine, sintque planè impii, ut illustrior sit eorum conversio, justificatio, & glorificatio. Sic videtur permisisse ut sanctus Paulus Christianos persequeretur, ut postea admirabilior esset ejus apostolatus.

20. Respondeo negando, Deum posse permittere aberrationes à fine, eo consilio, ut magis appareat virtus gratiæ, sitque mirabilior assecutio finis. Quia sic vellet ipsum malum, sine quo mediante non esset ille processus ad talem finem. Nec dici potest, malum illud mediare tantum occasionaliter, quia si sine occasione aliqua non potest haberi tali excellenti modo finis, & qui intendit finem, providet ut occurrat talis occasio, tunc occasio illa in mente ejus est medium ad illum finem, estque velut unus ex annulis catenam, ac seriem mediorum componentibus, & sublato illo annulo non constaret talis series. Quare si occasio illa est hominis peccatum,

is qui illam vult, & procurat ad aliquid à se intentum, tunc vult peccatum. Hinc non potuit Deus permittere peccatum Adami, ea intentione ut filium optimo modo mitteret, nempe ut Redemptorem; sed permissâ independenter ab illo fine, & sine tali intentione, Adami culpâ, nempe quia congruè per gratiam satis potentem illum avertebat ab ea, & non aliter avertere voluit debentem cum tali auxilio tentationi obsistere, statuit tunc mittere Redemptorem. Et hoc etiam decreverat conditionatè faciendum, si culpa illa contingeret: sed hoc non est Deum ex tali fine, quasi datâ operâ, culpam permittere. Et verum etiam est, non permissurum fuisse illud malum, nisi melius ipso malo paratum habuisset remedium. Sed aliud est non permittere malum sine provisione remedii, aliud permittere malum ut remedii vis appareat: quo modo ipsius mali contrarietas, ac proinde existentia ordinaretur, & volita esset ad manifestationem virtutis quæ est in remedio. Similiter non potest Deus permittere peccata ex intentione manifestandæ suæ justitiæ in punitione impiorum, quia sic ipsa peccata vellet, ut necessaria ad finem à se taliter intentum: sed iis permissis independenter à tali respectu, putà quia ad ea impedienda noluit dare fortiores gratias, quas non debebat, sed volebat ut homo

sibi vim inferret ad resistendum peccati illecebris, cum gratia quæ erat congrua, incipit velle manifestationem suæ justitiæ in puniendis præsuppositis peccatis; atque ita censendum est de omnibus finibus quos Deus intendit ex occasione malorum culpæ, quæ mala non permittit propter illos fines antecedenter volitos, ordinando hæc ad illos, sed sine tali respectu, propter justas aliunde causas, non dando ulteriores gratias quibus impedirentur. Præsuppositis autem illis malis, Deus majora providet bona, ut non vincatur per malum bonitas ejus, sed ipsa inde magis eluceat. Et sic non permisit malum zelum Sauli persequentis Ecclesiam, ut illustrior esset postea Pauli apostolatus, sed permissio, ac prævisio illo malo zelo, & persecutione, inde accepit occasionem manifestandi divitias, ac potentiam gratiæ suæ. In objectionem autem hoc sumebatur, prius fuisse in Deo absolutam intentionem talis apostolatûs, & ex ejus intuitu electam esse, eoque relatam permissionem mali: qui procedendi modus implicat in Deo, qui nec facit, nec permittit mala, ut eveniant bona: sed mala non permitteret, nisi majora provisorus esset bona: ita ut mala culpæ sint non quæsitæ, sed accepta majorum bonorum occasio, quam non debet omittere is qui vult bonum absolutè prævalere, & nihil esse unde in ipsum

gloria, per suam sapientiam, ac providentiam, non redundet.

22. Tertia ratio est, quia si, ut concedunt adversarii, duplex fuisset Dei circa homines, tam diversa ordinatio, ut antecedenter ad prævisa opera, prædestinasset unum certum numerum ad gloriam: aliorum verò salutem ipsorum libertati, per destinatas gratias adjuvandæ, commisisset, non potuisset contingere ut ex hoc immenso numero minùs dilectorum à Deo, ut non exclusorum antecedenter à beatitudine, imò per bonas gratias præveniendorum, stante in Deo sincerâ salutis eorum voluntate, nullus omnino salvaretur. Sed contra necesse esset, ad totalitatem defectionis eorum, seu ad nullius in bono perseverantiam, ut in electione gratiarum illis omnibus, & singulis conferendarum, Deus selegisset positivè, & antecedenter, eas solas quas prævidisset inefficaces fore ad salutem, cum exclusionem positivam efficacium. Nam si innumerabili multitudini non prædestinatorum destinasset gratias bonas, sine exclusionem positivam efficacium ad salutem, & determinationem, ac præelectionem etiam positivam inefficacium ad illum effectum, non contigisset illas omnes esse salutis inefficaces, & nullam prorsus finalis boni efficacem. Gratias enim promiscuè sumptas contingit esse, non tantùm aliquorum

aliquorum bonorum operum, sed etiam salutis partim efficaces, partim inefficaces. Et est contra illarum contingentiam, quòd in numero moraliter infinito, nulla sit ipsius salutis efficax. Maximè autem repugnat divinæ bonitati talis antecedens exclusio efficacium ad salutem, & selectio inefficacium ad illam. Hoc enim esset nolle, etiam antecedenter, salutem eorum cum quibus sic ageret. Nam qui alicui offert media inefficacia ad finem, quatenus inefficacia, & selecta ut talia, etsi potentia & sufficientia, excludendo de industria, & positivè efficacia ipsius finis, non vult illum finem, sed privationem ejus, seu potentiam, at inutilem, intendendo ac providendo ipsam inutilitatem: quod, ut dixi, divinæ bonitati maximè repugnat. Quare congruè dicendum est Deum aliter ordinasse, & intendisse, destinando nimirum omnibus hominibus gratias, inter quas multæ fuerunt salutis efficaces, eo quòd sint decretæ sine talium exclusionem, ex voluntate scilicet conditionata salutis, per bona opera obtinendæ. Et sic evitatur pereuntium quantumlibet innumerabilium, volita à Deo antecedenter exclusio à salute.

23. Confirmatur prædicta impossibilitas universalis inefficacitatis in immenso numero gratiarum, quæ dentur ut bonæ, sine præ-

dicta exclusionem efficaciam, quia in natura impossibile est ut in toto orbe, ex omnibus floribus arborum, per multos annos, nullus existat fructus. Item ut per aliquot annos, in omnibus generationibus hominum, nulli nascantur masculini sexus, sed omnes foemini. Item ut ex omnibus hominibus qui nascuntur uno sæculo, nullus ad senectutem perveniat, & similia, quorum omnium ratio est, quia in numero moraliter innumerabili causarum contingentium, ad opposita variè determinabilium, totalis omnium, & singulorum determinatio ad unum, non est apta oriri, nisi ex præternaturali determinatione causæ superioris, nempe Dei, qui potest infallibili modo disponere de contingentibus, etiam liberis, utendo scientia media, & omnipotentia sua ad ordinationem universaliter efficacem, quæ omnino esset ad bonum, & ad exclusionem omnium quæ essent impeditura tale bonum. Quòd si Deus hoc modo procedere voluisset, omnes homines indeclinabiliter ad salutem perduxisset. Sed quia generali ejus providentiæ, & modo agendi cum causis liberis id repugnat, non sic agit, sed causas liberas permittit agere juxta conditionem suæ naturæ, & indifferentiam illis propriam.

24. Dices illud idem inconveniens exclusarum gratiarum efficaciam, posse in-

ferri ex inefficacitate innumerabilium quæ non habuerunt effectum salutis.

Sed contra est, quia in sententia non admittente duplicem Dei circa homines ita diversam ordinationem, omni operum prævisione anteriorem, & asserente factum per ipsa opera discrimen, inefficacitas illa tam multarum gratiarum contigit intra maiorem multitudinem in qua multæ sunt efficaces. Non est autem contra gratiarum auxilium naturam, & conditionem, quod ex illis plurimæ sint inefficaces, sed est contra contingentiam quæ de se illis inest ad efficacitatem, aut inefficacitatem, quod in multitudine moraliter infinita earum sumptarum sine exclusione efficacium, nulla prorsus sit efficax: idque reperitur secundum adversarios in una totalitate hominum antecedenter ad statum viæ, ac proinde ad determinationem gratiarum, divisa ab alia totalitate, in qua singulis efficaces destinatæ sint. Nam Deum volunt antecedenter ad statum viæ, selegisse unam totalitatem, quæ est prædestinatorum, & omnibus ac singulis in ea contentis gratias, quibus infallibiliter salvarentur, etsi adhuc quo-ad particularia indeterminatas, certas tamen ac ratas quo-ad rationem efficacitatis, destinasse. Alteri vero totalitati quæ fuerit non prædestinatorum, dicunt quidem gratias destinatas esse ut bonas, ac

potentes, sed ita ut jam verum esset nullas fore efficaces. Itaque respectu illius totalitatis, jam in illo priori separatæ ab alia felicissima, id admittunt quod repugnat contingentiaæ quæ per se convenit gratiis, ad efficacitatem & ineffacitatem, & non potest provenire nisi ex delectu ineffacium sub ratione ineffacitatis prævolitarum à Deo, qui delectus ipsum constitueret nolentem antecederet talium hominum salutem. Quare illa sententia aliquid moraliter impossibile asserit, & Dei bonitati contrarium.

25. Dices totalitatem illam abutentium gratiis, sine cujusquam salute, posse contingere ob fragilitatem libertatis humanæ, & corruptionem naturæ per peccatum originale.

Respondeo primò, eam esse vim gratiæ, ut contra pravas fragilis arbitrii propensiones potenter excitet ipsum arbitrium ad bonum, atque inde oriri piorum, & sanctorum victorias. Quare non obstante illa fragilitate, & pravis inclinationibus, manet moralis impossibilitas generalis ineffacitatis, in multitudine moraliter infinita gratiarum auxilium.

26. Respondeo secundò, quo-ad corruptionem inductam per peccatum originale, non posse illam allegari ab adversariis pro causa generalis ineffacitatis in

omnibus gratiis quæ datæ fuerint totalitati non prædestinatorum. Nam in sententia adversariorum par fuisset inefficacitas, etsi non fuisset peccatum originale, siquidem ut prædestinatio beatificandorum, cum qua volunt conjunctas fuisse gratias quæ præviderentur infallibiliter efficaces, præcessit omnia merita eorum : ita negatio prædestinationis, quam nulla secutura esset gratia salutis efficax, præcessit in mente Dei omnia eorum demerita, ipsumque statum viæ, ac proinde & peccatum originale ; quod licet non contigisset, non prædestinati nunquam fuissent prædestinati, sicut prædestinati non propter illud peccatum defierunt esse prædestinati, & beatificandi. Quia igitur tam generalis inefficacitas in immensa multitudine gratiarum quæ datæ fuerunt totalitati non prædestinatorum, non potuit contingere absque eo quòd datæ sint cum generali, positiva, & antecedente exclusionem efficacium, verum erit in illa sententia, Deum illis omnibus, & singulis, antecederet ad prævisum ullum demeritum, non voluisse dare gratias nisi cum tali exclusionem : quod infinitè ab ejus bonitate est alienum. Quare oportet innumerabilem multitudinem eorum quos contigit reprobari, & quibus datæ gratiæ fuerunt de facto inefficaces ad salutem, fuisse contentam in

majori multitudine alios nondum prædestinatos comprehendente, & illi toti multitudini, intra quam nullus adhuc antecedenter ad opera, & usum libertatis, esset prædestinatus, datas fuisse pari, quo-ad illam indeterminationem conditione, gratias, ex quibus contigit de facto multas habere effectum salutis, quem aliæ contingenter, & per accidens non habuerunt, cum deberent habere: sic reprobandorum à prædestinatis discrimen non fuerit ante libertatem hominum: & nulla fuerit ante prævisa merita, discreta à Deo hominum multitudo, cui totaliter sumptæ solas dederit inefficaces ad salutem gratias, ex quo posset inferri illum dedisse tales gratias cum antecedente & positiva exclusionem efficacium.

27. Et præterea in hac sententia, ponente sortem & prædestinationem hominum, à Deo ut vocante per gratiam, & ab operibus dependentem, potest afferri pro ratione multitudinis pereuntium corruptio naturæ per peccatum originale; itemque abusus primarum gratiarum, & frequentia relapsuum, ob quæ Deus subtrahit uberiores, quas dedisset, gratias, ita ut ista nulla esset ex parte Dei anterior plurimorum, ne quidem negativa secretio à numero prædestinatorum. Sic & à Deo omnis boni, & à solis hominibus omnis mali origo congruè petitur.

28. Quarta ratio est, quia sententia asserens prædestinationem ante prævisa merita, supponit falsum. Supponit enim ante statum viæ, & ante prævisa bona, & mala opera quorumcunque hominum, determinatam fuisse eorum omnium qui exituri essent, multitudinem, ac totalitatem, ex qua Deus certos elegerit positivè, ultra quos nemo salvandus esset, & erga alios omnes negativè se habuerit quo-ad electionem ad gloriam. Atqui falsum est determinatam fuisse illam multitudinem ac totalitatem ante statum viæ, & ante quævis bona & mala opera hominum. Nam in determinatione generationum magnam causalitatis partem habet bonus, & malus usus libertatis eorum qui alios generant, aut non generant, cum generare possent. Et non videntur determinatè posterì in quorum productione nihil est ultra ordinem naturæ, nihilque miraculi, nisi visa determinatione parentum ad eos generandos. Et ad illam determinationem pertinent multi actus morales, in quibus est meritum aut demeritum, nempe amores ordinati, aut inordinati, licitæ, aut illicitæ nuptiæ, fornicationes, adulteria, incestus, & multa alia, quæ vel in timore Dei, nihil agendo contra ejus mandata, vel contra ea fiunt. Igitur non omnes homines determinatè visi sunt à Deo

ante visa quævis bona aut mala opera, ac proinde non omnes qui beati erunt, prædestinati fuerunt ante visum statum viæ, & ante cognita ulla merita aut demerita: quod volunt adversarii. Quare dicendum potius est, decreta de danda gloria, etsi ab æterno sint in Deo, tamen si rationis ordo spectetur, posteriora esse iis quæ ad statum viæ pertinent, ac proinde meritis aut demeritis, ex quibus petitur determinatio, & mensura gloriæ.

SECTIO SECUNDA.

Solvuntur objectiones.

1. **O**bjicies primò textum illum Apostoli ad Eph. 1. *Elegit nos Deus in ipso, ante mundi constitutionem, ut essemus sancti, & immaculati in conspectu ejus, in charitate: qui prædestinavit nos in adoptionem filiorum per Jesum Christum in ipsum, secundum propositum voluntatis suæ.*

2. Respondeo esse ibi sermonem de efficaci vocatione ad fidem, & sanctitatem viæ, & ita explicant D. Augustinus, lib. de prædestinatione sanctorum cap. 10. Hieronymus in commentario ejusdem loci, & alii. Quin etiam propositum illud voluntatis suæ, significare potest tantum generale decretum de salute hominum, quo

quo modo ipsa fuit finis incarnationis: & tale decretum non fertur in illam nisi conditionatè, ex hypothefi operum. Quod si illa omnia intelligantur de prædestinatione ad gloriam, intelligenda erunt de prædestinatione merita prævisa consequente. Quo posito adhuc verum erit illud quod eodem capite sequitur. *In quo & sorte vocati sumus.*, id est, Deo id agente, cum nos minimè cogitaremus, & contraria ageremus, ut exponit sanctus Thomas lect. 1. in caput 1. Epist. ad Ephesios. Meliùs tamen est intelligere hæc omnia de prædestinatione ad fidem, & justitiam, quæ est in via, quia non est verisimile revelatam fuisse Ephesiis omnibus prædestinationem absolutam ad gloriam, cum eos Apostolus urgeat metu finalis exitii.

3. Objicies secundò illa verba ejusdem Apostoli, ad Romanos 8. *Scimus quoniam diligentibus Deum omnia cooperantur in bonum, iis qui secundum propositum vocati sunt sancti. Nam quos præscivit, & prædestinavit conformes fieri imaginis filii sui: quos autem prædestinavit hos & vocavit: & quos vocavit illos & justificavit: quos autem justificavit illos, & glorificavit.* Ex quibus adversarii arguunt speciale propositum antecedens, & efficax, ex quo sit vocatio, & justificatio.

4. Respondeo solam argui voluntatem

antecedentem conditionatam, ex qua fit ut omnia cooperentur in bonum, ut ordinata verè ad bonum, & salutem hominum, si maneant in dilectione: quæ conditio semper intelligitur, ut in istis verbis Marci ultimo: *Qui crediderit, & baptizatus fuerit, salvus erit.* Ad illud. *Quos præscivit.* Respondeo sensum esse, quos præscivit consensuros vocationi, & perseveraturos. Unde præscientia meritorum præsupponitur prædestinationi ad beatitudinem, & conformitatem cum Christo in gloria: idque juxta explicationem Patrum antea citatorum.

5. Instabis, Verba illa, *quos prædestinavit, hos & vocavit*, significant vocationem esse effectum prædestinationis. Ergo ipsa prædestinatio vocationem antecedit in mente Dei.

6. Respondeo negando antecedens. Significant enim executionem temporalem beneplaciti, seu propositi de illis salvandis. Quod beneplacitum, ut dixi, est conditionatum. Probatur autem non significare dependentiam vocationis à prædestinatione, quia si ita esset, verba illa anteriora, *quos præscivit*, non possent intelligi de prævisione meritorum, ut antecedentium prædestinationem, sed de ipsa prævisione beatitudinis essent intelligenda. Quo posito, non esset rationabilis,

neque conveniens sensus istius propositionis, *Quos præscivit, & prædestinavit*, siquidem idem esset ac quos vidit à se prædestinatos, prædestinavit. Qui sensus non æquè congruit ac prædictus, qui inter præscientiam, & prædestinationem, causalitatem, seu ordinem designat qui esse debet inter meritum & præmium, & inter prævisionem meriti, & voluntatem dandi præmii.

7. Objicies tertio illud ad Romanos 9. *Cum nondum nati fuissent, Jacob & Esaii, aut aliquid boni egissent, aut mali, non ex operibus, sed ex vocante, dictum est ei (Rebeccæ matri) quia major serviet minori, sicut scriptum est. Jacob dilexi, Esaii autem odio habui. Et paulò post. Igitur non est volentis, neque currentis, sed misere-ntis Dei. Ergo cuius vult misereatur, & quem vult indurat. Et: Nunquid potest figulus ex eadem massa facere, aliud quidem vas in honorem, aliud autem in contumeliam.*

8. Respondeo non esse ibi sermonem de prædestinatione immediata ad gloriam, sed de misericordia quam exercet Deus in viatores, vocando hos præ illis ad justitiam, & gratiam. Idque appositè ad illud de quo agebat Apostolus: quare Iudæi rejecti essent à vera justitia, & gratia Dei, ad quam gentes adscitæ essent. Cujus qui-

dem rei rationem aliquam reddit ex parte hominum, nempe infidelitatem Judæorum, qui Christo credere noluiſſent, malentes legem veterem retinere, ejuſque opera: item fidem gentium, quæ Evangelium amplexæ eſſent: ſed ulterius peculiarem illum favorem vocationis gentium, in miſericordiam Dei refundit. Et patet ex reliquis quæ eodem capite continentur, illum loqui de vocatione efficaci ad juſticiam, quæ eſt ex fide in Chriſtum.

9. Objicies quartò Auguſtinum, cujus ſelectum locum lib. de correptione & gratia cap. 7. aſſert, & examinat Suares lib. 1. de prædeſtinatione, cap. 8. Sic ergo habet Auguſtinus. *Quicumque ab iſta originali damnatione divine gratiæ largitate diviſi ſunt non eſt dubium quin & procuretur eis audiendum Evangelium: & cum audierint, credunt: & in fide quæ per dilectionem operatur uſque in finem perſeverant.* Et poſtea. *Hæc omnia operatur in eis qui elegit eos in filio ſuo per electionem gratiæ. Non enim ſic ſunt vocati, ut non eſſent electi: ſed quoniam ſecundum propoſitum vocati ſunt, proſectò electi ſunt, per electionem, ut dictum eſt, gratiæ, non præcedentium meritorum.* Ex quibus vult Suares diſcretionem electorum à non electis, & propoſitum, quod ſit intentio gloriæ abſoluta, antecedens, & efficax, eſſe cauſam voca-

tionis, & prædicationis Evangelii, & gratiæ uberioris.

10. Respondeo primò generaliter ad Augustini testimonia, nullum in illo reperiri locum expressum pro antecedente merita prædestinatione ad gloriam, sicut pro consequente merita, est ille quem ex libro ad Simplicianum quæst. 2. citavi, sectione præcedenti: siquidem ex adversariis Bellarminus, & alii fatentur Augustinum ibi planè negare electionem ad gloriam, merita antecedentem. Neque aliud respondent, quàm Augustinum adhuc juvenem, scripsisse librum ad Simplicianum Medionalensem Episcopum: postea verò scripturarum usu, & ætate provectiorem, aliter sensisse, & tacitè retractasse quod ibi scripsit. Verùm illis haud malè respondent Lessius, Vasques, aliique, primò libros illos ad Simplicianum ab Augustino jam Episcopo, fuisse scriptos. Secundò eosdem ab ipso seniore, fuisse approbatos, & Pelagianis commendatos, ut veram de gratia sententiam inde haurirent, sicut videre est apud eundem, de prædestinatione sanctorum cap. 4.

11. Respondeo secundò directè ad locum à Suare objectum, Augustinum ibi loqui expressè de electione per gratiam uberem, & fortem, ex qua novit securura merita, & gloriam. Hæc autem ele-

Electio per gratiam est tantum mediata electio ad gloriam. Quod ut intelligatur, adverte Deum dum statuit dare tales determinatas gratias, per scientiam mediam, nosse opera & merita inde futura, & per illas continuatas fore etiam perseverantiam in gratia, & consequenter gloriam. Dum igitur tales eligit gratias, hoc ipso mediatè ad gloriam eligit, & non aliter. Quod confirmatur, ex eo quod Augustinus ejusdem lib. cap. 13. vult, gloriam non esse gratiam nisi in radice, nempe in quantum est à gratia non ex operibus data. *Sine ulla, inquit, dubitatione confitendum est, ideo gratiam vitam æternam vocari, quia iis meritis redditur, quæ gratia contulit homini. Rectè quippe ipsa intelligitur quæ in Evangelio legitur, gratia pro gratia, id est pro iis meritis quæ contulit gratia. Quod si vita æterna esset primum bonum electis à Deo volitum, sic ipsa esset in se præcisè, & non recurrendo ad aliquid antè, gratia, & maximè gratia. Itaque vult Augustinus aliud bonum esse ante gloriam volitum: quod quia volitum sit nullis præcedentibus operibus bonis, cum ipsum sit causa omnis boni operis, gratia & appelletur, & sit. Hoc autem posito, rectè omnino dicitur, Augustinum, per propositum secundum quod vocantur qui credunt, & obediunt gratiæ, nihil aliud*

QUÆST. VII. *De Predest. Dei.* 439
intelligere nisi volitionem gratiæ, quam
scit habituram effectum. Et de tali favore
atque electione intelligendi sunt alii textus
ejus. Idque confirmatur ex eo quod lib. de
prædestinatione sanctorum cap. 19. illud
propositum explicat de electione & præ-
destinatione, non tantum ad fidem, ut
volebant Pelagiani, asserentes præsuppo-
sito Evangelio, & fide, homines rectè ex
se posse vivere, & esse sanctos, & imma-
culatos, sed etiam ad justitiam, charita-
tem, & gratiam, ita ut hæc omnia sint
ab eo qui universa bona operatur.

12. At inquires, Augustinus videtur
significare discretionem de qua loquitur;
esse causam prædicationis Evangelii, ac
proinde determinationem finis, ad quem
omnia salutis media ordinantur.

13. Respondeo ab Augustino prædica-
tionem Evangelii poni ut aliquid ordina-
tum ad receptionem internarum gratiarum,
ita ut sensus sit, quando Deus vult per ta-
les gratias internas vocare, non deest ex-
terna prædicatio Evangelii, & sequitur
fides, & conversio, & perseverantia in
bono, continuatis talibus auxiliis.

14. Ad id quod dicitur, sic esse electos
quia secundum propositum vocati sunt,
respondeo propositum illud secundum Au-
gustinum esse decretum de tali vocationis
modo, per talem gratiam, quæ cognos-

citur gloriam causatura : non autem esse volitionem immediatam gloriæ , quam, ut dixi , docet non esse per se sed in radice gratiam. Ibi autem vult totam discretionem fieri per gratiam.

15. Objicies quartò. Deus producturus creaturas rationales , & elevaturus ad statum supernaturalem , prius censendus est voluisse suam maximam gloriam , quam posset ab illis habere. Hæc autem in formali earum beatitudine, sive in visione, & amore beatifico consistit. Ergo prius visionem , & amorem beatificum decrevit iis qui de facto eò essent perventuri , quàm quidquam aliud circa illos voluerit.

16. Respondeo primò , Deum non necessariò prius velle id in quo est maxima ejus gloria , ut patet in incarnatione , quam non voluit nisi postquam per peccatum Adami exciderunt homines à destinata illis felici sorte beatitudinis quam obtinissent , si obedivisset Adamus. Quare potuit Deus velle gloriam cultûs sibi liberè exhibendi , etsi minorem , quàm gloriam majorem actuum beatificorum necessariorum.

17. Quòd si quis velit majoritati gloriæ primum in intentione Dei locum tribui , responderi potest secundò , datâ majore supradicti argumenti , distin-

guendo minorem. Maxima illa gloria consistit in felicitate optimo modo, quo-ad personas, determinata, concedo: aliter quàm illo modo determinato, nego. Et dico optimum illum modum in eo situm fuisse ut felicitatem dare statueret liberis sui cultoribus, & sectatoribus virtutis, ut sic in ipsa summa magnificentia Dei, regnaret justitiæ remunerativæ æquitas, quæ tali magnificentiæ præluceret. Primò enim cultus & amor Dei liber per se Dei munificentiam provocat, & hæc est optima ad summum favorem dispositio. Deinde cum beatitudo hujus hominis potius quàm alterius, sit bonum speciale hujus hominis, non Dei, cui æquè bona esset alterius beatitudo, conveniens fuit ut hoc bonum non decerneretur à Deo, nisi hunc præ alio dignum videret, quæ dignitas in virtutibus, maximèque in amore Dei, ac religione consistit. Hinc rectè dici potest primam Dei intentionem fuisse de maxima gloria sibi procuranda per beatificationem plurimorum Angelorum, & hominum, abstrahendo à determinatione personarum, & illi generali volitioni nondum determinanti personas, successisse decretum de nulla determinanda persona, nisi prævisis meritis, & cultu atque amore libero. Neque repugnat Deum velle aliquid sub præ-

cisione personarum, & modorum, quibus illud habebitur, siquidem constat Christum decretum fuisse quo ad suam existentiam, cum essent adhuc indeterminatæ progenitorum personæ, siquidem ex Christi sic decreti meritis jam moraliter in mente Dei existentibus, datæ sunt progenitoribus gratiæ, ut Abrahamo, Isaaco, Jacobo, Davidi, & parentibus beatæ Virginis, & maximè ipsi ante alios Virgini primò post Christum decretæ, ut esset illius mater: quod totum ex ejus meritis factum est. Sic igitur prioritas aliqua in intentione absoluta, & antecedente, beatificandorum plurimorum Angelorum & hominum, bene stabit cum indeterminatione personarum, quarum electio debeat prævisa opera, & merita sequi.

18. Cæterum etsi valde probabilis sit iste intentionis ordo, melius tamen dici videtur, Deum post generalissimam intentionem gloriæ suæ, ab omnibus creaturis proventuræ, voluisse speciatim gloriam à creaturis rationalibus per liberum amorem, & cultum sibi exhibendum, & tantum consequenter gloriam tam magnificæ remunerationis ipso dignæ, & felicitatem earum ut mercedem, ac præmium meritorum. Quod congruit dictis sectione præcedenti in tertia probatione assertæ sententiæ, ratione prima, quia scilicet

QUÆST. VII. *De Prædest. Dei.* 443
cultus Dei, quem Deus non potest nolle,
magis aptus est habere rationem finis
quàm creaturæ felicitas, quam potest
nolle si cultus illius contrarium eligat.

19. Objicies sextò, qui vult media ef-
ficaciter, debet velle finem amore efficaci,
non autem tantùm affectu simplici & con-
ditionato, qui non progreditur ultra suf-
ficientia media, quia nulla potest esse ef-
ficacia in mediorum prosecutione, quæ
non fuerit priùs in amore finis ut causa il-
lius prosecutionis, aut provisionis.

20. Respondeo primò, voluntatem
conditionatam non esse effectum simpli-
cem, sed suo modo efficacem ad finem
sub possibilibus mediis acquirendum, eam-
que sufficere ad provisionem, & electio-
nem talium mediorum, ut cùm quis ali-
quem hæredem suorum bonorum consti-
tuere statuit, si fiat vir honestus, & do-
ctus, ex qua voluntate providet ut talis
evadat, ut dando magistros, exhortando,
& quævis media ad hunc finem adhiben-
do. Quod multò magis fit à Deo, homi-
nes ad sui possessionem, sub conditione
bonæ vitæ, & meritorum disponente.

21. Responderi etiam potest ex jam di-
ctis; nostram felicitatem non esse propriè
finem Dei, sed nostrum: respectu verò
Dei esse medium ad obtinendum à nobis
amorem, & cultum sui liberum, eo modo

quo merces non est finis ejus qui illam dat, sed operantis propter illam.

22. Ex hac duplici responsione habetur solutio duplex ad illud aliud argumentum. Sapienter agens vult prius finem, quàm media. Sed beatitudo est finis, merita verò media. Ergo qui est ipsa sapientia, prius voluit felicitatem quàm merita. Nam secundum primam responsionem, distinguitur major hoc modo. Vult prius sive absolutè, sive conditionatè, concedo. Semper absolutè, nego. Et probatum est Deum non debere nisi sic velle felicitatem hominum antecedenter ad prævisa merita.

Juxta autem secundam responsionem, data majore, negatur in sensu prædicto minor, quia beatitudo nostra est Deo medium, in quantum est bonum, cujus propositione ac promissione nos attrahit ad cultum sui, sicut optanti operam conductitii operarii, merces est medium ad illam obtinendam.

23. Objicit doctus recentior. Merita nostra, & perseverantia sunt effectus prædestinationis. Ergo prædestinatio non est ex prævisis meritis: neque ipsa fuerunt motivum illius, siquidem ipsa non potuerunt prævideri ante extitutam absolutè causam, à qua provenerunt: antecedens probatur, quia merita nostra, & perseverantia sunt effectus

QUÆST. VII. *De Prædest. Dei.* 445
gratiæ efficacis. Gratia autem, ut efficax,
ordinatur ad finem per ipsam volitum
absolutè, eumque connotat, ut infalli-
biliter obtinendum.

24. Respondeo negando antecedens.
Ad probationem ejus, concedo quidem
merita nostra esse effectum gratiæ efficacis.
Sed nego gratiam esse efficacem per hoc
quòd sit ad finem absolutè præintendum.
Est enim efficax per hoc formaliter quòd
si detur, habitura sit effectum boni ope-
ris: & ipsa habitudo ejus ad consensum
nostræ voluntatis conditionatè futurum
dependenter ab ea, constituit illam in ra-
tione efficacis & contingit multos acci-
pere gratias efficaces ad multa bona opera
qui non obtinent finem beatitudinis.

25. Quod si essentialiter, aut etiam quomo-
docunque necessariò includeret ordinem,
& respectum ad finem beatitudinis absolutè
à Deo, & antecedenter volitum, nemo ex
non salvandis unquam accepisset ullam
gratiam efficacem. Quia igitur plurimi non
salvandi, multas acceperunt gratias effi-
caces, per quas multa bona opera fece-
runt, quorum nullum sit sine gratia,
quæ per ipsum cognoscitur fuisse efficax,
clarum est non omnem gratiam efficacem,
neque gratiam efficacem ut sic ordinari ad
præintendum absolutè beatitudinis finem

26. Insuper, gratiæ efficaces ad salutis

effectum, hoc ipso quod sunt tales, dicunt ordinem ad finem beatitudinis absolute præintendum. Tales autem accipiunt electi: ergo ante gratias illis datas præintensus est absolute à Deo illorum finis, seu beatitudo.

27. Respondeo gratias efficaces, ad salutis effectum, sumptas sub ista reduplicatione ulterioris effectus supervenientis ei per ordinem ad quem sunt efficaces, qui est bonum opus, aut consensus ad quem excitant, dicere quidem ordinem ad finem beatitudinis; sed non ad præintendum absolute. Nam satis est quod dicant ordinem ad salutem ex illis conditionate futuram si dentur. Possunt autem dari ex intentione conditionata beatitudinis, ut supra-dictum est, idque ulterius probatur, quia per se loquendo, intentio conditionata alicujus finis tunc maxime est causa idonea ad providenda media optima, & efficacia ad illum finem, quando intendens plurimum optat ut ponatur conditio quam exigit, & multum etiam de se propensus est ad conferendum illud bonum quod se daturum promittit, si ponatur illa conditio. Deus autem maxime optat ut ponatur conditio quam exigit ad dandam nobis beatitudinem, quia conditio illa est cultus illi liberè à nobis exhibendus, & libera in eo perseverantia, & talis condi-

tionis bonum est finis ob quem Deus promittit nobis beatitudinem. Sed & de se propensissimus est Deus ad illam nobis dandam, quia proprium bonitatis est bona largiri. Non vult autem illam dare aliter quàm mediantibus meritis & obtento à nobis cultu libero, ut habeat in æternum adoratores qui ipsum ut Deum liberè elegerint, & prætulerint omnibus, etiamque sibi-metipsis, quòd fit per charitatem, quam maximè requirit inter bona opera, & dispositiones ad salutem. Satis est igitur ad causandam dationem gratiarum efficacium, quòd præcedat conditionata intentio beatitudinis; & non est necessaria præintentio absoluta.

28. Objiciunt alii, gratiæ quas dat Deus electis, essent majus illius beneficium si eas daret ex intentione antecedenti, & absoluta perducendi eos ad felicitatem.

29. Respondeo majoritatem beneficii ex tali donandi modo, ad omnes prædestinatos extenso, & ad illos restricto, aliunde repugnare, & per hoc tolli sinceram in Deo voluntatem salvandi non prædestinatos, quia si statuisset Deus nullam dare salutis efficacem gratiam, nisi ex tali antecedenti, & absoluta voluntate felicitatis, ubi non esset talis voluntas, nollet dare nisi inefficaces quoad salutem, etsi efficaces quoad aliqua bona opera.

Hoc autem, ut ostensum est sectione præcedenti, excludit voluntatem salutis eorum, & tendit in privationem finis. Dat igitur Deus omnibus gratias ut bonas, ac potentes causare effectum salutis. Et quia in illis multas videt efficaces salutis, vult in illis ipsam secuturam salutem, sed mediantibus meritis obtinendam. Sic prius semper merita videt quàm felicitatem absolutè velit.

30. Objicies ultimò ex Suare. In unoquoque negotio, vel gubernatione, exitus rei declarat intentionem gubernantis, & terminus ille quo tandem consecuto cessat sollicitudo, & gubernatio, solet esse primum objectum propositum voluntati, & intentum talis gubernantis, si prudenter se gerat. Ergo numerus electorum, qui re ipsa erit, in fine mundi, fuit primò intentus à Deo, & ad illum explendum merita ordinantur.

31. Respondeo cum in determinatione rei intentæ sub aliqua disjunctione intervenit libertas multorum, & permittit gubernans, ut ii quibus aliquid agendum proponit, eligant quid, & qualiter sint acturi, terminum totalem rei non fuisse sub omni sua determinatione primum objectum quod sibi initio proposuit: quia talis antecedens determinatio, maximè quo-ad exclusionem majoris numeri bene operantium,

operantium, non congruit cum generali propositione, & invitatione agentium liberorum. Tantum ergo gubernans debet providere, ut in exitu rei id reperiatur quod ei sit satis, quoque sit omnino contentus, & ne in hoc sit defectus qualis foret, si deessent qui se dignos præberent propositis præmiis, & omnes illa impune aspernarentur. Abunde autem providit Deus per gratias uberes, ut innumeri homines ad felicitatem pervenirent, quorum immenso numero non obest major multitudo eorum qui renuerunt. Satis est enim esse turbam magnam, ex omnibus gentibus, & populis, & linguis, quam, ut inquit D. Joannes in Apocalypsi, dinumerare nemo poterat, & Deum aliunde in illis qui bonitatem, & munificentiam ejus contempserunt, per debitam ipsorum improbitati, ac malitiæ punitionem, in æternum glorificari.





QUÆSTIO OCTAVA.

De Existentia Trinitatis.

SECTIO PRIMA.

Quomodo constet Existentia Trinitatis.

1. **R**espondeo constare optimo modo quo aliquid nobis in hac vita certissimum esse potest. Optimus ille modus est lumen fidei, quod præstat omni certitudini scientiarum. Nam si inde aliquid à Deo revelatum cum evidenti credibilitate nobis proponatur aliunde verò pro opposito appareat evidentia in speciem similis ei quæ in scientiis reperitur, debemus potius iudicium nostrum submittere testimonio Dei quàm illi apparenti in speciem evidentiaæ adhærere.

2. Hoc ergo optimo modo nobis constat veritas Trinitatis. Nam Deus se Trinum esse revelavit, & in Deitate Patrem æternum generare Filium ejusdem secum naturæ & ab utrôque procedere Spiritum sanctum, qui sit etiam idem Deitate cum illis. Id totum significatur illis Christi ad

Apostolos verbis, Matthæi ultimo: *Docete omnes gentes, baptizantes eos † In nomine Patris, & Filii, & Spiritus sancti.* Ubi voces Patris, & Filii, & Spiritus sancti distinctionem realem significant. Tò verò, nomen, significat eos habere unum Divinitatis nomen, unicamque virtutem quæ sit origo nostræ salutis, & principium in quod illa refundi debeat, unde necessariò illa virtus debet esse divina. Idem probatur ex illis verbis 1. Joan. 5. *Tres sunt qui testimonium dant in cælo*, id est qui attestantur nostræ Redemptioni per Christum, *Pater, Verbum, & Spiritus sanctus: & hi tres unum sunt*, nampe naturâ. Quibus verbis accedit interpretatio & sensus Ecclesiæ, & Patrum, atque Conciliorum definitiones quæ regulæ sunt fidei. Sic Dei de se ipso testimonio innixi iudicium certissimum de Trinitate ferimus, qui actus est summæ sapientiæ, positâ, quæ re ipsa est, evidenti credibilitate talis testimonii, ex motivis scilicet credibilitatis quæ per se constant, & de quibus suo loco agitur.

SECTIO SECUNDA.

*An ratione naturali possit ostendi existentia
Trinitatis.*

1. **R**espondeo nullum intellectum creatum seclusâ Dei revelatione posse attingere existentiam Trinitatis. Positâ autem revelatione posse afferri rationes quæ verè illam probant. Illas tamen quo-ad nos esse insufficientes ad suadendam Trinitatis veritatem homini cui non esset proposita per motiva credibilitatis, revelatio Dei, vel qui propositam non admitteret.

2. Prima pars probatur, quia cum nullus intellectus creabilis, si intra suum proprium ac naturalem cognoscendi modum relinquatur, possit aliter Deum cognoscere, quàm ex creaturis, in quantum illæ causam sui productivam manifestant, talis progressus ad ea tantum attingenda valet, quæ Deo ut uni conveniunt, cuiusmodi sunt independentia, ratio primi entis, existendi necessitas, omnipotentia sapientia, bonitas, ratio finis ultimi, & alia talia. Sic nullum est in creaturis trium personarum in unitate naturæ, strictè rem accipiendo, argumentum, aut vestigium, quia in illis nulla est distinctio realis quæ

identitatem realem non excludat. Igitur indeprehenfibile est omni creato intellectui Trinitatis Myſterium.

3. Secunda pars probatur primò, quia poteſt fieri hic diſcurſus. Agere eſt perfectio ſimpliciter ſimplex, quæ de ſe nullo defectum involuit. In ente autem infinito debet neceſſariò inefſe omnis perfectio ſimpliciter ſimplex. Ergo in Deo, qui eſt ens infinitum vera actio neceſſariò reperitur: idque ad intra, quia ad extra nihil neceſſarium eſt. Jam ſi Deus neceſſariò agit intra ſe, maximè per intellectum & voluntatem, cum immaterialitas ſit radix intellectiõis, & intellectio volitionis. Itaque in Deo eſt vera actio per intellectum, & vera actio per voluntatem. Ubiſcunque autem eſt actio, debet eſſe diſtinctio inter principium & terminum ejus. Itaque debet in Deo admitti diſtinctio inter principium intelligendi, & terminum intellectiõis: itemque inter principium volendi, & terminum volitionis. Sic erit multiplicitas in Deo, eaque ſubſtantialis, quia accidens phyſicum dicit imperfectionem, quæ in Deum non cadit jam illa multiplicitas non excludit identitatem realem, qua illa plura ſint unum ens abſolutum, ſiquidem quidquid eſt in ente ſimpliciſſimo, eſt illud ipſum ens. Et repugnat Deo compositio, quæ eſſet ſi

distincta in eo non essent, unum. Quia igitur multa in eo sunt unum ens simplicissimum, multiplicitas non est entium absolutorum, sed per relationes distinctorum, quo modo personæ distinguuntur, in quibus principium actionis per intellectum, vocamus patrem: & terminum illius, filium. Cumque principium actionis per voluntatem sint indivisibiliter iidem Pater & Filius, terminum talis actionis vocamus Spiritum sanctum. Hic discursus est compositus ex propositionibus singulis per se veris, & rationis lumini consentaneis, nec non in bona forma dispositis. Ergo suppositâ fide potest dari probatio vera, quæ in Deo multipliciter realem personarum inferat.

4. Dices, non esse veram illam propositionem ubicunque est vera actio, principium & terminus illius actionis distinguuntur itaque corrumpitur discursus in quo illud principium ut verum assumitur. Antecedens probatur, quia intelligere essentiale in Deo est actio & in eo non est distinctio principii cognoscentis à termino, ergo non est universaliter verum, ubicunque est actio, principium & terminum illius actionis distingui.

5. Respondeo negando antecedens. Ad probationem, dico intelligere quidem divinum, si sumatur cum sua ultima dif-

ferentia ad quam in Deo determinatur, esse actionem propriè dictam, ac proinde in eo sic sumpto reperiri distinctionem principii à termino: sed nego illud ipsum intelligere, si sumatur præcisivè ab illa determinatione, quo modo vocatur essentialis, estque commune tribus personis, esse actionem, nisi impropriè, ob rationem expressionis, quæ illi est communis cum nostra intellectione, quæ quia est physicè à nostro intellectu quo-ad suam entitatem producta, verè est actio.

6. Ad hoc intelligendum, recolendum est ex dictis antea, aliud esse cognoscere, quod est imaginem vitalem objecti in se habere; aliud dicere, quòd est notitiam communicare percipienti, in quo est ultimum complementum intellectualitatis, & intellectiōis, quod non debet Deo deesse. Et ipsum quidem cognoscere nunquam est secundum rem sine actione propriè dicta, sed cum ab ea actione sibi realiter identificata possit per nostrum conceptum præscindere, illam sub tali præcisionis statu non includit. Et sic cognoscere convenit omnibus personis Trinitatis. Et pro-ut ita spectatur non dicit distinctionem inter principium & terminum imò sic non habet propriè loquendo terminum, sed objectum quod in Deo est ab ipso principio cognoscente indistinctum, in quan-

tum illud principium cognoscit seipsum. Dicere autem est per se formaliter actio strictè sumpta, & necessariò importat distinctionem inter principium communicans notitiam, & terminum, seu personam cui fit illa communicatio: Imò dictio terminum illum seu personam producit, cum ipsi non præsupponatur persona quæ illam percipiat, quod in sola dictione divina contingit. Nam antecederet ad eam non est persona cui Deus suam notitiam communicet unde per dictionem ipsam dicens debet illam producere. Et hoc est infinitum discrimen inter dictionem nostram, & divinam, quod nostra supponat aliunde personam cui communicemus nostram notitiam, quæ etiam non inest ex natura nobis, sed cum concursu Dei quo necessariò indigemus, in nobis formanda est, & producenda. Deus autem dicendo personam ipsam producit cui fit communicatio notitiæ improductæ. Sic nullo indiget extrinseco ad perfectionem intellectualis communicationis, & sine potentialitate habet intra se id totum quod ad illam requiritur.

7. At inquiet aliquis, non est in Deo aliud intelligere quàm illud essenziale.

Respondeo id malè asseri, quia cum agere propriè ac strictè sumptum, sit perfectio simpliciter simplex, nullum defectum,

fectum involuens, & intelligere illud non fit physicè actio nisi per additam ei rationem dictionis, sequitur intelligere divinum secundum rem aliud includere quàm illud intelligere essentialè. Idque exigit infinitas Dei quæ, ut ostensum est, postulat necessariò communicationem intra ipsum Deum ac pluralitatem quæ non potest melius, neque aliter constitui quàm per fecunditatem dictionis, & consequentis ad illam amoris. Et alioqui deesset in Deo intellectiois ultima, & summa perfectio, quæ est communicatio notitiæ, quæ nisi sit ipsi intrinseca, Deus contingenter esset perfectio in ratione entis intellectualis, nec posset esse in illo genere summè perfectus, cum communicatio notitiæ ad extra non possit esse omni modo infinita.

8. Confirmantur hæc omnia isto discursu quo-ad multa consimili. Bonum est ex sua natura communicativum sui, & quo majus est bonum, eo magis est communicativum. Quate cum Deus sit infinitè bonus, summè necesse est esse aliquam communicationem bonitatis ejus. Et quia quidquid Deo necessariò convenit, est in ipso, necesse est illam communicationem intra ipsum terminari. Quod cum ita sit, duo inde sequuntur. Primum est communicationem illam esse infinitam. Secundum est, debere esse in Deo aliquam plu-

ralitatem , quia nulla est communicatio , nisi ad alterum. Quare cum pluralitas non possit locum habere in Dei natura , necesse est eam in suppositis illius naturæ inveniri. Jam autem in suppositis non potest , ut jam dictum est , melius stabiliri quam per fecunditatem dictionis, & amoris. Ergo sic est admittenda.

9. Potest quoque addi ista ratiocinatio. Cum amicitia sit perfectio amoris , oportet in Deo , in quo est summè perfectus amor , esse quoque perfectam amicitiam. Atqui amicitia pluralitatem aliquam supponit , & exercetur per communicationem notitiæ , & effusionem amoris , per quas operationes melius quàm per quidlibet aliud potest existere illa in Deo pluralitas. Ergo datur in Deo talis communicatio notitiæ , quæ est dictio , & talis effusio amoris , quæ vocatur spiratio activa : & per istas actiones procedunt à Patre Filius , & ab utroque Spiritus sanctus.

10. Ad probationem tertiæ partis , notandum est posse nobis res aliter , quàm se habeant , apparere , itemque fieri posse discursus aliquos ad probandum falsum , contra quos , si non staret contrarii experientia evidens , ipsi viderentur demonstrativi. Primò falsum potest quasi evidenter verum nobis apparere. Nam si quis non

haberet experientiam de illusione sensuum circa multa, putà circa baculum, qui ex parte immersus in aquam, distortus apparet, judicaret de facto objecta ita se habere, sicut in tali dispositione apparent: & tales deceptiones non nisi aliqua aliunde contrarii experientia corriguntur, quâ sublatâ, ipsa ratio apprehensioni sensuum, suum iudicium conformaret. Quare si eadem humana ratio erret circa ea quæ non possunt naturaliter à nobis attingi, & de quibus non potest esse ulla experimentalis cognitio, continget non posse, sistendo intra terminos luminis naturalis, nostram hallucinationem corrigi. Jam quòd fiant multi fallaces discursus contra res per se notas, & evidentes, quibus si pares fierent contra res ab omni nostra experimentalis notitia, & à communi naturæ ordine remotissimas, etsi in se necessariò veras, ipsi insolubiles viderentur, constat ex multis argumentis philosophicis, quæ vix solvi possunt, etsi certum notumque sit id quod per illa concluditur, esse falsum, ut contingit in argumento Zenonis contra motum, quo nihil in natura certius, & evidentius est. In illo enim argumento propositiones omnes quas sumit pro præmissis, per se apparent veræ, & evidentes, nempe quod ad pertranseundum spatium continuum, priùs

percurrenda sit prior medietas , quàm posterior : & rursus hujus posterioris medietas prima priùs quàm secunda , & sic de cæteris : item quòd in infinito numero medietatum successivè percurrendarum , non possit deveniri ad ultimam. Et argumentationis forma videtur rectè procedere. Itaque si non constaret evidenti experientia dari motum , argumentum illud demonstrativum videretur. Et si fiat discursus talem habens apparentiam veri circa aliquid verum quidem , & necessarium , sed non modò ab omni sensuum captu , verùm etiam à communi naturalium rerum ordine infinitè remotum , videbitur nobis omnino convincens : Et nihil erit intra rationis nostræ sibi relictæ lumen , unde talis error deprehendi , ac revinci possit. Dico autem in mente ethnici , circa mysterium Trinitatis , talem remansuram erroris invincibilitatem , quandiu non proponetur illi cum motivis credibilitatis testimonium Dei de se ipso trino. Et si enim à theologo christiano ad suadendum illi hoc mysterium , afferrentur discursus illi quos ratio , suppositâ Dei revelatione formare potest , si tamen nulla fieret mentio ipsius revelationis , tales discursus vim non haberent causandi assensûs , & fortius contrà starent apparentes negandi rationes. Nempe ipsa per se trium realiter di-

Sanctorum unitas videretur impossibilis: & contradictiones inde viderentur bene inferri per argumenta in speciem insolubilia: quibus tamen supposita Dei revelatione, congruè respondetur, ut infra constabit. Facile autem esset Ethnico illi circa allatos pro Trinitate discursus aliquid etsi verum, & per se dignum assensu, tamen ut oppositum principiis & argumentis majorem habentibus apparentiam veritatis etiamque evidentiae, negare ac rejicere. Nempe diceret esse in Deo actionem eminenter quidem, sed non formaliter. Vel actionis intellectivæ non necessariò requiri terminum ab ipsius principio distinctum, cum intelligens summè perfectum possit seipso intelligere seipsum, & similia. Quare seclusa Dei revelatione, non potest ullo alio modo mysterium Trinitatis homini infideli credibile reddi.

Dices ergo nihil profunt prædicti, quos supposita revelatione ratio format pro Trinitate, discursus.

II. Respondeo prodesse, primò, quia si non valent illi seorsim à revelatione, ac divisim accepti, ad causandum circa Trinitatem assensum contra apparentes in ea contradictiones, adjuncti tamen valent, & sufficiunt ad hoc tuendum, quòd fides non repugnet lumini naturali, cum etiam conformitatem habeat cum multis

ejus principiis. Secundò illi discursus faciliorem reddunt assensum fidei, dum juvant ad vincendam repugnantiam quam intellectus noster patitur in assentiendo propter solum testimonium extrinsecum, rebus quæ dicuntur ex natura rei taliter se habere, absque eo quòd ullo modo cognoscat illarum rerum naturam, aut proprietatem, ac modorum ita se habendi causam, atque originem.

SECTIO SECUNDA.

Solvuntur objectiones.

1. **S**icut posita revelatione de Trinitate, fiunt discursus qui verè illam probant, non tamen tales ut si, seclusâ illâ, fuissent excogitati, aut si homini Ethnico proponantur, sufficiant per se ad fundandum prudens de tali objecto iudicium, contra apparentes in oppositum contradictiones: ita posita eadem revelatione, solutiones afferuntur, quæ omnino veritati congruunt, non tamen tales ut homini revelationem non admittenti, quandiu illam negat, sufficiant ad iudicandum nihil esse in tanto mysterio, quod implicantiâ involuat. Verùm cum homini fidei in sensu composito admissæ revelationis sufficiant ad tale iudicium, minuantque

difficultatem quam patitur infidelis circa talis revelationis assensum; accuratè hoc loco sunt attingendæ & expendendæ.

2. Objicies ergo primò, quæ sunt eadem uni tertio, sunt idem inter se. Atqui omnia quæ sunt in Deo, sunt idem in uno tertio, nempe in essentia Dei, ergo omnia illa sunt idem inter se, ac proinde non datur in illo pluralitas suppositorum à se invicem distinctorum.

3. Huic argumento ut respondeatur, adverte, ad hoc ut valeat universaliter tam in ente infinito, quàm in finitis, illud axioma, quæ sunt eadem uni tertio, sunt idem inter se, tò idem debere latissimè sumi, ita ut ad verificationem talis prædicati sufficiat identitas excludens distinctionem quæ est inter absoluta, nec requiratur excludens distinctionem quæ esse potest inter relativa, per ipsam eorum oppositionem relativam. Personæ autem in Deo sunt idem identitate excludente distinctionem quæ est propria entium absolutorum, qualis est inter Petrum & Paulum, sed non sunt idem identitate excludente distinctionem quæ in ente infinito propter infinitam ejus communicabilitatem ad intra, per relationes, stante summa ejus simplicitate atque unitate constituitur. Hinc ad argumentum ita respondeo in forma, distinguendo ma-

jorem, sunt idem identitate excludente distinctionem propriam absolutorum concedo. Identitate excludente etiam distinctionem quæ in ente infinito potest esse inter relativa, nego. Ad minorem, concedo omnia quæ sunt in Deo, esse idem identitate quæ excludat distinctionem propriam entium absolutorum. Nego autem de identitate quæ excludat etiam distinctionem possibilem inter relativa intra ens infinitum. Unde negatur consequentia. Et ratio negandi ac taliter distinguendi identitatem, est ipsa Dei infinitas, quæ cum exigit ex natura rei ad intra communicationem sine compositione, itemque actionem qua producat non aliud distinctæ naturæ, sed aliud ejusdem essentiæ, debet necessario includere pluralitatem quæ stet cum identitate, unde illa identitas excludit solam propriam absolutorum distinctionem, non autem per relationes constitutam.

4. Potest in eundem sensum aliter distinguere eadem major, ita ut distinctio cadat non in modum identitatis, sed in tertium, cui extrema identificantur. Quæ sunt eadem uni tertio finito, & propter finitudinem incommunicabili, concedo: Quæ sunt eadem uni tertio infinito, & propter infinitudinem communicabili pluribus, sibi ipsi sine ulla distinctione à se ip-

so, identificatis, nego, ob eandem rationem infinitatis, quæ est radix Trinitatis in quantum exigit communicationem, & actionis fecunditatem in ente simplicissimo.

5. Instabis, sic corrumpit forma syllogistica, cujus principium non erit universaliter verum.

Respondeo negando sequelam, primò quia principium illud est universaliter verum hoc sensu, quòd, quæ sunt eadem unitertio identitate adæquata, hoc est absque eo quòd illud tertium latius pateat quàm unumquodque ex illis, sint idem absolute inter se. Sed cum sic accipietur axioma, negabitur minor syllogismi supradicti.

6. Secundò negatur prædicta sequela, quia forma syllogistica fundatur etiam, & maximè illis vulgatis principiis, quæ appellantur dictum de omni, & dictum de nullo, quæ sunt absolute & universaliter vera. Sed contra hoc ipsum.

7. Obicies secundò, si datur Trinitas, non valebunt principia illa, dictum de omni, & dictum de nullo, in quæ resolvitur ultimatè tota vis syllogismorum primæ figuræ. Consequens rationi repugnat. Ergo & antecedens. Sequela probatur, quia dictum de omni consistit in hoc quòd quidquid de aliquo subjecto universaliter sumpto affirmatur, verificetur etiam de omnibus

inferioribus ejus , seu de omnibus de quibus talis terminus verè prædicatur. Contrarium autem eveniet in hoc syllogismo. Omnis essentia divina est Spiritus sanctus , Pater est essentia divina. Ergo Pater est Spiritus sanctus. Cum enim secundùm illud axioma deberet esse vera conclusio , tamen propter id quod est peculiare in hoc mysterio , erit falsa. Item dictum de nullo consistit in hoc quòd quidquid negatur de aliquo subjecto universaliter sumpto , negetur etiam de inferioribus ejus , seu de iis de quibus talis terminus prædicatur. Contrarium autem reperietur in hoc syllogismo. Nulla divina essentia generatur. Filius est essentia divina. Ergo Filius non generatur. Denique non valebit forma syllogismi expositorii qui evidentissimus censetur , in quo pro medio termino accipitur singulare , de quo , quia duo alii termini prædicantur , iidem inter se identificantur , & quivis de alio prædicatur. Sequela probatur , quia hujus syllogismi , hæc essentia divina est Pater. Hæc essentia divina est Filius , ergo Filius est Pater , falsa erit conclusio.

8. Respondeo negando sequelam majoris , & dico quo-ad dictum de omni , & dictum de nullo , subjectum illud , seu medium terminum debere secundùm totam suam latitudinem sumi , ita ut perfectè distribuatur , aut acceptio ejus perfectæ di-

tributioni æquivaleat : quod non fit in al-
latis exemplis. Nam in utraque majore es-
sentia non sumitur pro eo omni quod est
essentia, sed pro essentia, ut virtualiter
distincta ab aliquo, quod tamen est reali-
ter essentia. Sumeretur autem secundum
totam suam latitudinem, & adæquatè, si di-
ceretur, omne quod est essentia divina, est
Spīritus sanctus, itemque, nihil quod sit
essentia divina, generatur. Et tunc major
utraque esset falsa. Quo-ad syllogismum
expolitorium, dico terminum non debere
esse, neque formaliter, neque æquipollen-
ter universalem : quod tamen contingit in
allato exemplo. Nam essentia divina est
terminus latitudinem habens, secundum
quam identificabilis est tribus personis di-
stinctis, etiam simul sumptis. Et hīc su-
mitur semel prout est uni identificatus, &
alia vice, prout identificatus alteri. Itaque
nullibi adæquatè, & indivisibiliter accipi-
tur. Unde nihil concluditur.

9. Objicies tertio, de eadem re contra-
dictoria verificari non possunt, quia idem
non potest simul esse & non esse. Hīc au-
tem talia verificarentur, quia cum essentia
divina & paternitas sint una res simplicissi-
ma, & essentia sit filiatio, Paternitas au-
tem non sit filiatio, de illa re verificabitur
quod sit, & non sit filiatio. Item quia cum
filiatio & essentia sint una res & filiatio ge-

neretur , essentia autem non generetur , eadem rei conveniet generari & non generari.

10. Respondeo distinguendo majorem eo modo quo jam distincta est , quæst. 3. sect. 3. de eadem re nullam habente multiplicitem virtualem , concedo ; de eadem re talem habente multiplicitem ob suam infinitatem , quæ necessariò exigit infinitam ad intra communicationem , nego. Et dico ea quæ per se videntur contradictoria , & talia essent respectu rei tali multiplicitate virtuali carentis , non esse hîc talia , quia non spectant idem eodem modo , seu secundum eandem virtualitatem sumptum ; sed nunc sumptum secundum unam , nunc secundum aliam. Nec refert quòd eidem realiter convenire dicantur hoc pacto. Essentia realiter est filiatio. Paternitas quæ est idem cum essentia realiter , non est filiatio. Tò enim realiter non efficit unitatem acceptionis , sed denotat diversas illas rationes objectivas primò intentionaliter sumptas , esse reales : quod est verum. Sicut cum dicitur homo realiter convenit cum equo per animalitatem , & realiter non convenit per suam rationalitatem , cum per eam disconveniat , tò realiter non tollit diversitatem sensûs formalis , nec multiplicitem virtualem animalitatis , & rationalitatis , sed denotat convenientiam illam quæ fit

per rationem formalem animalitatis, & negationem convenientiæ in ipsa ratione formali rationalitatis, non esse tantum per intellectum, sed à parte rei, quod est verum. Quod si tò realiter tolleretur diversitatem sensûs formalis in prædictis propositionibus, & faceret sensum purè identicum, una semper esset falsa, nempe ista. Paternitas non est realiter filiatio, quia sensus esset, res quæ est paternitas non est filiatio, quod est falsum. Item ista non esset vera, homo realiter non convenit cum equo per suam rationalitatem, quia sensus esset, nihil est in re quæ est homo, per quod homo conveniat cum equo: quod item est falsum, cum in re illa sit animalitas, per quam cum equo convenit.

11. Hic adverte ex Molina, quæstione vigesima tertia, articulo secundo, disputatione tertia, & aliis, nos, quando loquimur de rebus præcisè, & inadæquatè conceptis, sumere conceptus illos objectivos, & nomina illis significandis imposita, perinde ac si nihil esset in re nisi id quod ita præcisè concipimus, & significamus. Unde de diversis conceptibus objectivis ejusdem rei, quasi de duabus rebus loquimur, manendo tamen intra illam præcisionem, quæ constituendo diversos sensus formales primo-intentionaliter reales, licet non totam rei entitatem, seu realitatem

importantes, impedit talium conceptum, & propositionum falsitatem. Et hoc maxime verum est in præsentī materia de Trinitate, in qua patrem non possumus identificare essentiæ, quin essentiam præscindamus à filiatione, & vicissim. Itaque paternitatem, essentiam & filiationem, ut tria concipimus, sed præcisivè, seu non excludendū identitatem essentiæ cum filiatione, quando eam identificamus paternitati: neque negando de ea paternitatem, dum eam dicimus esse realiter filiationem. Et sic nihil implicat ea quæ in speciem contradictoria sunt, de eadem re talem habente multipliciter virtuales, & secundum nostros conceptus formalem verificari.

12. Objicies quartò ex Esparsa, questione trigesima octava. Ratio identitatis & unitatis non est ratio distinctionis & multipliciter. Et similiter unum est quod non est multa: & multa sunt quæ non sunt unum. Natura autem divina est ratio identitatis & unitatis intra Deum, ut pote identificans sibi omnia divina, & constituens cum iis omnibus unum Deum. Personalitas verò, seu relatio ad intra, est ratio distinctionis & multipliciter in Deo, ut pote distinguens personas divinas inter se, & constituens in ipsis & cum ipsis Trinitatem. Repugnat igitur ut natura divina, & personalitas, seu relatio ad intra sint

unum : ac proinde repugnat mysterium quale à nobis creditur.

13. Respondeo rationem identitatis & unitatis, si ipsa secundum se est infinita, posse non quidem formaliter, & ratione nostra esse rationem distinctionis, & multiplici-
tatis, sed ei realiter identificari, quia perfectio infinita, ob sui infinitatem, exigit necessariò communicationem sui, ac proinde communicationem ad intra, sine imperfectione, & propterea sine compositione, ad quod necessarium est ut sit pluralitas rationum formalium identificatarum illi perfectioni infinitæ, non tamen inter seipsas.

14. Ad id quod dicitur de uno. Respondeo cum eodem Esparsa, unum, quod est proprium Dei, non esse non multa simpliciter, & secundum omnem rationem identificatam realiter secum, sed solum secundum eam rationem, seu formalitatem, ac virtualitatem, in qua fundatur unitas, quod est Patrem, & Filium non esse multa in natura, seu Deitate. Idem dicitur de multis, seu de multitudine prædicatorum distinctorum in Deo. Nam multitudo non est in eo omni modo, cum non sit in omni ratione identificata multis, sed est tantum in ipsa ratione distinctionis & multiplici-
tatis, quam non impedit illa unitas, ut pote perfectionis infinitæ, & summe communica-
bilis.

15. Objicies quintò, si daretur in Deo identitas unius rationis formalis cum rationibus à se invicem realiter distinctis, daretur in creaturis aliqua similitudo talis unitatis multipliciter sibi identificatam habentis, quia creaturæ causam suam repræsentant, suntque participationes virtutis, ac perfectionis quæ ipsi inest nihil autem & tale in creatis. Ergo.

16. Respondeo negando majorem, & dico id quod Deo convenit quatenus est ens infinitum, esse imparticipabile, sicut ipsa infinitas, immensitas, æternitas, incomprehensibilitas, & alia talia imparticipabilia sunt. Jam autem illa identitas cum distinctis convenit Deo ratione infinitatis; quod probatur, quia quod in ente finito implicat, ratione præcisæ finitudinis, id enti infinito convenit ratione infinitatis. Atqui talis identitas implicat in ente finito ratione finitudinis. Ergo. Minor probatur, quia ad prædictam identitatem requiritur ut id quod identificatur distinctis, non sit melius intensivè, sive non sit perfectius per illa sibi identificata, quàm esset sine illis. Hoc autem implicat in re finita. Ergo. Hujus syllogismi major probatur, quia si id quod supponitur identificatum distinctis, fiat intensivè melius, seu perfectius per ipsa, quàm sine illis, necessariò distinguetur ab illis. Quidquid enim sit realiter melius

lius per aliquid, quàm sine illo, distinguitur ab illo, saltem potentialiter, ut una pars unius aquæ ab alia. Itaque sic identificabitur, & non identificabitur. Minor probatur, quia omne finitum melius fit etiam intensivè, seu perfectius, & majoris æstimabilitatis ac virtutis, accessione finiti, quàm sine illo: & plura finita meliora sunt uno. Itaque entitas illa finita, quæ supponitur habere identitatem cum multis distinctis, erit melior etiam intensivè & perfectior cum illis, quàm ipsis præcisis: & erit melior cum illis omnibus, quàm cum uno solo. Hæc autem omnia non sic se habent in ente infinito, quia hoc ipso quòd aliquid est infinitum, nullius accessione fit melius intensivè aut perfectius. Et si ve plura accedant, si ve pauciora, si ve inter se distincta, si ve indistincta, infinitam perfectionem non augebunt intensivè, sed potius necessarium erit ipsa in illa fuisse eminenter præhabita, & perfectionem quæ additur esse tantùm numeralem. Sic non implicat id quod est infinitum, identificari distinctis: & hoc est infiniti quatenus infinitum est, proprium. Consimilia vide apud Antonium Perem in tractatu de Trinitate.



QUÆSTIO NONA.

De Processionibus Divinis.

SECTIO PRIMA.

An dentur Processiones in Deo.

1. **P**rocessio hîc sumitur pro emanatione qua quid ab aliquo non virtualiter tantum, & secundum nostram rationem procedit, ut risibile à rationali, sed realiter ab eo producitur.

2. Dico dantur processionés immanentes in Deo. Probatur primò ex scriptura, Ioan. 8. ubi Christus de se ut Deo, & Dei Filio loquens, sic ait. *Ego ex Deo processi & veni.* Et cap. 16. *Exivi à patre, & veni in mundum.* De Spiritu verò sancto, ejusdem Ioan. c. 15. Sic loquitur. *Cum venerit Paracletus quem ego mittam vobis à Patre, Spiritum veritatis, qui à patre procedit.*

3. Probatur secundò ex Conciliis, & maximè ex Nicæno, in quo contra Arianos definitum est. Filium esse Deum de Deo, & Spiritum item sanctum utrique consubstantialem procedere, & simul adorari. Item ex Lugdunensi, cujus declaratio circa illud, *Qui ex patre filioque proce-*

QUÆST. IX. *De Process. Divin.* 475
dit, sic habet *Spiritus sanctus aternaliter ex
Patre & ex Filio non tanquam ex duobus
principiis sed tanquam ex uno principio,
non duabus spirationibus sed unica spiratione
procedit.*

4. Ratio est quia posita in Deo existen-
tia trium personarum, quæ ad infinitatem
Dei, summamque ejus perfectionem per-
tinet, ut dictum est quæstione præcedenti,
non potest esse in Deo talis multiplicitas,
nisi una persona ab alia procedat, quia non
potest esse talis distinctio nisi per oppositio-
nem relativam, siquidem omnia absoluta
sunt unum in ente summè perfecto. Alio-
quin infinita essent absolute, & omni mo-
do plura: oppositio autem relativa nulla alia
in Deo realis ad intra esse potest, nisi quæ
in reali origine unius ab alio consistit. Et
hinc inter attributa, quæ sunt tribus per-
sonis communia, & essentialia dicuntur,
nulla est realis distinctio, quia non est inter
ipsa comparata cum essentia, aut secum
invicem, realis processio. Igitur necesse
est ad mysterium Trinitatis, & personarum
in Deo multipliciter, esse in eo reales
processiones.

5. Objicies si dantur in Deo processio-
nes reales, personæ procedentes erunt, &
non erunt Deus. Erunt, ut supponitur.
Non erunt autem, quia non erunt à
se.

6. Respondeo fore à se hoc sensu quòd non erunt ab alio ut à causa, seu à principio extrahente terminum ex nihilo ipsius termini, sive actuali, eo quòd caruerit existentia, sive virtuali, eo quòd potuerit carere, erunt igitur illæ personæ absoluta & omnimoda necessitate: tamque necessarium erit illas esse, quàm Deitatem & paternitatem. Præterea esse essenziale, quod accipiunt, non est productum, quo modo propriè esset ab alio, sed est communicatum tantum. Et enim ipsa natura divina, quæ manet ipsa in se maximè singularis, non autem multiplicatur ut natura humana, & quævis creata quæ similem sibi producit, non seipsam alteri communicat. Ac denique esse personale quod accipiunt, non est aliud ab illo esse essentiali quod caret omni principio, sed summè ipsi identificatur. Neque etiam est strictè aliud ab esse personali, à quo procedit, quia illud dicit pluralitatem, non modò suppositorum, sed etiam personarum. Quare Filius erit tantum aliud à Patre, & Spiritus sanctus aliud à Patre & Filio, non autem aliud, & hoc ipso quòd non erunt aliud ab eo quod omni modo est à se, non desinent esse ens à se. Et non necesse est quidquid est Deus, aliter esse ens à se sub omni ratione identificata cum Deo.

7. Instabis, ipsum produci ab alio, & ab eo accipere suum esse, etsi necessarium, & necessariò, dicit imperfectionem, quia dicit indigentiam, posterioritatem, quæ repugnat enti summè perfecto. Ergo id non est admittendum in Deo.

8. Respondeo negando antecedens. Et ad probationem, nego esse indigentiam principii, ubi est summa, & absoluta existendi, & procedendi necessitas, & connexio talis inter principium & principiatum, ut implicet hoc non oriri ab illo.

9. Neque dicas, hoc quidem quod procedit, esse necessariò determinatum ad esse, sed determinatione extrinseca, quia principium illud priùs est necessitatum ad productionem hujus.

10. Respondeo enim esse determinatum in se, quia ex natura rei, ipsum sic procedere, dicit perfectionem quæ deesse non potest enti infinito, & in natura, quæ est etiam illo principio productivo prior, continetur eminenter, jamque ex eo quòd ita contineatur, debet necessariò esse formaliter. Itaque antequam illud principium ipsius productivum formaliter intelligatur existere, jam ipsum existit radicaliter in aliquo, à quo impossibile est ipsum distinguere, & non esse idem cum illo realiter. Et sic esse posterius secundum suam proprietatem formalem, non dicit

imperfectionem , sed modum procedendi ex natura rei necessarium : nec excludit rationem entis quod sine sui causa existat, sed illam rationem certo modo nullum defectum involuente terminat & conjungit cum aliis quæ ad infinitam Dei perfectionem necessario requiruntur, & subsistendi modum infinitè perfectum constituunt.

11. Instabis adhuc , absolutè loquendo beatius est dare , quàm accipere ; itaque melior erit Pater, qui dat esse Filio, quàm Filius, qui proinde non erit Deus. Idemque erit de Spiritu sancto comparato cum Patre & Filio.

12. Respondeo illud. Christi verum esse de datione libera , qua quod datur , beneficium est , non de absolutè necessaria , qua quod datur, non potuit non dari, & ipsum infinitum est in se, & continet excellenti modo ipsam dationis activæ , qua communicatum est, perfectionem. Quod totum contingit in processione divina , in qua persona producta , ratione essentiæ continet producentem , radicaliter in ipsa inclusam.

SECTIO SECUNDA.

An processiones divinae fiant per intellectum & voluntatem.

1. **N**egat Durandus in 1. dist. 6. q. 2. ubi docet Processiones divinas es-

se actiones essentia, seu naturæ divinæ, quatenus hæc ratione nostra intellectum & voluntatem antecedit, adeo ut solâ in Deo intellectâ naturâ, & præcisè per mentem intellectu & voluntate, & omnibus illarum potentiarum actibus, esset adhuc in divinis fœcunditas sufficiens ad generationem Filii, & ad spirationem Spiritus sancti.

2. Contrarium sentiunt Theologi communiter, à quorum plurimis opinio illa damnatur erroris, ac temeritatis. Cum his.

3. Dico, processiones divinæ fiunt per intellectum & voluntatem: probatur, quia omne verbum aliquo modo est ab intellectu. Atqui secunda persona in sacris Scripturis sæpe appellatur Verbum, & Græcè λόγος. Joan. 1. In principio erat verbum. Et verbum Caro Factum est. Et ejusdem Joan. 1. Ep. c. 5. Tres sunt qui testimonium dant in Cœlo, Pater, Verbum, & Spiritus sanctus. Et Apocal. 19. vocabitur nomen ejus Verbum Dei. Quare necesse est illam personam aliquo modo produci per intellectum, & intellectum esse principium ejus sive totale, sive parziale, sive quo, sive quod, sive proximum, sive remotum, de quibus dicetur postea. Quod si secunda persona per intellectum procedit, hinc omnino sequitur tertiam procedere per voluntatem: quia

inconceptibile est, & rationi planè repugnat, cum sint tres personæ Trinitatis, & ex iis duæ per processiones habeant rationem formalem, sui constitutivam, unam procedere per intellectum, & per talem processionem habere suum esse personale; aliam verò aliter procedere aliterque habere suum esse personale, quàm per voluntatem. Quare dum à sancto Joanne secunda persona, dicitur Verbum, totum mysterium Trinitatis partim formaliter, partim consequenter, docetur. Sed & tertiæ personæ formaliter in scriptura attribuantur ea quæ sunt charitatis, & dilectionis, pertinentque ad voluntatem. ut Rom. 5. Charitas Dei diffusa est in cordibus nostris, per Spiritum sanctum, qui datus est nobis. Et sancti Patres Spiritum sanctum expressè vocant amorem, ut sanctus Augustinus, qui lib. 9. de Trinit. c. 12. ita habet: sicut Dei verbum Filium esse nullus Christianus dubitat, ita charitatem esse Spiritum. Et talem appellationem tota Ecclesia in divinis officiis usurpat, ac retinet. Quare Spiritus sanctus omnino per voluntatem procedit, ita ut illa sit quomodocumque illius principium.

4. Confirmatur assertio, quia posito quòd Deus agat ad intra, ut necesse est, ex dictis quæstione prima, non potest
digniori

digniori modo agere , quàm per intellectum, & voluntatem. Itemque posito quòd in eo debeat esse communicatio, & fecunditas , non potest nobiliori modo fieri , quàm per ipsas potentias. Et sic redditur ratio cur sint tantùm duæ processiones , & cur processio filii sit prior origine quàm processio Spiritus sancti : ex eo quòd scilicet intellectus ex natura rei sit prior voluntate, & radix ejus.

5. Objicit Durandus, non potest intelligi quòd filius in divinis producat per actum intellectus, & Spiritus sanctus per actum voluntatis, nisi dupliciter, uno modo quòd isti actus sint ipsæ productiones personarum, alio modo quòd sint principia productionum. Primum non potest dici, primò quia productiones personarum secundùm omnes sunt actus notionales, & non essentielles. Sed intelligere & velle sunt actus essentielles, & non notionales. Ergo non sunt ipsæ productiones. Secundò quia si isti actus essent productiones personarum, unicuique personæ competeret producere Filium, itèinque Spiritum sanctum, quia cuicumque convenit actus per quem persona producit, competit producere personam ad quam actus ille terminatur. Intelligere autem, & velle competit omnibus personis divinis. Ergo omnes per.

sonæ divinæ producerent Filium , & similiter Spiritum sanctum. Tertiò quia productiones personarum differunt realiter: Intelligere autem & velle non sic differunt. Secundum item dici non potest , quia illud cuius conditio opposita est fœcunditati , non potest esse principium alicujus productivum. Atqui conditio actuum intelligendi & volendi est opposita fœcunditati , quia ex ipsis nihil aliud constituitur , seu consequitur , ex Aristotele , lib. 9. Metaph. Ergo.

6. Respondeo actus intelligendi , & volendi pertinere ad principium productivum Filii , & Spiritus sancti. Ad probationem in contrarium , respondeo actus intellectionis & volitionis divinæ posse conferre ad productionem immanentem in Deo , absque eo quòd illi propriè producant id quod in termino produci debet , cum satis ad talem productionem conferre possint per hoc quod ipsi communicantur termino , seu hypostasi quæ per se produci debet , ac recipere ipsos , & cum ipsis consequenter essentiam.

7. Et huc spectat quod actus illi non sint accidentia , ut actus nostri intellectus & nostræ voluntatis , sed substantia ipsa Dei. Unde sequitur quòd habeant proportionem ad productionem substantialis termini per communicationem sui. .

8. Respondent alii negando conditionem actuum nostri intellectus, & voluntatis, esse oppositam fecunditati, cum per eos producantur species, & habitus. Sed quidquid sit de ista productione, quam non omnes admittunt, prior solutio est magis consentanea modo quo actus divini intellectus, & voluntatis habent hîc rationem principii.

9. Instat Durandus, secundum idem proportionatè competit fecunditas creaturis, & Deo, sed fecunditas aliquid producendi, creaturis competit non ex hoc quòd sint intelligentes, & volentes, sed per aliquid prius, & communius. Unde & virtus generandi aliud, invenitur in rebus inanimatis carentibus intellectu, & ubi invenitur in rebus habentibus intellectum, hoc non est per intelligere & velle, aut per aliquid ad hoc pertinens. Ergo similiter in Deo, etsi natura Dei sit intelligens, & volens, ex hoc tamen nulla fecunditas inerit ad producendam quantamcumque personam, sed sicut calor ignis, si esset intelligens, causaret caliditatem sibi similem fecunditate naturæ suæ, sicut nunc facit, nec ad hoc aliquid cooperaretur suum intelligere aut velle, sic natura divina, licet sit intelligens, & volens, ex infinitate sua habet fecunditatem quòd virtute ejus persona

fit à persona, ad quam tamen intelligere aut velle nihil cooperatur.

10. Respondeo secundum idem quidem competere fecunditatem Deo & creaturis, ita ut id quod in creaturis confert ad productionem, conferat quoque in Deo, nempe natura quæ est principium primum omnis productionis; sed nego id solum quod confert in creaturis, conferre in Deo, aut eodem modo conferre, & id quod in creaturis non confert, nihil conferre ad productiones quæ sunt ad intra in Deo. Ratio est quia in Deo alius est producendi modus, nempe non per solam productionem propriè dictam termini per se distincti, sed per communicationem indistinctorum, quæ illi eidem distincto termino communicentur, ut pertinentia ad naturam, & substantiam ejus, illamque constituantia. Et talia sunt natura ipsa singularissima Dei, cum intellectu, & intellectione quoad filium: quoad autem Spiritum sanctum eadem natura cum voluntate, & volitione. Itaque talia habent rationem principii, non productivi per se formaliter, si productivum sumatur pro eo quod habet vim producendi terminum à se distinctum, ut contingit in creaturis, & in ipsa Dei natura atque omnipotentia comparata ad ea quæ sunt ad extra, sed constitutivi, & completivi per

communicationem sui. Ipsa autem personalitas personæ producentis, putà paternitas in generatione Verbi, & tum ipsa paternitas, tum filiatio in spiratione Spiritus sancti, sunt principium strictè productivum termini distincti ut sic, quemadmodum infra ostendetur. Et ratio talis principii non debet convenire naturæ per se in Deo, quia quod per se in Deo distinctionem proximè constituit, sive efficit, non est id quod maximè est commune, & per se in omnibus personis reperitur. Quare id melius formalitati per se distinctæ, cujuscmodi est personalitas, tribuitur. Sic ergo productioni quæ est alterius rationis ab omni productione creata, respondet proportionatè ad dissimilitudinem ejus, diversa principiorum qualitas, & conditio, ita ut cum terminis productus, & aliqua sine multiplicitate communia habeat, & aliquid etiam per se distinctum, alia sint principia communicationis, & aliud principium multiplicatis, sive distinctionis. Et in iis quæ assignantur, non modo ad multiplicitem, sed etiam ad communicationem, nihil sit non ita necessarium, ut eo sublato talis productionis ratio nec haberi, nec intelligi possit.

11. Instat præterea Durandus, qualis est ordo rei inter differentia realiter, ta-

lis est ordo rationis inter differentia secundum rationem. Sed ubi natura, intellectus, & voluntas differunt realiter, productio est realiter vi naturæ, & non intellectûs, aut voluntatis, ergo sic est in Deo, in quo ista differentia sunt solum secundum rationem.

12. Respondeo distinguendo majorem, si nulla sit disparitas, nisi penes distinctionem hinc realem, inde rationis, concedo: si sit alia disparitas, & alius se habendi modus, ut hîc contingit propter jam dîctos productionis & communicationis modos, nego.

SECTIO TERTIA.

Quomodo intellectus & voluntas conferunt ad processiones divinas.

1. **S**COTUS in 1. dist. 2. q. 755. ad secundum dubium asserit, Filium quidem procedere per intellectum, & Spiritum sanctum per voluntatem, non tamen fieri processiones illas per ipsam intellectionem, & volitionem, quæ tantum concomitanter ad hoc se habeant, sicut alia attributa. Quare secundum illum potentia Dei intellectiva habet duplicem actum secundum, utrumque immediatum, unum qui est intellectio, omnibus per-

sonis communis, alterum qui sit dictio, seu productio verbi, soli conveniens Patri: & similiter potentia volitiva duos etiam actus immediatos habeat, unum qui sit volitio, omnibus personis communis, quo illæ omnes volunt sua objecta: alterum qui sit spiratio qua pater & filius producant spiritum sanctum, absque eo quod inter tales actus sit subordinatio, qua unus habeat rationem principii respectu alterius.

2. Contrarium sentiunt communiter Theologi, & docent per intellectum divinum, mediante, & conferente intellectione, produci filium: & similiter per voluntatem, mediante, & conferente in ratione principii ulterioris volitione, produci spiritum Sanctum. Horum sententia, ut probetur.

3. Adverte primò in nostro intellectu duos esse loquendi modos, unum quo loquitur sibi, & hoc fit præcisè per intellectiorem, & judicium de objecto: alterum quo loquitur alteri, enuntiando illi suam cogitationem, ac judicium: quod sine locutione externa & instrumentali fit inter Angelos, per conceptus, de quorum propria ratione est talis enuntiatio, ac declaratio. Diversitas illa locutionum bene innotescit, & constat ex diversitate essentiali propositionum nostrarum voca-

lium, per quas illæ locutiones exprimuntur. Nam ista propositio v. g. Deus est trinus, quatenus præcisè continet iudicium de tali objecto: & ista, dico tibi Petre, Deum esse trinum, plurimùm significatione differunt: & una supponit aliam, nempe locutio ad alterum, locutionem ad se ipsum, nemo enim alteri enuntiat nisi quod ipse apud se concepit etsi autem qui loquitur alteri dicat tantum, Deus est trinus, tamen talis propositio, ut directæ ad illum, habet eandem significationem quam ista. Dico tibi Deum esse trinum. Itaque ipsa ut est locutio ad alterum, differt essentialiter à se ipsa prout est tantum imago & signum iudicatæ identitatis inter subjectum & terminum, sine ulla enuntiationis directione ad audientem. Similiter etiam in voluntate duo sunt amandi modi, unus quo vult præcisè objecta sibi proposita: alter quo amorem suum exprimit, effundendo illum, extra seipsam, in personam amatam. Et illi actus sic concipi possunt, ut per unum quidem volens dicat, volo mihi, vel tali personæ, tale bonum per alterum autem dicat, per voluntatem talis boni tibi adhæreo, & me in te per meum affectum transfero. Tales igitur actus differunt eo modo quo duo prædicti loquendi modi, nam ita se habent ipsi in volun-

tate, sicut illi in intellectu; & effusio illa ac tendentia in personam amatam, ita supponit complacentiam priorem, & causatur ab ea suo modo, sicut dictio à judicio. Et in hominibus qui suos actus internos non possunt manifestare nisi per externos, qui supponunt pro internis, effusio illa, ac tendentia amoris exprimitur per amplexus, & similia amicitiae signa.

4. Adverte secundò verbum divinum, seu actum divini intellectus, simul esse & locutionem qua Deus loquitur sibi ipsi, quomodo convenit tribus personis, quæ ita sunt intelligentes; & dictionem, cujus ratio formalis illi ad se ipsum locutioni supervenit, & solius Patris propria est; unde soli Patri convenit habere verbum propriè sumptum. Et sic dictio illa Patris activè sumpta ipsum constituit loquentem, eique correspondet terminus, qui est hypostatis recipiens notitiam quæ per illam communicatur, proportionatè ad id quod fit in hominibus, quorum unus enuntiat quod concipit alteri, alter autem illud idem audit, ac percipit: sed cum hoc infinito discrimine, quod dictio divina producit terminum percipientem, eique communicat eandem singulariter notitiam quam habet ipse loquens, & cum ea intellectum, & naturam, quatenus illa sunt talis notitiæ principia. Similiter quoque

dicendum est actum divinæ voluntatis simul esse & amorem essentialem quo Deus ut sic, & personæ divinæ constituuntur absolutè volentes sua objecta, & impulsus illum quo Pater & Filius se se infinitè diligentes, dilectionis suæ terminum producunt, eamque termino sic communicant cum ipsa voluntate, & natura, ut hæc in illo subsistant. Sic dilectionis communicatio ipsam dilectionem supponit, ipsaque activè sumpta Patrem & Filium spirantes constituit: passivè autem sumpta pro termino, cum termino ipso cui fit talis communicatio, Spiritum sanctum spiratum, seu per dilectionem productum constituit. Hinc ipsum D. Bernardus sermone 8. in cant. osculum Patris ad Filium vocat. Et Divus Laurentius Justinianus in libro de obedientia, suavissimum, ac beatissimum mutui amoris amplexum. His præmissis.

5 Dico, processio Filii, & Spiritus sancti non fit per solas potentias intelligendi, & volendi sumptas præcisè in actu primo, sed intellectio etiam, & volitio actualis pertinent ad principium productivum Filii & Spiritus sancti. Probatur, quia universum dictio, seu locutio, qua quis loquitur alteri, non est ab intellectu per se sumpto immediatè, sed ab intellectu concipiente illud ipsum

quod loquens dicit. Et impulsus amoris directus ad personam amatam, non est immediatè à voluntate, nullo præsupposito alio actu, sed à voluntate habente apud se complacentiam erga illam personam. Atqui Filius æternus producit per dictionem Patris: Spiritus autem sanctus per talem communicationem & impulsus amoris. Ergo intellectio & volitio non se habent tantum concomitanter ad illas productiones, sed ad eas aliquo modo conferunt.

6. Dices memoria non dicit actum secundum intelligendi, sed primum, nempe intellectum & species quæ ad recollectionem inserviunt. Atqui teste Augustino, apud Scotum, loco supra citato, & Anselmum in Monologio, capite 31. Verbum procedit ex memoria Patris. Ergo procedit per intellectum sumptum in actu primo.

8. Respondeo memoriam ad loquendum sibi, seu ad concipiendam de novo rem antea conceptam, non dicere antecedenter ad illam locutionem, nisi actum primum intellectus, cum speciebus rei ut antea conceptæ: ad loquendum autem alteri dicere, etiam actum secundum quo prius loquatur sibi, & denuo concipiat rem antea cognitam. Et præterea dico cum asseritur verbum procedere ex

memoria Patris ; memoriam ibi non sumi pro potentia recordativa , seu secundò cognoscitiva rei antea conceptæ , sed pro intellectu præhabente , seu in priori signo rationis habente notitiam rei dicendæ. Et ex hoc vero sensu patet ad dictionem requiri non modo intellectum , sed intellectum actu præconciipientem illud , cujus notitia communicatur.

SECTIO QUARTA.

An & quomodo in processibus divinis personalitas produciens habeat rationem principii.

1. **C**irca hoc duæ sunt sententiæ. Multi enim asserunt , illa eadem quæ sunt principia communicationis , nempe naturam & potentias intelligendi , ac volendi , cum suis actibus , esse etiam principia productionis ut sic , seu id quod productivè attingit rationem realiter distinctam à persona producente , ita ut personalitas illis adveniens , constituat tantum principium quod productionis. Et ita sentiunt Caiëtanus , Suares , & plures alii. Contra autem multi docent quod jam supra dictum , obiterque probatum est ; personalitatem producentis esse formale principium quo productionis ut sic ,

seu id quod per se attingit rationem termini realiter producti distinctivam. Ita docet S. Thomas in 1. Sentent. dist. 7. q. 1. a. 2. in c. quem nihil retractasse in summa, ostendit Vechenus disp. 31. c. 5. num. 18. Et pro eadem sententia citantur S. Bonaventura, Durandus, Ariminen-
sis &c. Expressiùs autem, & ex professo id docent multi recentiores, & idem Vechenus, Martinon, & alij.

2. Horum sententia, præter jam dicta, probatur ulteriùs, quia omne principium quod per se producit vera productione terminum, necessariò ab eo distinguitur. Et nihil est id à quo, aliquid ab ipso indistinctum, realiter per veram emanationem procedit. Atqui neque natura divina, neque dictæ potentiæ, neque actus earum realiter distinguuntur à termino processionis, respectu cujus habent aliquo modo rationem principii. Ergo non sunt principium strictè & per se productivum rationis formalis quæ in illo termino distinctionem inter ipsum & producens constituit, sed aliquo alio modo habent rationem principii respectu illius termini. Major est per se evidens, & identitas principii strictè productivi cum termino verè & realiter producto, contradictionem involuit: siquidem tale principium debet esse reali ordine, atque

origine prius producto : productum autem non potest esse ita prius se ipso. Itaque si identificaretur producenti, esset se ipso prius, & non esset.

3. Dices ad productionem satis esse si principium quod, à termino producto distinguatur, non autem necesse esse ut principium quo, ita sit distinctum à termino. Hic autem principium quod distinguetur à termino producto, nempe persona, cui tribuitur omnis actio, quæ est à quavis virtute quæ ipsi insit, secundum illud, *Actiones sunt suppositorum.* Ergo sufficiens erit distinctio ad processionem divinam etsi principium formale quod, productionis non distinguatur à termino producto.

4. Respondeo è contra distinctionem à termino producto requiri per se formaliter, & directè in principio formali quo, productionis, sive in forma ac virtute à qua est processio & emanatio, cum nihil à se ipso procedat. Quare ista propositio vera est in sensu formali. Producent, ut producat, distinguitur à termino producto. Atqui solum principium formale quo est propriè & strictè producat. Id autem quod est tantum principium quod, si non sit etiam principium quo, non est formale producat, sed tantum denominativè, in quantum est primum subjectum in quo est

QUÆST. IX. *De Process. Divin.* 495
virtus quæ producit, quæque æquè produ-
ceret si esset extra ipsum. Ergo necessitas di-
stinctionis à termino producto cadit per se
in principium formale quo illius termini.

5. Dices secundò, natura divina &
prædictæ potentiæ & actus nequidem
possunt esse inadæquatè principium pro-
ductionis ut sic, in processibus divi-
nis. Ita prædicti authores contra Valen-
tiam, Arrubalem Gamachæum, & alios
asserentes essentielles actus esse principia
proxima processionum divinarum, sed in-
completa, & velut partialia quæ per pro-
prietates relativas, in ratione veri prin-
cipii productivi compleantur. Probatur
assertio, quia eadem contradictio quæ in-
venitur in eo quòd aliquid se ipsum adæ-
quatè producat, invenitur quoque in eo
quòd aliquid sit inadæquatum sui ipsius
principium, in quantum idem esset se ipso
realiter prius & non esset prius. Omne
enim quod actu producit, sive sit prin-
cipium totale, sive sit parziale, debet esse
reali ordine prius ut producat, & quod
producit debet esse realiter posterius
omnibus principiis sui productivis, ut ab
iis sibi præsuppositis procedat. Atqui ne-
que natura divina neque intellectus &
voluntas Dei, neque actus essentielles in-
telligendi & volendi sunt aliquid reali
ordine prius quàm persona producta, quæ

ab iis nullo modo realiter distinguitur, sed summam cum illis realem identitatem habet, Ergo nihil illorum potest esse, etiam partiale & inadæquatum, talis personæ productivum principium.

6. Dices omnia salvari, si dicatur intellectionem & volitionem essentialem esse principium proximum personarum procedentium non per se absolute, sed prout connotant relationes distinctas personarum producentium.

7. Respondeo non sic salvari contradictionem supra allatam, quia non per hoc ponitur distinctio quæ per se formaliter, & directe est necessaria inter principium quo emanationis, & terminum qui realiter emanat, ac producitur; quæ distinctione sublata eorum quæ tantum ratione distinguuntur, unum erit reali ordine prius, & aliud non sic erit prius: in quo est secundum rem contradictio.

8. Dices preterea cum Arriaga disp. 45. sect. 5. etsi principium processionis non distinguatur, satis esse si ipsa processio activa distinguatur: quod hîc eveniet, quia processio illa activa identificatur principio quod in quo erit.

8. Respondeo impossibile esse ut detur processio activa à termino producto distincta, nisi illa egrediatur à principio formali quo pariter distincto ab illo termino.

mino. Hinc posito quòd actio à causâ in creatis distinguatur, per se implicat aliquid esse causam actionis qua sibi det suum primum esse, idque defectu distinctionis à se ipso, quæ requireretur, ut esset se ipso prius. At inquit Arriaga, res eadem potest esse causâ sui ipsius dummodo supponatur existens per actionem adequatam ab alio principio. Quia igitur intellectio divina in patre præ-existit, non quidem ab alia causâ, verùm à se, poterit esse principium filiationis sibi identificatæ.

10. Respondeo primò idem non posse esse illo modo causam sui ipsius absque eo quòd ipsum replicetur, & sic duplicem existentiam habeat, unam priorem, alteram reali ordine posteriorem, eo modo quo Christus se ipsum in Sacramento Eucharistiæ producit. Hoc autem non cadit in intellectiorem divinam, sicuti cadit in humanitatem ejus, quia id est proprium rei defectibilis, quæ magis existat per duas existentias, quàm per unam, quæ non sit infinitè perfectâ, sed perfectibilis ac supplebilis per aliam; ergo etsi in creatis idem possit se ipsum dicto modo producere, nihil sequitur inde simile in divinis. Major probatur, quia non potest esse id quod est de se formaliter effectivum replicationis, imò

ipsa effectio secundæ existentia, quin sit replicatio : Hoc autem est duplex actio totalis respectu ejusdem termini: nec aliud assignari potest per quod id fiat. Quia igitur, si res eadem se ipsam secundò producat, id fiet per novam actionem totalem, res illa necessario replicabitur.

11. Respondeo secundò, in tali hypothesis, rem illam quæ erit sui ipsius replicatæ causa, non fore causam iteratæ suæ singularitatis nisi identicè, quia determinatio Physica illius singularitatis est à Deo, qui ex veriore Philosophia ad omnes effectuum individuationes determinat. Itaque loquendo in sensu formali, qua de re hîc est quæstio, principium formale quo, illius singularitatis reproductæ, erit ipse Deus, non autem res quæ denuo producet, & sic semper manebit principium productionis formale quo, à re producta realiter distingui.

12. Dico tertio sola proprietas relativa est principium formale quo productionis, prout productio est. Ita authores pro prima assertione citati.

13. Probatur primò ex Patribus, quos citat Martinon, inter quos Athanasius in Dialogo primo de Trinitate contra Anomæos, explicans illud Psalmi 109. *ex utero ante luciferum genui te*, sic ait *uteri nomine genitricem vim ipsius hyposta-*

QUÆST. IX. *De Process. Divin.* 499
sis intelligi. Nec dici potest, uteri nomine eum substantiam intelligere, cum Gregorius Nazianzenus in oratione de laudibus Athanasii, eum unam substantiam, & tres hypostases docuisse, easque idem fuisse ac personas, affirmet.

14. Probatur secundo ex Concilio Lateranensi c. 2. de summa Trinitate, ubi sic habetur. Illa res, id est natura, non est generans, neque genita, sed est Pater qui generat, & Filius qui gignitur. Quibus verbis significatur patrem generare. per hoc quod sibi proprium ac differentiale est. Si enim per naturam generaret. Ipsa verè generans diceretur: sicut absolute omnis virtus qua suppositum aliquid facere dicitur, dicitur illud ipsum facere, ut anima qua homo intelligit, intelligere: calor quo ignis calefacit, calefacere: albedo qua album disgregat visum, ipsa disgregare.

15. Probatur tertio ex prædictis quia produciens ut sic, debet esse distinctum, & nihil indistinctum ab aliquo potest esse principium quo illud producat, etiam inadæquatum, nisi productio sit replicatio: quod neque adhuc in sensu formali verum est, & hîc locum non habet. Atqui sola Hypostasis personæ producentis, est distincta realiter ab eo quod in termino strictè est productum. Ergo sola il-

lud, sive ipsam personalitatem producit. Quòd si essentia aut intellectio simul producerent, ipsæ deberent esse distinctæ, quia ipsæ opponerentur per relationes originis, seu per originationem ipsam activam, quæ sola hîc facit distinctionem producentis à producto. Et maximè ipsæ distinguerentur, ac potiori jure quàm personalitas putà quam paternitas, quia ubi distinctio fundatur in productione, id quod magis primariò, ac per se est principium activum distinctionis, est maximè distinctum. Atqui si semel essentia, vel intellectio sint principium productionis ut sic, erunt maximè primarium ac formalissimum principium, quia rationes quibus probatur ipsis convenire rationem principii productivi, illam omnino, aut ferè adiment personalitati, quæ tantum erit subjectum primum illius virtutis, per quam fiet productio, & per se non continebit terminum, sicut illa agendi principia magis formalia. Itaque essentia, aut intellectio magis distinguentur à personalitate filii, quàm paternitas: quod est contra fidem.

SECTIO QUINTA.

Solvuntur objectiones.

1. **O**bjicies primò, Filius, Hebr. 1. vocatur *splendor gloria* patris, splendor autem est à luce ut sic, & Pater ipsa maximè divinitate est lux. Ergo Filius est à natura Patris ut principio suæ productionis. Et hoc testatur Athanasius lib. 2. contra Anomæos, his verbis. *Pater quoniam Deus est, ipsaque, majestas, splendorem habet, eum videlicet quem genuit Deum à se subsistentem.*

2. Respondeo Filium esse splendorem paternæ gloriæ per id quòd est ipsi còmmunicatum, nempe per intellectiònem, quæ est de se imago, cum infinita claritate lucem ipsam divinitatis & paternitatem repræsentans : & quia hoc convenit ipsi secundùm modum per quem procedit, ideo hoc illi propriè attribuitur. Non tamen id ei formaliter convenit quatenus alter est, & distinctus à Patre. Sed quatenus id ab illo accepit, quod commune cum illo habet, & accepit per viam assimilationis.

3. Objicies secundò, Patres sæpe dicunt Filium esse genitum ex substantia Patris.

Respondeo illos quoad hoc sumere generationem secundum quod communicationem includit, non autem prout strictè productiva est ipsius proprietatis distinctæ: & absolute nihil aliud intelligere per illam ex substantia paterna productionem, nisi consubstantialitatem, quæ maximè in natura consistit.

4. Objicies tertio, Cyrillus Alexandrinus lib. 1. Thesauri, cap. 7. prope finem vocat generativam virtutem, & generativam essentiam Dei. Ergo vult naturam ut sic esse principium quo generationis.

5. Respondeo eum velle quòd essentia sit radicaliter, & remotè generativa, in quantum infinita perfectio ejus communicationem ad intra necessariò requirit, quæ tamen per aliquid formaliter aliud ab ipsa fiat, nempe per hypostases productrices, quas ipsa eminenter continet. Adde quòd essentia dici potest generativa hoc sensu quòd sit apta ad generationem conferre per communicationem sui, unde ipsa communicabilitas ejus dicitur aliquo modo generativa virtus.

6. Objicies quartò, si principium productivum ut sic, est proprietas relativa personæ producentis, debet illa proprietas continere personalitatem oppositam, aut formaliter, aut eminenter: si quidem

QUÆST. IX. *De Process. Divin.* 503.
quidquid producit aliquid in ratione principii, non instrumentalis, debet illud continere aut formaliter, aut eminenter. Atqui neutro modo persona produciens continet productam; non primo, quia paternitas non est filiatio. Non secundo, quia id quod continet aliud eminenter, continet illud nobiliori modo, quàm si contineret formaliter & dicit supereminentiam perfectionis in continente supra contentum.

7. Respondeo primò rectè agnosci in Deo alium continendi modum, qui est continere originaliter, ob æquipollentem vim relativam necessariæ, ac proinde semper actualis fecunditatis respectu contenti. Quare hic modus consistit in hoc quod aliquid sit principium simul & actualis productio termini à se formaliter, & differentialiter connotati, & continentia ipsa sita est in illa differentiali fecunditate relationis per quam talis emanet terminus. Et quia hic terminus non est ejusdem rationis cum illo principio, non continetur in eo formaliter; cumque sit aliquid non minùs perfectum, non continetur eminenter, posito quòd continere eminenter ita sumatur, ut importet excessum perfectionis in continente supra contentum. Quare restat ut contineatur originaliter, eo quòd ab eo ex natura rei procedat cum

dicta æqualitate, sine identitate quidem formali in ratione utriusque constitutiva, at cum summa, intra genus relationis, convenientia. Nam paternitas & filiatio, ubi sunt sine defectu, qui est in creatis, optimam conjunctionem, seu communicationem constituunt, eademque est ratio de spiratione activa, & passiva. Quare negari potest universalissimè valere illud principium, quidquid producit aliquid, continet illud aut formaliter aut eminenter. Erit autem verum, si dicatur quidquid producit aliud, &c. Sed hîc locum non habebit, quia tò, aliud, importat creatos effectus, in quibus illud principium sine exceptione valet pro causis non instrumentalibus sed principalibus.

8. Sed & admissio universalissimè in bono sensu illo principio, quidquid producit aliquid, continet illud aut formaliter aut eminenter, respondeo secundò ad continentiam eminentialem non requiri altiorem perfectionis gradum, quando id quod continetur est infinitum in se, sicut personalitas divina, quia nihil est in Deo quod non sit in sua propria perfectione infinitum, etiam formaliter, ita ut per nihil formaliter superabile sit: itaque defectus supereminentiæ in personalitate producente, non impediet ne ipsa contineat eminenter; id est excellentissimè,

QUÆST. IX. *De Process. Divin.* 505
lentissimè, sed non formaliter, personalitatem productam.

9. Confirmatur id, quia alioquin essentia non posset continere omnes personalitates eminenter, si continentia eminentialis diceret universaliter, etiamque in ente infinito, respectu eorum quæ sunt ad intra, excessum perfectionis supra rationem contentam. Neque enim essentia est aliquid excellentius ulla perfectione, aut ratione quæ sit in Deo, sed tantum aliquid prius in ordine ad nostros conceptus, cum summa identitate secundum rem, & ex parte objecti per se sumpti.

10. Hic adverte Patrem duobus modis continere eminenter personalitatem Filii, in jam dicto sensu. Primò ratione essentia, secundò ratione ipsius Paternitatis, quæ est formale principium illius non univocum. Et sic Pater & Filius continent spirationem passivam duobus modis: spiritus autem sanctus prout quidem dicit essentiam continet eminenter illas personalitates. Et continentia illa eminentialis convenit ei in sensu formali, sicut aliæ virtutes & attributa essentia. At spiratio passiva formaliter sumpta, cum non contineat essentiam per se, sed tantum identicè, hoc tantum modo illas personalitates continet, & sufficit, ac summè bonum est ei illas ita continere.

11. Obicies sextò, si proprietas personæ producentis est vis productiva alterius proprietatis personalis, aliqua perfectio simpliciter simplex non conveniet formaliter essentiæ divinæ, nempe illa ipsa vis productiva, quæ est perfectior de se quàm vis creativa, quæ tamen est perfectio simpliciter simplex.

12. Respondeo distinguendo illam propositionem, aliqua perfectio simpliciter simplex, prout perfectio simpliciter simplex dicitur melior ipsa quàm non ipsa, nego. Prout perfectio simpliciter simplex est quæ nullam imperfectionem involuit, & est æquè bona ac ea quæ cum ipsa impossibilis est in eodem supposito, subdistingo. Non conveniet essentiæ radicaliter, & etiam identicè, iterum nego: non conveniet formaliter, concedo: & dico in eo nihil esse absurdi, quia talis perfectio est notionalis, & constitutiva ac determinata unius personæ, quæ tantùm debet radicaliter & identicè contineri in essentia. Nec sequitur inde essentiam carere tali perfectione, aut eam illi deesse, quia ad hoc requireretur ut nullo modo ipsi conveniret. Convenit autem optimo modo quo potest convenire essentiæ ratio constitutiva personæ, nempe radicaliter quo ad sensum formalem, & identicè quo ad rem.

13. Instabis, sic suppositi talitas erit nobiliori modo activa quam essentia, quia erit nobilioris termini productiva, essentia verò ignobilioris, nempe entis creati, idque contingenter.

14. Respondeo distinguendo similiter, nobiliori modo qui non contineatur in essentia radicaliter, nego: qui in ea contineatur radicaliter, ac proinde excellentissimo modo, transeat: quòd ideo non concedo absolute, quia utraque ratio in Deo est æquè intrinsecè & infinite perfecta.

15. Objicies septimò; si proprietas personalis est vis generativa, nulla erit ratio cur non pertineat ad substantiam Patris. Hoc autem dici non potest, quia Concilium Lateranense capite Damnamus, definit non solum totam essentiam divinam communicari Filio, sed etiam totam essentiam & substantiam Patris. Paternitas autem non communicatur. Ergo dici non potest paternitatem pertinere ad substantiam Patris.

16. Respondeo negando sequelam, & dico rationem cur Paternitas non computetur in substantia Patris, esse, quia nomen substantiæ in Deo communiter determinatum est eodem modo, ac nomen essentiæ, ad significandum id quod, cum non accidentaliter conveniat Deo, est

commune tribus personis, & antèrius ad ipsas, & ipsarum principium radicale; idque secundum idem Concilium, quod capite citato, essentiam à substantia divina non distinguit, sed pro eodem sumit, dum ait : *Qualibet trium personarum est illa res videlicet substantia, essentia, seu Natura divina, quæ sola est universorum principium.* Ita Concilium; ex quo patet substantiam esse etiam radicem Paternitatis.

17. Obicies octavò, universaliter loquendo natura, & quæ ipsam sequuntur potentia, aut accidentia sunt principium agendi. At ubi est principium novo modo activum, est nova natura. Et Deus agit ad extra per naturam & attributa eam sequentia, ut sunt sapientia, omnipotentia, misericordia, Justitia &c.

18. Respondeo ubi rei productæ natura est producenda, valere majorem: non autem ubi suppositalitas formaliter est producenda: quod in Deo solo contingit, cum tantum in eo natura communicatur, ita ut in communicatione remaneat individualiter una: Quare in eo ut productionem sub ratione productionis nihil terminat nisi suppositalitas, ita nullum est illius formale principium, nisi suppositalitas prior, quæ sola distinguitur à termino producto. In creatis autem, ut

QUÆST. IX. *De Process. Divin.* 509

natura per se producitur, & suppositalitas tantum identicè, ita id quod producit est sola natura, aut virtutes ipsi additæ, supposititalitatis autem creatæ, cum ipsa per se non producat, sed tantum identicè, ut pote nihil addens entitati naturæ, nisi negationem conjunctionis cum perficiente, nullum est principium formale productivum, ne quidem in Deo.

19. Objicies nonò, illud est principium formale productionis, in quo productum assimilatur producenti. Hoc autem est natura. Ergo.

20. Respondeo distinguendo majorem, principium formale productionis pro-ut ipsa communicationem dicit, concedo: pro-ut in hac generatione productio ut sic à communicatione distinguitur, nego, ob rationes quibus contrarium probatum est.

21. Objicies decimò; productio Filii erit æquivoca, & sic illa non erit perfecta generatio, quæ est assimilatio substantialis.

22. Respondeo necesse esse ut sit æquivoca, in quantum strictè productiva est, cum pro-ut communicationem includit, sit plusquam univoca, ad quod sufficit naturæ similitudo specifica. Ratio cur sub ratione productionis, debeat esse æquivoca, est quia ubi natura in producente &

producto est eadem numero, non potest esse distinctio, nisi per productionem ut sic, attingatur ratio differendi, quæ illam faciat æquivocationem. Nego autem propterea non fore perfectam generationem, quia eadem productio quatenus communicativa est, facit perfectam assimilationem per naturæ communicatæ identitatem, idque multò meliùs quàm ubi natura est numero diversa à producente. Itaque productio naturæ strictè sumpta obest perfectioni generationis, tollendo rationem perfectissimæ assimilationis. Unde in generatione perfectissima principium assimilationis debet esse communicativum, non strictè productivum. Productivum autem in tali generatione debet attingere rationem non essentialem, sed quæ præcisè faciat pluralitatem, quæ necessaria est ad processionem.

23. Confirmatur, quia si homo per generationem attingeret ipsam individuationem filii, quæ in veriore philosophia petitur ex determinatione causæ primæ: non idcirco desineret generare, & generatio esset univoca in quantum ibidem esset productio naturæ similis, non obstante illa æquivocatione quæ esset in productione individuationis: multò igitur magis illa generatio erit quo-ad assimilationem, per quam constituitur in esse for-

QUÆST. IX. *De Process. Divin.* 511
mali generationis, univoca, in qua cum
productione proprietatis distinctivæ, seu
personalitatis, eadem numero natura, illi
personalitati communicatur.

SECTIO SEXTA.

Ex quorum cognitione Verbum procedat.

1. **A**Dverte in Deo priora secundum
rationem esse absoluta, quam re-
lativa, quia per se universaliter loquendo,
prius est esse quam aliquo modo se habere
ad aliud: & relationes ad intra priores esse
omnibus respectibus ad creaturas, etiam
possibiles, quia possibilia ad extra non
sunt possibilia nisi dependenter à Deo sub-
sistente, per actionem quæ sit à tribus in-
divisibiliter personis, quæ sunt unum
principium agendi ad extra. Hinc scientia
quam Deus habet de se, & de personali-
tatibus Trinitatis, est prior eadem scientia
pro-ut ad creaturas, etiam possibiles, ter-
minata: & prius etiam Deus dicit apud
se ea quæ sunt objecta interna illius scien-
tiæ, quam cognoscat quidquam exter-
num, etiam ut possibile, ob eandem ra-
tionem, quia omnia quæ sunt ad intra,
priora sunt de se omnibus quorum ipsa
possibilitas à Deo intra se constituto, &
subsistente, oritur.

2. Dices, potest concipi omnipotentia Dei, ac proinde & creaturæ ut possibiles ab ipsa, absque eo quod cognoscatur Deus ut subsistens in tribus personis. Ergo non omnia quæ sunt ad intra, priora sunt secundum rationem, omnibus extrinsecis.

3. Respondeo posse quidem concipi à nobis non sequentibus ordinem cognoscibilium, & abstrahentibus à modo quo subsistit causa eorum, quæ tota, cum subsistentia sua determinatè sumpta, ac proinde triplici, prior est illis, & radix possibilitatis eorum: unde & prius cognosci postulat. Nego autem secundum perfectam rationem, quæ nihil ignoret, prius esse conceptibilem omnipotentiam sumptam relativè ad creaturas possibiles, quàm personalitates, & totam Dei subsistentiam, quæ præcedit omnem ejus actionem ad extra: his positis.

4. Dico primò, Verbum procedit ex cognitione essentia divinæ, & perfectionum absolutarum, & trium personarum. Probatur, quia procedit ex cognitione comprehensiva omnium quæ pro instanti rationis in quo generatur, sunt cognoscibilia, & apta dici. Atqui essentia divina, & perfectiones absolutæ, & personalitates sunt ejusmodi. Ergo. Minor probatur, quia primò quidem essentia, & perfectio-

nes absolutæ sunt ante omnia cognoscibiles, & secundum nostram rationem priores personalitatibus; unde quo instanti Pater esse concipitur, jam suam cognoscibilitatem habent. Deinde personalitates omnes sunt quoque pro illo primæ processionis instanti cognoscibiles, quia cum Pater sit primæ processionis principium per viam intellectûs, cognoscit necessariò & seipsum communicantem, & communicationis terminum, seu Filium: Et quia tam ipse quàm Filius ad Spiritum sanctum, per id quod est illis differentiale, referuntur, Spiritum quoque sanctum simul vident, sine quo se ipsos videre non possunt. Unde hæc omnia, non obstante originis ordine, sunt simul cognitione: ac proinde hæc omnia Pater in generatione Filii dicit, & per horum dictionem generat.

5. Objicies, si Verbum ex cognitione sui procedit, erit, & non erit in illo priori originis quo Pater ipsum producit. Primò quidem erit, quia videbitur. Neque enim illud alia quàm intuitiva cognitio, ut potest de se perfectissima, locum habet. Non erit autem, quia ut aliquid accipiat esse, debet in instanti, saltem rationis antecedente actualitatem illius acceptionis, non esse. Unde pro illo instanti non est visibile.

6. Respondeo negando sequelam. Ad probationem, nego ut aliquid accipiat esse, debere in aliquo instanti rationis, non esse, si principium à quo accipit, non est prius natura sed tantum origine antecedit, hoc est, si principium illud non sit causa in suo esse absoluta ante productionem principiatum, quo modo sol secundum se est prior lumine quod semper necessario produxit; sed includat in suo esse differentiali ipsam principiationem, & per illam formaliter constituatur: quo modo ita se habebit, sicut illuminatio activè sumpta, seu sol ut illuminans, in sensu composito illuminationis, se habet ad lucem à se prodeuntem. Ibi enim non est prioritas existentiae, neque naturæ, sed tantum originis, cum qua stat simultas propria relativorum, se se mutuò connotantium. Porro Pater æternus est in suo esse formali generans, neque à Filio distinguitur per aliquod esse absolutum, sed tantum per generationem activè sumptam, ad quam non est in eo ulla potentialitas, cum ipsa generatio activa, adveniens secundum nostram rationem, essentiae, sit differentia ejus, seu Paternitas. Sic ergo Pater in priori originis consideratus Filium videt à se manantem, ut terminum suæ fecunditatis necessario actualis. Et hinc habetur, non esse de ratione visionis, ut suum

QUÆST. IX. *De Process. Divin.* 515
objectum supponat, sed ut vel supponat,
vel ut inferat: quod omnino præstat
visio Patris æterni pro-ut ipsa est dictio
sui termini productiva, seu potius suum
producens terminum.

7. Dico secundo, Verbum non procedit ex cognitione, possibilem. Probatur, quia possible non sunt cognoscibilia pro eo instanti rationis, quo Verbum procedit. Nam, ex dictis, nondum sunt pro illo instanti possible, cum possibilitas illorum supponat subsistentiam Dei, consistentem in Trinitate personarum, quæ sunt priores omni actione ad extra, & unum omnium ex nihilo educibilium principium. Nihil autem habet veritatem, & cognoscibilitatem sibi propriam, ante sui possibilitatem.

8. Nec dici potest esse cognoscibilia in omnipotentia Dei antecedente personalitates, quia, ut dictum est, omnipotentia relatio ad creaturas possibile est posterior relationibus ad intra, quæ constituunt personalitates. Quare in omnipotentia Dei distinguenda est vis ipsa, quæ est fundamentum talis relationis, & illa relatio. Vis ipsa est quid in se absolutum, & per se cognoscibile absolute, nondum cognitis terminis, ad quos non fundat respectum, nisi suppositis personalitatibus, quia vis illa non est activa nisi ut

virtus ipsarum. Concedo autem in omnipotentia relativè sumpta, cognoscibilia esse omnia, & singula possibilia sed non ita se habet omnipotentia nisi posterius ad personalitates, ac proinde ad processiones, per quas illæ ad intra producuntur.

9. Objicies, cognitio ex qua Verbum procedit, debet esse Dei comprehensiva. Non erit autem talis nisi sit cognitio saltem possibile omnium, ac necessariorum.

10. Respondeo, etiam nondum cognitis possibilibus, satis fore comprehensivam Dei primò intensivè, in quantum infinita claritate, & penetratione, infinitam objecti excellentiam adæquabit, quod solius Dei cognitioni respectu ipsius Dei convenit. Secundò extensivè, in quantum divinarum perfectionum absolutarum amplitudinem infinitam, omni multitudine, & quantitate, etsi sine numero, & quantitate majorem, ac proinde omnium, pro instanti processionis, cognoscibilem, in quibus sunt personæ, earumque proprietates, complectetur: non debere autem esse aliter comprehensivam Dei pro illo instanti, quia si esset formaliter pro illo instanti comprehensiva per extensionem ad possibilia, Verbum non esset prius possibilitate creaturarum, nec fons illius possibilitatis, qua posterius procederet.

11. Dico tertio, Verbum non procedit ex cognitione contingentium. Probatur à fortiori, quia si possibilia nondum sunt pro instanti processionis Verbi, possibilia, ac proinde nec cognoscibilia, multò minùs contingentia suæ futuritionis determinationem habent, & determinationis cognoscibilitatem pro illo instanti. Et hinc sequitur, respectus scientiæ & decretorum Dei ad contingentia, nondum in Deo esse pro illo instanti, in quo est Verbi processio, ac proinde nihil istorum esse objectum ex quo procedit. Confirmatur assertio, quia id quod non potuit non esse, non procedit ex aliquo quod potuit non esse. Atqui cognitio contingentium determinatè sumpta, pro-ut ad hoc & illud terminatur, potuit non esse, quia Deus potuit velle ut non essent ea quæ sunt. Ergo ex cognitione eorum Verbum non procedit. Et omnino in ejus processione nihil debet esse contingens, quia ipsa est generatio naturalis, & necessaria, debetque præcedere omnes actus liberos Dei qui vel sunt causæ contingentium, ut decreta de illis, vel sunt posteriores, ut scientia visionis. Et rationi repugnat Deum priùs videre Petrum, quàm Verbum suum, quod continget, si Verbum procedit ex visione Petri, omniumque contingentium, post quæ omnia ipsum

videbitur, & non ante, eritque visorum à Deo ultimum.

12. Nec responderi potest, Verbum secundum ea, quæ ipsi essentialia sunt, ut cognitio essentiæ Dei, & perfectionum absolutarum, & Paternitatis, & Spiritus sancti, esse prius cognitione contingentium. Secundum autem ea quæ sunt illi accidentalia, cujusmodi sunt cognitio eorum quæ potuerunt non esse, esse posterius. Nam in processione Verbi nihil est accidentale, sed tota est substantialis, & necessaria, & pro-ut infert emanationem personalitatis, est simplicissima, etiam secundum mentem nostram, productio, licet in quantum includit communicationem à Patre factam, includat multa secundum mentem nostram distinguibilia, cujusmodi est cognitio essentiæ, cognitio perfectionum absolutarum, cognitio Paternitatis, ipsiusque Filiationis, & Spirationis passivæ Spiritus sancti. Igitur in illa processione nihil est quod actus liberos Dei circa contingentia, eorumque determinationem supponat.

13. Objicitur primò, cognitio ex qua qua Verbum procedit, debet esse perfectissima, quæ esse possit. Non erit autem talis, nisi se extendat ad omne verum, etiam contingens, ut hoc modo sit adæquatè Dei comprehensiva. Ergo

QUÆST. IX. *De Process. Divin.* 519
ex tali cognitione Verbum procedit.

14. Respondeo esse perfectissimam, & comprehensivam modo supradicto, idque sufficere, & extensionem formalem ulteriorem repugnare prioritati qua Verbum necessariò, & naturaliter antecedit omnia Deo extrinseca. Unde est fons, & principium possibilitatis eorum.

15. Objicitur secundò, Pater communicat Filio cognitionem omnium quæ ipse novit: & hæc communicatio fit per dictionem, & per dictionem processio. Ergo Verbum procedit ex cognitione omnium quæ novit Pater, etiamque contingentium. Antecedentis prima pars constat ex Patribus, inter quos Divus Augustinus l. 15, de Trinitate. c. 12. sic ait: *Verbum de suo nihil habet, sed tantum de illa scientia ex qua nascitur.* Quare cum Verbo negari non possit scientia etiam contingentium, necesse est illam esse Verbo communicatam à Patre. Divus Anselmus in Monologio c. 32. *Uno, inquit, eodemque Verbo dicit seipsum, & quacunque fecit* summus scilicet ille Spiritus de quo sermo præcesserat. Idem probatur ex Concilio Florentino in litteris unionis, ubi expressè habetur *Patrem dedisse Filio omnia quæ habet præter esse Patrem.* Quare cum Pater habeat scientiam omnium intelligibilium, etiamque contingentium,

neceſſe eſt illam omnem eſſe Filio datam à Patre.

16. Reſpondeo, Patrem quidem communicare Filio cognitionem quam habet, etiam de contingentibus, ſed poſteriùs ad generationem Filii, quia poſſibilia tantùm poſteriùs ad perſonalitates ſunt poſſibilia, & cognoſcibilia, & apta dici. Quare dictio eſt generativa tantùm pro-ut eſt etiam communicativa notiæ quam habet Pater de ſe, & de ſua eſſentia, & prædicatis abſolutis, & de terminis ad quos differentialiter refertur, ſive de perſonis à ſe procedentibus. His enim cognit-
tis, producitur ipſa Filiationis perſonalitas, & ei hæc omnia ad ejus conſubſtantialitatem neceſſaria communicantur. Pro-ut autem dictio eſt de creaturarum ſive poſſibilitate neceſſaria, ſive exiſtentia contingente, non eſt amplius generativa, niſi identicè, quia jam genitus eſt Filius, ſed eſt adhuc formaliter perfectiva geniti, in quantum eſt bonum, & conveniens Filio, quod hæc etiam illi dicantur à Patre, nihil non communicante illi per viam intellectûs, præter ipſam, per quam ab eo diſtinguitur, paternitatem.

SECTIO SEPTIMA.

Cur processio Filii sit generatio, non autem Spiritus sancti.

1. **C**irca hoc communior, & receptissima est sententia, quæ asserit ideo verbi processionem esse generationem, quia cum generatio sit processio viventis à vivente in similitudinem naturæ ex vi processionis formaliter, processio verbi hoc totum habet in quantum est per intellectum, cujus est suum terminum assimilare rei cognitæ, cum è contra processio Spiritus sancti hoc ipsum non habeat in quantum est per voluntatem, quæ alium habet tendendi modum, per solam inclinationem & impulsum. Ita censet Divus Thomas q. 27. a. 4. & plerique Theologi.

2. Ad hanc sententiam probandam, adverte primò quæri hîc definitionem generationis per quam conceptum ipsis habeamus abstractum ab omnibus imperfectionibus creaturarum omnium generatio-num, & quæ tamen sufficiat ad distinguendam generationem ab omni processione quæ non est generatio. Ob hanc causam locum hîc non habet illa quam tradit Aristoteles 5. physic. c. 1. ubi sic ait. *Generatio est ex subjecto, sive termino non exi-*

stente in existentem, secundum contradictionem facta mutatio. Ipsa enim ratio mutationis, & transitus à non substantia ad substantiam, summus est defectus, à quo infinitè distare debet ea quæ in Deum cadit generatio. Et qui illi notioni adhæserunt hæretici, vel Verbi generationem negarunt, ut Sabelliani: vel de non existentia venisse Filium, & fuisse aliquando cum non existeret, impiè concluderunt, ut Arriani. Aliam ergo notionem, & rationem formalem generationis, à contingentia, & mutatione secretam, investigarunt sacri doctores: & optimè Sanctus Thomas q. 27. a. 2. generationem pro-ut ad omnia viventia se extendit, docet esse originem viventis à principio vivente conjuncto secundum rationem similitudinis in natura: in qua definitione, etsi illud, à principio conjuncto, imperfectionem dicit in creatis, in quibus hæc conjunctio fit per decisam partem substantiæ, quæ à genitore in genitum transit, tamen conjunctio ipsa principii, abstractè sumpta, imperfectionem illam non dicit, cum aliter esse possit, nempe in Deo, in quo conjunctio quæ est inter genitorem & genitum, est per ejusdem indivisibilis, & totius naturæ, sine ulla ipsius naturæ multiplicatione communicationem. Universalior autem erit, & nullam prorsus generationem propriè di-

Etiam excludet definitio, si dicatur, generatio est origo, seu processio substantiæ à substantia, per assimilationem naturæ, ita ut ipsa productio non materialiter tantum, & identicè, sed formaliter, & ex proprio suo conceptu habeat rationem assimilationis.

3. Notandum secundò locutionem esse actionem qua loquens assimilât sibi eum qui locutionem percipit, communicando illi notitiam earum rerum de quibus loquitur, adeo ut talis notitia, audienti communicata, sit formaliter id in quod locutio ex natura sua tendit: & si is ad quem locutio dirigitur, non audiat, careat effectu suo locutio, nec ipsa habeat suum totum esse formale completum, quod est communicatio notitiæ quæ habetur, seu assimilatio in notitia. Quare, cum secunda persona Trinitatis procedat per locutionem, quæ dirigitur ad ipsam, omnino illa procedit per viam assimilationis ex vi processions formaliter.

4. Notandum tertio, non esse de ratione locutionis, ut sit assimilatio tantum accidentaliter, & merè intentionaliter. Nam si detur ens cujus locutio sit per se physice substantialiter, & secum intellectum item substantialem, & essentiam talis entis, ut primam percipiendæ dictionis radicem importet; si præterea tale ens loquens

non supponat eum qui percipit, sed locutione ipsa illum producat, communicando illi notitiam, non specie tantum sed numero eandem, & cum notitia intellectum eundem, eandemque naturam, talis locutio, seu dictio erit ex sua propria ratione substantialiter assimilativa: & tam loquens quam locutionem percipiens, erunt, non intentionaliter tantum, sed substantialiter similes ex ipsa vi formali locutionis taliter fecundæ. Hoc autem totum accidit in productione verbi, unde ipsa ex sua propria ratione est, non merè intentionaliter, sed substantialiter assimilativa.

5. Notandum quartò, per communicationem amoris, eum qui amat, non assimilare sibi eum qui amatur, sed se illi unire, & adhærere & in eum se transfundere. Unde etsi detur amor qui sit substantialis, & voluntatem item substantialem, & essentiam sui principii importet, & sit fecundus communicando se & voluntatem, atque essentiam eandem termino suo, non propterea erit in tali productione assimilatio termini cum producente, seu amante, sed erit unio principii, seu amantis cum termino. Et quia sic procedit à Patre & Filio Spiritus sanctus, productio ejus non est substantialis assimilatio, non quod desit ratio substantialitatis in illa productione sed quia deest ratio assimilationis.

6. Confirmatur, quia si in ea esset ratio assimilationis, illa maximè sita esset in hoc quod qui procedit habeat naturam eandem cum illis à quibus procedit. At in hoc non est ratio assimilationis. Ergo minor probatur, quia si una numero forma substantialis, putà ignis, esset in duabus materiis, illæ non haberent similitudinem in illa forma, sed identitatem absolutam, & unitatem per indivisionem, atque indistinctionem in illa. Quia igitur Spiritus sanctus habet eandem numero naturam cum principio spirante, non habebit quo-ad hoc similitudinem in natura, sed summam identitatem, ac propriissimè sumptam unitatem. Et hinc patet non posse aliam quàm intentionalem similitudinem reperi, ubi non est habitæ formæ distinctio. Unde quia non potest esse in Deo naturæ distinctio, non potest esse similitudo in natura, nisi intentionalis.

7. Dices, contra illud jam allatum exemplum deficientis propter formæ identitatem absolutam similitudinis, duæ materiæ habentes unam numero formam, putà ignis, haberent convenientiam relativam in modo habendi, illam; ergo sic Spiritus sanctus comparatus cum principio spirante, etsi non habeat similitudinem in forma habita, quæ est tantum una numero, habebit similitudinem quo-ad ipsam habitio-

nem illius formæ , quia æquè est habens divinitatem, ac Pater & Filius.

8. Sed contrà est, quia non habet illam formam seu divinitatem eodem modo, sed valde differenti. Habet enim illam ut semper sibi communicatam per amorem: Filius autem, ut communicatam per dictionem: Pater autem, qui est principium principio carens, per suam innascibilitatem. Quare non est paritas, nec similitudo, sed valde diversa ratio in modo habendi divinitatem.

9. Atque ex his manet probata assertio, ex quibus in forma hoc fit argumentum. Actio illa sola, quæ ex sua propria ratione, productum substantialiter assimilât producenti, est generatio. Talis autem est productio Verbi, non autem Spiritus sancti. Ergo. Minor probatur, quia actio per quam communicatur termino per ipsam producto, notitia producentis, quæ notitia sit substantialis similitudo ejus, & cum tali notitia, etiam intellectus, ut proximum principium illius notitiæ, ipsaque essentia, ut radicale principium, est ex sua propria ratione assimilatio substantialis cum producente. Talis autem est productio Verbi, non verò Spiritus sancti, per quam quidem communicatur etiam essentia, sed non per viam talis assimilationis, & aliunde sine relatione identita-

QUÆST. IX. *De Process. Divin.* 527
tis relativæ, seu convenientiæ substantialis, ratione cujus in homine genito est similitudo substantialis cum genitore. Ergo productio Verbi est formaliter assimilatio substantialis, non autem productio Spiritus sancti.

10. Dices perfectius est participare eandem numero naturam cum producente, quam participare distinctam realiter, & specietantum eandem. Ergo perfectio illa qua productio Spiritus sancti præstat productioni hominis, non debet ei adimere rationem generationis.

11. Respondeo non hoc sensu adimere rationem generationis, quòd productio Spiritus sancti sit minùs perfecta, quàm ipsa generatio Verbi: sed hoc sensu quòd in ea desit aliquid ad rationem generationis requisitum, nempe ratio assimilationis ex ipsa vi, & ratione formali processionis.

SECTIO OCTAVA.

Solvuntur objectiones.

1. **O**bjicies primò, similitudo intentionalis ad rationem generationis impertinens est, & inutilis. Neque enim ea requiritur, ut constet in humanis: neque sufficit, ut patet in productione nostræ cognitionis.

2. Respondeo distinguendo antecedens, intentionalis merè accidentalis, cujusmodi est creata intentionalis, concedo: intentionalis, quæ tam est substantialis, quàm ista est physicè accidentalis, nego. Et dico primò similitudinem illam intentionalem, quæ reperitur in productione Verbi, esse ex propria sua ratione & differentia substantialem, & consubstantialem cum producente, quia est repræsentatio producentis per intellectiōem ejus propriam, quæ est de substantia ejus, communicatam cum intellectu ipso, & natura ejus ut principiis percipiendi eam. Unde si similitudo intentionalis constituatur ut genus contrahendum à divina & creata, differentia, qua divina differt à creata, erit ista repræsentationis substantialitas, seu repræsentatio ut constituta per illam communicationem planè substantialem. Dico præterea, posito quòd detur talis similitudo, non posse dici illam esse inutilem ad rationem generationis, ac filiationis cum enim filius sit terminus assimilationis substantialis intellectivus, hoc perfectissimè per illam similitudinem ac repræsentationem constituitur. Dico postremò tantùm abesse ut ratio intentionalitatis obstet rationi similitudinis substantialis ad generationem requisitæ, ut potius impossibile sit reperiri sine defectu, ac proinde in Deo, similitudinem substantialem

substantialem ad generationem requisitam sine intentionalitate similitudinis. Ratio est, quia extra illam intentionalitatem non est possibilis similitudo & repræsentatio nisi per identitatem specificam, qualis est inter naturas numero distinctas, cujusmodi sunt natura Petri & natura Pauli : Ubi autem est talis distinctio, & unitas tantum specifica, necessario est imperfectio, & finitudo naturarum. Itaque talis similitudo non potest habere locum in generante & genito Deo. Unde, si non sufficit intentionalis, quæ simul sit substantialis, etiam formaliter, pro-ut ad Deum contracta, & per prædictam communicationem constituta, erit impossibilis in Deo generatio, ac filiatio.

3. Objicies secundo, Ratio unius generis non potest contrahi per rationem formalem alterius generis. Atqui similitudo intentionalis est de genere accidentis, abstrahendo à physico aut metaphysico, cum in nobis sit accidens physicum, in Deo autem non sit tale accidens, sed aliquid conveniens illi præter essentiam ejus, quæ est esse à se. Ergo ipsa non potest contrahi per rationem formalem quæ sit de genere substantiæ, seu per ipsam rationem substantiæ.

4. Respondeo rationem accidentis metaphysici, etsi sit extra rationem sub-

stantiæ, sumptæ pro eo quod est primarius conceptus objectivus, seu essentia cujusque substantiæ, cujusmodi est in homine ratio animalitatis, & rationalitatis, non esse tamen extra rationem substantiæ, pro-ut substantia sumitur in definitione generationis, nempe pro eo omni quod ita est identificatum substantiæ, ut sine eo non possit esse omnino quo ad suam entitatem substantialem completa, quo modo risibilitas ita est extra essentiam hominis, ac proinde accidens metaphysicum ejus, ut sit aliquid substantiale, nempe ita identificatum substantiæ hominis, ut illa ipsa substantia sine tali identificato non possit esse completa. Sic autem similitudo intentionalis, quæ de se abstrahit ab accidente physico & metaphysico, est substantialis in Deo, & ipsa substantialitas eam in illo contrahit, distinguitque ab accidentalitate physica similitudinis intentionalis quæ nostris conceptibus inest. Quare contractio illa non fit per aliquid quod non sub ratione generica similitudinis intentionalis contineatur.

5. Objicies tertio similitudo intentionalis est tantum æquivocè similitudo. Ergo ipsa ad generationem ac filiationem non sufficit. Antecedens probatur, quia ad similitudinem propriè sumptam requiritur unitas naturæ quam non dicit similitudo intentionalis.

6. Respondeo negando antecedens, quia illud propriissimè habet similitudinem, & rationem imaginis quod exprimitur ad repræsentandum exemplar. Unde id quod adimit Verbo, quo aliquis se ipsum concipit, rationem entis geniti, non est defectus similitudinis, sed defectus substantialitatis, seu similitudinis in natura, quæ similitudo in Verbo Dívino cum Patre comparato invenitur.

SECTIO NONA.

Expenduntur duæ sententia contraria.

1. **P**lurimas circa propositam quæstionem sententias excogitarunt Theologi, haud aliter, inquit Vechenus, quàm si proposito ænigmatæ per-obscuro, suas quisque conjecturas undequaque conferret. Ex illis diversis opinionibus duas tantùm celebriores hîc expendam. Prima est Richardi à sancto Victore, libro 6. de Trinitate. Cap. 12. quem multi alii sequuntur, & pro ea citantur Alensis, Bonaventura, Major. Docent igitur illi productionem Verbi per hoc esse generationem quòd ei communicetur natura cum fœcunditate, & sic aliqui filium esse dicunt similem Patri in natura, eo quòd accipiat ab illo naturam fœcundam, sicut

ille fecundam habet. Alii verò volunt in hypostasi similem esse, in quantum non obstante differentia qua paternitas, & filiatio distinguuntur, habet filiatio hanc convenientiam cum paternitate, quod sit productiva, cum ipsa, alterius hypostasis, cui æquè naturam divinam communicant.

2. Refellitur hæc sententia utrovis modo accepta. Nam si primo modo intelligatur similitudinem in natura reperiri in filio extra rationem repræsentationis, quæ similitudo non sit in Spiritu sancto, ita ut quo-ad naturam habeat aliquid Filius, quod non habeat Spiritus sanctus; Respondeo id esse falsum, & Spiritum sanctum habere quo-ad naturam, totum quod habet Filius. Quod si natura non communicatur ulterius, respondeo id non oriri ex eo quòd habeat illam cum aliquo defectu, nempe virtutis communicativæ, sed quia omnis communicatio jam facta sit, quando ipse accipit à Patre & Filio naturam: quod non est habere illam cum defectu fecunditatis, cum ea, quantum est de se sit fecunda, sed est habere illam, positâ jam omni possibili fecunditate actuali. Et cum hoc se habeat per accidens ad ipsam naturam quam habet, nihil minus habet quo-ad naturam, quàm Filius, aut Pater. Sicut in humanis, quod Pater pro-

ducto Filio, non habeat amplius naturam, juxta naturæ leges, potentem producere Filium eundem, vel quòd Filius non habeat naturam productricem Patris sui, id prorsus nihil obest similitudini in natura, & omnino se habet per accidens ad illam.

3. Quòd si intelligatur fœcunditatem illam se tenere ex parte hypostasis, & sic Filium esse similem Patri in hypostasi, quæ est aliquid substantiale, & similitudinem illam consistere in hoc quòd filiatio sit fœcunda, sicut paternitas, jam describitur, ut non pertinens ad rationem formalem generationis divinæ, similitudo in ipsa natura, quæ similitudo conveniat Filio, & non Spiritui sancto. Atqui talis debet inveniri similitudo, quia generatio debet esse assimilatio in ipsa potissimum natura atque essentia, nempe in eo quòd per se primum est, & in ratione principii optimum, & ad quod proprietates personales se habeant sicut in creatis differentiæ individuantes, quæ materiales appellantur. Et nisi ita dicatur, ratio generationis, quo-ad aliquid, perfectior erit in creatis, quàm in Deo, quia generans creatum dabit genito similitudinem quo-ad optimum sui, generans autem in Divinis dabit similitudinem tantum quo-ad id quod materialiter se habet ad illud, quod in ipso primum est,

optimumque , secundum nostrum concipiendi modum, principium, nempe quo-ad essentiam ac naturam. Quæ continet formaliter omnem perfectionem simpliciter simplicem, & eminenter paternitatem: quod paternitati non convenit. Unde ipsa secundum nostrum concipiendi modum se habet sicut ea quæ ex genere suo non dicunt summam perfectionem rei.

4. Altera sententia est Suaris, aliorumque asserentium secundam Personam divinam ideo esse Filium, quod procedat per intellectionem ultimò constitutivam essentiae divinæ. Unde procedit perfectissimè in similitudinem naturæ per processionem formaliter ; quod non convenit Spiritui sancto procedenti per volitionem, quæ non constituit essentiam divinam, sed illam supponit, estque ejus attributum, sicut & ipsa Dei voluntas. Unde licet Spiritus sanctus accipiat realiter essentiam identificatam volitioni, non tamen eam formaliter accipit, ita ut ratio formalis accepta ab eo, sit ipsa ratio essentiae.

5. Refellitur hæc sententia, quia supponit falsum, nempe intellectionem esse rationem formalem ultimò constitutivam essentiae Dei metaphysicè sumptæ, quod quæstione secundâ sect. 1. & 2. inde maximè refutatum est, quod ante con-

ceptam intellectiōnem actualem habeatur conceptus objectivus Dei distinctivus ab omni alio ente, & prior omnibus aliis cum ipso convertibilibus, nempe quod sit Spiritus à se: quo posito, omnes aliæ perfectiones sequuntur, & in primis actualitas intellectiōnis bene inferitur, siquidem implicat Spiritum à se esse in potentia physica ad intellectiōnem, quo modo non esset ens summè perfectum in ratione Spiritūs.

Quod si dicas essentiam Dei debere consistere in perfectione maxima & maximè actuali, respondeo, præter dicta loco citato de perfectione maxima negativè, seu quâ nulla sit major perfectio, cum quo stat quod pares ex ea sequantur, itemque de prima potius, seu primò distinctiva, quàm de maximè actuali, ac denique de ea quæ sit optima & actualis in ratione principii, præter illa, inquam, respondeo, si essentia Dei dicatur includere intellectiōnem quia debet consistere in perfectione maxima & optima, inde sequi etiam volitionem quæ non est minùs perfecta, quàm intellectio, & similiter constituit actuale exercitium potentiæ volitivæ, fore de essentia Dei, quo modo Spiritus sanctus, qui per volitionem procedit, tam procedet in si-

militudinem naturæ, quàm Filius. Unde
Filius præ illo nihil habebit quò consti-
tuatur in ratione Filii.

F I N I S.









*image
not
available*